

Colophon

Ce livre a été écrit avec $\text{\LaTeX}$ (La(mport) $\text{\TeX}$), un logiciel gratuit de composition typographique créé par Leslie Lamport, qui utilise $\text{\TeX}$, une invention de Donald Ervin Knuth datant de 1982, comme moteur de composition.

La **police** utilisée est Charter, une police de caractères à empattements (serif) conçue par le renommé typographe Matthew Carter en 1987. Caractérisée par des formes claires et des contreformes ouvertes, elle est reconnue pour son excellente lisibilité, ce qui en fait un choix apprécié pour le corps de texte. Les **émoticônes** 😊 ont été aimablement fournies par Icons8 (<https://icons8.com/icons/>). La couverture du livre, réalisée par PIPPO, représente bla bla.

✉ jbollon94@gmail.com
✉ digourdi.tsarvensou@gmail.com

Pe noutra Pachón
Téatro, Patoué
Lenva, Émochón
rèise de digourdia Amitié

Pièse

L'OPETAILE MODERNO	1
FORUM VALDOTÈN	44
LA VATSE DE L'UNIVERSITOÙ	85
EUN DROLO DE DISTRIBUTEUR	125
MATTE... SEN TCHEUTTE MATTE	169
TANTA BETSII	215
DISCO FLAMA	250
N'EN PA LO TEN	318
LA RECONSTITUTION	
La vèille di gran dzô	367
TODZO PI DIGOURDÌ	377
SÈIDEPOU(VO)ÈR	433

Liste di *vidéo*

Lo cafi d'Ampaillan é la betsì de Ferré	74
La trifolla de Feleunna	74
Tchièn Frottapanse... 4.50 !	79
Catalogue Boeuf	115
Comèn te t'arbeuille ? !	183
Amour i Monte Emilius	190
N'a de poustà pe té	207
Moutra	329
Touéno Lo Gra vs Richard Foille	344
Canmimo vs Eumpourtàn	382
Vota Jordy di Digourdì	438
La chute di Prézidàn	453
Lista n° 1 - Pe lo bièn di péì	473
Lista n° 2 - Eunsemblo pe le Digourdì	475

Liste di mezeucque

A Message to You Rudy - The Specials	17
Di Congo pe travaillì - Le Digourdì	24

Il pranzo è servito - Augusto Martelli	35
Forum - Jénérique	63
Cheb Hasni - A la besse	99
Il Ritorno Del Ringo - Nazca	114
Waka Watse	118
Jamming - Bob Marley & The Wailers	120
UEFA Champions League anthem	165
<i>Uomini e Donne - Jénérique</i>	187
Unchained Melody - The Righteous Brothers	191
<i>SOS tata - Jénérique</i>	197
Love Theme - Barry White - Jénérique	205
Matte... sen tcheutte matte	212
Danse tirolèise	232
Let's Twist Again - Chubby Cheker	266
Piccola Katy - Pooh (Karaoke)	270
Non ho l'età - Gigliola Cinquetti	272
You Should Be Dancing - Bee Gees	275
Tuca Tuca - Raffaella Carrà	285
Say You, Say Me - Lionel Richie	288
Whigfield - Saturday Night	313
Dune buggy - Oliver Onions	315
Be My Lover - La Bouche	316
Samba do Brasil - Bellini	335
Gbl 386 - Stomp cherzi - Giampiero Boneschi	359
Samba Degli Assenteisti - Bruno Zambrini	364
Ruda tańczy jak szalona - Czadoman	424
Katchi - Ofenbach vs. Nick Waterhouse	426
Gone With the Wind Max Steiner	
Porta a Porta - Sigla	470
We Are The Champions - Queen	483
Walkin' & Strippin' Sonny Lester Orchestra	486

Liste di-z-éffé sonore

Borello	95
Chan di pou	144
Tchéqueun	197
Pendeula	204
Machina que postèdze	229
Téléfonne	246
Gramo son d'électrisitoù	350
Portellón	416
Tentatif aviemàn moteur	418
Aviemàn moteur	419
Oua frèide	421
Tchéqueun	473

Liste di foto

Saventa & Sandrino	341
Pouteun a Saventa	353
Cafi di mateun	357
Pouteun pe Carlo Trèisoù	359

Préfachón

L'aruye po tcheu le dzor, mimo se vo trailledde i Guetsè leungueusteucco, d'eunvian-é eun voyadzo pai lon é stimulàn a traé d'eun patouè. Patouè d'an quemeun-a mi, euncó de pi, patouè d'an comunitó, euntenduya comme esprèchòn vivanta de eungn eunsemblo de dzi que se recougnison a l'euntor d'eun projè, d'an lenva é d'eun téritouéo. Vouè, péquè le Digourdì son po mocque de braoz-ateur, son avàn to de dzoun-io Tsarvensolèn, que l'an lo plèizi de pourté su lo palque leur vécù é leur éritadzo, atò l'entouziàsme, la frècheur é la voya d'amuzé eun s'amuzèn que l'apartchè à leur éyadzo.

Bièn cheur tsicque jénérachòn eunterprette a sa modda l'éritadzo quemeun. É l'è fran a traé de heutta eunterprétachòn todzor nouila que lo pasó se fa prézèn - attuel é vivàn - é pouze le fondemèn pe l'avin-ì. Pouchà d'an curiosité é de eungn'estrordinéa voya de se beté eun djouà, le Digourdì l'an reléo tcheu le défi que lèi son ihó propouzó, eun parcourèn d'an magnî trasversalla de nombreu janre arteusteucco : de la réalizachòn de queurmétradzo eun patouè comme La reconstitution é Là-bas au front, i spettacolo final de la 63a édichòn di Concours Cerlogne, eun pasèn pe l'euvra téatralla L'homme au cœur valdôtain dédiéé a la memouï d'Émile Chanoux a l'ocajòn di 50o aniverséo de sa mor. Mi étò la produchè muzicalla, fète de reprèize de boucòn fameu é de compozichòn originelle, é la réalizachòn de nombreu clip vidéó. Le Digourdì prèd-

zon eun langadzo moderno, frique é ironeucco é lo partadzon su le preunsipal rézó sosial di dzor de voui : Instagramm, Facebook, YouTube, TikTok, mi ètò su de plattefourme muzicalle comme Spotify é Apple Music.

La Valoda d'Ouha l'areu po pousù espéré de-z-ambassadeur mèilloi di patouè ! Pe levré, dz'ouï souligné eungn otro particulé que fa oneur i Digourdì é que témouagne de la maturité d'an compagnì ioi que l'éyadzo mouyèn di-z-acteur pase po le 25 an : le Digourdì s'eungadzon ètò dedeun la formachòn di patouazàn de demàn. Dze penso a l'organizachòn d'ateillì de téatro pe le mèinoù é a la conse-canta créachòn, a l'euntérieur de la compagnì, di groupe di Pégnò Digourdì de Tsarvensoù que l'a débuté su lo palque di Splendor l'an 2023. Voualà donque eun dzen témouagnadzo de la vitalité de nouha queulteua é eun motif d'espouer pe son avin-ì.

La publicachòn de hi livro, l'è eungn otro boucòn que se djoueun a an produchòn dza remarcobla. La révijòn di teste l'a demandé an confrontachòn continuella avouï Jordy, é dze crèyo que l'espé-rianse siye ihéye eunrechissanta pe tcheu dou. Pe mè avàn to que, a traé de l'étsandzo, n'i pousù vivre di dedeun la jénèze di pyihe, eun m'obledzèn a me confronté avouï eun langadzo que évolue dézò l'eumpulchòn di tsandzemèn que tsicque jénérachòn que lo prèdze pourte avouï sè ; mi, dze crèyo, eunrechissanta ètò pe l'oteur, que dz'i vu crèihe di poueun de vuya de l'atenchòn a la lenva é de la métrize de la grafiya. Eun parcourèn le dji pyihe, lo lèiteur manquerè po d'aprésié l'évoluchòn arteusteucca de la compagnì. Di premî compozichòn que s'ensérèison dedeun la tradichòn popu-léa pi classeucca canque i teste pi métatéatral de la dérî produchòn. Eungn ouvradzo complè, an sorta d'antolojì multimédialla di premî dji-z-àn d'an compagnì nèisuya caze pe riye é que avouï lo ten s'et eumpouzéye comme eunna di réalité pi dinameucque, novatrise é complete di panoramà téatral valdotèn.

Eun reprègnèn le mo de l'oteur : eun jeste d'amour.

Un grand merci profond et sincère à Daniel Fusi-naz, pour avoir cru en cette œuvre, pour la patience et la passion qu'il a déployées dans la relecture de l'ensemble des textes, et pour l'honnêteté intellectuelle avec laquelle il m'a initié à la graphie BREL. Je remercie également Diego Lucianaz, pour ses conseils, ses suggestions et sa disponibilité sans faille. J'embrasse également Marlène Jorrioz, qui a peaufiné l'introduction de Dji Cou Digourdì, avec un français soigné, reflétant à la fois la passion de l'auteur et l'amour qu'elle porte pour Le Digourdì.



Introduction

Pourquoi Dji Cou Digourdì Le recueil Dji Cou Digourdì est né de la nécessité de rassembler toutes les pièces de théâtre interprétées par la compagnie Le Digourdì de Tsarvensoù à l'occasion de ses participation au Printemps Théâtral. Presque toujours, les versions finales des textes sont retouchées à la main lors des dernières répétitions, ce moment mystérieux où surgissent, pour une étrange raison, les répliques et les idées les plus drôles, pétillantes et piquantes, et donc les plus efficaces pour l'essor du spectacle. Pour cette raison, les textes théâtraux, archivés quelque part dans les ordinateurs des acteurs, sont restés figés sur une ancienne version du scénario, peu fidèle à la représentation réellement jouée sur scène.

Par ailleurs, les pièces des Digourdì ont souvent intégré au scénario des contenus multimédias : enregistrements sonores, bruitages, vidéos ou images. Ainsi, au-delà de la volonté de témoigner fidèlement des pièces interprétées sur la scène du Printemps Théâtral, Dji Cou Digourdì constitue également un archivage des contenus multimédias créés par la compagnie théâtrale *tsarvensolentse*.

Bref, Dji Cou Digourdì s'offre aux lecteurs comme un témoignage vivant et un inventaire précieux de l'art théâtral cultivé par les Digourdì.

Le contenu Dji Cou Digourdì rassemble les dix premières pièces interprétées par la compagnie Le Digourdì de Tsarvensoù à l'occa-

sion de ses participation au Printemps Théâtral entre le 2009 et le 2019¹. Chaque pièce constitue un chapitre et s'articule de la manière suivante :

- Couverture de la pièce avec titre, auteurs, lieu et date de la représentation ;
- Photographie de groupe accompagnée de la liste des acteurs et d'un QR Code pour visionner la vidéo intégrale de la pièce ;
- Entretien avec un acteur, incluant un souvenir personnel et quelques curiosités ou anecdotes liées à la pièce ;
- Description de la scénographie et des principaux éléments de décor utilisés sur scène ;
- Présentation des personnages, dans l'ordre d'apparition, avec le nom de l'acteur qui les incarne ;
- Texte de l'avant-spectacle, le cas échéant ;
- Texte intégral de la pièce ;
- Liste des collaborateurs ayant travaillé en coulisses.

L'habillage C'est avec plaisir que je commente également le soin apporté à l'habillage du contenu de *Dji Cou Digourdì*. J'ai personnellement veillé à ne pas me limiter à la simple rédaction d'un volume réunissant une série de pièces de théâtre classées par ordre chronologique. Étant donné que les *Digourdì*, depuis leur création, ont toujours cherché à proposer un théâtre novateur, dynamique et créatif, j'ai voulu que ce recueil reflète cette philosophie à travers une présentation originale, agréable à lire, visuellement attrayante et enrichie d'éléments multimédias.

Pour cela, j'ai choisi de concevoir *Dji Cou Digourdì* avec $\text{\LaTeX}$, un logiciel gratuit de composition typographique, reconnu pour la qualité exceptionnelle des documents qu'il permet de produire. La

1. Au total, cela fait 11 ans ; cependant, en 2017, Les *Digourdì* n'ont pas participé au Printemps Théâtral. La raison de cette absence est expliquée dans le chapitre dédié à l'année 2017.

grande flexibilité de $\text{\LaTeX}$ m'a permis d'adapter la mise en page classique d'un script théâtral - pensée à l'origine pour faciliter la lecture par un acteur - en une version plus fluide et lisible pour un lecteur intéressé par l'intrigue du scénario. En effet, la beauté d'une composition typographique ne réside pas uniquement dans le texte lui-même, mais aussi dans la manière dont ce texte est disposé : une mise en page réussie sait rester discrète, sobre et cohérente, sans attirer inutilement l'attention ni nuire à la lecture par des espacements incohérents ou des variations injustifiées de style ou de caractère². Par conséquent, je suis certain que le lecteur saura apprécier le soin de la composition typographique de *Dji Cou Digourdì* autant que la richesse de son contenu.

Pour apporter une touche de couleur au texte, je me suis inspiré du livre « Computer Science Distilled : Learn the Art of Solving Computational Problems »³, dans lequel les auteurs utilisent des émoticônes pour égayer la lecture de sujets liés à l'informatique. J'ai repris cette idée non seulement pour enrichir visuellement le texte et lui donner une touche d'originalité, mais aussi dans un but didactique : faciliter la compréhension de certains termes ou expressions en patois. Ainsi, le lecteur rencontrera régulièrement des émoticônes représentant un objet, une émotion ou un animal immédiatement après le mot correspondant : *martelette* 🛠️, *innamoròù* 😍, *gadeun* 🐷.

Enfin, compte tenu de la fonction d'archive de ce recueil, j'ai souhaité rendre facilement accessible au lecteur tout le matériel multimédia produit par les Digourdì au fil des pièces. Grâce à des QR Codes intégrés dans le texte, le lecteur peut accéder directement aux plateformes YouTube, Facebook, Instagram ou Sound-

2. Fazio, Luciano. *Introduzione all'arte della composizione tipografica con LaTeX*. Università degli Studi di Messina, n.d., <https://mat521.unime.it/~fazio/tesi/GuidaGuIT.pdf>

3. Waisman, Wladston Ferreira Filho. *Computer Science Distilled : Learn the Art of Solving Computational Problems*. Code Energy LLC, 2017.

Cloud pour découvrir les vidéos, les photos, les bruitages et les musiques⁴ réalisés par les Digourdi.

Méthode Maintenant que la raison d'être de *Dji Cou Digourdi*, son contenu et son habillage ont été clarifiés, il est temps d'en présenter brièvement la réalisation.

La première phase a consisté à rassembler les textes des pièces, sous format papier et/ou numérique, en privilégiant les versions les plus à jour. Ensuite, j'ai entrepris un long travail d'archivage et de visionnage minutieux de toutes les captations vidéo des représentations théâtrales de 2009 à 2019. Ce fut sans aucun doute la phase qui a demandé le plus de temps. En regardant et en écoutant chaque réplique, j'ai mis à jour tous les scripts, en y intégrant également les improvisations - par nature absentes des textes d'origine. De plus, j'ai structuré toutes les pièces en séquence de scènes, chacune dotée d'un titre éloquent.

Une fois terminée la transcription intégrale de toutes les pièces, une phase de révision linguistique a été menée en collaboration avec le Guichet linguistique francoprovençal de la Vallée d'Aoste. Tout le contenu de *Dji Cou Digourdi* a été corrigé sur le plan orthographique et, du moins en partie, lexical.

En parallèle de ces deux grandes étapes, j'ai aussi collecté l'ensemble du matériel multimédia produit par *Le Digourdi*⁵ et je l'ai rendu disponible, lorsque ce n'était pas encore le cas, sur YouTube  pour les vidéos, et sur SoundCloud  pour les bruitages et les chansons.

4. Les bruitages et les musiques sont accessibles via la version en ligne du présent recueil. Version archivée au sein du dépôt GitHub (voir [Annexe - Version numérique](#)).

5. Malheureusement, une seule vidéo n'a pas été archivée car elle a été égarée on ne sait où. La vidéo représentait parodiquement la publicité pour l'eau de Santa Colomba « qui, si tu la bois, est une bombe ! » (voir pièce « *Eun drolo de distributeur* »).

De plus, pour chaque pièce, j'ai mené un entretien avec un ou plusieurs acteurs afin de recueillir ces souvenirs, anecdotes et émotions qui rendent chaque interprétation unique et irremplaçable. Ces échanges se sont voulus aussi spontané que possible, menés individuellement ou en petit groupe, autour d'un apéritif convivial qui a aidé l'acteur à partager toute son expérience personnelle avant, pendant ou après les représentations.

Je terminerai par quelques notes méthodologiques concernant la scénographie, les costumes, les avant-spectacles et la mention des collaborateurs. La description de la scénographie vise uniquement à relever les éléments les plus marquants du cadre dans lequel se déploie l'action. Elle s'accompagne d'une liste approximative de certains accessoires de scène utilisés par les personnages. Cette énumération ne se veut absolument pas une reproduction fidèle de la fiche technique détaillée.

Quant aux costumes, j'ai choisi de ne pas leur consacrer une section dédiée. En cas de tenues particulières, celles-ci sont indiquées en note ou dans la description des personnages, lorsque cela s'avérerait pertinent. J'ai également transcrit les avant-spectacles lorsque le script ou l'enregistrement vidéo était disponible⁶. Enfin, j'ai tenu à mentionner, à la fin de chaque pièce, les collaborateurs ayant travaillé en coulisses. Cependant, certains enregistrements de pièce ne comportaient pas les remerciements finaux, j'ai dû m'appuyer sur des photos et des témoignages pour tenter d'identifier les membres de l'équipe. Il est possible que certaines personnes n'aient pas été citées, et si tel est le cas, je l'assure : ce n'est nullement intentionnel !

Notes stylistiques À mesure que le travail avançait, selon la méthodologie exposée dans le paragraphe précédent, j'ai dû faire des

6. En 2014, Joëlle Bollon et Laurent Chuc ont chauffé le public avec un avant-spectacle dont, malheureusement, ni le texte ni aucune preuve vidéo n'ont été retrouvés.

choix stylistiques.

Tout d'abord, le patois étant une langue minoritaire, plusieurs mots n'existent pas ou se sont perdus avec le temps. Pour combler ce vide lexical, il est d'usage courant de recourir à des emprunts à la langue française. Toutefois, dans certains cas, j'ai suivi les conseils de Diego Lucianaz, ardent défenseur de Le Digourdì pour le rôle que la compagnie joue dans la diffusion du patois auprès des jeunes générations. Il m'a suggéré de privilégier, lorsque cela était possible, la création de néologismes plutôt que le simple emprunt au français. À titre d'exemple, pour traduire le mot italien « cancelletto (#) » (dièse en français), j'ai opté pour un néologisme original et adéquat au contexte théâtral : « petchoudaellenda ». Un mot inventé, certes, mais qui, dans le cadre d'une pièce, trouve toute sa légitimité - et qui sait, pourrait un jour entrer dans l'usage quotidien. Un autre exemple : pour « sedia a sdraio » (chaise longue en français) », j'ai proposé le néologisme « caèya di solèi ». Cependant, chaque fois que la création d'un néologisme n'était pas pertinente ou satisfaisante, j'ai emprunté le terme français correspondant, en l'écrivant en italique. En général, tous les mots provenant d'une autre langue (italien, français, anglais) ont été écrits en italique : *proscenium*, *scène*, *scénographie*.

Les noms propres, en revanche, ont conservé leur graphie d'origine sans italique : Ferrari, Champagne, Facebook, Orage, Pierre, Francesca... Dans ces cas, la première lettre majuscule suffit à signaler au lecteur qu'il s'agit d'un nom propre à lire tel quel, dans sa forme d'origine.

La ponctuation, l'emploi des majuscules, la graphie des nombres en toutes lettres ainsi que les autres conventions linguistiques suivent, en principe, les règles de la langue française.

Un autre aspect très important ayant nécessité une prise de position concerne les nombreuses variantes phonétiques du franco-provençal. Il est connu, du moins parmi ses locuteurs, que le patois varie fortement d'une commune à l'autre, ce qui en fait une

langue profondément hétérogène. Pour des raisons évidentes, la variante utilisée dans *Dji Cou Digourdì* est le patois de la Commune de Charvensod. Cependant, même au sein de cette seule aire linguistique, on y trouve de nombreuses variantes phonétiques : *éve/ive, me plé/me pli, féyo/fio, aprestoù/aprestó*. Face à cette très vaste richesse phonétique, j'ai cherché un compromis entre cohérence et valorisation des variantes qui, à mon modeste avis personnel, représentent une facette précieuse de l'identité de ses locuteurs et méritent d'être conservées. Par conséquent, dans une même pièce de théâtre, le lecteur trouvera le même mot écrit de manière différente. J'ai toutefois veillé à ne pas faire coexister deux variantes en même temps dans une même phrase (*èitsa/èita, counte/conte*).

Par principe, les variantes phonétiques influencées par la langue italienne n'ont pas été retenues, afin de privilégier, chaque fois que possible, l'origine française du terme.

Dernier point, mais non des moindres : la graphie à adopter pour écrire le patois de Charvensod. Jusqu'à présent, j'ai toujours écrit le patois de manière approximative, m'inspirant des règles phonétiques de la langue française et consultant des collègues plus expérimentés. Néanmoins, pour pouvoir publier *Dji Cou Digourdì*, il me fallait faire appel à quelqu'un en mesure de corriger quelque 450 pages de script. La seule institution en Vallée d'Aoste offrant ce type de révision gratuitement était le Guichet linguistique francoprovençal de la Vallée d'Aoste, qui applique la graphie définie par le BREL⁷. Par conséquent, l'intégralité du texte de *Dji Cou Digourdì*, a été relue et corrigée selon ces règles. Cette graphie repose sur une logique simple : écrire chaque mot tel qu'il est prononcé, chaque lettre étant porteuse d'un son précis, permettant au lecteur de reconstruire fidèlement la prononciation.

Je n'entrerai pas ici dans le détail des avantages ou limites de cette convention graphique, car il s'agit d'un sujet qui exigerait des connaissances et des compétences bien au-delà des miennes. L'ob-

7. Bureau Régional Ethnologie et Linguistique.

jectif de ce paragraphe est uniquement de justifier le choix stylistique qui a été fait. Un choix dicté par une raison pratique, à savoir la possibilité de faire réviser l'ensemble d'un corpus de 450 pages dans une graphie cohérente et reconnue.

Un don Dji Cou Digourdì n'est pas seulement un travail de mémoire. C'est un geste de reconnaissance envers une communauté, un don offert à Le Digourdì, à son histoire, à ceux qui l'ont fait vivre, à ceux qui en ont ri, applaudi, parfois même pleuré. C'est aussi, profondément, un acte d'amour, car ce recueil m'a demandé une quantité de temps incalculable — et le temps donné c'est la forme la plus pure d'amour.

Il ne me reste plus qu'à vous souhaiter une...

bonne lecture !

#todzorpigourdì

Sommaire

2009 **L'opetaille moderno** - La modernitoù l'arè-ti poutro de bénéfise pe le-z-opetaille? Mi sourtoù : éziston-ti le maladdo reutso é le maladdo pouo? Lo séjour de Casimir é Geromine deun l'opetaille de Veulla no-z-èidzerè a repoundre a seutte dimande.

2010 **Forum valdotèn** - Deun lo *studio* Mediaset de Forum, Rita de l'Eillize no poutre deun eun vrèi tribunal, avouè lo renomou dzeudzo Senliquer. Dou case : Tobie countre la fenna Bertina é Tchièn Frottapanse countre le carabegni Tic é Tac.

2011 **La vatse de l'universitoù** - Le vatse rendon pamì comme eun cou ; euncó Marietto é lo bitchouli Sahlam san pamì iaou bouéchi la tita. Mi lo laouréou Simon, avouè le-z-amì vétériné, sa comme modernizé lo baou de pappà Tchièn.

2012 **Eun drolo de distributeur** - La Quemuea de Tsarvensoù l'a atsetou eun distributeur d'éve pe la populachón. Dèi l'inaougurachón, eunna matse de dzi, tsaqueun avouè son caraté, s'euncrouijon douàn seutta bouteucca de l'éve, iaou pe lo vallet de veulla l'è pa lèin-o fé reuspété lo reillemèn.

2013 **Matte... sen tcheutte matte** - Pe pasi lo ten, dou vétchot

avèitson de trasmechón a la télévijón iaou semble que sise poussiblo accapé totte le repounse i problème de la viya : comèn s'arbeillì, troué l'ommo parfé, terì si amoddo le bo-tcha é accapé eun traille.

2014 **Tanta betsii** - Eunna équipe de Tirolèis betchì èidze eunna fameuille euntredeutta a fé betsii. La mor de tanta Melanie, que gneun s'atègnè, reusque de fé saouté totte ! Grase a l'équipe tirolèise, totte le saouseuse son eumbouélaye ; mi can mimo la mii semble euncó plèin-a de tseue. . .

2015 **Disco Flama** - Passon le-z-àn mi la counta l'è todzor la mima : Pollein é Tsarvensouè alerèn jamì d'acor. Trèi jéné-rachón de Pollentchón é de Tsarvensolèn s'accapon todzor i Disco Flama pe fé fita, danchi é pe dimoutrì qui l'a la tita pi diya. Mi l'amour saré pi for de l'orgeuill que divije le doe Quemeue ?

2016 **N'en pa lo ten** - La flemma di-z-eumpléyà pebleucco countre le prateuque di penchon-ouè, le tsachaou countre le-z-ambientaliste ; euncó finque de végàn é de maladdo di *social*. Tcheut eunsemblo pe eunna bataille idéolojique deun le buró pebleucco iaou gneun l'a lo ten pe traillì, mi tcheutte l'an lo ten pe pédre de ten.

2017 **LA RECONSTITUTION | La vèille di gran dzô** - Aprì la Secounda Guéra mondiale, lo 27 janvieur 1946, 424 Tsarvensolèn é Tsarvensolentse dimandon a la Préfetteua de Veulla la reconstituchón de la Quemeua de Tsarvensouè. Lo 30 avrì 1946, la Quemeua l'è reconstituïte é lo 30 jouëun 1946 Aimé Borbey, Emerico Comé, Justin Donzel, Louis Lucianaz é César Savioz prègnon l'euntsardzo de organisé le premie-z-éléchón de Tsarvensouè reconstituïte : lo gran dzô. Le-z-émo-

chón viquiye lo lon de la vèille de si gran dzô pouèn maque le-z-imajin-ì.

2018 **Todzo pi digourdì** - Pagàn Paul vo conte la counta di straordinéo sucse d'eunna di pi fameuze Compagnì teatrale cougniye pe to lo moundo : Le Digourdì de Tsarvensou. Mi pe savèi la vrèya istouère di Digourdì, de sen que conte Pagàn fodriye coppé la mèitchà, vardé eun car é tsapoté euncó quetsouza !

2019 **Sèidepou(vo)èr** - La sèi de puer l'a fé tsire lo Gouvernemàn Jorrioz. Le Digourdì l'an pamì eun Prézidàn. Le-z-éléchón antisipaye pe voté lo nouo Prézidàn di Digourdì divijon totta la parotse de Tsarvensou eun doe fachón : le rouze, lista numéró 1, pe voté Marlène Jorrioz é le dzano, lista numéró 2, pe voté Jordy Bollon.

Rendez-vous lo 9 marse i téatro Splendor de Veulla pe cougnit eun directe lo *vainqueur* di-z-éléchón.

L'OPETAILE MODERNO

Pièse icrita pe Joël Albaney

Téatro Giacosa de Veulla, 15 mi 2009

Le Digourdì di 2009



Drette: Paola Lucianaz, Francesca Lucianaz, Joël Albaney, Jasmine Comé, Paolo Cima Sander, Giada Grivon, Fabrizio Pession, Pierre Savioz, Ilaria Linty.

Achouatoù: Valeria Brunod, Serena Giorgi, Joëlle Bollon, Simone Roveyaz, Laurent Chuc, Ester Bollon, Marco Ducly.

🧑 L'OPETAILE MODERNO 🧑



Lo souvenir de l'acteur

« Mon souvenir de l'Opetaille moderno l'è, san doute, la sensachón que sayò eun tren de vivre eun sondzo, eugn émochón euncrouayable. L'ie lo premì cou que noutra compagnì, djeusto nèisiya, pouyè si eun vrèi palque... é lo fé que si palque l'ie fran lo Tèatre Giacosa, *symbole* di téatro populéro valdotèn, l'ie eun fouà de jouà é responsabilitou. Dze nen n'i eun dzen souvenir pe la collaborachón que n'en i avouì lo Charaban, eun particulié avouì Vittorio Lupi, Mauro Rossi é Giovanni Neri. L'an fé-no découvrì comèn s'apreste a nivó professionnel eun spectaclle téatral, sourtoù pe sen que regarde la *scénographie* é le costume. Me rappelo avouì plèizì que Aldo Marrari l'ayè chouivi-no deun la produchón de totta la pièse.

Deun mon *cœur* l'Opetaille moderno l'a cheur eun caro eum-pourtàn, pequé l'a dimoutro-me que n'a ren de pi dzen que traillì avouì de dzi é de-z-amì que l'an la mima pachón de té. »

Joël Albaney

Queriauouzitou

- Pe pourté lo pi poussiblo de dzi i Tèatre Giacosa, vi que pe Le Digourdì l'ie lo débù si eun vrèi palque, caque dzor douàn lo spettaclo, son itou stampou eunna patélo de foillette publisitère é attatchà i pal de la lemie ou betou si lo vèyo di machin-e di Tsarvensolèn. Damadzo que lo lon de la nite l'a plouì détchise é le Tsarvensolèn son récha-se eun se divijèn eun dou partì : n'ayè qui pensè que sise foillette sayoon itou betou de la par de la Quemeua pe annonchì que l'ariàn gavou ià l'électrisitou ; é qui l'ie stra malechè pequé lo papì é l'entso l'ayoon eumpouertchè lo vèyo de la machina.
- La *scène* di maladdo *psychiatrique* l'è itaye eumprovizaye deun la dériye proua jénérale sensa que Ester diise ren a

gneun ! Pouade imaji la réachón é le riaye de totta la compagnì.

- Lo Tèatre Giacosa de Veulla l'a lo palque eunna mia dicllo ver lo pebleuque. Donque, tcheu le-z-objé avouì de raoue dèyon itre blocoù pe pa colaté. Malerezamente, deun eunna *scène* avouì bièn de trimadzo, le fren di raoue de la coutse de Geromine son digantsa-se. Bièn aloù que noutro Paolo Cima Sander l'è arrevou à vardé lo pèise de la coutse que l'ie eun tren de colaté ver lo pebleuque ! Queriau de savèi pe queunta *scène* capite ? Alade la tsertchè deun la *vidéo* de la pièse ¹.
- Pe la pièse l'« Opetaille moderno » le Digourdì l'an rejestrou leur premiye parodì d'eun *refrain* publisitère : « Di Congo pe travaillì ». La publisitó orijinelle l'è seutta :

👤 BOLLYWOOD TVC - RIO CASA MIA 👤



- Selon lo premì Prézidàn di Digourdì, Jerome Saccani lamè traillì derì le ridó pe pouèi veure le dzente feuille de la compagnì totte eun ganeussón !

1. QR code a padze 3.

Scénographie

- 2 coutse d'opetaille é 1 coutse a doe plase bièn comodda  ;
- 3 *tables de nuit* ;
- 2 armouére ;
- 2 caèye nèye eun plasteucca ;
- 1 pourtamanti ;
- 1 poltronna bièn comodda ;
- 1 fondal téatral avouì eunna pourta i mentèn pe laquella le-z-acteur pouon entré é chotre ;
- 1 boursset pe le grou sou é 1 pe le sou tri ;
- 1 campaneun  ;
- 3 botèille de Gatorade ;
- 1 flute ;
- 2 cabaré d'ardzèn : 1 pe pourti eun *cracker* é l'atro pe la cachoula de la *bourguignonne* ;
- 1 per de motchaou ;
- 2 platte de papi, de fortsette é de caouti  ;
- 2 cachoule : eunna grousa pe fé la puré é l'atra pi péгна pe fé bolequé l'ouillo de la *bourguignonne* ;
- 1 vèyo é 1 paille.

 PERSONADZO

PIERRE	Premi présentateur, eunterprétoù pe PIERRE SAVIOZ.
LAURENT	Secón présentateur, eunterprétoù pe LAURENT CHUC.
GEROMINE	Eunna viille madama 🧖‍♀️ recovéraye a l'opetaille, eunterprétaye pe JOËLLE BOLLON.
CASIMIR	Vétchot 🤪 campagnar recoveroù a l'opetaille, eunterprétoù pe JOËL ALBANEY.
ARISTOCRATE	Mesieu bièn eumpourtàn, noble é aristocrate, recoveroù a l'opetaille, eunterprétoù pe MARCO DUCLY.
GASTON	L'eunfermì personnel de l'Aristocrate, eunterprétoù pe LAURENT CHUC.
PRIYE	Lo priye de l'opetaille 🙏, eunterprétoù pe PIERRE SAVIOZ.
FENNE DI POULISIE	Femalle arbeillaye comme le méccanisièn de la <i>Ferrari</i> , eunterprétaye pe JASMINE COMÉ, GIADA GRIVON é SERENA GIORGI. Giada é Jasmine eunterprèton euncó le-z-eunfermiye de la <i>psychiatrie</i> .
STARTER	Cape di fenne di poulisie, eunterprétoù pe SIMONE ROVEYAZ.
EUNFERMIYE	Eunfermiye de l'opetaille avouì eun caratéo d'eun maréchal, eunterprétaye pe FRANCESCA LUCIANAZ.

JOSETTE	La feuille de Geromine, eunterprétaye pe ILARIA LINTY.
MEDESEUN MITCHO	Lo <i>Doctor House</i> de l'opetaille, eunterprétoù pe PAOLO CIMA SANDER.
FERNANDA	Lo Chef de l'opetaille, eunterprétaye pe ESTER BOLLON. Ester ferè euncó lo maladdo <i>psychia-</i> <i>trique</i> .
TSAMBRI	Tsambri personnel de l'Aristocrate, eunterpré- toù pe PIERRE SAVIOZ.

🤪 AVANSPETTACLE 🤪

Se senton de vouése que veugnon de dérì la tèila.

PIERRE Laurent entra té, mé n'i pouiye.

LAURENT Pouiye? Feulla!

PIERRE (Ajitoù 🤪) Soplé va té!

LAURENT T'i tan grou é t'a pouiye de cattro personne que son viin-e no vére?!

PIERRE Adón fièn an бага? Baillèn dou creppe a la moura!

Le dou fan eunna man a la moura : « tchisse, cattro, totta man, satte... ».

LAURENT Ah! Pierre, deusteun! Feulla!

PIERRE (Eun prégnèn coadzo) Adón vou mé!

Lemiye 💡 desù lo proscenium. Pierre chor de dérì la tèila.

PIERRE Bonsoir a tcheutte!

Entre euncó Laurent é se plache a drèite de Pierre.

PIERRE (A Laurent) Mondjemé véo de dzi oueu lo nite! N'ayoù pa la fèi tan pai!

LAURENT (Eun avèitsèn lo pebleucco) N'ayoù pa la fèi tan pouèi!

PIERRE A mé l'ayón deu-me que dèi seu desù lo palque te vèyave ren de sen que capitae dézó lo palque! (Ajitoù) Mi me semble pa! Se vèi totte!

LAURENT Eh ouè! Mi se t'avèitse amoddo trèi car de la sala son pa de Tsarvensoù!

PIERRE T'a rèizón! Can mimo... a Fin-is l'an pi euncó de dzente feuille! Èita salle do lé eun premì feulla!

Laurent seuble i feuille.

PIERRE Mi va savèi péqué n'a pi de dzi de Fin-is oueu !

LAURENT Pierre ! Avouï tcheu le tracasse que le Tsarvensoulèn l'an i dzor de oueu, fegueua-té se l'an lo ten de vin-ì sé pe avèitchi no !

PIERRE T'a rèizón ! Son tcheu pi greundzo... pe deue... té pensa que eun cou t'ayè praou te réchi a satte é demì pe alé eun Veulla a ouett'aoue. Ara, avouï seutta dzenta arionda que l'an fé-no ba i Pont-Suaz te fa te réchi a chouï é demì ! Péqué eun cou que t'i ba, te fa bailli la présédanse i Gressaèn ; aprì pi de 50 an que n'en i no si drouette ! É comme se bastise pa, can te feullon devàn l'an euncó eun grou souri a 32 di 😊.

LAURENT T'a rèizón ! Aprì te fa euncó chotre demì aoua devàn di travaille pe alì a l'icoula prende le botcha é alì i mitcho pe fé medji.

PIERRE Mi na ! Senque te me di ? Sitte l'è pa lo travaille di-z-ommo ! Son le fenne que dèyon pensé i megnadzo.

LAURENT (*Ironique*) Eh brao ! Eun cou l'iye pouèi ! Aya a Tsarvensou, dèi can l'an betou si doe formachón di femalle di fiolet, leur pi grou tracasse l'è si d'aprestì l'èima, bailli la biacca i fiolet é prenoti le campe réjonal pe la demendze.

PIERRE Ouè, ouè... si cou va fran tott'a balón !

LAURENT Te pou pa resté bièn avouï seutta viya ! T'i stressou ! Aprì fenèi que eun se beutte maladdo !

PIERRE Queutta pédre ! Te la sa la dériye ?

LAURENT Di-mé.

PIERRE Noutro Senteucco, Ennio Subet, dèi can l'a si qué que lo Ministre Brunetta l'è fé-se eunna loué si lo travaille, l'a vouli euncó llou fé la sin-a.

LAURENT N'ayò sentì de seutta loué : la Subettina. Espleucca vèi comèn fonchoun-e !

PIERRE Adón, te sa que Brunetta l'a desidó d'aoumenté l'oréo de la *mutua* ; dunque, noutro Senteucco l'a betoù eunna riilla pe tcheu le sitouayèn ! Dèi ara can eun l'è maladdo, l'è maladdo i 100% ! Te pou ghenca pami alì ba a la crotta pe prendre eunna boun-a botèille de veun ou alì de foua pe couilli le pomme 🍏.

LAURENT Ah ara n'i comprèi péqué l'è an senâ que vèyo pa mon vezeun di mitcho é pe tèra n'a totte le pomme pouriye.

PIERRE ... é fa fé attachón ! Péqué lèi son le vallet de veulla que pasoun, dzor é nite, mitcho pe mitcho pe verifi. Eugn effé, l'an pami lo ten de pasì i mentèn de la parotse pe bailli la multa i machine parquédjaye mal !

LAURENT ... é comme se n'isse panco praou, n'a euncó d'atro mé cher-z-amì, péqué eun cou que t'a apréstó sin-a, t'a baillà medjì i mèinoù é t'a lavó le-z-éze... te l'amerie pa t'itaoulé eun momàn desù lo chofà pe avèitchi lo Grande Fratello ?

PIERRE Ouè !

LAURENT Eh na ! Péqué totte le souaré, can si preste m'achouaté si lo chofà lo tseun comenche a djapi é molle pa tanque lo pourto pa féye eun tor deun lo péi !

PIERRE Mi senque te me di ? Itèn pa pe eunna grousa Veulla ! T'a praou bailli campa a la tsèin-a é lo tor se lo fé da solette !

LAURENT A Tsarvensoù ? ! Mi t'i matte ! Fenèi que lèi teurion desì avouì lo fezi !

PIERRE Me rappelao pami de seutta counta ! É t'a sentì que n'at euncó la finanse é le carabignì di bouque que son eun tren de cayì to pe l'er lo péi pe tsertchì seutte-z-arme ?

LAURENT N'ayó sentì de seutta counta é sayó tellemàn tracachà

que n'i falì euntéré deun lo courtì le dou pistolet a éve : le dou Super Liquidator di botcha !

PIERRE Acouta vèi seuilla.

Laurent s'aprotse.

PIERRE (*Eun moutrèn quetsouza dézó la djacca*) Te vèi lo pistolet a éve que n'i seuilla ? Me fa todzor lo pouté aprì... l'è pa denonchà.

LAURENT Oh pouff, que viya ! No n'en euncó baillà lo non Digourdi a noutra compagnì !

PIERRE Ouè que coadzo !

LAURENT Spèèn que le tréze que son séilla dérì (*moutre la tèila*) teugnon pi ate lo non di groupe !

PIERRE Can mimo douàn can sen chortì di tendón n'ayón tan pouiye di dzi... ara n'en finque prèi tro de coadzo.

LAURENT N'en euncó prao deu-nen ! Spèèn can mimo que la Que-meua é tcheutte le Tsarvensolèn contenisan a no baillì eunna man ; piatro sit an l'è lo premì é dérì an que fièn lo *Printemps Théâtral*.

PIERRE Ouè ! (*Eun avèitsèn la moutra* 🕒) Ara senque te nen di se présentisan la pièse ?

LAURENT (*Eun avèitsèn son pouse sensa moutra*²) Ouè l'è l'aoua de comenchì, mi devàn vourio fé eunna présizachón pe tcheu le Tsarvensolèn : tcheu sise manifeste que n'en betó ia pe la parotse, l'è pa pequé gavoön l'éve ou l'élétrisitó, mi l'è pe lo spétacle de seutta nite ! Tracachade-vó pa !

PIERRE Amoddo ! Mogà no sistémèn an miya pe la présentachón ?

Pierre é Laurent se cllouzon la djacca é drichon lo papillon 🦋.

2. Malerezamente Laurent l'iye oublià-se de betì la moutra, mi lo pebleucco l'a bièn riette pe seutta gaffe.

*Eun pi, Laurent se beutte si le poueunte di pià é Pierre se plèye
si le dzegnaou de fasón que sisan ate tcheu dou igale.*

PIERRE *Mesdames é Messieurs* a vo « L'opetaille moderno ». Pise
icrita pe Joël Albaney.

LAURENT Boun-a souaré a tcheut !

Pierre é Laurent chorton. Teuppe 🍷.

ACTE I

SE IVRE LO RIDÓ

Scène I – L'ARISTOCRATE É LE POUO MATASSE

Partèi la tsansón :

🔊 A MESSAGE TO YOU RUDY - THE SPECIALS 🔊

Eun scène n'a trèi coutse. Doe, salle iaou son itaoulou Casimir é Geromine, son bièn seumple é protso n'a maque doe caèye é doe tables de nuit; i contréo, la trèijima coutse (a gotse), salla de la persona eumpourtanta (l'aristocrate), l'è d'ottón, avouè eun queusseun de sèya é eun couvre-lit avouè le frandze. Acouti n'at eunna comodda poltronna é eunna table de nuit. Pe completi la scénographie, i fon di palque n'a dou-z-armouère eun feur, eun pourtamanti é eun grou fondal avouè eunna pourta i mentèn.

L'aristocrate l'è catchà dézó le queverte é l'è eun tren de drimi. Geromine l'et eun tren de fé lo tsaousón é lo vioù l'et eun tren de lie lo journal avouè le lenette ba desì lo na.

Se sen pamì la tsansón.

GEROMINE (A Casemir) L'è na senâ que si seuilla dedeun é si pa senque atègnon a me fé chotre.

CASIMIR T'atten pi euncó té comme tcheutte !

GEROMINE Si pi praou coudzia. Mi mé sensa mon courti é le dze-leunne 🐔 de mé si perdiya !

CASIMIR (Euntre lli) Eunna pi, eunna mouèn. . .

GEROMINE N'i pa comprèi. . . senque t'a deu ?

CASIMIR Ren, ren! Diavo maque que te pouave te le porté avouï té! Omouente n'ario magà pouï féye de nouo discour avouï caqueun. Le-z-aoue comenchon itre londze seuilla dedeun. . . é lo spettacolo l'et todzor lo mimo (*avouï lo dèi moutre* 🍷 *Geromine*) é ta viya la si perquee : l'è chouï cou que te me la conte!

GEROMINE Te pense que a mé fiyisse plèizì restì seuilla avouï eun rabadàn comme tè? Surtoù veure, can te tsandzon le fise, eun moustre patanì pi é ouse, blan comme lo lasì é sensa pamì ren de euntéressàn pe le femalle.

CASIMIR Magà pe de femalle comme té! Se le femalle que travailon seuilla son jantile maque avouï mé n'aret eunna rèizón! É té te fa pa itre dzalaouza! É aprì resta maque tranquilla, itsaouda-té pa. . . piatro te pren eugn atro *infarto*!

GEROMINE Mé ara resto adì bièn é si pa senque baillerio pe itre eun campagne.

CASIMIR Ouè fa beun diye que s'en eun trèi malado eun tsambra é l'atro (*moutre la personna eumpourtanta*) l'a panco t'an prédjà.

GEROMINE Ouè ren! S'en gneunca lo non. Se n'i comprèi amoddo dèi itre euna grousa tita.

CASIMIR Eh vouè, t'ayè panco comprèi-lo? Mi te avèitse pa lo TG3? Sitte l'é tcheu le momàn eun télévijón 📺. Eun dzor pe an bagga é eun dzor pe eugn'atra.

GEROMINE Na. Mé acouto maque la *Voix de la Vallée* desù la radió 📻.

CASIMIR Adón l'é l'aoura que te te modernizisse an miya!

GEROMINE Mé reusto bièn pai : de ouette a onze se si i mitcho *Radio Zeta* avouï Ciccetti é a maenda lo *Gazzettino*, avouï Cesarino!

Se rèche l'aristocrate que l'ie eun tren de drimì. Se derèidì é aprì pren lo campaneun 🛎 pe querì son valet.

ARISTOCRATE Gaston ! Gastoon !

Entre Gaston.

GASTON Bondzor mesieu ! Sade dza réchà ?

ARISTOCRATE Djaque ! Queun dzor l'é oueu ?

GASTON Oueu l'è devendro 15 Mi. L'è onj'aoure é sinque di ma-teun, lo ten l'è sèèn é eun Val d'Outa l'è pa capitoù ren d'eum-pourtàn.

ARISTOCRATE Amoddo, adón refèicha-mè djeusto le queverte.

GASTON To de chouite !

Gaston gnouye refèichì le queverte.

ARISTOCRATE Tro itrèite !

GASTON (*Eun refèichèn*) Va mioù pouai ?

ARISTOCRATE Tro lardze !

Gaston moun gouye euncó eun momàn.

GASTON Va bièn ara ?

ARISTOCRATE Ouè va bièn.

Lo vioù, que l'a vi la scène, l'a i fon de la coutse le queverte que lo toppon pa totte. Adón pe pa trebeli proue a se fé èidjì.

CASIMIR Gaston ! Squezade Gaston !

L'eunfeurmi fé semblàn de ren, adón lo vioù tourne lo criè eun vouaillèn.

CASIMIR Deh, Squezade !

GASTON Ouè.

CASIMIR Me refèichade la coutse i fon pe plèizì ?

GASTON Mi squersade pa mesieu, poui pa vegni tanque lé ! Apri qui reste seuilla a avèitchi lli ?

CASIMIR Que demanda foula que n'i fé. L'é vrèi n'ayoù pa pensoulèi.

Se viounde di couti de la viille é sopatte la tita.

Scène II – LE SEN-Z-OUILLO

Pe la pourta i fon di palque entre eun prée avou la Bible eun man.

PRIYE (*Eun fièn la croueu*) Bondzor a tcheutte.

CASIMIR Bondzor Monseur.

Lo prée s'aprotse a Gaston que l'ye eun tren de poulit le-z-onlle de l'aristocrate.

PRIYE Mesieu...

GASTON Ouè.

PRIYE Qui l'è lo pi vioù é pi maladdo seuilla ?

GASTON (*Eun moutrèn Casimir*) L'è si lé !

PRIYE Mersi.

Lo prie s'aprotse a la coutse de Casimir é dousemàn, avou bièn de pitié, lèi fé la croueu ✝ si lo fron.

CASIMIR (*Eun branquèn lo bri di prée*) É so ? ! Que fiade ? Mi squersade pa !

PRIYE (*Eun lèi prédzèn comme fuse eun pouo matasse*) Mesieu, comme la demando-me voutra fameuille si vin-ì vo salì pe lo dèri cou.

CASIMIR (*Eun se totsèn le-z-attribus*) Mi na na ! Que fiade ? Si pa preste a moueure mé !

GEROMINE Mi senque te te totse ? N'a pamì ren lé 😊 !

CASIMIR Ah ! souplì là !

PRIYE (Éton-ou 😲) Comèn ? ! Mi seutta l'è pa la tsambra numeró 17 ?

CASIMIR Na, na seutta l'è la tsambra niméro... (se veurie ver Geromine) niméro ?

GEROMINE (A basa vouése) 23.

CASIMIR Seutta l'è la 33 !

GEROMINE (Eun vouaillèn) 23 !

PRIYE Boundjeu de la France ! Squezade-mé tan ! Si fran trompou-me ! Adón me fa belle partì, piatro me scappe finque lo mor !

Baille la bénédichón a la tsambra é can l'è preste a chotre tourne eun derì ver Casimir.

PRIYE Mesieu, si pa se v'ouèide sentì que no fa refé lo tette de l'éillize. Se vouillade pouade baillì eunna man euncó vo.

CASIMIR Na mé n'i dza baillà praou i ten de mé.

PRIYE (Diplèizi) Ah. (Ver Geromine) Vo madama ?

GEROMINE Me deplì, mi mé se dérì n'i pa lo bourse. Pi que de botón n'i pa.

PRIYE Fé pa ren adón. Fé pa ren. Tracachade vo pa.

CASIMIR Acoutade na бага : (eun moutrèn la persona eumportanta) deumandade a llou que nen n'a d'avanse !

PRIYE Ah mersi bièn.

Lo préé va ver l'aristocrate.

PRIYE (A Gaston) Bondzor mesieu. Pouì-dzó lo réchì ?

GASTON Eh na, l'è eun tren de drimì. L'è mioù que lo rècho mé.

PRIYE Va bièn. Vito que n'i prisa.

Gaston to todzèn tsertse de réchì lo mesieu.

GASTON (*Eun totsèn la man a l'aristocrate*) Mesieu. Mesieu. . .

L'aristocrate se rèche pa.

PRIYE . . . squeeze. Mi n'i fran pris. Lèi penso mé.

GASTON Va bièn, comme vouillade.

Lo pri beutte eunna man si l'ipala de l'aristocrate.

PRIYE (*Eun braillèn*) Mesieu !

L'aristocrate se rèche épouvantó .

ARISTOCRATE Ah ! Eh ! Oh, senque ? !

PRIYE Bondzor.

ARISTOCRATE Salì !

PRIYE Mesieu l'an deu-me que v'ouèi de voye moustre de fé de bienfezanse pe l'éillize.

ARISTOCRATE Oué . . . (*Ver Gaston*) va prende lo boursset.

*Gaston pren lo boursset di mesieu é teurie foua bièn de sou 🖐️.
Lo mesieu lèi di de na avouè la tita ; adón Gaston nen teurie
foua eugn atro pi petchoù é lo mesieu tourne lèi diye de na.*

GASTON Monseur n'i pa de tri. Vou a vére pe lo boursset di pise.

Gaston tourne eun deri avouè eun per de sou tri eun man.

GASTON N'i acapó so !

Gaston baille i préè le dou tri que l'a prèi pe lo boursset.

PRIYE Oh mersi. (*Ironique*) V'ouite fran itoù jantilo.

GASTON Mersi a vo.

PRIYE Oueu lo nite fiyo eunna prière pe tcheu vo é tourno vo troué demàn mateun. Repouzade-vó. Orvouar a tcheutte.

Lo prée fé la marca de la croueu é chor.

Scène III – FERRARI 🏎️ POULISIE

Entron trèi femalle di poulisie : son arbeillaye avouè eun tone rodzo de la Ferrari. Eunna avouè l'icaoua 🏏, l'atra avouè de prodouè pe pouliti é la dériye avouè eun patrasse.

FENNA DI POULISIE Bondzor a tcheutte !

CASIMIR (*Eun fièn vère que l'è to contèn*) Bondzor ! Voualà l'è dza torna aoura di poulisie !

FENNA DI POULISIE I Bièn lévou ?

GEROMINE Mi ouè, mersi, é vo ?

FENNA DI POULISIE II To bièn, mersi madama.

GEROMINE V'ouite dza torna preste pe eunna nouva galoppaye ?

FENNA DI POULISIE II Eh no totse...

CASIMIR Ouè mi sen comèn l'an aprèi amoddo lo patoué seutte !

FENNA DI POULISIE III Sen itaye coudziye. Diyon que lo maladdo se te lèi prèdze sa lenva se queutte bièn pi alé.

CASIMIR Ouè, ouè fran pèi !

Entre lo cape avouè eun cronomètre ⌚ é eunna bandjèira a carón blan é ner (salla que emplèyon pe le compétichón di machine).

STARTER Sah, sah, adón v'ouite tcheu preste ? Beuttade-vó totte eun reugga, euncó té !

FENNA DI POULISIE I Mi vouè, resta tranquilo. Oueu si plèin-a d'énerji !

STARTER No fa beti mouèn de do meneutte, piatro no payon pami !
Perqué lo cou passou (avèitse eunna fenna di poulisie) l'amia de té l'an spédi-la ià perqué l'a ralento totte le-z-atre !

FENNA DI POULISIE II Ouè, fa beun diye que l'an beuttó pi de do meneutte !

FENNA DI POULISIE III Pensa que salla poura matassa perdave de ten a poulitì tcheu le cassette !

FENNA DI POULISIE I Bondàn ézajéro ! L'ayè panco comprèi comèn martse seuilla dedeun. Djeusto la mandì i mitcho !

STARTER Bon perdèn pa de ten, prest ? Trèi, dou, eun... Via !

Lo cape fé partì lo cronomètre é sopatte la bandjèira 🏴󠁧󠁢󠁥󠁮󠁧󠁿 pe l'er. Le femalle totte a galoppe pouliton lo pi vito poussiblo. Saouton d'eun couit à l'atro de la tsambra é, eun mimo ten, tsanton é danchon, avouè finque le dou vioù, la tsansón :

 **DI CONGO PE TRAVAILLÌ - LE DIGOURDÌ** 

Can la mezeucca fenèi, se plachon protso i leur cape.

STARTER Stop !

FENNA DI POULISIE II Si cou l'è fran bièn aloù.

STARTER Ouè, an meneutta é 36 seconde ! Eh, can v'ouite vo trèi l'è totte eugn atro travaillì !

FENNA DI POULISIE Iuhuh !

STARTER Ara vo báyade maque eun bon Gatorade pe eunna...

FENNA DI POULISIE III Vito que n'en sèi !

Lo cape distribuèi lo bèye eun terièn foua de l'abrosaque trèi botèille de Gatorade.

STARTER ... é lo Champagne 🍾 v'atèn pi defoua !

FENNA DI POULISIE Iuhuh !

Chorton tcheu catro.

GEROMINE Son tcheu mat seuilla dedeun !

CASIMIR Dériàn recoverì seutte dzi é pa no !

GEROMINE Crèyo beun !

Scène IV – L'AOUA DI VEZEUTTE

Entre l'eunfermiye.

EUNFEURMIYE (*Eurle avouè acsàn tédesque*) L'oréo di vezeutte comenche ara !

GASTON Sht ! Te vèi pa que lo Chef de mé drime !

EUNFEURMIYE (*Arroganta*) Me euntéresse pa, sitte l'è lo répar de mé é fiyo sen que n'i voya !

GASTON (*Eun moutrèn l'aristocrate*) Avouè llou séilla véyèn pi tanque can !

EUNFEURMIYE Acouta bièn pégno eunfermì de prouva : mé n'i 27 an de servicho é de seutta plasse l'a jamì tramou-me gneun ! A-te comprèi ?

GASTON Mah, lèi dzouyeriyo pa lo mitcho.

EUNFEURMIYE Can mimo torno repété : (*eun vouaillèn*) L'oréo di vezeutte comenche ara !

L'eunfermiye chor de scène.

GEROMINE Sen pamì tan dzoueun-o mi n'en prau de sentì eun cou pe comprendre senque no dion.

CASIMIR Ah se l'è comme totta la senâ vou cheur pa me lagnì avouè to si mondo que veun me trouvì.

GEROMINE Comprègno beun perqué t'a pa gneun. T'i gramo comme eun pet.

CASIMIR (*Eun desuèn la vouése de Geromine*) T'i gramo comme eun pet !

ARISTOCRATE (*Ver l'eunfermì*) Acoutta, n'i sèi.

GASTON Ouè, vo pourto eun vèyo d'éve ☹ ?

ARISTOCRATE Vèi té.

GASTON Vouillade salla di grouse boule ou salla di Seunteucco ?

ARISTOCRATE Salla di boule va bièn.

GASTON Ouè to de chouite, mesieu.

L'eunfermì reumplèi eunna flute d'éve é la soumón a l'aristocrate (djeusto eunna péгна gotta). Aprì, reprèn lo vèyo é lo beutte eun caro. Dimèn entre eunna dzenta feuille blounda, Josette, la feuille de Geromine.

JOSETTE Bondzor a tcheutte !

CASIMIR (*Eun se terièn si de la coutse pe vère mioù*) Bondzor !

GEROMINE Oh ! Avèitsa qui se vèi. Adón te sa qué que t'a na mamma ?

JOSETTE Mamma di pa pouèi. N'i pa i lo ten devàn é avouè tcheu le-z-eungadzemèn que n'i.

GEROMINE Ouè, ouè, bailla-mé eun poteun.

Se baillon eun poteun. Josette s'achouatte si la caèya protso de la coutse.

JOSETTE Can mimo to bièn ? Comèn se reuste seuilla ?

GEROMINE (*Avouè eun ton ironique*) Se reste bièn. L'è caze eun oberdze. Si poste seuilla ara l'a maque trèi-z-itèile ★ pequé la catrima l'an djeusto gavou-la. (*Avèitse Casimir ironiquemàn*) Aprì la compagnì l'è fran dzenta ! Fiyèn de salle riaye é de salle fite que avèitsa !

JOSETTE S'i fran contenta. Adón t'a fran fata de ren ? Mé n'i pensoù de pourti-te an bouite de biscouì.

GEROMINE Oh mersì Josette. (*Avèitse la conféchón*) Lo pri te pouave lo gavì !

JOSETTE Ah ouè n'i oublià ! Squeza-mé !

GEROMINE Pe 0.80 santime t'aré cheur atseutou-me de biscouï 
bièn bon !

JOSETTE Mamma n'ayè l'offre a la LIDL é pouèi n'i fé que spendre
an mia de pi pe atseti doze conféchón.

CASIMIR Seutta l'è cheur ta feuille !

GEROMINE Ita tchica quèi té ! Pa fata d'acouté noutre conte !

ARISTOCRATE (*Ver l'eunfermì*) Gaston, n'i fan : quetsouza a medjì.

GASTON Vo baillo eun cracker.

ARISTOCRATE Va bièn.

GASTON To de chouite, mesieu. Vouillade sise avouì la sa ou sensa
sa ?

ARISTOCRATE Avouì la sa.

*L'eunfermì, avouì eun cabaré d'ardzèn, lèi pourte eun cracker.
L'aristocrate lèi baille eunna mordiya é tourne lo pouzé desì lo
cabaré. L'eunfermì beutte tourna totte eun caro.
Entre lo medeseun.*

Scène v – MEDESEUN MITCHO

MED. MITCHO Bondzor a tcheutte !

GASTON Bondzor mesieu ! L'è arreuvouì Doctor House !

CASIMIR Qui ?

GASTON Medeseun Mitcho !

MED. MITCHO Adón comèn l'è, to bièn pe seuilla ?

GEROMINE Todzor bièn mesieu lo medeseun. Mé resto bièn euncó
oueu.

MED. MITCHO Vèyèn pi ara, madama. Adón, teuriade si la mandze
é baillade-mé lo bri.

Lo medeseun mezeue la préchón.

MED. MITCHO (*Eun s'apesissèn de la feuille 😊*) ... é seutta dzenta demouazella de iaou chort ?

GEROMINE L'è ma feuille.

MED. MITCHO Ah n'i comprèi...

Lo medeseun fenèi de prendre la préchón.

MED. MITCHO Voualà lèi sen caze madama ! Dou ou trèi dzor é vo mando i mitcho.

GEROMINE Ouè l'è devendro é vo èi dza deu-me seutta baga demarse !

MED. MITCHO Me dipli mi voutra préchón monte é bèiche tcheu le momàn ; é apri avouè an feuille pai penso que vo féyo pi resti euncó seuilla doe ou trèi senâ.

GEROMINE Ah ! Restade maque tranquillo que vo èi vi-la oueu é la vèyade cheur pamé a me trouvi !

CASIMIR Pa deutte... l'a euncó onze conféchón de biscouè a fi foua !

GEROMINE Resta tchica quèi té !

Lo medeseun fé lo tor de la coutse é euncrije le joueu de Josette, laquelle se trame pe lo quetè trailli.

MED. MITCHO (*A Geromine*) Mé aya l'amerio... teriade-vo si.

Geromine se beutte achouataye si la coutse avouè eunna mia de difficultó.

MED. MITCHO Amoddo, teriade si le bri, si lo cou, clouzade le joueu, sarade bièn la botse é ara sarade é clouzade le man pe trèi car d'aoua de ten...

Geromine fé totte sen que lèi di lo medeseun é, dimèn que ivre é cllou le man, lo medeseun nen profite pe fé lo fleungàn avouè Josette.

MED. MITCHO (A Josette, bièn malisieu 😊) Adón squezade, mi queun l'è voutro non ?

JOSETTE Si Josette, plèizi !

MED. MITCHO Oh Josette ! Mé si House ! Medeseun House, mi criàde-me maque Mitcho ; é diade-mé, an fenna dzenta comme vo senque fé ? Queun travaille fé ?

JOSETTE Si dirijanta eun Réjón.

GEROMINE (*Eunfastedjaye* 😞 *pe itre itaye abandonaye*) Va bièn pouèi medeseun ?

MED. MITCHO Ouè madama ! Trèi car d'aoua n'en deutte.

GEROMINE Mi comencho a itre lagnaye !

MED. MITCHO Alé, conteniade.

Geromine conteneuvve a clloure é ivri le man avouè le joueu cllouji. Lo medeseun Mitcho reprèn a martélé Josette.

MED. MITCHO (A Josette) Adón diavo, an dzenta feuille comme vo l'è mariaye ?

JOSETTE Na si *single*...

MED. MITCHO Ah v'ouite *single* ! Me deplì...

GEROMINE A mé na ! Adón va bièn pai medeseun ?

MED. MITCHO Ouè madama !

Lo medeseun tourne s'occupé de Geromine.

MED. MITCHO Adón madama, teriade foua le pià de la coutse é itade achouataye. Levade si le man é aprì pléyade l'itseun-a é portade le man tanque i fon di pià.

La poua Geromine se plèye si é ba eun per de cou avouè l'èidzo di medeseun que la cllou é l'ivre comme eun livro.

MED. MITCHO Ba é si, si é ba... tourna trèi car d'aoua pai.

GEROMINE Todzor avouè le joueu cllouzi ?

MED. MITCHO Ouè.

Lo medeseun tourne avouè Josette.

CASIMIR (*Eun desuèn Josette*) Si ! Ba. Si é ba ! Si, si, si !

To d'eun creppe, entre eun maladdo psychiatrique que, eun trambélèn, eurlé :« Tchouf, tchouf ! Tchouf, tchouf ! ». Aprè eun per de seconde doe eunfermiye entron i galoppe, fan eunna pouenteua i pasiàn ià de tita, l'eumbrancon é lo teurion foua de pèise. Dimèn medeseun House tranquilize Josette é Geromine.

MED. MITCHO (*Ver Casimir*) Ara pasèn a vo.

CASIMIR Ouè, prest !

Medeseun House s'aprotse a Casimir.

MED. MITCHO Lo bri mersì é si la mandze.

Lo medeseun mezeue la préchón, mi dimèn avéitse Josette é sensa s'apesèivre countenie a saré la poumpetta de la préchón que sare todzor pi lo bri di pouo Casimir.

CASIMIR (*Eun souffràn 😓*) Ahi, argh, ahi !

MED. MITCHO Ouè mi que préchón ata !

CASIMIR Que drolo ! La feuille que l'è seuilla protso l'è dza eun momàn que l'è arrevaye é penso fran que sise sen !

MED. MITCHO Souplé ! Son pa de bague pe voutro éyadzo !

CASIMIR Avèitsade que mé tanque ara le pastille bleuve n'i maque vi-le eun publisitoù !

MED. MITCHO Lèi manque euncó finque lo Viagra, pai te me st-choppe comme eun pallontcheun ! Sa, ara ivrade la botse . . .

Avouè eunna lemiye medeseun Mitcho avéitse dedeun la botse de Casimir, mi teurie vitto eun déri la tita.

MED. MITCHO Ouè mi que bon flo de crotta ! Senque vo baillon medjì seuilla dedeun lo mateun ? *Bagna cauda* é biscouè ?

Lo medeseun pren coadzo é avèitse tourna deun la botse de Casimir.

MED. MITCHO Diade ouè...

CASIMIR (*Avouè la botse iverta*) Ouè !

MED. MITCHO Diade na...

CASIMIR (*Avouè la botse iverta*) Na !

MED. MITCHO Ouè... Mogà oueu lo nite devàn que alì a drimì queuttade la dentchiye  dedeun la *conegrina* !

CASIMIR Va bièn, comme vouillade vo medeseun Mitcho.

MED. MITCHO Demàn mateun lèi baillade euncó eunna dzenta frotaye. Ara teriade-vo si.

Casimir, avouè an miya de difficultó, se beutte achouatoù si la coutse.

MED. MITCHO Teriade si la flanella...

CASIMIR Eh fiade vo mé arevo pa !

MED. MITCHO (*Eun terièn si la maille*) Oh que bon flo de servadzo ! Demàn mateun mogà frottade euncó dézò le bri ! Ara fiade de pégnò crep de tosse.

Casimir fé fran de son pezàn é plen de catarre. Lo medeseun dimèn que lo vezeutte avèitse to di lon la dzenta Josette, laquelle, de louèn, repón avouè de souri malisieu.

MED. MITCHO N'i deu pégnò !

Lo viou le fé pi pégnò.

MED. MITCHO Lèi sen caze. Selón mé, se vouillade eunna tosse tchica pi sètse vo consèillo de passé de trèi a dou paquet de *trinciato* pe dzor !

CASIMIR Voué, va bièn medeseun, comèn vouillade vo.

MED. MITCHO Aya le tsambe é aprì n'en fenì.

Lo medeseun fé lo tor de la coutse é se plache devàn Casimir. Avouì eun martelette  léi baille eun crep deur desì lo dze-gnaou, mi Casimir levve eun bri; lo medeseun lèi baillie eugn atro crep mi, comme douàn, Casimir levve lo bri. Dimèn Josette avouì la squiza de beté eun plase la coutse de la mamma se fé avèitchi lo qui di medeseun, que, distré, baille eun creppe de martelette si la tsamba de Casimir. Lo pouo Casimir réajèi eun terièn eun caouse i bale di medeseun que, souffràn, tsi pe tèra.

JOSETTE (*Eun galoppèn vitto ver lo medeseun*) Medeseun, medeseun, v'ouite fé-vo de mou?

MED. MITCHO Na, na, tot a poste! Tracachade-vó pa.

Josette tourne protso de Geromine.

CASIMIR (*I medeseun*) Eh squeezezade mé!

MED. MITCHO Ouè, ouè... eun jénéral le bague semblon normale. Ara passerio a noutro pi eumpourtàn cliàn!

Lo medeseun s'aprotse a l'eunfermè.

GASTON Eh drime, me dipli tan!

MED. MITCHO Gneun problème. Passo pi mé pi tar. Ah, djeusto eunna bagga : va-ti bièn la coutse que n'en beuttou-lèi protso de la fenitra? Sade, lamen fère contèn noutro pi eumportàn cliàn.

GASTON Ouè, fran amoddo! Aprì de seuilla vèi bièn lo Mont-Émilius que llu lame da mat.

MED. MITCHO Si fran contèn. Adón tourno pi tar. Tanque!

GASTON Ouè vo remersio. Tanque!

Med. Mitcho torne avouì Casimir.

MED. MITCHO (*Ver Casimir*) Bon ara me nen vou. Mogà tourno pi tar pe eun dzen *clistere* ! (*Avèitse la dzenta feuille*) Vo... v'ouèide eunna beurta grima, vo vèyo an mia blaye. Pe mé v'ouèide fata d'eunna pégnà vezeutta.

GEROMINE A mé semble pa : l'è todzor igalla.

JOSETTE Mamma mé vou vère. Vourriyo jamì que aprì me sento mal djeusto foua de l'opetaille.

GEROMINE Josette fé atenchón !

Josette baille dou pouteun 🙄 a la mamma é chor avouì lo medeseun.

GEROMINE (*Eugn avèitsèn lo medeseun*) Té pren-te varda !

MED. MITCHO Ouè. (*Eun chortèn avouì Josette*) Au revoir a tcheutte !

Josette é medeseun Mitcho chorton.

Scène VI – LO MOTCHAOU

Lo vioù pren eun motchaou desù sa table de nuit mi lèi tsi pe tèra. Pe lo prendre se dèi caze cayì pe tèra. L'eunfermì, que l'a vi amoddo la scène, baoudze pa eun dèi. Lo maladdo pren lo motchaou eun se lagnèn é a fose se souffle lo na.

L'aristocrate iternèi 🤔.

GASTON Mondje prégnade pa de frette ! Vo prègno to de chouite eun motchaou !

L'eunfermì galoppe pe prende eun dzen motchaou de tissù.

ARISTOCRATE Fiade vito !

GASTON Ouè, ara fiade eunna dzenta soufflaye...

L'eunfermì pourte lo motchaou i na de Gaston, lequel souffle détchis.

GASTON Oh... fran eunna dzenta soufflaye ! V'ouèide caze reumpli-lo !

GEROMINE Na, mi se pou pa itre fagnàn pouèi ?

CASIMIR Ouè, l'atro l'a caze fé-me moueure pe coillì lo motchaou é avèitsa avouè sit ommo senque l'a fé ?

Dimèn l'eunfermì arendze l'atchaou di queseun a Gaston.

Scène VII – L'AOUA DE MAÈNDA

Entre l'eunfermiye avouè eun per de platte, vèyo é fourtsette de papì.

EUNFEURMIYE L'oréo di vezeutte fenèi ara ! (Ver Casimir é Geromine) La maenda l'è caze presta. A vo lo plat é le fortsette de papì.

L'eunfermiye tappe le-z-éze si la coutse de Casimir é Geromine.

GEROMINE Mersi ! Todzor de papì ?

EUNFEURMIYE Vouillade lavé vo le-z-éze ㊦ ?

GEROMINE La mia l'ye eunna demanda... diavo pe riye... mondje !

CASIMIR Qui areuvve pe no baillì medjì ?

EUNFEURMIYE Areuvve ara Fernanda vo servì. (Ver l'eunfermì) Pe llu (avouè la tita moutre Gaston) areuvve euncó lo menù spécial. Au revoir !

L'eunfermiye chor.

CASIMIR (A Geromine) Mé medjì seuilla dedeun lamo ren !

GEROMINE A qui te lo di !

CASIMIR Me semble de itre a eunna de salle fite di Pro Loco.

GEROMINE Aprì fa totte pouzì desù le queverte pequé te te beurle le tsambe.

CASIMIR Vrèi euncó sen.

Entre Fernanda, lo Chef de l'ipetaille, eunna fenna grousa, avouè eun gran faoudè de la Pro Loco é eun grou souri que moutre eunna groussa di nèye. Avouè eun bri pourte eunna grousa cachoula é avouè l'atra man teun eunna potse que eumplèye pe fé an miya de ravadzo eun la bouéchèn countre la cachoula.

Jénérique de :

 IL PRANZO È SERVITO - AUGUSTO MARTELLI 

FERNANDA V'ouite pa euncó mor?

CASIMIR Ouélla Nanda, t'areuvve pountuella euncó oueu!

FERNANDA Comme todzor! T'a bièn fan oueu? Ou pa tan?

CASIMIR Ouè, dièn que eunna dzenta bistecca  lèi resterie.

GEROMINE Sondza maque! Vèyèn se eundovin-o : oueu n'a puré é straqueun! Na oubliavo, n'at euncó la *minestrina*.

FERNANDA Te sa que t'a belle eundovin-ou! Oueu n'a lo menù spécial : polenta é fricandó ou tartiffle i beuro avouè lo lapeun!

CASIMIR Mondje! Adón beutta belle eun platte de polenta!

Fernanda teurie foua de pégne pastille .

FERNANDA Voualà! Polenta é fricandò! Seutte son le noue pillule iofilizaye : te le tappe ba avouè eunna gotta d'éve é t'i plen pe to lo dzor.

CASIMIR Seutte pégne bague?

FERNANDA Ouè.

GEROMINE (A Casimir) Fé vèi veure!

Casimir alondze lo bri pe pasé la pillule a Fernanda, mi male-rezamente lèi tsi pe tèra. Fernanda lo reprodze eun lèi baillèn, avouè la potse, eun crep desì lo djise.

FERNANDA Mi Casimir! T'a fé tchire la Polenta é fricandó!

CASIMIR Ouè é té t'a to rempli-me de puré!

FERNANDA (*Eun perdèn la pachense*) Ouè, ouè. Adón v'ouèide desidoù senque vouillade medji? N'i pa de ten a pèdre!

CASIMIR Ouè, ouè. N'i désidoù: vou desù la puré é straqueun. Te sa n'i pa l'ive de viya pe dijirì to si medji.

FERNANDA Beutta eun sé lo plat adón.

Fernanda beutte ba eunna bella potchaye, eun icretèn tchica desì la coutse.

FERNANDA Euncó an mia?

CASIMIR Na, na, n'a prao!

Fernanda lèi beutte ba eugn'atra potchaye.

FERNANDA Euncó eunna potchà! N'i pa voya que aprì te va i mitcho é te di que Nanda te baille pa prao medji!

CASIMIR Na, na, seu n'a prao!

FERNANDA (*Eun s'aprotsèn a Geromine*) Geromine te vou euncó té?

GEROMINE Mi ouè. Perqué se meudzo pezàn aprì resto rechaye totta l'éproù.

Comme douàn, Fernanda tappe ba eunna potchaye eun icretèn la poua Geromine.

FERNANDA Euncó eunna potchà?

GEROMINE Na, na, n'a prao!

Sensa lèi baillì lo ten de fenì, Fernanda remplèi pe lo secón cou lo platte de Geromine.

FERNANDA (*Eun se poulitèn le mandze é le lenette*) Mersì madama! Mersì!

Fernanda s'apersèi d'avèi to pouertchà Geromine. Pe rezoudre, pren lo panamàn, lo lètse é lo frotte countre lo vezadzo é le lenette 60 de Geromine.

FERNANDA Mondjemé, squeeze n'i to pouertcha-vo !

GEROMINE (*Eun tsertsèn de pa se fé totchi*) Ouè, mersì madama, mersì !

FERNANDA Voualà é se v'ouèide euncó fan criade-mé. A vo lo baillo !

GEROMINE Na, na, pa fata.

FERNANDA Bon, ara vou di dentiste.

CASIMIR N'i la fèi que l'è pouza que te remande.

FERNANDA Eun per de-z-àn !

Fernanda chor.

GEROMINE L'è pi caze satte dzor que meudzo so é tcheu le dzor l'a caze eun gou nouo.

CASIMIR Todzor a te lamenté ! L'è beun bon so.

ARISTOCRATE (*Ver l'eunfermì*) Gaston !

GASTON Ouè mesieu.

ARISTOCRATE N'i peuca a l'itsin-a...

GASTON Ouè, adón teriade-vó si que vo fiyo eun dzen servicho.

L'aristocrate se teurie si é Gaston comenche a lèi froté l'isteun-a.

GASTON Seuilla ?

ARISTOCRATE Na, pi aoutre.

GASTON Seuilla ?

ARISTOCRATE Na, tchica pi ba.

GASTON Adón seuilla ?

ARISTOCRATE Ouè brao fran li !

GASTON Oh mesieu si bièn contèn de vo fé contèn !

ARISTOCRATE Ouè si contèn can te me fé contèn !

Entre eun tsambri tot élégàn é va ver l'aristocrate que i mimo ten se beutte comodo si la coutse. Gaston lèi refèiche le lenchoueu.

TSAMBRÌ Bondzor a tcheut ! Bienvenù a l'opetaille moderno. Senque vouillade medjì oueu ?

ARISTOCRATE Senque v'ouèide ?

TSAMBRÌ (*Pren lo menù é li*) Adón lo chef vo propoze, comme entrée :

- moules à la francillon ;
- soufflé au fromage de montagne ;
- mousse de saumon avec crevettes ;
- salade et vinaigrette.

pe premì n'en :

- bouillabaisse marseillaise ;
- soupe aux légumes.

pe secón :

- mérrou au bresse bleu ;
- encornets à la biscailienne ;
- ratatouille ;
- tartiflette.

Pe lo bèye vo propozo Cabernet di 1932 ou Merlot 1927.

Le dou vioù s'avèitson amoddo é areuvon pa a comprendre 🤔.

ARISTOCRATE Na, na... lèi sen pa. Mé vouillavo eunna bourguignonne !

TSAMBRÌ Eunna bourguignonne, n'a gneun problème. V'apresto totte !

Lo tsambrì chor.

ARISTOCRATE (A Gaston) Que servicho !

GEROMINE (Eun desuèn Casimir) Que bon-a la puré !

CASIMIR (Eun tsertsèn de semblì a Geromine) Que bon-a la puré !
Que nen sayoù mé ? !

GEROMINE Mi fi-te feun !

L'eunfeurmì dimèn apreste l'aristocrate eun lèi betèn la servietta i cou.

GEROMINE Can mimo dedeun sit ipetaille n'en pi dza vi-nen de bague drole !

CASIMIR Ah ouè, bondàn ! Va savèi senque l'arèn euncó da vère noutro dzouvin-o.

GEROMINE Que l'opetaille l'ise eun tsandzemèn me vatte, mi moderno tanque a si poueun na !

Entre lo tsambrì avouè eun cabaré 🍸👤.

TSAMBRÌ Mesieu la voutra bourguignonne ! Vouillade veure ?

L'aristocrate di de ouè avouè la tita. Lo tsambrì levve lo topèn é s'aprotse a la coutse, mi malerezamente s'euntsambotte é vouldze to l'ouillo bolequèn desù l'aristocrate. Le dou vioù, dimèn que l'aristocrate braille di mou, s'avèitson é se fan an dzenta riaye.

Scène VIII – SE TORNE I MICTHO

Vouése deri le ridó 🧐 : « Eun per de dzor aprì ».

🏠 SE IVRE LO RIDÓ 🏠

Eun scène n'at a la coutse l'aristocrate to fèichà di pià a la tita. Tellamente que l'è fèichà, son eunfermì lèi baille bèye avouè eunna paille. De l'atro couti, le dou vioù son eun pià eun tren de s'arbeillì é de presté le valize, vu que, finalemàn, chorton de l'opetaille. I mimo ten entre lo medeseun.

MED. MITCHO Bondzor a tcheutte !

GEROMINE Oh Bondzor !

CASIMIR Bondzor medeseun !

MED. MITCHO (A Geromine) Adón oueu l'è lo dzor ! Fiade voutre valize que vo mando i mitcho perquè si cou l'è totte eun plase. Saliade-mé la feuille !

GEROMINE (Pa tro convencua) Ouè, ouè.

Medeseun Mitcho baille lo foillette de l'opetaille a Casimir é Geromine.

MED. MITCHO (A Casimir; itèn bièn louèn pe pa sentre son flo) Itade-mé bièn euncó vo.

CASIMIR Ouè mersi, salì !

MED. MITCHO (Eun chortèn) Salì a tcheutte !

Lo medeseun Mitcho chor.

CASIMIR A forse poui torni eun cantin-a a bèye lo vèyo 🍷 é féye la belote !

GEROMINE Ouè, fé maque lo feun, pouèi demàn t'i tourna seuilla !

CASIMIR (*Eun desuèn la vouése de Geromine*) T'i torna seuilla ! Te tsandze pa té !

Casimir pren la valiza 🧳.

GEROMINE T'a prèi totte ?

CASIMIR Ouè, mé si prest. . .

GEROMINE La tita ?

CASIMIR Te tsandze jamì le batiye ?

GEROMINE (*Eun prégnèn sa valiza*) Na ! A propoù, alèn saliù noutro vezeun ?

CASIMIR Ouè ! Éita-ló ba lé !

Casimir é Geromine s'aproston a l'aristocrate.

GEROMINE (*A l'aristocrate*) Te queutto la bouite di biscouù, te le meudze. . . ouè, can t'areuve pi a le medjì !

Geromine baille le biscouù a l'eunfermì.

GASTON Mersì madama !

CASIMIR (*Eun se moquèn de l'aristocrate*) Adón ! T'areuve pa a fé plin plin ? (*Eun sopatèn la tita*) T'areuve pa ? Alé ! Fé plin plin !

GEROMINE (*Eun baillèn manforta a Casimir*) Ouè betèn si amoddo le queverte é. . . ah. . . atèn, mogà dèi se soufflé lo na !

Geromine teurie foua eun motchaou é lo pourte i na de l'aristocrate.

GEROMINE Souffla lo na, ouè souffla, souffla !

L'aristocrate tsertse de diye de na é de se difendre.

ARISTOCRATE Mmm, mmm, mmm !

GEROMINE Mi brao !

CASIMIR L'a gnenca eumpli-lo ! Aprì la *cannuccia* ! Te bèi deun la *cannuccia*... é... é t'a voya de me gratì l'itseun-a eunna miya ? Na ? (A Geromine) Gratta té !

GEROMINE (*Eun gratèn l'itseun-a de Casimir*) Ah ah ah, ouè, ouè grato mé, grato mé !

CASIMIR Bon, vo salièn ! Conserva-té di gamolle !

GEROMINE Ouè si cou l'è praou fèichà 🌀 ! Salì !

ARISTOCRATE (*Malechà* 🤨) Mmm, mmm, mmm !

GASTON Salì !

Casimir é Geromine chorton.

🇪🇺 TSI LA TÈILA 🇪🇺

Deri le ridó

Collaborateur

Flavio Albaney
Paola Lucianaz
Fabrizio Pession

Costumiste

Roberta Charrere
Ornella Grivon

Souffleur

Valeria Brunod

Tramamoublo

Jean-Pierre Albaney
Jerome Saccani

FORUM VALDOTÈN

Pièse icrita pe Le Digourdi

Téatro Giacosa de Veulla, 7 mi 2010

Le Digourdì di 2010



Drette: *Francesca Lucianaz, Marco Ducly, Ilaria Linty, Paolo Cima Sander, Simone Roveyaz, Joël Albaney, Laurent Chuc.*

Achouatou: *Joëlle Bollon, Giada Grivon, Pierre Savioz, Jasmine Comé.*

FORUM VALDOTÈN



Lo souvenir de l'acteur

« Pe mé Forum Valdotèn l'è itaye la pièse pi dzenta de totte. Lo 2010 l'è itoù l'an di premi cou : *vidéo* pe eunna pièse, imitachón d'eun personadzo fameu (dzeudzo Santi Licheri), parodi d'eun programme télévizif. L'avanspettacle l'ayè tsaoudó lo pebleucco, lo ritme de la résitachón martsè é dèrì le ridó totte l'è aloù amoddo. Tsaqueun de sise petchoù bocón l'a fonchoun-où pe son contcho é betoù eunsemblo l'an créó la pièse pi dzenta di Digourdì. »

Francesca Lucianaz

Queriauouzitòu

- Lo vrèi dzeudzo Santi Licheri, que Joël Albaney imite, l'è mor eun mèis douàn de la présentachón de Forum Valdotèn (4 avrì 2010). Donque, sensa lo volèi, la pièse l'è itaye euncó eun ommaje a la mémoué de Santi Licheri, fameu majistrà é personadzo télévisif.
- Orijinellamente, le doe *scène* prensipale sayoon deun l'ordre contréo : douàn la counta de Tchièn Frottapanse é aprì salla di dou-z-ipaou. I dèrì momàn son itaye eunvertiye, vu que lo ritme de la premiye l'iye pi ate.
- La *vidéo* de l'arrestachón di pouo Tchièn Frottapanse l'è itaye réalizaye avouè eun seul *plan-séquence*¹. Catro meneutte de *vidéo* que le-z-acteur son arrevó a eunterpreti to deun creppe. Mi l'è pa itó seumplo, di momàn que Rosina, Gilda é d'atre campagnar avouè l'Ape s'aprotsoon pe dimandé (mogà finque

1. Dans le *plan-séquence*, ces plans sont filmés sans interruption, ni montage. Un *plan-séquence* ne dispose donc pas de coupure et se caractérise par son action continue. Le spectateur peut ainsi suivre une action du début à la fin sans qu'il y ait d'arrêts. Source : CinéCréatis.

eun braillèn) : « Senque l'è capitó ? », « Senque v'ouite eun tren de fé ? » ou « Pequé n'a le carabegni ? ».

Scénographie

- 2 cllende de bouque pe le-z-eumputé di tribunal ;
- 1 groussa tabla relevaye é 1 caèya avouì le raoue pe lo dzeudzo  ;
- 1 martelette de bouque pe lo dzeudzo  ;
- 1 plimetta USB  ;
- 1 boursset avouì dedeun de DVD  ;
- De matériel pe baillì lo blan : 1 itchila  , 1 pennel  é 1 sidel ;
- 1 atéstà di *Guinness dei primati* é 1 groussa botèille  ;
- 1 fondal maròn avouì i mentèn eunna tèila iaou l'è proyettaye l'icrita « FORUM VALDOTÈN ». Si la mima tèila seràn proyettaye le *vidéo* de la pièse.

 PERSONADZO

PIERRE	Présentateur de la pièse, eunterprétoù pe PIERRE SAVIOZ.
LAURENT	Présentateur de la pièse, eunterprétoù pe LAURENT CHUC.
RITA DE L'ÉILLIZE	L'istorique présentatrice de la trasmechón <i>Forum</i> , eunterprétaye pe FRANCESCA LUCIANAZ.
FENNA DI MAQUIADZO	Femalla di <i>staff</i> de la trasmechón que s'ocupe de truqué le partésipàn, eunterprétaye pe GIADA GRIVON.
PASCAL	Assistàn de Rita arbeillà comme eun valet de veulla, eunterprétoù pe MARCO DUCLY.
EUMPRÉZÉYE	Eumprézéye euntsardjaye de baillì lo blan i meur di tribunal, eunterprétaye pe JASMINE COMÉ.
SIMON	Botcha de l'eumprézéye, arbeillà comme eun eumbianqueun, eunterprétoù pe SIMONE ROVEYAZ.
DZEUDZO SENLIQUEUR	Dzeudzo de la trasmechón <i>Forum</i> , eunterprétoù pe JOËL ALBANEY.
TOBIE RASCARD	Ommo de Bertina, eumplouayé réjonal dzouveunno que lame fé la dzenta viya, eunterprétoù pe LAURENT CHUC.

BERTINA

RESETTA

Fenna dzouveunna propriétéa di bazar di péi
é fenna de Tobie, eunterprétaye pe
JOËLLE BOLLON.

TCHIÈN

FROTTAPANSE

Eumputé senza permì de gueuda, eunterpré-
toù pe PIERRE SAVIOZ.

FRANCO TIC

Maréchal calabrotte di carabegnì, eunterpré-
toù pe PAOLO CIMA SANDER.

CARLO TAC

Carabegnì 🦋 vénéchàn senza espérianse, eun-
terprétoù pe SIMONE ROVEYAZ.

MADAMA TISSOT

Dzeudzo di *Guinness dei primati*, eunterpré-
taye pe ILARIA LINTY.

🤪 AVANSPETTACLE 🤪

Lemiye 💡.

Si le proscenium se présente Pierre, arbeillà bièn élégàn.

PIERRE Squezade l'è capitoù eun problème. Eun de no di Digourdì, mon compagnón que derie itre seu avouì mé, se fé pamì acappé.

Di fon di téatre se sen Laurent braillì.

LAURENT Euh, eh ! Atèn eun momàn vah !

Laurent galoppe 🐎 i mentèn di pebleucco é rejouèn Pierre eun saoutèn si lo palque. L'è to blette de tsa é l'a la djacca deun la man. Euncó llou l'è élégàn.

PIERRE Mi iaou t'ie ? Te semble lo case de fé attendre tcheutte seutte dzi ? Iaou t'ie ?

LAURENT *(Avouì lo flo i queue)* Te pouè pa attendre seuun meneutte douàn de comenchì ?

PIERRE *(I pebleucco)* Squezade ! *(A Laurent)* Se pou savèi iaou t'ie fenì ?

LAURENT Squezade tcheut ! Mé sayòu aloù aoutre i Splendor !

PIERRE I Splendor ? ! Mi t'i ià de tita ? Te sa pa que sen seuilla ?

LAURENT Ouè mi n'i deutte : vi que sit an n'a le-z-éléchón communal, a forse ivron si Splendor ! Mi ren a fé ! Pouèi n'i pa vi gneun, n'i vi to frémoù, si tracacha-me é si vin-ì sé a flamma. L'è aloù euncó bièn que n'i acapoù eun poste vouido seu douàn, piatro... !

PIERRE Ara que te me di so... eugn éffé l'a fé drolo euncó a mé ; pequé seuun meneutte fé n'i avèitchà foua de la fin-itra é n'i vi lo plasal di machine, seuilla eun fase, vouido.

LAURENT L'an pasoù si plasalle l'iye to plen ! Eh mi sit an le dzi son organizou-se ! Sinqe pe machina é caqueun l'è euncó finque vii ba a pià ! Pequé te sa, deun le déri-z-àn le bague son tchica tsandjaye.

PIERRE Sen cheur, pequé fa deue que dèi lo premì janvieur n'en pamì...

Pierre pren lo portafuille  é teurie foua eunna carte é la moutre i pebleucco.

LAURENT ... la *Carte Vallée* !

PIERRE Can mimo l'è beur queri-la pouèi, pequé pe no Valdotèn l'iye de pi de eunna seumpla carte, l'iye lo sembole de l'*autonomie*, l'iye eunna amia, eunna de fameuille.

LAURENT Ouè ! No Valdotèn belle can alaon a la mer... pitoù oubliavon lo paréo, lo achiamàn... mi la *Carte Vallée* ? ! Ah salla na ! Tcheutte avouì la *Carte Vallée* deun lo portafuille !

PIERRE ... é mé si preste a beti la man  si lo fouà  que (i *pebleucco*) la ouèide euncó tcheut pe lo portafuille ! L'è-ti pa vrèi ? Lévisse la man qui l'a dza caya-la ià !

LAURENT Eh, èita ! Gneun ! Cayade-là pa ià ! Pequé n'i senti de vouése que la réjón vou eumpléi seutta carte de magniye que tcheut le rézidàn entron gratouitamente pe le comeun pebleucco !

PIERRE Adón na cayade-là pa ià !

LAURENT ... é n'i euncó senti que vouillon fé comme pe l'imondicha, que te baillon eun pri eun fonchón de la cantitoù que te fé.

PIERRE Seutta n'ayou panco senti-la !

LAURENT Can mimo fa diye que sensa l'è totta eugn'atra viya, no sen itou tro acoutemoù amoddo. Aprì can mamma Réjón baille eunna man, no lèi prégnèn le bri !

PIERRE Mi pe sen baste veure lo dérì de l'an. De tratteur, de-z-Ape, de porter, de machine. Tcheut eun quiya douàn le distributeur 📺. N'ayè de fameuille que eumplisaon seutte *taniche* 📺 da pourté i mitcho... é Graziano, eun noutro amì de Riccione, (a Laurent) counta vèi senque l'a deu-no !

LAURENT L'a avèitcha-me pe le joueu é la deu-me (*avouì eun acsàn romagneul*) : « *Ma quando si diceva che il Valdostano l'ultimo giorno dell'anno fa sempre il pieno... ah io immaginavo tutta un'altra cosa !* ».

PIERRE ... é lo 31 eun tchi no senque l'et ?

LAURENT Eun tchi no lo 31 l'è euncó finque Patrón ! Mi a Tsarvensoù qui l'a fé lo Patrón ? Gneun ! Tcheutte ba i distributeur eun quiya avouì seutte *taniche* !

PIERRE Gnenca lo premì de l'an sen itó tranquilo. N'ayè eun trimadzo pe sise mitcho ! De passamàn eun avouì l'atro : fa beun beuté eun caro le *taniche*. Pouèi n'en eumpli le crotte, le cantin-e, no chortao finque foua di fin-itre !

LAURENT Boneur que la Réjón l'è vii-no eun countre avouì seutta loué di *Piano Casa*, que baille la possibilitoü d'alardjì lo mitcho di 20%, piatro iaou le beuttavon totte seutte *taniche* !

PIERRE Can mimo Laurent fa deue eunna бага : la Réjón de tenzentèn fé de bique.

LAURENT Mi Pierre ! Euncó Paolo Comé, noutro pi for djouyaou di Fiolet fé de bique. Feguea-té la Réjón !

PIERRE Ouè mi seutta l'è fran grousa ! Aprì a no de Tsarvensoù no totse de protso, pequé l'è capitaye djeusto dameun lo péi.

LAURENT Dameun Tsarvensoù ? Mi senque l'è capitoù ?

PIERRE Mi salla counta, bièn eumpourtanta, lé dameun lo péi !

LAURENT Dameun lo péi... Na ! Di-me pa que aprì la *tangenziale* a Comboé ara vouillon fé l'*autogrill* i Peseun-e ? !

PIERRE Mi na, mi senque t'a comprèi?! Mé si eun tren de prédjì di tréneun 🚂 de Cogne!

LAURENT Oh mondjemé, t'a fé-me vî eun creppe!

PIERRE Can mîmo pe seutta counta di tren l'an caya-no ià de sou!

LAURENT Mi Pierre, lo discoù di tréneun l'è tchica complecòu... é damadzo que pa tcheutte lo san. Mi mé te diyo que noutre politisièn son itoù pi veusto de sen que tcheu no seu dedeun pensèn.

PIERRE Mi counta vèi adón!

LAURENT Té pensa senque l'è capitoù eun Val d'Outa deun la dé-riye périodda...

PIERRE Bah, deun la dériye périodda... Ah! Lo *Bon Chauffage*! A mé l'è bièn allo-me : si arrevòu a atseté 12 353 *pellet*, mi que t'ou de pi?

LAURENT Mi na! Mi que le *Bon Chauffage*! Salle son totte de counte foule! Seutta l'è eunna бага биєн, биєн, биєн eumpourtanta é fa diye que l'a tchica tracachà tcheutte.

PIERRE T'i eun tren de prédjì di tremblemèn de tèra? Mondje que pouiye que n'i prèi si dzor! N'i to vi boudjì la coutse, si to aloù ba a lambo pe le-z-itchilì tanque foua de foua. Se lèi penso...

LAURENT Voualà! Mé l'è sé que te vouillavo! Té t'i convencù de seutta бага. L'an prédja-nen le journal 📰, le TG réjonalle, grou titre « *Epicentro a Bionaz* » ... mi son totte de counte foule!

PIERRE De counte foule? Mi t'i matte?

LAURENT Totte de counte foule!

PIERRE Mi comèn? Mi se l'è pa itoù lo tremblemèn de téra, adón senque l'è itoù?

LAURENT L'ïye ba eun Veulla la *trivella* que fiè la borna pe la Me-

tropolitana !

PIERRE Mi adón ara mé n'i to comprèi comèn son alaye le bague !
Voualà iaou catson le tréneun de Cogne !

LAURENT Eh ouè ! Lo catson lé dézò ! Can mimo n'en prao deu-nen
euncó sit an.

PIERRE Ouè.

LAURENT Aprì n'en fé euncó tchica tar.

*Laurent se teurie si la mandze pe avèitchi la moutra 🕒, mi,
comme l'an douàn, l'è oublià-se de la beuti² !*

LAURENT Mé dériyo de comenchì a prézentì la pièse.

PIERRE Betèn-no an mia eun plase. . .

*Pierre é Laurent se cllouzon la djacca é se beutton a poste la
tsemize.*

PIERRE Vèyo que t'i pa fran ren crèisì de l'an pasoù ! Me totse euncó
sit an lo mou i dzegnaou ?

LAURENT Na ! Sit an si organizó-me. . .

*Laurent va déri la tèila. Aprì eun per de seconde torne avouì
eun sgabel de bouque. Lo pouze protso de Pierre é lèi mounte
desì. Ara l'è pi ate de Pierre é dèi donque plèi le dzegnaou pe
itre a la mima atchaou de Pierre.*

PIERRE Mesdames et Messieurs. . .

LAURENT . . . pièse icrita pe le Groupe Téalral le Digourdì de Tsar-
vensoù. . .

PIERRE . . . a vo Forum Valdotèn !

Teuppe 💡.

2. Lo pebleucco l'a tourna bièn riette pe seutta gaffe.

ACTE I

SE IVRE LO RIDÓ

Scène I – APRESTÈN L'ÉILLIZE

La scénographie l'è la copie di programme télévisif Forum : dou ban pe le-z-eumputé é eun ban pe lo dzeudzo. Eun scène n'a Rita De l'Éillize que se boudze d'eun couti a l'atro avouè eunna femalla di maquiadzo que lèi galoppe aprì pe la beutté eunna mia eun plase. Son panco eun directe é donque le lemiye son base. Pascal, l'assistàn de Rita, l'è eun tren d'apresté la plase di dzeudzo.

RITA (*I tecnisièn foua scène*) Apresta-mé la sinque... Vouè salla va bièn! (*Ver la fenna di maquiadzo*) Beutta-mé pa troppe de coleue 🍷 i vezadzo que me fé vaille da matte. Vouè pouèi va mioù! É Pascal iaou l'è? L'è todzor eun treudda si ommo lé, te lo queurie é repón pa, te lo tsertse é l'è pa, can t'a fata l'è ià...

PASCAL Rita si seuilla! Sayò djeusto eun tren de beutté eun plase le noutre bague pe la trasmichón. Semble pa avì mi se te te rèche pa a satt'aoue di mateun te fé pocca ou ren.

RITA É pensa a mé! Que dèyo me féye totta dzenta pe lo meun poubleuque.

PASCAL T'a de gran fastide té!

RITA Pensa que l'è dza la 2647 pountaye de Forum Valdotèn é si todzor ajitaye comme se fise la premiye!

PASCAL Mé na. L'è eugn an é chouì mèis que traillo seuilla é diyo trèi paolle pe dzor... é chourtoù todzor le mime!

RITA Oh, acouta ! De carabegnì comme té nen n'a plèin-a la Val d'Outa ! Baillo eun caouse a eun bouèisón é nen chorton eun moui ! Euh que tracasse !

PASCAL Na, na : fiyo pa le nite, prègno pa de frette... na, na, Rita resto séilla !

RITA Mi vouè ! (*Totta dousa*) Resta seuilla avouè Rita, que sen belle afféchouou-no a té !

Entroun, eun fièn bièn de cazeun, dou-z-eumbianqueun : l'eumprézéye é lo botcha Simon. Pascal tsertse de le-z-aritè.

PASCAL Senque fiade séilla ? Pouade pa entrì !

EUMPRÉZÉYE M'enteresse pa ! Trama-té !

RITA Senque capite ?

Rita s'aprotse a l'eumprézéye é a Pascal. La fenna di maquillage lèi reste todzor protso. Dimèn Simon mounte l'itchila si la gotse di palque, ver lo fon.

PASCAL Si pa te diye.

RITA (*Inervaye* 🙄) Euh madama no sen eun télévijón seuilla, n'en pa de ten a pédre, soplé !

EUMPRÉZÉYE Restade maque tranquilla, ajitade-vó pa, l'è totte icrì neue si blan !

L'eumprézéye baille eun papì a Rita.

RITA Vouè veure !

EUMPRÉZÉYE Vèyade si papì ? L'è lo contrat avouè l'Endemol que m'aoutorize a baillì lo blan fran oueu, lo devendro 7 de mi.

RITA Mi pouade pa fé pi tar ou eugn atro dzor ?

EUMPRÉZÉYE Na pequé dèi demàn ivrèn lo cantchè si a Senta-Colomba é lé nen n'en pe pouza, rèizón eun pi pe fenì vitto oueu.

RITA Mi lo prée l'a totta seutta prisa ?

PASCAL Pouriye fé comenchì a la tsantì vi que son an blita.

EUMPRÉZÉYE Na, na, na ! No sen proféchonnal é surtoù n'i pa de ten a pédre, dunque comenchèn, alé Simon !

L'eumprézéye comenche a dirijì lo travaille é Simon ataque a baillì lo blan. Le dou restèràn pe to lo ten di prosé pe eunna coueugne a gotse di palque, de fasón que se véisan pa tan.

RITA Madama ! Euh madama ! Prèdzo avouì vo madama. . .

L'eumprézéye se vionde eun baoudeillèn.

RITA Lé a l'anglle, vouì pa vo veure é pa vo senti ! Sen eun télévijón seuilla !

PASCAL Rita, tracacha-té pa le-z-avèitso mé.

RITA (Ironique) Ah sit cou si tranquila !

Vouése derì le ridó 🗣️ : « Rita t'i presta ? L'è djeusto fenì Mattino Cinque é sampouza totse a no ».

RITA Vouè, vouè ! (A Pascal) Ià, ià ! T'i euncó seuilla, l'è panco ton momàn, poussa, totse a mé, ià, ià !

Pascal chor de la scène. La fenna di maquiadzo porte a Rita le botte é lèi arendze le potte 🗑️. Aprì chor euncó lleu de scène.

Vouése derì le ridó 🗣️ : « Attenchón, diretta de sé a ouette, satte, chouì, sinque, catro, trèi. . . ».

🗣️ FORUM - JÉNÉRIQUE 🗣️

Dimèn pase la fenna di maquiadzo avouì eun grou cartel avouì icrì : « BOUÉCHÌ DI MAN ». Fenì lo refrèn, la cllertó di lemiye aoumente.

Scène II – GAGNÌ PE LA VIYA

RITA Bondzó a tcheut é bienvin-ì a eunna noua émichón de Forum Valdotèn. Si fran contenta perqué ieue n'en totchè eunna poueunte di 42% de *share* ! Mersì bièn a tcheu vo que no avèitsade chouèn. Bon adón comenchèrio to de chouite avouì lo premì cas de seutta dzournoù. Veun Pascal !

Pascal entre.

RITA Que dzen te veure Pascal !

PASCAL Mersì Rita ! Douàn de comenchì, vouriyo djeusto salì euncó mamma que l'a prèi eunna bronchite é l'è platta a la coutse.

RITA (*Jèinaye 😊*) Vouè Pascal, la salièn tcheut euncó no é spèèn que tournise totte eun plase ! Conteugna pe plèizì. . .

PASCAL Ouè, pe lo premì case de oueu n'en mesieu Tobie Rascard que porte la fenna, madama Bertina Résetta.

Entroun tsaqueun de leur djet, se plachon dèrì leur ban é salion lo poubleuque.

RITA Bièn, adón vi que son tcheut a leur poste, fièn entré lo dzeudzo Senliqueur !

Rita chor de la scène. Pascal va dèrì lo ban di dzeudzo, soun-e lo campaneun 📢 é aprì doe seconde lo dzeudzo entre. La fenna di maquiadzo pase douàn lo pebleucco avouì eun cartel avouì icrì : « TCHEU DRETTE ».

PASCAL (*I pebleucco*) Tcheu drette !

SENLIQUEUR (*Dimèn que Pascal l'èidze a s'achouatté*) Achouatta-de-vó maque, mersì Pascal. Adón n'en oueu lo cas de Tobie Rascard (*avèitse Tobie*) diyo bièn ?

TOBIE Vouè, vouè mesieu lo dzeudzo.

SENLIQUEUR Vouè é Bertina Resetta djeusto ?

BERTINA Vouè mesieu lo dzeudzo.

SENLIQUEUR Adón a vo la paola mesieu Rascard.

TOBIE Bondzó mesieu lo dzeudzo, oueu si seuilla pe eunna bagga bièn seumpla.

SENLIQUEUR Ouè, se l'iyè tan seumpla vegnavade pa seuilla !

TOBIE La baga l'è seumpla, mi avouè eunna fenna pai l'è pa seum-plo ren se beti d'acor. Lo mèise pasó, feniya eunna pezanta demè dzornoù de traille, si passó bèye eugn apéritif avouè dez-amè é n'i vi que a l'anglle de la cantin-a n'ayè eunna bouró de dzi. Queuriaou de seutta bagga si approtcha-me é n'i vi que djouyaon tcheutte a si nouo djouà que va tan de modda ara. L'è si djouà iaou te fa eundovin-ì dji numéró desì 20 pe arrevé a gagni 4000 èiro i mèise pe 20 an sensa fata de féye ren, caze comme eun poleteucco de *Place Deffeyes*.

SENLIQUEUR Diyèn pa de counte foule va souplé ; can mimo n'i comprèi de queun djouà prèdzade : lo Lot 🎰.

TOBIE Na mesieu lo dzeudzo...

SENLIQUEUR Vouè squezade-mé si troumpo-me vouillao diye lo *Gratta e Vinci*.

TOBIE Na, na sise son de djouà passó, lèi djouye pamì gneun. Sitte se queurie *Pin for Five*.

BERTINA Mi resta quèi Tobie que l'è dza dzen que mamma Réjón te paye lo *bilinguisme*. Mesieu lo dzeudzo, se queurie *Win For Life*, gagni pe la viya.

SENLIQUEUR Vouè, vouè, ara n'i to clèe ! Contegnade maque avouè voutra conta mesieu Tobie.

TOBIE Bièn, tornèn i discoù : eun cou vi totte seutte dzi, n'i vouli proué euncó mé a djouè dji numérò. Malerezamente, me nen

vegnoon eun devàn maque satte, pouèi vi que la fenna l'a euncó praou de chanse (tcheu le-z-àn gagne quèichouza a la lottii di Sci Club é i tombolón de Tsalendre) n'i téléfoun-ou-lèi 🤔 pe me fé èidjì. É sade comèn l'è allaye a fenì la conta ?

SENLIQUEUR Na diyade-mé...

TOBIE Soun chortì tcheut é dji le numérò é pouèi n'en gagnà.

SENLIQUEUR Istooo !

BERTINA Vouè é dèi si dzor noutra viya l'é vin-a eungn enfeue.

SENLIQUEUR Senque vouillade diye ?

BERTINA Deun noutro mitcho l'è totta an deusquechón ; se pou pamì vivre : d'an premì n'ayòn prèdjà d'eumplèyè le sou pe alardjì é valorizé lo petchoù bazaa i mentèn di péi que ...

TOBIE Mi pren-té varda ! Feguea-té se n'i deu so, caya ba salla bo-teucca que te fé maque pédre de ten.

BERTINA Mesieu lo dzeudzo, prèdze pouèi perqué vouriye spendre tcheu le sou pe fé la dzenta viya.

TOBIE Lamondjeu ! Mi qui l'a fé-me-ló fé de te téléfoun-ì si dzor lé !

BERTINA T'ise pa téléfoun-ou-me n'ayòn gneunca lo tracasse d'itre seuilla oueu.

SENLIQUEUR (*Boueuche avouè lo martelette de bouque 🗡️*) Todzèn, todzèn, prèdze eun pe cou seuilla dedeun !

TOBIE Adón d'an premì n'i pensó de fée mèitchà di sou avouè la fenna, aprì l'è vi-me eun devàn que satte numérò si dji n'i cherdi-le mé ! Donque me totsériye lo 70% di gagnadzo !

BERTINA Mon cher, l'è mersì i trèi numérò que n'i bailla-te mé que n'en gagnà ! Lo dzor, lo mèise é l'an de noutro mariadzo.

TOBIE Di pa de counte foule BERTINAAA ! Lo 13, que l'è lo dzor que s'en maria-no n'ayò dza djouya-lo mé !

BERTINA Sen maria-no lo 12 touéno ! (*Eun plaouèn* 🥹) Vèyade mesieu lo dzeudzo, comèn féyo a resté euncó avouè eungn ommo pouèi !

SENLIQUEUR V'ouèi pa tcheu le tor...

BERTINA L'è eumpousiblo se beutté d'accor avouè eugn ommo avouè le secotse créaye !

TOBIE Adón conteugna a te le fé pequé di banque.

SENLIQUEUR (*Boueuche lo martelette* 🦋) Silanse, tchica de sè-riétó, mi perqué fiade pa *fifty-fifty*, mèitchà pe eun ?

TOBIE Mi comèn mèitchà pe eun ? Fisse pe salla crapiya n'ario gneunca djouyà la *schedina* é aprì perqué divijì eun partie igale di momàn que mé n'i djouyà satte numeró countre le trèi de lleu ?

BERTINA Ah vouè, l'è pouèi que se rèizoun-e ? Adón spleucca-mé perqué lo gagnadzo di bazar fa lo divijì can si maque mé a lèi travaillì dji-z-aoue pe dzor ? !

TOBIE Mi planta-là lé !

SENLIQUEUR (*Boueuche lo martelette* 🦋) Squezade, l'è pa clléa eunna bagga, v'ouite eun communion di bièn ?

TOBIE Malerezemàn vouè mesieu.

BERTINA Ouè dzeudzo, me si mariaye bièn dzoueun-a é... (*eun braillèn* 🗣️) bièn foula !

TOBIE Ah pe sen t'a pa fé de grou tsandzemèn !

BERTINA Mi senque me fa sentì ! Saloppe, permè-té pa...

SENLIQUEUR (*Boueuche lo martelette* 🦋) Ah deun si cas la loué prèdze clléa. Se arrevade pa a vo beutté d'accor, fa divijì eun partiye igale : 50% é 50% ! Si articllo, l'articllo 111 di *Code civil*, l'è pa valido deun lo cas de (*fé le corne* 🐮) « *adulterio, incapacità di intendere e volere, non adempiere ai propri doveri*

di coniuge ».

BERTINA Ah vouè? Adón ara terièn to foua, mesieu lo dzeudzo!
Me euntèrèche pa pi de fé eunna beurta fegueua.

TOBIE Teuria maque to foua, n'i pa ren a catchi!

BERTINA Ah ouè?

TOBIE Ouè!

BERTINA Ouè?

TOBIE Ouè!

BERTINA Adón te te rappelle ta dériye chortiya de traille a Romma?

TOBIE Vouè, lo *Convegno* di fondachón *anti-sismiche*, qui se la oubliye, l'è itaye bièn stoufianta, é pe fenì n'i euncó tchapó eugn'eunseurtaye di dirijàn perqué n'i perdì la machina di fotografiye 📷 de l'ouficho!

BERTINA Na mon chèe, t'a pa perdi-la, l'iye dézò lo sédil de la machina!

TOBIE (*Étoun-ou é tracachà* 😞) Dézò lo sédil de la machina? É té te me lo di ara?

BERTINA Mesieu lo dzeudzo, vouriyo fé veure seutte fotografiye... aprì véyèn se l'articllo 111 di code l'è euncó valido.

SENLIQUEUR Pascal, sitte l'è lo traille de té.

TOBIE Na, na, na, na, na eh! Baillo pa lo permì pe veure le foto!
Son de bague eunterne di travaille, que l'an pa ren a veure avouì lo prosé.

SENLIQUEUR Se vouillèn rezoudre la situachón fa vère le foto, pia-tro...

Dimèn Pascal pren la plimetta USB de Bertina é la porte eun réjì.

Veugnon proyettaye eun per de foto³ de Tobie avouè de femalle tchica peillotte 🧑. Pa ren de pezàn mi djeusto de llou eumbrachà a de fenne pa tan toppaye.

SENLIQUEUR (A Tobie) Complemàn, pa mal !

SIMON Que boun-e !

EUMPRÉZÉYE Mi que te fé ? Botchassa, trailla !

SENLIQUEUR (A Tobie) Mon cher, v'ouite mal plachà. Bon can mimo seutte foto le teugno pi mé perqué dèyo le beutté a verbal, eh Pascal ? 😊

PASCAL (Eun catsèn to ià) Vouè, vouè to vrèi !

SENLIQUEUR Me reteurio pe baillì eunna soluchón i voutro cas.

🏠 FORUM - JÉNÉRIQUE 🏠

Lo dzeudzo chor.

Scène III – EUN BEILLETTE PE LE MALDIVE

RITA (De fouda scène) Ara la poublisitó !

La cllertoù di lemiye bèiche.

TOBIE (Eun tsemièn ver Bertina to dispéó) Ah Bertina ! Mi t'i foula ? Te me porte seu eun télévijón é te fé veure seutte bague douàn tcheutte !

BERTINA (Malechaye 🤡) Ah te crèyo. T'a praou fé-me-nèn vère !

TOBIE Pe eunna petchouda fita 🍷 que l'è chortiya si dzor ! É apri se vèi pa ren d'atro si salle imadze. N'i maque fé caque foto avouè seutte femalle tchica plèizente, voualà lo totte.

PASCAL (Eun tsertsèn de divijè le dou) Plan plan !

3. Malerezemàn le fotografie son pe l'archive privò di dzeudzo Senliqueur ! Donque la seula magniye pe le vère l'è d'avèitchi la vidéo de la pièse dèi la me-neutta 25:33.

BERTINA Pe fourteun-a que n'a pa euncó lo restàn perqué piatro fayè féye Forum eun *fascia protetta* aprì onze aoue di nite !

EUMPRÉZÉYE N'i dza vi djeusto entraye de sen que l'è fé si seuilla. Se cougnisón dza di prédjì sise !

TOBIE Mi senque nen vouillade savèi vo ? Contegnade a baillì lo blan va ! Eumbianqueun de la *mutua* !

SIMON Deh mamma Réjón ! Calma !

RITA (A Tobie) Deh vo restade tchica pi tranquillo ! (Ver l'eumbianqueun) É aprì vo-z-atre ba lé baillade lo blan é eummicclade-vó de vo bague !

SIMON Rita l'a rèizón. Can eun sa pa, l'é mioù que restise quèi.

EUMPRÉZÉYE Mi a té caqueun la dimando-te quèitsouza ?

SIMON Na, na ! Acouta, seu vou tanque a la reugga ?

EUMPRÉZÉYE Vouè, pa pi si. É pren-te varda de fé de dan !

SIMON Vouè, vouè, féyèn todzor *pennellato* ou comencho lo *spazzolato* ?

EUMPRÉZÉYE *Pennellato* va bièn !

RITA (Pitoù inervaye 🤔 ver le dou) Pe plèizì !

TOBIE Can mimo Rita, vouillavo djeusto présizé que mé n'i todzor travaillà pe la fameuille é eun Réjón s'i todzor fé-me eun toumeun pouèi (avouì le man moutre lo toumeun). Pe senque 🤔 ? Pe ren, pe eunna Bertina que vou me rouvin-ì !

EUMPRÉZÉYE Mi planta-là lé va, toumeun !

BERTINA Vouè l'a fran rèizón !

TOBIE (Tsandze de ton, tchica pi vendicatif) Ah mi se gagno mé tcheut le sou di *Win For Life*, te me vèi pamì cheu : me n'en vou i Maldive !

SIMON Euncó mé, euncó mé !

EUMPRÉZÉYE Té pensa maque a travaillì. Que te fa nen féye euncó de mètre caró pe atseuté eun beillette pe le Maldive !

BERTINA (A l'ommo) Vouè, te nen acappe pi eunna aoutre per lé que lave, steurie é fé to lo reste i mitcho comme fiao mé. Critin-a que s'i !

TOBIE Ah tracassa-té pa ! Que nen trouo beun eunna dzenta é dzoueun-a.

SIMON Comme salle di foto ?

EUMPRÉZÉYE Se te la plante pa te féyo pi travaillì euncó la demendze mateun !

SIMON Na, na, resto quèi !

Scène IV – LA SENTENSE DE SENLIQUEUR

Vouése derì le ridó 🗣️ : « Dirette de sé a ouette, satte, chouì, sinque, catro, trèi, dou... ». Tcheu prègnon leur plase. Pascal soun-e lo campaneun 📢.

PASCAL Tcheu drette !

Lo dzeudzo entre é s'achouatte eun saoutèn desì la caèya. Pascal lo plache amoddo douàn lo ban.

SENLIQUEUR Adón, sentì la diquiarachón de M. Rascard é de Mma Resetta vo liyo la sentensa : vi le proue que l'an vi tcheutte, i sanse de l'art. n. 435 ter comma 3 di *Code civil*, lo mesieu seuilla prézèn l'a pa reuspétó le chouivèn articllo :

- art. n. 235 di *Code civil* que prèdze di drouet de l'ommo ver la fenna ;
- art. n. 1352 di Code pénal *ubriachezza molesta* 🍷 ;
- eun moui d'atre eunfrachón que n'i désidó de pa tin-ì countcho pe pa rendre voutra situachón euncó pi grave.

Eun considérachón de sen que n'i deu tanque ara n'i desidou que lo gagnadzo dèi pi alé divijà deun seutta magniye :

- la tseufra de èiro 1000 a tcheu dou pe l'eumpléyì deun lo bazar ;
- èiro 2500 a Bertina pe le-z- ézijanse de lleu ;
- èiro 500 a Tobie pe le voye que l'at.

Eun pi, pe vo mesieu :

- la tseufra de èiro 5000 a baillì a l'Amministrachón réjonnalla pe lo dan d'imadze que v'ouèi proquero-lèi.

Pouèi n'i desidoù, orevouà a tcheutte !

TCHEUTTE Orevouà mesieu lo dzeudzo.

 FORUM - JÉNÉRIQUE 

Lo dzeudzo chor.

Scène V – RÉCLAMME TSARVENSOLENTSE

*Pascal, Rita, Tobie é Bertina se plachon i mentèn di palque :
Pascal é Rita i mentèn, Bertina a gotse é Tobie a drèite.*

EUMPRÉZÉYE Brao merlo ! A la plase de resté quèi i micho ! Bièn fé !

SIMON (*Eun dimontèn l'itchila* 🗑️) Se te tsachon pi de la Réjón te queutto ma plase.

Le dou eumbianqueun chorton.

RITA (*A tobie*) Mesieu vouillade diye quèichouza ?

TOBIE Ah Rita... (*levve le-z-ipale*) senque vouillade que vo diiso ?
Pi mal de pouèi, pouchè cheur pa alé !

BERTINA Si cou te beutte ba la tita, a fose !

RITA Pe plèizì madama, voutro ommo me semble dza praou démo-
ralizó pe la sitouachón.

TOBIE Pensa que fegueua deleun eun Réjón avouì tcheut. Na, na,
n'i fran lo moral dézò le botte ! Féyo pi fran comme n'i deu ;
féyo la valiza 📦 é vou a tsertchè lo tsaa.

BERTINA Ah, ouè, ouè, va mai a tsertchè lo tsaa ! Tobie, mé magaa n'i ézajéro a dédi tan de ten i bazaa, mi n'i jamè fé-te manqué la tsaleue de la fameuille, é té ? Té l'è pouèi que t'a remersia-me ? T'a tsertchè la tsaleue deun eugn atro djet !

RITA Me diplé bièn pe comèn l'è alló a fenì voutro cas è spéo que magaa vo tourneré a allé an mia pi d'acoo.

TOBIE N'i fran pa la fèi de tourni a allé d'acoo avouè seutta tsapletta ! Rapella-té bièn Bertina que mamma de mé l'a todzoo deu-me que le pateun se lavoun i mitcho !

BERTINA Ita mai tranquilo que n'i praou lavo-nen de pateun i mitcho deun tcheu sise-z-àn ! Mi ara praou, can l'è trop l'è trop, n'at an limite a tot !

TOBIE Tsapletta !

RITA Bièn adón mé vo salio, vo remersio bièn, salì !

Bertina é Tobie salion Rita, se mandon a caqué é chorton de scène.

RITA É voualà que lo premì cas de seutta émichón l'é allaye-se-nèn. É ara la reclamme !

Rita é Pascal chorton. Son proyettaye doe poublisitó :

1. Lo cafi ☕ d'Ampaillan, que se te lo bèi te fé eunna dzenta man (i fiolet), é la Betsi de Ferré, que te fé pa biqué ;
2. La trifolla 🍋 de Feleunna que can te la queurie nen areuvve eunna.

Teuppe 💡.

👤 LO CAFI D'AMPAILLAN É LA BETSI DE FERRÉ 👤



👤 LA TRIFOLLA DE FELEUNNA 👤



Lemie 💡.

Scène VI – CATRO É SEUNCANTA !

*Vouése deri le ridó 🧐 : « Rita t'i presta ? Tornèn comenchi.
Pascal é Tobie entron eun scène ».*

RITA Mondje, vouè, vouè !

*Vouése deri le ridó 🧐 : « Presta pe la diretta : chouì, sinque,
catro, trèi, dou... ».*

RITA Bièn tornoù a tcheut. No contegnèn la trasmichón avouì eun nouo cas. Pascal prézenta-no le-z-eumputé.

PASCAL Vouè Rita. Adón n'en mesieu Tchièn Frottapanse contre dou carabegnì 🧑 di veulladzo : mesieu Franco Tic é Carlo Tac.

Le-z-emputé entron é se plachon douàn leur ban.

RITA Bièn, comenchen : fièn entré lo dzeudzo Senliqueur.

Pascal va deri la caèya di dzeudzo é soun-e lo campaneun 📢.

PASCAL Tcheu drette !

*Entre todzor la femalla di maquiadzo avouì lo cartel « TCHEU
DRETTE ». Entre lo dzeudzo.*

SENLIQUEUR Bondzó a tcheutte, n'en seuilla pe lo secón cas de seutta dzornoù mesieu Tchièn Frottapanse que l'a portó lo Maréchal Franco Tic é lo Caporal Carlo Tac, la paolla a mesieu Tchièn.

FROTTAPANSE Bondzó, mesieu lo dzeudzo, bondzó a tcheutte.

SENLIQUEUR Voué n'en comprèi-lo, bondzó euncó a vo, comenchade pe plèizi a conté voutra conta.

FROTTAPANSE Adón, l'iyé lo 25 d'avrì; sade l'è eun dzor de fita é fran si dzor n'i fé la sin-a di tet, perqué sade si eun tren de fé lo mitcho é, l'è euncó bièn allo-me, perqué si arreuvé a prendre lo seside pe beutté le labie i tet. Iaou arendzo l'è eun poste bondàn particuilli perqué l'è pe la *zona A*, pe lo mentèn istorique; can mimo n'i fé seutta sin-a é sade comèn l'è, criya Binno de l'eumprèiza, criya Cino di simàn, Louis di bouque é euncó la fenna Fonsine, mondjemé salla fenna fé de douse que son an boumba é...

SENLIQUEUR (*Boueuche lo martelet* 🚧) Praou, praou, praou, copade la conta! N'i pa fata de savèi tcheu le particuilli é souplé arrevade i beut.

FROTTAPANSE Vouè, vouè, vouè, squezade-mé bièn mesieu lo dzeudzo, can mimo sayò eun tren de diye que n'en fé fita é a la diye totta n'en euncó tchica ézajéro avouì lo bèye, perqué n'en comenchà avouì lo Muller de la Cave comme apéritif, aprì sen passò i Torrette, perqué avouì la tseue 🍷 t'i coudzì de bèye eun bon rodzo...

SENLIQUEUR Praou! Arrevade a la questchón pe plèizi!

FROTTAPANSE Vouè, vouè, vouè, squezade-mé bièn mesieu lo dzeudzo. Adón, eun cou fenì le dijestif é fé doe tsansón, n'i prèi lo tse-meun di mitcho é malerezemàn n'i pami pensó que la Ré-jón l'ayè beuttó, a dispozichón de tcheut, si dzen servicho de *taxi* que te porte i mitcho avouì poca sou : *Allô Nuit* se criye.

Donque n'i fé la counta foula de prendre ma machina é de me beutté a la gueudda. A eun sertèn poueun, to pe eun momàn, la lemiye bleuvva... é voualà !

SENLIQUEUR Si stouffie d'acouté voutre conte foule que me spleucon ren ! Ara acoutèn lo carabegnì Franco Tic.

Franco Tic prèdzor todzor avouì eun acsàn calabrotte.

TIC Mesieu lo dzeudzo, bondzò, la nite di 25 avrì 2010, mé, lo soussegnà Marechal Tic nèisì a Gioia Tauro lo 3/3/73 é lo caporal Tac seu, nèisì a... nèisì a...

TAC Bassano del grappa, lo 7/7/77.

TIC No no plachoon eun localitò Chef-Lieu de la Quemeua de *Tsarvensoddi* pe eun normal controle, can a chouï-z-aoue é 23 di mateun no-z-appesisèn que l'è eun tren de arrevé an machina que avanchè eun magniye pa conforme i Code di tsemeun.

FROTTAPANSE Na, na, na mesieu lo dzeudzo mé guedavo tranquilo pe mon tsemeun !

SENLIQUEUR (*Boueuche lo martelet* 🚧) Ouè, ouè, acouttade, v'ouèide dza prédjà, ouèide dza i voutro ten...

TIC Diavo : aprì que n'en bailla-lèi la tsasse eun bon momàn...

FROTTAPANSE Na, na, na mé si arretou-me to de chouite !

SENLIQUEUR (*Boueuche lo martelet* 🚧) Pascal pensa-lèi té !

Pascal s'aprotse a Tchièn é lo eunvite a se calmé.

TIC N'en arritò la machina 🚗 é, constatoù l'évidàn stat di mesieu que guedèe, n'en fé-lèi lo test alco... alco... lo test di pal-lontcheun é, selón le prescrichón de la loué, n'en reterià lo permì de gueudda.

SENLIQUEUR Bièn, comencho a comprendre sen que l'è capitó, mi comprègno pa lo perqué v'ouite seuilla mesieu Frottapanse !

FROTTAPANSE Mesieu lo dzeudzo mé n'i bi, n'i guedó é n'i cheue pa fé amoddo, beutto pa eun doute so. Mesieu lo dzeudzo, prégnade-vó varda, djeusto que l'isan gavo-me totte ! Mé oueu si seuilla perché la nite eun questchón n'i soufló dedeun salla péгна machina que l'an sise dou lé é n'i soufló la valiya de 4,50 ! Si cheue de so, lèi beutto la man 🖐 si lo fouà 🔥 .

SENLIQUEUR Bièn, mi iaou vouillade arrevé ?

FROTTAPANSE Mon tracasse l'è que pe seutta bagga n'i pa de rési que me dimoutre la validité de l'alcoltest perché Tic é Tac, l'an pa vouli me bailli lo verbal.

TIC Mi mesieu lo dzeudzo no n'en bailla-lèi-ló !

FROTTAPANSE Vouè mi deussì si croué bocón de papì que vo criyade verbal l'é pa marcaye la valiya de véo n'i soufloù. Comprégnade mesieu lo dzeudzo ?

SENLIQUEUR Na pe ren. Mi diyade-mé : perché vouillade eun resì, se n'i bièn comprèi, que dimoutrise que v'ouèi souffloù 🐷 a si valeue tan ate ? Mé areuvvo pa a comprende ! Areuvvo pa a comprende ren !

FROTTAPANSE Perché mesieu lo dzeudzo... voui entré deun lo *Guinness dei primati* !

SENLIQUEUR Comèn lo *Guinness* ? ! L'an gavou-vo lo permì de gueudda, l'an reteria-vo la machina é vo... vo vo tracachade di *Guinness* ? !

FROTTAPANSE Mi vouè, mesieu lo dzeudzo. Mé si pa pe le bague matérielle, lo permì de gueuda aprì eugn an te lo rendoun, le machine te le atseutte. Mi lo *Guinness*, l'è lo *Guinness*, entré deun lo *Guinness* l'a pa de pri. É i dzor de oueu qui l'è que fé 4 é 50 ?

SENLIQUEUR Eugn éffé v'ouèi pa tcheu le tor.

TIC N'a cheur a se blagué, abreuttì !

FROTTAPANSE Vouè, mesieu lo carabegnì rapellade-vó bièn que l'è mioù itre pión que marón, perqué la piorna passe...

TIC (*Malechà* 🤡) Oh senque?! Restade tchica calmo!

SENLIQUEUR (*Boueuche lo martelet* 🗡️) Todzèn avouè le paolle, piatro vo féyo chotre tcheut.

FROTTAPANSE Na, na, squezade mesieu lo dzeudzo, si fé-me prendre tchica la man! Mesieu lo dzeudzo, vouillavo renque vo diye euncó que mé oueu n'i portó seuilla avouè mé lo dzeudzo di Guinness, madama Tissot. Soplé, pouèn la fé entré?

SENLIQUEUR Va bièn, Pascal, fiade entré madama Tissot.

PASCAL Vouè, mesieu lo dzeudzo, to de chouite.

Pascal accompagne madama Tissot eun scène. Madama Tissot prèdze eun patoué tchica amériquèn.

M.ME TISSOT Bondzó mesieu lo dzeudzo, é a vo tcheut, vo porto le salì de l'assembloù NGRW *National Record Guinnes of the World*. Si oueu seuilla eun tsardze de dzeudzo pe rendre of-fisiel lo record de mesieu Tchièn Frottapanse.

SENLIQUEUR (*Avouè acsèn amériquèn*) Bièn madama, de senque v'ouèide fata, diade-mé.

M.ME TISSOT N'ario prao de eunna proua *audio-video* ou icrita de salla valeue que tan v'ouite eun tren de prédjì.

TAC *Video? Ostreggheta se n'en lo video.*

FROTTAPANSE T'a eun *video*? Teuria foua adón!

SENLIQUEUR (*Surpri*) Mi adón ouèide eunna vidéo de si dzor lé?

TIC (*Fé de gramo joué* 😊 *i Caporal*) *Video?* Vouè l'é la *camera-car* que n'en todzó deussì noutre machine mi ara sarè ba i fon d'eun magazeun... avouè tcheut le filmà que n'en eun ca-zerma lèi allérèn chouì mèis pe accapé fran si que tsertsade. (*Eugn avèitsèn lo Caporal*) Djeusto?

TAC Na maréchal. Vo rappelade pa le dispozichón di comandàn ?
No fa todzor no porté aprì le réjistrachón di dèrì mèis, eugn
éffé le n'ì fran seuilla.

*Tac ivre lo boursset é, eun prégnèn eun DVD 🍷 pe cou, tsertse
la réjistrachón.*

TAC ... lo dzor di batón d'or... na, lo dzor de la fita de la birra ...
na, ah voualà lo 25 d'avrì !

SENLIQUEUR Bièn, bièn, Pascal prégnade la proua vidéo é fiade-nó
la vère.

*Pascal pren la casetta é chor foua de scène. Veun proyettaye
eunna vidéo iaou le carabegnì ariton Frottapanse, lo maltrat-
ton é, aprì èi fé-lo souflé, déclaron que la valiya l'è de 4.50.*

Teuppe 🍷.

👤 TCHIÈN FROTTAPANSE... 4.50! 👤



Lemie 💡.

Pascal tourne eun scène.

SENLIQUEUR Ah, bièn si cou n'ì prau de proue eun man, me re-
teurio pe désidé, Pascal la caèya pe plèizi.

🏠 FORUM - SIGLA 🏠

Pascal èidze lo dzeudzo a chotre.

Scène VII – ATÉGNÈN LA SENTENSE

Rita se plache i mentèn de la scène.

RITA Voualà l'è arrevó lo momàn di téléfoun-aye ! Dimandèn squeuza se no pouèn pa vo senti tcheut mi sade tellamente nombreu, mi contegnade a proé, se sa jamè. Adón sentèn la premiye téléfoun-aye de oueu... ouè, qui n'en eun leugne ?

Vouése deri le ridó 🧐 : « (Eun cognèn) Ouè, s'i Tchaspeun de Cogne. Bondzó a tuit, Rita t'i toujour pi dzenta, vouillavo diye a Tchièn que dèi remèasì la fenna de mè que lou dzor de la singna de la séchòn de la rebatta eun tchi Pèatse la ramachame tchica veutchou piatro lo record di cattrou é cinquenta lo pourtavo si a Dzéméillàn... aou, te lo raccoumando ! Salì é mersì Rita ! ».

RITA Salièn é remersièn tcheutte Tchaspeun de Cogne pe sa euntéressanta osservachón. Passèn a la seconda é deriye téléfoun-aye de seu matteun ouè, qui n'en eun leugne ?

Vouése deri le ridó 🧐 : « (Avouì acsàn de Fin-is) « Ouè, mondje mondje n'i prèi la leugne Piero, que émosón Rita, 'on de-r-an que aprouo, mondje, mondje ! ».

RITA Si fran contenta pe vo Madama !

« Ouè squezode, mé dze 'i Rina de Féic é, vuoillavo difendre Tchièn eun diyèn que le dou carabegnì a la pla'e de fouété le dzi pourion se compolté tchica miouc avouì le sitouayèn perché son bièn malpoulic. Eun pouteun 😞 a Pascal ! ».

RITA Salì Rina é brao Pascal, euncó ba pe Fin-ise t'a de sucsé eh ? Lo ten di téléfoun-aye l'è fenì pe oueu me diplé, ara no fa allé senti sen que l'a a no diye lo dzeudzo.

PASCAL Vouè Rita.

Scène VIII – EUN FROTTAPANSE A NEW YORK

Pascal va déri la caèya di dzeudzo é soun-e lo campaneun 📞.

PASCAL Tcheu drette !

*Entre la femalla di maquiadzo avouè lo cartel « TCHEU DRETTE ».
Entre lo dzeudzo.*

SENLIQUEUR Mersi Pascal. Adón diyo que lo cas l'è pi lèin-o de sen que pensao. L'articlo n. 35 bis comma trèi di *Code civil* prévèi que le proue *audio é video* van trèi cou sen que vatte eunna temouagnanse é son a tcheu le-z-éffé la vêtó é la dimostrachón de sen que l'è capitó si dzor lé. Donque mesieu Frottapanse l'a tcheu le drouet pe demandé son fameu *Guinness dei Primati*.

Son tcheutte countèn eun scène; tchica mouèn le carabegnì.

SENLIQUEUR Mi fenèi pa seuilla. Selón le-z-articlo 39-43-52 di Code pénal, gneun-a aoutoritó pou se permettre de abuzé di pouè, le dou carabegnì Tic é Tac que, dedeun lo filmà djeusto vi, bailloon de caouse é lévoon le man countre si pouo mesieu, dèyon pe loué payè le dan pe la tseuffra de èiro 4000 a Frottapanse :

- 3000 pe le dan moral que v'ouèi fé-lèi ;
- 1000 perqué n'i désido-lo mé, é mé si la loué.

Pouèi l'é itoù désidó. Lo cas l'è cllou.

 FORUM - SIGLA 

Lo dzeudzo chor. Comme douàn, tcheut se tramon i mentèn di palque.

RITA Oh voualà ! Que détchijón l'a prèi noutro dzeudzo. N'ariyo jamè deu-lo é gneunca lo poubleuque l'ariye pensó a tan.

FROTTAPANSE Ah lèi reste bièn, a sise dou !

TIC (*Ver Tac*) Deh que boillón que n'en tchapó ! Le 4000 èiro te le ren pi tcheu té euncó pe mé !

RITA Mesieu Frottapanse si contenta pe vo perqué sise dou carabegnì se meuton maque so. De gran malédecó !

M.ME TISSOT Vouè si contenta euncó mé pe vo, vi que v'ouèide tsertcha-me tanque aoutro a New York; oumouèn n'i pa fé eun vouayadzo pe ren.

FROTTAPANSE É ara pe lo *Guinness*? Senque fa fé?

M.ME TISSOT Mesieu Frottapanse, sitte l'è eun atéstà que dimoutre la valeue di voutro *record* é seutta...

Pascal lèi pase eunna grousa botèille .

M.ME TISSOT ... l'è lo pri que vo porto a non de l'assembló NRGW *National Record Guinness of the World* pe vo euncoradji a ameilloré euncó de pi voutro *record*! Mogà pe arrevé a eun dzen sinque i pallontcheun! Vo attègno a New York deun mon ouficho pe légalizé lo tot.

RITA Ouè réjie fièn eunna foto!

Rita, Tchièn é madama Tissot s'aprotson é sourion pe fé la foto.

RITA Mesieu Frottapanse vouillade diye quèitsouza a propoù de la sentanse?

FROTTAPANSE Si bièn contèn perqué si poui lo premì Frottapanse fameu deun lo mondo é seurtoù lo premì Frottapanse que vat a New York!

RITA Ouè mesieu é rappelade-vó de prédji de noutra trasmechón can vo dimandoun pi de voutro *record*.

FROTTAPANSE San doute Rita 😊. Poui pa vo oublì.

RITA Bièn adón mé vo remersio é vo salio. Complemàn! Salì!

Tcheu chorton, mouèn que Rita é Pascal.

RITA Adón Pascal n'en fenì!

PASCAL Ouè, l'è itaye diya pe seuilla.

RITA Eh vouè, spèrèn que bièn de dzi l'issan vi-no perqué la poun-taye de oueu l'iye cheur pa da pédre. Adón salièn tcheut, a no revèrè demàn mateun a la mima aoura. Salì a tcheut!

PASCAL Poudzo !

 FORUM - SIGLA 

 TSI LA TÈILA 

Derì le ridó

Collaborateur

Flavio Albaney

Ester Bollon

Paola Lucianaz

Aldo Marrari

Fabrizio Pession

Livio Viano

Valentino (lo tecnisièn de Livio)

Miji

Diego Bollon

Souffleur

Valeria Brunod

Tramamoublo

Jean-Pierre Albaney

Louis Bollon

Jerome Saccani

LA VATSE DE L'UNIVERSITOÙ

Pièse icrita pe Le Digourdi

Téatro Giacosa de Veulla, 6 mi 2011

Le Digourdì di 2011



Drette: Joël Albaney, Simone Roveyaz, Jasmine Comé, Francesca Lucianaz, Marco Duchy, Ilaria Linty.

Achouatou: Paolo Cima Sander, Laurent Chuc, Giada Grivon, Joëlle Bollon, Ester Bollon, Pierre Savioz.

🧑‍🎓 LA VATSE DE L'UNIVERSITOU 🧑‍🎓



Lo souvenir de l'acteur

« L'è itaye la premiye pièse iaou n'en vouli cloure la counta avouè eun messadzo émouvàn. L'è itó bièn drolo cloure de seutta fasón... lo pebleuque se lo attégnè pa é euncó no sen senti-no eunna mia foua plase, sourtoù aprì èi fé eunna londze counta que l'ie complètemàn comique.

Can mimo n'ayoon fé eun grou traille, avouè le costume, la réjistrachón eun Cittadella de Waka Watse é la *chorégraphie* que n'en danchà si lo palque. Eun pi, se me troumpo pa, l'è itó lo premì cou que n'en realizó no mimo eunna matse de *scénographie*.

Mi se dèyo fran teri foua lo pi dzen souvenir que n'i, me fa diye que son le botcha de la parotse que, le dzor aprì ou finque aprì de mèis, repettaon noutre battiye, salle que lèi fiaon pi riye ; finque té (Jordy Bollon, N.d.R.) si dzo que sayò pasoù te veure t'ayè deu-me, si la louye, « Areuvvo, prègno l'achenseur », eunna di battiye di pouo Tchièn Frottapanse !

L'ie cheur plèizèn veure la sale di Giacosa plèin-a de dzi (é le premi-z-àn no no lo attéгнаon cheur pa), mi la soddisfachón pi grousa l'ie comprendre que t'ayè quetoù eun vrèi souri, de grouse riaye, de-deun le dzi. »

Pierre Savioz

Queriazouzitou

- Waka Watse l'è itaye la premiye *cover*¹ di Digourdì. Avouè seutta tsansón le Digourdì l'an euncó réalizoù, pe lo premì cou de leur istouère, eunna *chorégraphie* que l'an danchà i mentèn de seutta pièse.
- La *chorégraphie* de Waka Watse l'è itaye repropouzaye i ma-

1. Deun lo 2009, l'ie itaye djeusto réjistraye la parodi d'eun *refrain* publisitère.

riadzo de Fabrizio Pession é Paola Lucianaz.

- Deun la *vidéo* Catalogue Bœuf n'at eun bitchouli que pe eun per de seconde arrevée pa a comprendre comèn eun bou piémontèis pouè prédji devàn eunna machin-a di reprèize !

Scénographie

A gotse, pe la mèizón di lasì :

- 1 tsaoudée ;
- 1 tabla  avouì desì an matse de papi é documàn ;
- 2 caèye de bouque  a l'entor de la tabla ;
- 1 scaffal avouì eunna bouite de caille pe fé lo fromadzo, de platte, de tasse, eunna botèille de rodzo é de vèyo ;
- 1 modeun de la caillà ;
- 1 sidel di lasì ;
- 1 devella piastrellaye avouì eunna fin-itra, de fasón que se pousse vère qui pase dérì.

I mentèn :

- 1 chouta de bouque ;
- 1 batchì ;
- 1 radió .

A drèite, pe lo parque di vatse :

- De bale de fen ;
- 1 arieuza² ;
- 2 rètse pe apeillì le vatse ;
- 1 icaoa  ;
- 2 saque de letsón ou de *mangime*.

2. Lamèn la querì euncó trepeullalasì.

 PERSONADZO

SAHLAM	Maroqueun aouri de Tchièn, todzor avouè la baquette eun man, eunterprétoù pe PAOLO CIMA SANDER.
PICCINA	Rèina di lasi, blantse avouè de tatse maròn, calma é avouè bièn d'ichèn, eunterprétaye pe JOËLLE BOLLON.
COBRA	Rèina di baou, nèye, aggressive é todzor presta a féye de djestre, eunterprétaye pe ESTER BOLLON.
TSARDOÛN	Rèina ville, tsatagnaye, bièn saventa, eunterprétaye pe FRANCESCA LUCIANAZ.
TCHIÈN	Propriétéro di vatse, ommo de Iolanda é pappa de Simon, eunterprétoù pe PIERRE SAVIOZ.
IOLANDA	Fenna de Tchièn, mamma de Simon, comandanta é déterminaye, eunterprétaye pe JASMINE COMÉ.
SIMON	Garsón laoureoù de Tchièn é Iolanda, l'a pa tan voya de se pouertchi le man, eunterprétoù pe LAURENT CHUC.
MARIETTO	Pantalón tanque a l'amboueuille ³ , bretelle de pap-pagran é tsapè rodzo eun tita. L'è l'amè de Tchièn, lo vezeun di mitcho todzor contèn é pozitiv, eunna mia tro queriaou, eunterprétoù pe JOËL ALBANEY.
CHEF	
MOTTINHO	Lo cape de l'équipe spésialla di vétérinéro, eunterprétaye pe ILARIA LINTY.

VET.

GILLES

³. Lamèn lo queri euncó botón di ventre.

Vétérinéro d'orijine amériquène, bièn sportif, spécializoù eun sosyalizachón é mouvemàn de la vatsse, eunterprétaye pe GIADA GRIVON.

VET. SCHULZ Vétérinéro d'orijine tédesque, spécializoù deun la psicolojì de la vatsse, eunterprétoù pe MARCO DUCLY.

VET.
TRINCHERO Vétérinéro jamaiquèn spécializoù deun l'alimentachón de la vatsse, eunterprétoù pe SIMONE ROVEYAZ.

ACTE I

🏠 SE IVRE LO RIDÓ 🏠

Scène I – COBRA, PICCINA É TSARDOÛN

La scène l'è divijaye eun trèi partiye : d'eun couti, a drèite, lo parque di vatse eun stabulachón libra ; i mentèn eunna péгна chouta avouì le bague que se eumplèyon de couteumma i baou ; a gotse eunna devella que pourte a la mèizón di lasi. Dedeun la quezeun-a n'at eunna tabla plèin-a de papì é documàn, avouì déri eunna tsaoudée iaou se feré lo lasi.

Entre deun lo parque lo bitchouli, aprì le vatse : Cobra, Piccina é Tsardoùn. Se vèi maque lo maroqueun que avèitse foua scène é prèdze avouì le vatse 🍷🍷🍷. Se sen lo

🏠 BORELLO 🏠

*di vatse*⁴.

SAHLAM Veun seu veun ! Veun seu veun ! Alé, sah, ommo, que fa arrevé i parque. Ommo Dik ! Va ba déri ! Maladetto d'eun tseun, m'acoutte pa... Sa, sa, Tsardoùn, alé ! Boudza-té-vèi !

*Entre totta flappa la premiye vatse*⁵.

SAHLAM Mondjemé se fisan totte lente comme té n'ario cheur jamì lo flou queurt. Cobra, Cobra !

4. Lo son de la vatse (*muggito*).

5. Pe rendre l'euninterprétachón bièn pi téatralla, totte le vatse se boudzon si do pià/patte 😂.

Entre la secounda vatse é euncó lleu tsemin-e flappa eun gan-tèn la tita. Eunsemblo a Tsardoùn se proméon douàn lo palque é de tenzentèn se frotton eunna countre l'atra ou desì de bale de fen.

SAHLAM Veun Piccina, euncó té. . .

Entre la trèijima é dérì vatse. Comme le-z-atre l'a la fiacca de tsemi.

SAHLAM . . . saye lleu.

Sahlam entre deun la mèizón di lasì pe prendre lo nésesséo pe pouèi aryè. Le vatse son solette é pouon prédjì tranquillemente.

PICCINA Sit maroqueun no queutte pa tranquille eun momàn !

COBRA Vouè t'a rèizón. L'è todzor d'entor é no queutte jamè pequì eun pése.

TSARDOÙN É aprì avouì si tseun 🐕 que l'è todzor dérì a no moudre le zaret. L'è fran gramo. A mé cheurtoù que n'i le pià tan sensiblo é delecatte.

COBRA Mi iaou gramo ? Mé eun dzor avouì ma corna drèita n'i levou-lo desì mé é n'i caya-lo bièn louèn. (Bièn fièira) Eugn éffé a mé reste pa tan protso é fé bièn atenchón.

PICCINA É aprì comenche a itre vioù é chor. Vèyade beun que l'è pi sen que fi de sa tita que sen que lèi diyon de fére.

TSARDOÙN Fé atenchón a sen que te di di viille ! Mé si la pi viille di baou mi salla que sa todzor de pi de vo totte. Rappèla-té que, sensa de mé, vo ariya jamè aprèi eunna matse de bague. Té, Cobra, si pa se te rappèle euncoa : l'an que t'i nèissia, mé é mamma de té allavon bièn d'accor é. . .

COBRA Voualà que torne reprende sise discour stoufiàn pa pocca.

PICCINA Vouè, sen dza totte de salla conta li. . .

TSARDOÙN Reuspé vo doe todzor mouèn ? !

COBRA Can mimo, v'ouèi vi Sahlam? L'è dza torna aoura de no aryì.

PICCINA Fran té te prèdze. Avouì la squeuza di bataille di rèine te queutton pa crèître le teteun é te teurion cheur pa de lasì 🍷 . La fontin-a la féyon avouì mé! (*En moutrèn le teteun*) Avèitsa-mé que mezeua : la satchima!

TSARDOÙN Finque ézajeroù! Pensa que Tchièn, noutro proprié-téro, l'a de foto de mé da dzouvin-a que... le n'ayoù pa magà grouse comme le tin-e, mi bièn pi caraye é diye comme eun bèrio! Atro qué!

Piccina é Cobra s'avèitson.

PICCINA (*Eun se moquèn de Tsardoùn*) Ara te te pouriye fé eun *lifting*! N'i senti que refàn euncó le sen pe le vatse ara.

Cobra é Piccina se beutton a riye.

TSARDOÙN Adón vo dovve vo pouria dza fére demanda : eunna pe beutté oumouente eunna premiye é l'atra pe beutté su de rebeuste bretelle!

PICCINA Te la sa todzor pi londze té!

TSARDOÙN Vouè, l'é fran pouèi. Can mimo seutte machine pe no-z-aryì son pa pouì tan delecatte.

PICCINA Pe ren. Me fan eun mou di matte! Tcheu le cou que me teurie eunna peuppa vèyo le-z-itèile ★😏★😏★.

TSARDOÙN Mi eun dzor ou l'atro salla *machinetta* li no teurie si euncó le teteun. Te vèi pi!

PICCINA Spérèn fran de na.

TSARDOÙN Can mimo mé me rappèlo eun cou can Tchièn me ariave a man! Sen vouè que l'ye dzen. Cheurtoù can n'ayoù de maleusse avouì caqueun ou la dzournoù l'ye pa tan al-laye bièn vèyao pa l'aoua de itre accaéchaye é baillì mon bon

lasì. Sario restaye pouza é pouza a itre patchocaye pe llu. Cheurtoù can baillave campa a sé dzente tsansón... a mé me s'eumplissave lo queur d'amour. Belle se Tchièn l'a jamì tsan-toù a Sent-Or, (*avèitse l'atra*) eh... t'a comprèi... sayè me fiye relassì.

PICCINA Comèn n'ario lamoù passì euncó mé sise dzen momàn. Mé si nèisia caze eunsemblo a si trepeullalasì électric. L'è dèi can si modze que Sahlam eumplèye si machèn avouè mé.

TSARDOÙN T'a rèizón é cheurtoù noutro Tchièn n'en pamì tan vil-lo seuilla i baou. Sembleavì que, dèi can l'è arrevoù sit aourì, llu l'ise queuttoù totte é lèi euntéressise pamì ren de no.

COBRA De mé se euntéresse euncoa. S'i jamì itaye fourtin-aye à pe le concour. Mé si caze chia que saroù Rèina Réjonalla 2011 é n'aret Gueuste que di a Touri de me beutti si dzen bosquet que tan sondzo!

TSARDOÙN Te lame sondjì eh?! Mi acouta Cobra... mi l'è vrèi que t'a de problème a restì prègne? Perqué n'atte de vouése que vouyadzon pe seuilla...

Cobra reste sourprèya de sen que l'a deu Tsardoùn, mi comprèn to de chouite qui l'a fé l'espion : se vionde ver Piccina é la eumbranque pe eunna corna.

COBRA Vouè sarè seutta sé que l'arè de-te-ló.

PICCINA Na, na, si pa mé! 😊 Mi l'a pa d'eumportanse, di maque...

COBRA Ouè l'è vrèi. Mé, dèi can n'i prouvoù Molón, lo bou de la grandze de Marteun, n'i todzor pensoù a llu é djeusto a llu. S'i eunnamoraye fran!

PICCINA Oh poua matasse...

COBRA L'ayè doe grouse-z-ipale, eugn'itsin-a é eun cotzón que fiave pouiye de vère! É aprì de grouse corne!

PICCINA ... é ara?

COBRA ... é ara l'è dou-z-àn que lo vèyo pamì.

TSARDOÛN Cobra, te lo vèi pamì, resta tranquila. Seuilla te fa pa te eunnamorì 😊 d'eun bou! Tcheu le-z-àn se tsandze. Eun nouo é dzouveun-o tcheu le cou.

PICCINA Euncó mé sayao eunnamoraye... de Topo!

TSARDOÛN De qui?

PICCINA Topo.

TSARDOÛN Qui?

PICCINA (*Eun braillèn*) Topo! N'ayoù cogni-lo a Gressan a l'Anaborava, mi can n'i si qué que l'ayè trèi meulle mèinoù...

TSARDOÛN Senque? Trèi meulle mèinoù?

COBRA Trèi meulle?

PICCINA Ouè bon... trèi meulle paillette!

TSARDOÛN Ah l'è diffièn!

PICCINA ... é beun n'i to de chouite oublià-lo!

COBRA (*A Tsardoùn*) Pensa 3000 ratte seu dedeun! Can mimo m'euntéresse pa de Topo! Mé vouillo mon Molón!

Scène II – TCHIÈN L'ÉLÉVEUR

Torne Sahlam. Pourte Tsardoùn é Cobra foua di parque. Al-leume la radió avouì de mezeucca arabe é eun tsantèn tsertse d'atatchi l'arieuza a Piccina, que, can lo vèi arrevé, s'ajite.

🏠 CHEB HASNI - A LA BESSE 🏠

Can l'a fenì de beutti su totte, icaoue an mia pe tèra, mi aprì do seconde se beutte protso d'eunna balla de fen é s'eundrumme. Aprì pocca entre deun la mèizón di lasì Tchièn l'élèveur. L'è restoù to lo mateun eun Veulla a fere de commechón é l'è bi-se dza caque apéritif, donque l'è eunna mia gramo. Ren lèi va

bièn.

Se gawe lo paltó é lo tsapí é va ver lo parque pe vère sen que l'è seutta mezeucca que sen. Can areuvve deun lo parque vèi Sahlam eundrumì.

TCHIÈN *(Eun tchouéyèn la radió)* Deh s'i arrevoù !

Sahlam se levve to de chouite eun pià, eun se frótèn le joueu.

SAHLAM Vouè mesieu, bondzor Tchièn !

TCHIÈN Vouè bondzor euncó a té. Vou-te cafilasì é brioche vi que t'i djeusto levoù ?

SAHLAM Na na mersì (*mortifià*) l'iyo eun tren de tsertchè eun ratte  que l'é dza caque dzor que viounde pe seuilla.

TCHIÈN ... é Iolanda ?

SAHLAM Qui ?

TCHIÈN Sahlam, la fenna !

SAHLAM Ah Iole ! Ouè l'è allaye a messa. L'a deu-me de te diye de beutti su l'ive pe la pasta.

TCHIÈN Mi lèi penso ghenca ! (*Bièn arrogàn*) L'è pa eun travaille de mé sen. L'a djeusto de arrevi tchica devàn lleu, pitoù de tchacolé foua de messa avouè le-z-amie ; ou diye i prée de copé an mia lo sermón. Fé todzor de counte si prée...

Entron Iolanda é Simon.

IOLANDA *(Eun braillèn)* Tchièn ! Iaou t'i ?

Tchièn entre deun la lèiti. Dimèn Sahlam conteneuvve a pouliù deun lo parque, mi l'a todzor eun bouigno  que acoute ver la lèiti.

TCHIÈN *(Avouè eun ton bièn pi fèiblo, mouèn arrogàn de douàn)* Oh, Iolanda ! Bièn alaye messa ?

IOLANDA Ouè, t'a beto-nen de ten pe fé totte le commechón de té !

TCHIÈN Eh ouè... euh, lo sermón l'iye-tì dzen ?

IOLANDA Ouè, prochèn cou te pou vî euncó té !

TCHIÈN Na, na ! Pren-te varda, n'ayè eunna quiya a l'AREV !

IOLANDA Imajin-o !

SIMON Pappa ! Di pa de counte foule, te cougnisèn ! Te passe de-z-aoure é de-z-aoure avouì Calliste é Jérôme a bèye de vèyo tanque a noua i Bar de l'Arena.

TCHIÈN Mi deh Simon ! Fé atenchón euncó té ! Oueu l'è pa dzour-noù !

IOLANDA T'ise bi dou blan 🏳️ eun mouèn t'arie tchica pi dzen carratéro.

SAHLAM (*Eun rièn*) Eh, eh, eh, grama seutta eh ?

TCHIÈN Sahlam souplì eh ! Va fenì sen que t'ie eun tren de fère.

SAHLAM Vouè, vouè, to de chouite patrón.

Sahlam tourne a sa plase. Ara l'è eun tren de brochè Piccina.

TCHIÈN (*Eun s'achouatèn a tabla*) Bon ara medjì caque tsouza perqué comencho a avèi tchica d'appetì.

SAHLAM (*Eun rièn*) Eh, eh, eh ! Te fa ichouì sen que t'a bi seu mateun.

Tchièn bièn eunfastedjà, se levve é va aoutre deun lo parque iaou n'atte Sahlam.

TCHIÈN (*Eun desuèn Sahlam*) Eh, eh, eh ! Ano ! Sah, veun avouì mé...

Tchièn pren Sahlam é lo pourte ver la drèite di palque, caze foua.

TCHIÈN (*Eun moutrèn foua scène*) Te vèi ba lé i fon de la toula ? Va ba me tramé la souye ! Ara ! Vito !

SAHLAM Vouè, vouè, galoppo 🐎.

*Sahlam chor foua é queutte Piccina avouì lo trepeullalasì apeillà.
Tchièn salie Piccina avouì eunna caresse é tourne dedeun la
mèizón di lasì. Dimèn Iolanda l'è chortia.*

SIMON Vouè mi pappa, avèitsa que confujón que n'a seuilla. Comèn te fi a comprendre caque tsouza ?

TCHIÈN (*Eun s'achouatèn*) T'a rèizón mi mé dedeun si cazeun si iaou queutto le bague. Resta tranquilo que perdo ren.

SIMON N'isso totte mé eun man seutta baracca !

TCHIÈN Pe ara si euncó mé que désido le bague é (*eun moutrèn la tabla*) vardo bièn mon ouficho.

SIMON Pappa te fa comprendre que mé n'i itedjà ! Mé que si laouréou, si de bague que té t'imagin-e gneunca. T'a jamì senti prédzì de *dematerializzazione* ? Tcheu le documàn allérian deun lo *computer* é d'eunna secounda te trouveriye totte sen que t'a fata.

TCHIÈN Acouta-mé, va euncó to bièn pouèi, n'i pa fata de novitoù.

SIMON Pappa l'élèveur de oueu l'é pamì si de 20 an fé ! T'ioù lo comprendre ?

TCHIÈN Pequé ?

SIMON Comèn pequé ? Aya l'è to diffièn !

TCHIÈN Argh acoutta Simon, n'i pa fata de nouvotó ! Pappa l'è contèn pouèi... é seunséramente se t'isse pa fenì de itedjà a 40 an t'arie poui me éidjà tchica devàn pe seuilla. N'ario cheur pa avì fata de prende Sahlam !

SIMON Mi pappa ! Mé n'i itedjà ! Mé si laouréou ! Mé pourio jamì fére lo travaille de Sahlam. Mé n'i itedjà ! Te vou lo com-

prendre ?

Scène III – MARIETTO

Marietto areuve a la fenitra  é vèi le dou achattoù a medji.

MARIETTO Oué Tchièn !

TCHIÈN Oh Marietto ! (A Simon) L'a senti lo flou di medji.

MARIETTO Veugno dedeun Tchièn ?

TCHIÈN Vouè, veun, fé lo tor...

Marietto fé lo tor é entre.

MARIETTO Eh le-z-amì ! Adón comèn l'è ?

TCHIÈN Amoddo. Te me semble eun priye que cougnisavo : are-vave todzor fran a l'aoura de maenda pe bailli la bénédichón i mitcho. Comme eunna moutra souisse !

MARIETTO Ah, é té Simon ? Te martse l'icoula ?

SIMON Icoula ? ! Marietto, l'é pa fran eunna icoula...

MARIETTO Vouè é comèn te vou la crii ?

SIMON Te sa Marietto totte le pi grouse veulle di mondo l'an eun eumpourtàn *Centre d'étude*. L'è fameuza l'Universitoù de Toronto, Boston, Il'è la Sapienza a Romma, la Bocconi a Milan é... la Testafochi eun Veulla !

MARIETTO Mi pensa té ! Ah vouè n'i vi lo téléjournal. Pensa Tchièn que can n'i senti predji de *campus* eun Veulla n'i pensoù que l'isan fé eun grou courti pe tcheu le Veullatchi. Can mimo t'a belle fenì le-z-iteudzo ?

SIMON Vouè caze. Me mancon djeusto trèi ou catro izamèn.

MARIETTO L'ye beun l'aoura ! Mé é Tchièn l'ian stouffie de travaili to lo dzor eun campagne. Pe fourtin-a si cou t'i euncó té que te no baille eunna man.

SIMON Mi pensa-lèi gnenca ! Mé n'i itedjà ! Mé si laouréou ! Mé n'i dza eunna idi de sen que fiye pe seutta fameuille. Mé vouillo jesti !

TCHIÈN Jesti ? !

MARIETTO Deh Tchièn t'a fé eun botcha bièn feun ! Va savèi vio de sou te fé poui.

TCHIÈN Soupli va !

MARIETTO Deh m'achatto ! (*Eun s'achouatèn*) Mi te meudze totte a sèque ?

TCHIÈN Avouè té l'è eumpoussiblo. (*A Simon*) Deh laouréou ! Va què lo veun !

MARIETTO Ouè va què lo veun a pappa !

SIMON (*Démoralizou*) Ouè pappa ! De rodzo ?

MARIETTO Ouè va bièn !

Simon soumón dou vèyo de rodzo 🍷🍷 a Marietto é i pappa.

SIMON A pappa betèn mèitchà vèyo...

TCHIÈN Ouè, ouè pa de pi.

MARIETTO A Marietto beutta mai plen !

SIMON ... é queutto sé la botèille 🍷 pe Marietto !

TCHIÈN Simon aprè beutta tchica eugn ordre seutta tabla plèin-a de papi.

SIMON Ouè pappa.

Simon, dimèn que Marietto é Tchièn fan la counta, beutte eugn ordre le papi.

MARIETTO (*A Tchièn*) T'a de novitoù desè Cobra ? L'a tin-ì lo bou de Ginetto ?

TCHIÈN Mi na, ren ! Nen prédzavo fran si mateun avouè Jérôme é euncó llu di que n'i prouvoù de totte é ren a fére.

MARIETTO Tchica te le eumplèi de *mangime*. Trop, can l'è trop l'è trop !

TCHIÈN Si pa te diye comèn. Si djeusto que l'è dou-z-àn que me queutte sensa vi. L'è pa poussiblo. Se fisse pa tan grama n'ario cheur pa vardou-la.

MARIETTO Grama ? ! Dedeun ton baou ? T'a maque de croué vat-chine !

TCHIÈN (*Caze avouè le larme i joueu* 😞 *é eun se levèn*) Queutta-mé pa plèizì. Te sa bièn comèn teri si lo moral di-z-amì té.

MARIETTO Squersavo, squeza-mé ! Veun sé !

Tchièn se nen va ver lo parque.

Scène IV – N'A MANCA DE LASÌ !

Tchièn deun lo parque vèi arevé Sahlam avouè eun sidel de lasi demì vouido.

TCHIÈN Mi l'è to li lo lasi ?

SAHLAM Vouè. N'a pa de gran bague.

TCHIÈN Avèitsa seuilla Marietto. Gnenca de lasi n'i, pamì ren. Va totte todzor pi mal ! Le vatse rendon fran pamì comme eun cou.

Marietto va vère dedeun lo sidel.

MARIETTO Mi fran ren... é mé que si euncó vèi pe te dimandi tchica de lasi. Ara ouzo pamì. Se te lèi beutte dou biscouè 🍪 lo mateun t'a belle feni-lo !

Tchièn gante la tita. Sahlam va vouldji lo lasi deun la tsaoudée.

MARIETTO Sah alèn no chouaté !

TCHIÈN Ouè fé maque comme se te fise i mitcho de té !

MARIETTO Ouè, ouè veun maque !

Tchièn é Marietto s'achouatton tourna a tabla.

MARIETTO Bon a par le squerse Tchièn t'a beun rèizón. É aprì seutte vatse san pamì sen que peucon : d'iveur peucon, can va bièn, sinque caletou de fen, si de plan, si di mayèn, lo piè-montèis, lo fransé é lo sanfouèn di-z-Ile !

Dimèn Sahlam pourte foua Piccina.

TCHIÈN (*Démoralizou*) Eh, lo si praou !

MARIETTO É le *mangimi* ? Sen-nó senque lèi beutton dedeun ?

TCHIÈN Cheur que na !

MARIETTO Te vèi beun que tcheu le momàn nen accapon : caque fabreuque que trafeutson le *mangimi* avouè le pouse de mabro ou de faène drole.

TCHIÈN (*Acabloù*) Eh...

SIMON (*Fier de llu*) Pappa ! T'isse deu-me devàn de tcheu sise problème, mé pouavo fé quetsouza. Mé que n'i itedjà, n'ayò la soluchón !

TCHIÈN Acouta, mi pe plèizi, mi queutta-mé pédre, té é ta icoula !

MARIETTO Mi ouè queutta ité pappa.

SIMON Pappa, crèi-mé, mé si sen que fé de noutre vatse.

TCHIÈN ... é senque te vourie fé ?

MARIETTO ... é senque te vourie fiye ?

SIMON Adón mé, mé... mé que n'i fé de-z-iteudzo tchica économique poui pa fére tan pe seutta situachón. Mi n'i de-z-amì djeusto laouréou que l'an itedjà sen que servèi a no.

TCHIÈN ... é pe senque ?

MARIETTO ... é pe senque ?

SIMON Se te me baille papì blan pe le vatse, te spleucco totte de seu a eunna pouza.

TCHIÈN Papì blan ? Mi t'i ià de tita !

MARIETTO Mi Tchièn n'en prouvoù eunna blita de bague pe noutre vatse !

TCHIÈN Noutre ? 😏

MARIETTO Ouè le min-e, le tin-e... ouè de no ! Prouvèn sen que te di lo garsón !

SIMON Ouè pappa, dai !

MARIETTO (*Eun baillèn eun cré creppe si l'ipala de Tchièn*) Dai !

TCHIÈN Te di ?

MARIETTO (*Tourna eun baillèn eun cré creppe*) Dai !

TCHIÈN É beun... Vouè... prouvèn euncó so.

SIMON Adón pappa vou tchertchè sise vétérinéro que n'i deu-te é no véyèn de seu a pocca. Salì ! Salì Marietto !

Simon chor.

MARIETTO Te vèi que me fayè itedjì euncó mé.

TCHIÈN Mi ouè té ! L'ian d'atre ten can l'ian dzouvin-o no, Marietto ! Aprì Marietto fa diye que qui pou savèi di vatse de pi que no dou ? De botcha vétérinéro ? Ah, ah, ah !

MARIETTO Ah, ah, ah ! É adón... santé !

Marietto, douàn que levé lo vèyo, lo eumplèi tourna de rodzo.

TCHIÈN L'è bon si rodzo eh ! Santé !

Le dou bèyon eun creppe.

TCHIÈN Te sa senque pourian fé ara ? Alèn ba i parque, te fiyo vére Cobra : mondjeu que dzenta que n'i aprésto-la ! L'è presta pe lo conçoù ! Veun veure !

Le dou van ver lo parque. Douàn de chotre euncrouijon Sah-lam que entre deun la lèiti.

SAHLAM (*Eun se plégnèn*) Todzor a fé la conta sise dou li ! Mimi é Coco ! Travaillì todzor le mimo !

Sahlam avèitse la tabla 🏠.

SAHLAM Ah lasì pocca, touteun de veun !

Sahlam pren eun di dou vèyo é agoutte.

SAHLAM Bon deh !

Aprì èi bi eunna goloù, Sahlam vouldze lo sidel demì plen de lasì deun la tsaoudée é beutte an mia de caille.

SAHLAM Adón comme di Tchièn, eun tchitchareun de caille eun poussa pe 300 litre de lasì. . . (*Avèitse douteu le pocca litre de lasì*) prouèn can mimo a beuté eun tchitchareun é vèyèn comèn vat !

Pe queriaouzitou Sahlam gneufle la bouite di caille, mi to d'eun creppe iternèi é to lo caille fenèi dedeun la tsaoudée.

SAHLAM Oh mondjeu senque n'i combinoù ! To lo caille dedeun 20 litre ! Fa to de chouite viondì !

Pren lo modeun é viounde lo lasì, mi aprì do seconde lo lasì veun deur comme de bèrio 🍷 é Sahlam areuve pami a teri foua lo modeun.

SAHLAM Oh a forse l'a caillà !

Avouì totte sé forse arreuve a teri-lo foua ! Lo beutte eun caro é s'avèitse a l'entor.

SAHLAM Bon alèn ià de sé !

Sahlam bèi euncó eunna gotta de rodzo é chor ver lo parque iaou euncrouije Marietto é Tchièn.

TCHIÈN (*A Sahlam*) Poste ?

SAHLAM Ouè bièn aloù, pa fé de mou !

Sahlam chor.

TCHIÈN (A Marietto) Sit an le fontin-e son quetsouza. . .

MARIETTO Ah nen si quetsouza euncó mé !

Le dou entron deun la mèizón di lasì, douàn Marietto é aprì Tchièn.

TCHIÈN Entra maque Marietto !

MARIETTO Ouè cougniso lo mitcho !

Le dou s'achouatton a tabla.

Scène V – CHEF D'ÉQUIPE MOTTINHO

Arreuve Iolanda.

IOLANDA Oh Marietto drolo te vère seuilla pe l'aoura de maenda.

TCHIÈN Ouè drolo !

MARIETTO Ouéla Iole ! Vatte ?

IOLANDA Vouè totte amoddo. Te pense de t'arritè euncó oueu a maenda ?

Marietto l'è preste a diye de vouè mi Tchièn lo antisipe.

TCHIÈN Na, oueu na Iolanda. Oueu n'en de grouse novité é euncó bièn eumportante ! Dèyon arrevé avouè Simon, n'en pa lo ten de medjì !

IOLANDA Comme vouillade. Vi que gneun l'a beuttoù si le pate, n'i terià foua di conjélateur de bon cannellón é son djeusto chortì di for.

MARIETTO Mondje le cannellón ! Avouè lo ragoù ?

IOLANDA Ouè !

MARIETTO Avouè la béchamelle ?

IOLANDA Ouè !

MARIETTO (*A Tchièn, eun se levèn*) Adón mé vou avouè... .

TCHIÈN (*Eun tagnèn Marietto pe eunna mandze*) Na, na, Iolanda tracàcha-te pa pe le cannellón ! Le medzèn a sin-a, tante Marietto l'è pi ià !

IOLANDA Ah comme vouillade, le meudzo pi tcheu mé !

Iolanda chor é Marietto, bièn eunfastedjà 😞, se gave lo tsapì, lo boueuche countre la tabla é s'achouatte démoralizòu. Eun mimo ten, di couti di parque, entre Simon avouè lo fameu Chef d'équipe Mottinho.

SIMON (*Eun braillèn*) Pappa, pappa !

TCHIÈN Mondjeu, mondjeu l'è Simon, l'è arrevoù avouè le vétérinéro ! Veun Marietto, vito !

MARIETTO Ouf, oueu sen totte a galoppe !

Tchièn é Marietto, a galoppe, van ver lo parque.

SIMON (*Eun braillèn*) Pappa, sitte l'é lo vétérinéro Mottinho.

MOTTINHO (*Eun baillien la man a tcheut*) Bondzor a tcheut.

SIMON (*Emochon-ou*) Bondzor !

MARIETTO Marietto !

MOTTINHO Mé si lo Chef d'équipe Mottinho. N'i prèi satte *lauree* é s'i eun di pi capablo é aprestoù vétérinéro de la Val d'Outa. Si seuilla a voutra dispozichón pe rezoudre tcheutte voutro problème avouè le bitche pe djeusto 128 *euro* la meneutta.

MARIETTO (*A Tchièn*) Eunna fontin-a la meneutta. Que onéto !

Dimèn areuvve euncó Sahlam que icaoue l'entrada de mèizón.

TCHIÈN (*Eun prégnèn Simon a couti de llou*) Acoutta Simon, (*tracachà*) me semble tchica tcheur !

SIMON Mi pappa ! Te dèi pa avèitchi l'aspé économique. Te sa beun comèn van seutte bague : lèi queuttèn poui djeusto eun papi que l'è restoù avouì no é la Réjón no paye poui caze totte.

TCHIÈN Ah bon se l'è pouèi. Bon, adón. . . (*eun s'avèitsèn a l'entor*)
Sahlam !

Sahlam, que l'iye eun tren d'acouté, se beutte si l'« attenti ».

SAHLAM Vouè !

TCHIÈN Mi que te fé li dret ?

SAHLAM Sayoù eun tren d'icaoué !

TCHIÈN Mi te vèi pa que l'è arrevó lo vétérinéro ?

(*Malechà* 🙄) Pourta eun sé le bitche ! Fé-me pa fé seutte fe-gueue !

Marietto, que l'è todzor i mentèn di pià, fé euncó llou semblàn de reprodjì Sahlam.

Sahlam chor foua eun galopèn.

MOTTINHO Bon tornèn a no ? Mesieu Tchièn, v'ouite vo eh ? Bièn, voutro garsón l'a spleuccou-me tchica la situachón é adón n'i pourtoù avouì mé le tecnisièn que me servisavon de pi. Pouì le fé euntri ?

TCHIÈN Ouè, ouè !

MOTTINHO Adón vo le prézentó : vétérinéro Gilles vegnade !

Entre eun galopèn lo vétérinéro Gilles. Ite jamì rito é saou-taille to lo ten. La la blouza di medeseun, mi dézó l'è arbeillà sportivamente.

GILLES (*Eun sarèn la man a Tchièn*) Hi ⁶ Tchièn !

TCHIÈN V'ouèide prisa ?

6. Liye eun anglé. Si vétérinéro salieré todzor eun anglé.

GILLES Na, na! (*Eun salien Marietto*) Hi!

MARIETTO Hi!

Gilles se plache protso de Mottinho.

MOTTINHO Lo secón l'è vétérinéro Schulz!

Lo vétérinéro Schulz entre.

SCHULZ (*Ver lo pebleucco, eun bouéchèn for eun pià 🦶 pe téra é avouè acsàn tédesque*) Ai!

Lo vétérinéro Schulz salie Tchièn é Marietto eun sarèn la man.

SCHULZ (*A Tchièn*) Ai!

SCHULZ (*A Marietto*) Ai!

MARIETTO (*Eun braillèn di mou pe la man tro saraye de Schulz*) Ahi!

Schulz se plache protso de Gilles.

MOTTINHO ... é lo trèijimo l'è vétérinero Trinchero!

Entre lo vétérinéro Trinchero avouè le-z-infradito, pantalon-tcheun tanque le dzegnaou, pèi rasta é bounet jamaiquèn.

TRINCHERO (*A Tchièn*) Salù!

Lo vétérinéro Trinchero salie Marietto avouè eun djouà di man juvenile : se baillon lo sinque, deun couti é de l'atro, é eun creppe de panse eun countre l'atro. Apri èi salia, lo vétérinéro Trinchero se plache protso di-z-atre collègue.

MOTTINHO Voualà, ara vo prèdzon de leur spésializachón. Vo dou (*a Gilles é Trinchero*) alade maque vo presté dimèn que comenchèn avouè Schulz.

Le vétérinéro Trinchero é Gilles chorton.

MOTTINHO Simon alèn veure sise papì 📄 que t'ayè deu-me?

SIMON Ouè alèn veure !

MOTTINHO Bièn. (A Tchièn) Fiade entré le vatse !

*Simon é Mottinho entron deun la mèizón, eun quetèn solette
Tchièn é Marietto avouè lo vétérinéro Schulz. Dimèn, to todzèn,
Sahlam pourte le vatse eun scène.*

Scène VI – VÉTÉRINERO HERMANN SCHULZ

SCHULZ (A Tchièn é Marietto) Salù ! Adón mé si lo docteur vétérinéro Hermann Schulz é si laouréou eun psicolojì de la vatse é stress di baou. I dzor de oueu l'è eugn argumàn todzor pi eumportàn pe la bon-a calétoù de la rase.

TCHIÈN Ah...

SCHULZ Pouè comenchì ma térapì ?

TCHIÈN Vouè, vouè, fiyade maque.

SCHULZ Adón n'i djeusto fata de tcheu vo pe beutti-me voutre vatse totte a l'entor de mé. Comme eun serclle.

MARIETTO (A Tchièn, a basa vouése) Me semble eunna bagga tchica drola a mé.

TCHIÈN Marietto ! Lèicha travaillì lo vétérinéro ! Pitoù va baillì eunna man a si Sahlam lé !

Marietto èidze Sahlam a plachì le vatse douàn Schulz.

SCHULZ Adón comenchèn avouè Cobra. Di-mé viyo de-z-àn t'a ?

COBRA Meuh !

SCHULZ Bièn, ouette !

Tchièn réajèi ibai 😬 !

TCHIÈN Ouè mi lèi crèyo pa !

SCHULZ É di-mé perqué t'a de problème de t'accoblì avouè de bou ?

Cobra di quetsouza i bouigno de Schulz. Euncó Tsardoùn é Piccina diyon quetsouza eun secré a Schulz.

SCHULZ (A Tchièn) Squezade, pouide torni tcheut deun la mèizón di lasì perqué la vatse l'a de problème a predzì avouì totte seutte dzi.

TCHIÈN Le vatse l'an de tracasse a prédjì ?

SCHULZ (Todzor avouì acsàn tédesque) Ouè ! Le vatse l'an de tracasse a prédjì !

TCHIÈN (Mortifià) Oh, squezade ! Marietto, Sahlam ! Quetèn lo vétérinéro prédjì avouì le vatse.

MARIETTO Mi mé vouillavo djeusto senti sen que l'ayè a lèi diye.

TCHIÈN Sah, Marietto ! Veun que te voueudzo eun vèyo !

MARIETTO Ah ! Areuvvo !

Se nen van tcheutte deun la mèizón, mouèn que Sahlam que chor foua ver le pro a drèite, é queutton le vatse avouì lo vétérinéro que lèi prèdze.

IL RITORNO DEL RINGO - NAZCA

Lo vétérinéro Schulz acoutte totte le vatse, que, sensa prédjì, maque avouì de jeste, se plègnon de sen que va pa. Aprì èi acoutto-le totte é trèi, le ipnotize avouì de movemèn de la man que le trèi vatse chouivèison euntsantaye. A la feun de la mezeucca, Schulz fenèi sa térapì é le trèi vatse son deun eugn età de transe : son rite é baoudzon maque la tita a drèite é a gotse. Schulz criye Simon, Mottinho, Tchièn é Marietto, que sayoon eun tren d'avèitchi de papì deun la mèizón di lasì.

SCHULZ Vegnade maque.

TCHIÈN Ouèi fé ?

SCHULZ Ouè !

Marietto é Tchièn galoppon ver lo parque.

TCHIÈN (A Schulz) Ouè diade-mé queun l'è lo problème.

SCHULZ De problème n'a tan. Le vatse l'an fran perdi leur caractéro é se senton sfruttaye sensa pami eunna rèizón de viya é, cheurtoù, vouillon chédre leur lo bou.

TCHIÈN Mi... comèn fiyo ?

MARIETTO (*Todzor i mentèn di pià*) Eh, comèn ?

SCHULZ Tracachade-vó pa ! N'i totte. Adón (*avèitse le vatse*) Cobra, Piccina é Tsardoùn !

Le vatse son euncó deun eun età de transe, mi Schulz, avouì eun claquemèn ☞ di dèi, le fé tourni deun lo prézèn.

SCHULZ Ara vo fiyo vère le bou que n'en a dispozichón é vo vo lo cherdéré. Tot comprèi ?

Cobra, Piccina é Tsardoùn repondoun avouì eun « meuh » !

SCHULZ Bièn, adón vidéo !

Comenche eunna vidéo iaou trèi bou difféèn se présentent : lo bou chouisse, bièn fier, dzen, prestàn é rebeusto ; lo bou piémontèis, drolo mi seumpateucco ; lo bou valdotèn, croué bagga é finque tchica euntredeutte.

Teuppe 💡.

👤 CATALOGUE BOEUF 👤



Lemie 💡.

SCHULZ Adón, mé firiyo chédre pe premiye a la rèina di baou. Cobra totse a té ! Queun bou t'a cherdì ?

COBRA (*Eun moutrèn Boston*) Meuh !

SCHULZ Ah t'a cherdì Boston, lo bou chuisse. Piccina ara totse a té, vi que t'i la rèina di lasì. Queun bou t'a cherdì ?

PICCINA (*Eun moutrèn Birillo*) Meuh !

SCHULZ Bièn ! Birillo, si piemontèis. Voualà que a Tsardoùn totse Tanteun, lo bou valdotèn.

Tsardoùn l'è bièn ba de moral é plaoue.

SCHULZ (*Eun soladzèn Tsardoùn*) Tracacha-té pa ! Te vèi pi que l'aré bièn de caletou catchaye ! (*A Tchièn*) Bon mé sé n'ario fenet, n'i djeusto fata de eunna бага : que vo a feun senà m'atsetade pe voutre vatse eun ordinateur portablo ; pouai l'an pi comoddo se cougnitre avouì le bou cherdì... pe mézo de la *chat* !

TCHIÈN De tsat ?

SCHULZ La *chat* !

MARIETTO (*A Tchièn, eun fièn seumblèn de savèi*) Ouè mi deh, la tchat !

TCHIÈN (*Dizorientou*) D'acor comme vouillade !

SCHULZ Tracachade-vó pa ! Váyade aprì que rezultà aprì to so ! Adón mé marco le-z-aoure beutto trèi, fiyèn cinque va, tante no paye la Réjón. Va bièn igale ?

TCHIÈN Vouè, vouè, va bièn, fiyade vo que vo sade.

Schulz sare la man a tcheutte é se nen va. Dimèn Simon é Mottinho chorton de la mèizón di lasì.

SIMON Pappa t'a vi ? So vouè que l'è lo tsandzemèn que te prédzavo. Te te ren contcho iaou pouèn arrevì no que n'en itedjà ?

TCHIÈN Vouè, vouè. S'i fran vioù.

MARIETTO Ah ouè, t'i fran vin-ì vioù !

Scène VII – VÉTÉRINÉRO GILLES

MOTTINHO Vouillèn veure lo secón vétérinéro ? Lo ferio entré é véyèn sen que no di. Vétérinéro Gilles, vegnade !

Entre eun galopèn lo vétérinéro Gilles. Marietto saoutaille comme Gilles.

GILLES Bondzor a tcheutte. Mé si lo docteur vétérinéro Gilles, frique frique d'étude. Si djeusto laouréou eun sosializachón é mouvemèn pe la vatse.

TCHIÈN Pe la vatse ?

GILLES Ouè pe la vatse !

MARIETTO Pe la vatse !

GILLES Ouè, adón, seutte vatse le vèyo tan tan rèide. Leur l'an fata de caro...

MARIETTO Caro !

GILLES ... é de caqueun que le idjisse a fé chotre la voya de vivre !

TCHIÈN Voya de vivre ?

MARIETTO (*Todzor eun saoutèn comme Gilles é bièn euntouziaste*)
Mi ouè, la voya de vivre !

GILLES Adón mé n'i dza aprestit eunna mezeucca avouè eun course que pou le-z-èidjì a itre pi sportive !

MARIETTO Sportive !

TCHIÈN Sportive ?

GILLES Ouè, se v'ouite d'acor mé comencherio la terapè !

TCHIÈN Vouè fiade maque.

GILLES Ok n'i djeusto fata de tchica de caro.

Gilles pouze l'abrosaque é teurie foua trèi jupe awouayenne pe le vatse, que, totte contente, se le beutton.

GILLES ... é adón, one, two and one, two, three, mezeucca !

Partèi la tsansón réalizaye pe Le Digourdi :

 WAKA WATSE

Gilles, i mentèn di palque, danche é fé vère le premi pa. Le trèi vatse comenchon a aprende le pa é se queutton alì. Tcheu le-z-atteur (euncó Iolanda, Sahlam, Trincherò é Schulz) se fion prende é comenchon a danchi, mouèn que Tchièn, lo seul que l'è pa tan cheur de to sen que l'è eun tren de capitè.

Fenia la tsansón tcheutte tournon a leur poste, iaou sayòn douàn.

GILLES Ok ! Parfé !

MARIETTO So te pren eh ! Que chouéyaye !

TCHIÈN Vouè, mi squezade vétérinéro mi l'è garanti si produi ?

GILLES Mi ouè l'è garanti. L'è dza lo catrimo baou que viondo seutta senà avouì ma terapì é son tcheutte reustoù contèn.

TCHIÈN Tcheu contèn ?

GILLES Ouè ! Pe la fatteura beutto caque-z-aoure eun pi eh, tante. . .

MARIETTO ... tante paye la Réjón !

TCHIÈN Ouè, ouè, tante l'è la modda de la dzournoù.

MARIETTO Adón ok, salù a tcheutte, salù !

Gilles chor foua eun galopèn.

Scène VIII – VÉTÉRINÉRO TRINCHERO

MOTTINHO Bièn, mé ferio entré lo dèrì vétérinéro, pouèi fenissèn la terapì : vétérinéro Trincherò, vegnade !

Lo vétérinéro Trinchero entre pa.

MOTTINHO Vétérinéro Trinchero, vegnade !

Lo vétérinéro Trinchero areuvve pa.

TCHEUTTE (*Eun braillèn*) Trinchero !

Entre lo vétérinéro Trinchero avouè an flemma que la mèitchà baste.

TRINCHERO (*Bièn relassoù*) Ouè salì, mersi !

MARIETTO Èita-ló !

TRINCHERO (*I vatse*) Mé si lo medeseun vétérinéro Trinchero é . . .

TCHIÈN Squezade ! Si seu !

Trinchero se vionde ver Tchièn.

TRINCHERO Ah ouè. Salì, mé si lo medeseun vétérinéro Trinchero é si lo pi vioù vétérinéro euntre no perché n'i falli voyadzì de-z-àn é de-z-àn pe trovì la soluchón a seutte vatse que l'an todzor de problème. Dièn que si restoù catro, seunqu'an eun Hollande iaou n'i accapoù l'erba 🌿 pi boa pe voutre bitche. Dièn que micllaye avouè d'agroù é de dzén-épì de voutre montagne baille eun prodouè euncomparablo. To so pou prende lo poste di souye que baillade tcheu le dzor a voutre vatse sensa problème.

TCHIÈN Mondje !

TRINCHERO N'i djeusto fata de savèi se v'ouèi fata ara ou pouade attendre caque dzor perché va comme lo pan.

TCHIÈN Vi que sen eun tren fièn totte ara !

TRINCHERO Bièn. Adón fièn l'ordre desù Internet é deun eun momàn dériye arrevì totte.

Trinchero teurie foua lo portable é fé l'ordre.

TCHIÈN (*A Marietto*) Internet? Te vèi i dzor de oueu que bague?
 Mé que l'iyo euncó acotemoù a alì prendre eun tchi Paolina
 a Gressan le bague que t'ayè fata.

MARIETTO Ah se te pren euncó té Internet lo Pezzoli va clloure.

Caqueun soun-e lo campaneun de la pourta di mitcho.

TCHIÈN Qui l'è que soun-e a mèizón, Simon te va tè?

MARIETTO Ouè va vère!

SIMON Ouè pappa.

TCHIÈN Atégnao ren mé.

Simon entre avouè eun paquet.

SIMON Pappa l'iye lo postiillón que l'a portoù si paquet.

TCHIÈN Ah la fèi n'i comprèi. Seràn torna salle pomate de la «Djeust»
 que pren to di lon la fenna! Se son sen le féo tchapé eun
 vaoulo!

SIMON Mi na pappa! No n'en itedjà! Seutta l'è la tecnolojì : son
 le-z-erbe que t'a djeusto prèi avouè Mesieu Trinchero.

TCHIÈN Mi lèi crèyo pa!

Tchièn baille lo paquet a Trinchero.

TRINCHERO Eh ouè son dza le-z-erbe de mé. Ah, sentade que par-
 feun!

Anneuf lon tcheut.

MARIETTO Mondjemé n'i dza mou a la tita Tchièn!

*Trinchero baille l'erba i vatse. Son de grou canón  que Trin-
 chero aleumme avouè lo briquette . Euncó Sahlam nen pren
 eun.*

TRINCHERO Voualà eunna pe eun. Fa le-z-allemì avouè lo briquet
 é le djouà son fé. Aprì eun dzen momàn de mouvemèn, so l'é
 sen que vo idze a vère to roze. To so se criye térapì Rave...
 Na! Rèina party. N'i euncó eunna mezeucca pe l'occajón!

 JAMMING - BOB MARLEY & THE WAILERS

*Totte le vatsse comenchon a alé d'eun couti a l'atro di palque
comme se fusson drogaye é bièn relassaye. Euncó Trincherò se
relasse. Sahlam é Marietto prouon a pipé euncó leur.*

TRINCHERO Ah, n'i dza comandoù eunna conféchón pe senà pe
to l'an, pouèi v'ouite tranquilo pe tchica de ten.

TCHIÈN Mondjeu !

TRINCHERO Pe la prestachón. . .

TCHIÈN Ouè, ouè, si dza totte !

TRINCHERO Va bièn, salù a tcheut !

Trincherò chor.

MOTTINHO Voualà, ara que vo vèyo pi tranquilo é que seutte bitche
l'an tchandjà plima, me nen allério euncó mé. Vo queutto
maque eun per de papi pe pouèi paì eun 36 comode rate.

TCHIÈN Que jantila !

Mottinho teurie foua de papi é le baille a Tchièn.

TCHIÈN A vo ! Payade maquè avouè calme. Salù é mersi !

SIMON Pappa l'accompagno mé a la porta.

Simon é Mottinho chorton.

TCHIÈN Deh Tchièn ! Avèitsa : vaoulo !

*Marietto se beutte a saouté i mentèn di palque eun bouéchèn
le bri comme se fusson de-z-ale !*

SAHLAM Eh patroùn ! Avèitsa, si to blan Tchièn !

MARIETTO ... é Sahlam l'è vin-ì to blan !

Tchièn sa pa senque diye é le-z-avèitse éton-ouè é deperdù 🤔.

MARIETTO Sahlam alèn ià !

Marietto chor eun vaoulèn avouì Sahlam. Tchièn se beutte le man douàn lo vezadzo, dispéou é preste a plaoué.

Teuppe 🧐.

Vouése derì le ridó 🧡 : « Dou mèis aprì ».

Lemiye 💡.

Scène IX – LA MORALE

Le vatse son tsandjaye. Eun scène n'a doe caèye di solèi avouì le vatse itaoulaye desì é eun ombrellón 🌂. Eunna vatse l'a la bandjèira de la CGIL.

TCHIÈN (*Moral a téra, i pebleuque*) L'é dza tchica que va eun devàn seutta conta é le bitche de mé son todzor pi drole é te areuvve pamì a lèi fi fiye sen que te vou. Avèitsa Cobra, ara que l'é icrita i sindacat bare fran pamì ren. Pa que devàn l'isse itaye eunna gran rèina mi ara eumpeugne djeusto se te lèi promé pe icri sinque potchà de *mangime* pe souye ; é Piccina é Tsardouùn reston to lo dzor i solèi é dèyo euncó atseti-lèi eunna pomatta pe le berleue di solèi. Mi cheurtoù ara que son icrite a la CGIL me baillon lo lasì eun cou pe dzor é djeusto can l'an voya leur... é fenèi pa seuilla. Son doe senà que me queutton pa entrì dedeun lo parque... é perché? Perché le-z-itreuillo pa tcheu le dzor é leur lèi teugnon tan a itre prope. Sise drouet l'an rovin-ou-me-lé. (*Pause*) na mi si cou praou seutta bagga ! (*Malechà é déterminou*) Ara fa tsandjì ! Si cou... ara Simon me sen ! Si cou si botcha va me senti !

Tchièn va dedeun la mèizón.

TCHIÈN Simon, Simon veun seuilla !

SIMON Ouè pappà arreuvo.

TCHIÈN Avèitsa sen ! (*Moutre lo parque*) Avèitsa sen que v'ouèide combin-ou-me i vatse !

SIMON Mi comèn sen que n'en fé ? N'en fé-le resti mioù.

TCHIÈN Ah reston mioù ? Reston trop amoddo ! Si cou la fèi n'i fenì euncó d'avèi eun icouila de lasi pe dzor.

SIMON Mi pappa ! Te fa pa avèitchi vio te ren la vatse, mi se reste bièn avouì le-z-atre é se l'è contenta de sa viya !

TCHIÈN Ouè ! Mi rapella-té que tanque a oueu l'iye euncó mersi a salla péгна icouila de lasi que t'a poui itedji tanque a 40 an !

SIMON (*Pi tracachà pe son pappa*) Mi pappa fa pensì a la nateuva. Fa pensì que leur comme no dèyon itre libre de féye sen que voulon.

TCHIÈN Praou, praou Simon ! N'i fran comprèi que lo mondo l'a tsandjà. Lamao tan lo Simon que l'ayè nou-z-àn é criyave « pappa, pappa pourta-mé ba i baou que veugno avouì té a bailli lo fen a la viille Poudre ». Poudre... te la lamave é lleu lamave té. Te chortave de l'icoula é te galoppa-ve eun tsan pe pouèi la vère é l'accaéchi. T'iye bièn dzouvin-o mi bièn pi sensiblo !

SIMON Mi...

TCHIÈN Acoutta ! N'i desidoù eunna bagga. Le-z-amì vétérinéro dèi oueu queutta-lé maque louèn de si baou é... a si Sah-lam lèi accapèn pi caque d'atre travaille. Si noureun voui lo vardì eunsemblo a ta mamma. Voui lo trailli tcheu le dzor é voui apprèchi le-z-émochón que te fan prouì le bitche tcheu le dzor... que chouèn te baillon bièn pi di dzi...

Derì le ridó

Chorégraphie

Joëlle Bollon

Costume

Roberta Charrere

Ornella Grivon

Mezeucca

Josette Barailler

Tramamoublo

Jean-Pierre Albaney

Louis Bollon

Jerome Saccani

EUN DROLO DE DISTRIBUTEUR

Pièse icrita pe Joël Albaney

Téatro Giacosa de Veulla, 11 mi 2012

Le Digourdì di 2012



Drette: Pierre Savioz, Ilaria Linty, Francesca Lucianaz, Stephanie Albaney, Stefano Vermillon, Joël Albaney, Simone Roveyaz, Giada Grivon, Jasmine Comé, André Comé, Jordy Bollon.

Achouatoù: Jean-Marc Savioz, Étienne Linty, Ester Bollon, Aimé Squinabol, Laurent Chuc, Philippe Vermillon, Marco Ducly, Julie Squinabol, Michel Ventrice, Lily's Galloni, Paolo Cima Sander, Sophie Comé, Joëlle Bollon.

🧑‍🤝‍🧑 EUN DROLO DE DISTRIBUTEUR 🧑‍🤝‍🧑



Lo souvenir de l'acteur

« Me rappello pocca bague di pièse, n'i pa eunna grousa mémouée. Mi can mimo me rappello amoddo comèn l'è nèisiya la compagnì di Digourdì !

L'iye l'an 2007 é sayoo eun tren de guedé pe bèichì ba eun Veulla. S'ayoo presque foua d'Ampaillan can sento a la radió eugn'annonse publisitère d'eunna compagnì téatrale é to de chouite diyo a mé mimo : « mi pequé seu a Tsarvensoù n'en pa eunna compagnì de téatro ? ». Areuvvo i Pon-Sià é acappo le trèi de l'Ave Maria : Giada, Ester é Jasmine. Teurio ba lo finestreun é, tot entouziaste, lèi diyo : « Oh mi pequé fièn pa eunna compagnì téatrale ? An matse de Quemeue nen n'an eunna. Pouèn pa pa èi la noutra ! ». Dèi si dzor gnouo a pompé de dzi pe teri si eunna compagnì. A la feun lo soutièn pi for n'i i-lo de la classe di '84 : Joëlle, Joël, Ester, Jasmine ; aprì n'en euncó terià dedeun d'atre-z-amì : Francesca ('83), Giada é Pierre ('85).

Caque ten aprì no-z-accapèn eun tchi Gidio (restoràn Monte Emilius) pe no-z-organizé é tsertchì d'atre dzouveunno. Sayoon eun tren de no-z-achouaté deun la péгна tsambretta a gotse di ban, can Joël se présente avouè eun que n'ayoon jamì vi : botte blantse (que gneun betè), *jeans* to strachà é polo de la Fred Perry avouè lo colette terià si ! Me présente : « Salì, mé si Laurent » ; « *Ciao, io sono Paolo* ». Ester m'avèitse comme pe diye « mi sitte sa gneunca prédjì patoué ». Eun pi l'iye pi vioù de no !

É beun... sitte l'iye lo super Paolo Cima Sander : l'è itaye la vrèya rivélachón di Digourdì (pa fata de counté véo de cou lo pebleucco l'a riette grase a llou !).

Dèi salla premiye réunió n'en comenchà a no troué pe eunna sala de la viille bibliotèque (eun cou euncó finque pe eunna sala dézò Mèizón Quemeua), pe liye de teste téatral é fée le premiye proue. Eun teste que n'en prouoü mi jamì présenteoü l'è « Piéreun lo stchapeun » !

Aprì fayè chédre eun Prézidàn. Can n'en fé la réunion n'i to de chouite pompoù Joël « Ouè té t'i adatte pe fé lo Prézidàn, t'i fran eun gamba, t'i lo top! » ... é pouèi n'en accapoù qui sariye aloù douàn lo dzeudzo deun lo case saoutisan foua de problème légal.

N'en pa moloù de no-z-accapé é de proué de teste téatral tanque lo dzor iaou sen senti-no preste pe présenté eun premi spettacolo a totta la populachón de Tsarvensoù, lo 17 mi 2008 a la bibliothèque communale. L'entouzasme que n'ayoon l'ye contajeu é lo pebleuque l'a to de chouite comprèi-lo. L'è itoú, sensa doute, l'eungrédiàn secré de noutro sucsé.

Pouèi son nèisi le Digourdì... ah na! Pouèi l'è comèn l'è nèi-siya la compagnì. Mi pequé « Digourdì » é pa « Le compagnón de la fiacca » ou « Le botchassa de Tsarvensoù »?

Eunna nite mé é Simone no no reteriavon aprì eun mariadzo. L'ye beun tchica tar mi n'ayoon pa voya d'alé drimì. Adón désidèn d'ataqué si pe Cogne. Passèn donque i mitcho de Simone pe prende le cllo de la machina. Mé attégnao foua di mitcho é for probablo que Simone l'arè fé de cazeun eugn entrèn i mitcho, pequé, aprì eun per de seconde, sa mamma chor foua si la louye é no di : « Iao alade ? ». Simone lèi repón : « Alèn si eun Cogne ». Dispéraye la mamma no braille : « Si eun Cogne ? ! Fiade pa tro le digourdì ! ». Attaquèn si pe Cogne é dimando a Simone : « Mi senque vou deue digourdì ? » ; « Boh, si pa, mamma me lo di todzor ». Dèi salla nite n'i mémorizòu lo numéró de téléphone de Simone comme « Digourdì » !

Aprì tchica de ten, lo lon d'eunna proua, sen deu-no : « Mi queun non no no baillèn ? ». Aprì trèi meneutte propouzo : « Le Digourdì ! », « Mi senque vou diye ? » ; avèitsèn sen que di lo dichonnéo : « Abile, actif, euntelledzèn » ... « Sen no ! ».

Voualà comèn son nèisi Le Digourdì ! »

Laurent Chuc

Queriaouzitòu

- Pe Jordy Bollon, futur Prézidàn di Digourdi, é André Comé, futur Vise-prézidàn, « Eun drolo de distributeur » représente leur débù deun la compagnì.
- Pe lo premì cou, pouyon si lo palque de mèinoù é de megnotte.
- Pe la majorité di Digourdi, seutta l'è la pièse mouèn dzenta ou que l'a baillà mouèn de sodisfachón.
- Michel Ventrice l'è l'acteur lo pi ansièn que l'isa jamì resitó si eun palque avouì le Digourdi.

Scénographie

- 1 distributeur *automatique* d'éve, ate pi de dou mètre é lardzo trèi pa. L'at eunna brotsetta i mentèn, iaou le dzi pouon teri l'éve. Desi la brotsetta lèi son dji botón pe séléchouï le caletaye d'éve. Eun pi, desi la machina, n'at eun grou pleuro iaou le cantogni micllon de poutreungue pe apresté le caletaye d'éve que le sitouayèn séléchouon ;
- 1 grou lenchoueu pe toppé la machina ;
- Pe le cantogni desi la machina, totte sorte de baradziye pe apresté le caletaye d'éve (1 modeun, pousse coloraye, benzina, erbe...) é de confetti¹ ;
- Pe le sitouayèn : botèille, tsaèn, boteillón (eun vèyo ou eun plasteucca) pe teri l'éve ;
- Pe tcheu le sitouayèn, de tessere pe paï l'éve di distributeur ;
- 1 ribàn de la Val d'Outa, de grouse fosome é 1 Opinel ;
- 1 grou cartel de cartón avouï l'icrita : « SISENSASOU » ;
- 1 banquetta  ;
- 1 pal de la lemiye ;
- 1 cartel avouï icrì de comunicachón pe la populachón.

1. LAROUSS.FR - *Mince rondelle de papier coloré qu'on lance par poignées lors de certaines festivités (carnaval). À l'origine, confetti est un pluriel (confetto = boulette de plâtre frais roulée, confectionnée à la main, remplacée plus tard par un petit rond en papier dans les festivités du carnaval). Ce mot niçois et italien s'est imposé en français comme un singulier.*

 PERSONADZO

ATTILA	Cantognì costó todzor arbeillà eun mandze queurte é avouì tan de-z-àn d'espérianse eun Que-meua, eunterprétoù pe SIMONE ROVEYAZ.
DIEGO	Cantognì dzouvin-o avouì pocca d'espérianse, eunterprétoù pe PAOLO CIMA SANDER.
SEUNTEUCCO	Seunteucco fenna de Tsarvensoù ; fé dzenta fegueua l'è son objectif, déterminaye é senza tracasse pe le trebelachón di-z-atre, eunterprétaye pe FRANCESCA LUCIANAZ.
DON CARMELITO	Don Carmelito, lo préye di péi, eunterprétoù pe JORDY BOLLON.
SERVÀN DE MESSA	Servàn de messa de Don Carmelito, eunterprétoù pe PHILIPPE VERMILLON.
POPULACHÓN	La tsantiì di péi : JOËL ALBANEY, ESTER BOLLON, PAOLO CIMA SANDER, MICHEL VENTRICE ; Lo fotografe ANDRÉ COMÉ ; Lo cap di-z-alpeun : Marco DUCLY ; Dou mèinoù de la <i>Gaie Famille</i> : AIMÉ SQUINABOL é JULIE SQUINABOL ; Le personadzo de la pièse é trèi mèinoù di péi : JEAN-MARC SAVIOZ, ÉTIENNE LINTY é LILYS GAL- LONI.
VALLET DE VEULLA	Vallet de veulla fenna, jantilla é dilijanta, eunterprétaye pe JOËLLE BOLLON.

CLAUDINE	Fenna veullatchiye que pourte ià pe lo péi son pégnò tseun, catchà dedeun la bourssetta, eunterprétaye pe STÉPHANIE ALBANEY.
GIACO	Garsón dzouvin-o é tchica malédecoù, eunterprétoù pe PIERRE SAVIOZ.
GIADA	Femalla que pase pe case protso di distributeur, eunterprétaye pe GIADA GRIVON.
PIERLUIGI	Comandàn di-z-alpeun, eunterprétoù pe MARCO DUCLY.
SEUR CLARETTA	Seur que l'at a queur lo bièn spirituél (é économique) de l'èillize, eunterprétaye pe SOPHIE COMÉ.
VÉTCHOT	Ommo ansièn di péi, eunterprétoù pe MICHEL VENTRICE.
PROSPERO	Vioù bièn veuste que lame s'euntremelé deun le-z-affée di-z-atre, eunterprétoù pe JOËL ALBANEY.
VOLONTÉO DI SECOUR	Volontéo di premì secour, fier d'itre volontéo é di drouet que lèi baille, eunterprétoù pe PIERRE SAVIOZ.
LUCIANO	Ommo si la carentèin-a que fé le <i>turni</i> a la Cogne, bièn prisoù, eunterprétoù pe ANDRÉ COMÉ.
MATASSA	Femalla sensa sou que dimande l'armoun-a, eunterprétaye pe STÉPHANIE ALBANEY.
JACK	Gay cobloù avouè John, eunterprétoù pe LAURENT CHUC.

- JOHN Gay cobloù avouì Jack,
eunterprétoù pe STEFANO VERMILLON.
- NAIMA Femalla tunizine avouì sinque mèinoù ; tsemie
todzor avouì eun grou tsaèn si la tita, eunter-
prétaye pe ILARIA LINTY.
- FRANÇOIS Lo pión di péi, eunterprétoù pe
MARCO DUCLY.
- TROUPE RAI Journaliste fenna, eunterprétaye pe
GIADA GRIVON, é opérateur *vidéo* de RAI 3, eun-
terprétoù pe ANDRÉ COMÉ.

ACTE I

Scène I – ME RACCOMANDO !

Lemiye 💡 si lo proscenium.

Di dou couti di palque entron Attila (a drèite) é Diego (a gotse). Attila l'at avouè sé eun abrosaque é l'et arbeillà avouè eunna crè flannela. Diego, i contréo, l'è bardoù tanque i cou é se frotte le man pe lo frette.

DIEGO (*Eun baillèn la man 🤝 a Attila*) Adón comèn l'è ?

ATTILA (*Eun sarèn for la man a Diego*) Amoddo !

DIEGO (*Se totse la man*) Ahia ! Maladetto ! Adón sen eun retar ?

SEUNTEUCCO T'a vi lo Seunteucco ?

ATTILA Na...

A gotse entre lo Seunteucco. Tsemie bièn fièira é se plache i mentèn di dou.

SEUNTEUCCO Bondzor ! Adón n'i volè prédji avouè vo dou, devàn que l'inaougurachón de oueu l'aviproù, pe vo rappelé voutra fonchón a la machina que n'en plachà é que demàn allèn ivri.

DIEGO Tournà ? Mi se n'en fé pe trèi mèis lo course i BIM tcheu le feun senà é n'ayè dza si floque d'eun Assésseur que no féyè eunna tita pèi a forse de no diye sen que no déyèn féye a seutta fameuza machina de l'éve.

SEUNTEUCCO Vouè lo si, mi vi que vo cougniso, gate pa repeté eun cou de pi le bague. Adón, can le dzi...

ATTILA (*Per la pachense*) Euncó ? Mi vouè, no fa mandé a la brotsetta la caletou d'éve que le dzi l'an cherdì !

SEUNTEUCCO Bon, bon, mioù pèi. L'eumportàn l'è que demàn a choui-z-aoue di mateun v'ouisa tcheu dou a voutra plase perqué n'arè la quiya di dzi a prende l'éve é mé n'i pa voya de féye beurta feguea !

DIEGO Qui vou-teu que se lévise pèi vitto, de demendze i fret, a prende d'éve ?

ATTILA Pe mé, can arrevèn a ouet aoue n'a praou é d'avanse.

SEUNTEUCCO Se n'i deu choui-z-aoue, l'è choui-z-aoue, va-ti bièn ?
A do-z-aoue de l'iproù vo baillon pi lo tsandzo d'atre dou...
é pe lo nite de dji a chouï s'i eun tren de pensì de criï torna vo.

DIEGO Tourna no dou ?

SEUNTEUCCO Ouè !

ATTILA Na, na, na ! La fenna sensa de mé drimme pa lo nite.

DIEGO (*Malisieu*) Ouè, l'an beun deu-me-ló... 😊

DIEGO (*Suspecteu*) Senque l'an deu-te ?

SEUNTEUCCO (*Eun copèn la counta di dou*) Seutta l'et eunna situachón d'émerjensa !

DIEGO Mi comèn trèi *turni* ? Véyo coute to so a la Quemeun-a ?

SEUNTEUCCO So son pa de-z-affée que vo regardon !

DIEGO Na, sarèn pa de problème de no dou mi de totta la popula-chón de Tsarvensoù...

ATTILA ... é squezade-mé, avouï totte seutte spèize, dedeun lo pat de stabilitoù comèn fiade a resté ?

SEUNTEUCCO Mi pensa pitoù a la tin-a de stabilitoù can te torne lo nite i mitcho ! Can mimo, se n'i deu choui-z-aoue l'è choui-z-aoue, pa eunna meneutta pi tar ! Bon ara mé vou, pequé sarèn dza tcheut lé a m'atendre. Sali é a choui-z-aoue !

Lo Seunteucco chor.

ATTILA Mi di-me té se fa féye no si travaille ! Avouï to sen que n'en a féye pe la quemeun-a !

DIEGO Mi l'è pa ren sen. L'è que no fa resté lé a la machina tanque no baillon pa lo tsandzo !

ATTILA ... é aprì féye le trèi *turni* perqué le dzi veugnion a prendre l'éve a totte-z-aoure ! Ah, mi mé me féyo pi apresté pe la fenna eun paneun avouï eunna grousa *cotoletta* eumpanaye.

DIEGO La *cotoletta* ? I fret ? 🤨

ATTILA Mi que fret !

DIEGO Te reste pi totte desù lo (*ironique*) petchoù estomac que t'a ! Mé n'i deu a la choze de me presté eun vazet de Danette, pouèi si a poste pe to lo dzor... é se n'i euncó tchica pi fan dimando eun toque de ta *cotoletta* !

ATTILA Mi (*eun moutrèn lo seun grou bri*) gnenca pe sondzo ! T'a maque a te organizé devàn, comme mé !

DIEGO Que jantillo ! É mé que te rècho todzor can areuvve lo Seunteucco ou la Jeunte desù lo poste de travaille !

ATTILA Mi di pa de conte foule, mé si todzor bièn réchà ! Ah... pe bèye senque te porte di mitcho ?

DIEGO Pe bèye ? Mi n'en lo distributeur de l'éve seuilla !

ATTILA Te bèi pi té sen. Mé n'i todzor avouï mé eunna gotta de veun (*ivre l'abrosaque é teurie foua eun boteillón*) perqué lo paneun fé sèi.

DIEGO (*Avouï eun ton malisieu, eugn avèitsèn lo boteillón*) Eun boteillón de dou litro ! Cheur d'avèi-nèn praou ?

ATTILA Penso beun. Aprì se nen n'i pa praou baillo eun cou de fi a la fenna que veun sé avouï lo bis.

DIEGO Ah ! Bon l'è dza tar, senque fièn ? Alèn ?

ATTILA Ouè, si qué que la Pro-Loce l'at aprestitou eunna mordia pe tcheut.

DIEGO Adón vito alèn !

Chorton tcheu dou. Teuppe 🍷.

Scène II – L'INAUGURACHÓN

🍷 SE IVRE LO RIDÓ 🍷

Lemiye 💡.

Totta la pièse vionde a l'entor d'eunna machina de distribuchón de l'éve, plachaye a gotse di palque. La particularitòu de si distributeur l'è que baille tan de calitoù d'éve. La machina l'a maque eunna brotsetta é dameun lo distributeur l'è plachà eun grou pleuro. Pe l'inaugurachón la machina l'è topaye pe eun grou lenchoueu.

Eun scène, a gotse, douàn lo distributeur, n'at Attila, eun vallet de veulla, lo Seunteucco é lo préye avouì son servàn de messa ; a drèite, n'a totta la populachón : lo cap di groupe di-z-alpeun avouì leur gonfalón, la tsantiù, eun fotografe, dou mèinoù de la Gaie Famille é bièn d'atre dzi.

Si lo fon di palque n'at eunna tèila iaou l'è proyettaye l'icrita « Acqua Santa Colomba ». Pe cloure, comme décor, a gotse l'è plachà eun cartel avouì icrì de mésadzo pe le sitouayèn é a drèite n'at eunna banquetta é eun pal de la lemiye.

SEUNTEUCCO (Avouì bièn d'entouziisme) Mesdames é messieurs, sitouayèn de Tsarvensoù, bondzor a tcheut é bienvi à l'inaugurachón de seutta moderna machina, froui de la meillaouza tecnolojì !

Le dzi a drèite boueuchon di man.

SEUNTEUCCO Diavo, machina que baille totte le calitoù d'éve possible é immajinable !

Le dzi boueuchon di man.

SEUNTEUCCO Mersì, mersì. Diavo, que baille totte calitoù d'éve poussible é immaginable é que ma Jeunte é mé n'en battéyà : La Bouteucca de l'éve !

Le dzi tornon bouechi di man 🍌.

SEUNTEUCCO Mersì, mersì. Seutta l'è la premiye Bouteucca de l'éve que ivrèn eun Val d'Outa. Vio de cou atsetèn de botèille d'éve que sen pa de iaou veugnon ? É adón l'Amministrachón diqué l'a fé ? L'a pensoù de beté 18 caletaye d'éve...

Lo vallet de veulla bloque lo Seunteucco é lèi di de pa sparé tro ate avouè le numéro.

SEUNTEUCCO ... 15 caletaye d'éve...

Comme douàn : lo vallet de veulla consèille i Seunteucco de calé.

SEUNTEUCCO ... dji caletaye d'éve diffiente !

Le dzi tornon bouechi di man euncó pi for.

SEUNTEUCCO Dji caletaye d'éve diffiente pe bailli-vo la possibilitoù de chédre queunta vo euntéresse. Mersì a eun pégnò èidzo réjonal n'en pouè beutté a si distributeur eun *software* de dérè jénérachón. Pe chédre l'éve que vo euntéresse baste eunséri (*eun terièn foua eun paquet de tessere*) seutta tessera...

Lo Seunteucco baille le tessere a la populachón.

SEUNTEUCCO ... chédre la tipolojì d'éve volua é voualà que chor lo prodouè que v'ouèi comandoù. Ouè mé cher sitouayèn, si cou pouade eumpléyé l'éve de voutra quemeun-a pe féye de tot : se pou seumplemàn la bèye naturella ou *mousseux*, eumpléi-la pe varè sertène patolojì é, se voulade, finque la vardé desù la crédense comme éve bénédiya !

Le dzi tornon bouechi di man bièn for.

SEUNTEUCCO ... é fenèi pa lé! L'Amministrachón comunale l'a pensoù a eun discour sosial : eun se trouèn seuilla a féye la quiya, pe prende l'éve, le dzi l'an la possibilitoù de se cognitre é de sozializé. Pe tcheu sise motif, vouillo remersié totte le-z-aoutoritoù : ma Jeunte é to lo Consèille comunal, le consèillè régional, lo chef di groupe di-z-alpeun, lo serdzèn di pompi, Monsieur de noutra parotse...

DON CARMELITO (*Stouffie*) Amen! 😞

Lo Seunteucco s'arite é comprèn d'itre tro tchatcharón-a.

SEUNTEUCCO ... é tcheu vo-z-atre seuilla prézèn!

Le dzi boueuchon di man bièn for.

SEUNTEUCCO Dimandériyo ara a Monsieur, Don Carmelito, se pou no baillè eunna péгна бeнeдичо́н a seutta machina, a la Bou-teucca (*eun gavèn ià lo lenchoueu que toppe la machina*) de l'éve!

Le dzi boueuchon tourna di man. Dimèn lo préе avanche, ver lo mentèn di palque, é lo fotografe se plache douàn le dzi pe fé de fotografie.

DON CARMELITO Mersì madame lo Seunteucco. Vouillò djeusto remersié euncó mé l'Amministrachón pe sen que l'a fé pe no parrouassièn. L'éve...

LE DZI Amen!

DON CARMELITO ... l'è eunna rezoursa que l'a queuttou-no nou-tro Bon Djeu, mi que chouèn l'è pa apprèchaye pe le dzi. L'éve...

LE DZI Amen!

DON CARMELITO que l'a fé é feré todzor de miaclo, l'è lo bièn pi eumportàn pe vivre... pe la viya de l'ommo. É aprì que dimandé de pi a noutro Seunteucco que, mersì a sa sensibilitoù, l'a beuttoù euncó la calitoù de l'éve...

LE DZI ... Amen !

DON CARMELITO bénédiya !

LE DZI *Ora pro nobis !*

Dimèn lo Seunteucco se fé fé de foto 📷 pe la Vallée.

DON CARMELITO Adón a si poueun baillerio eunna péгна bénédichón a la Bouteucca de l'éve.

Don Carmelito, avouì l'èidzo di servàn de messa, pren l'aspersoir pe la bénédichón. Lo chef di groupe di-z-alpeun baille l'« at-tenti » é tcheutte repoundon a l'ordre. A si poueun, lo préé prononche caque paole eun lateun é bénédèi la machina. Aprì la bénédichón, la tsantiì ataque eun Salve Regina pocca eunton-ou.

SEUNTEUCCO (*Bièn digoutaye pe la tsantiì*) Mersì, ouè, mersì. (*I vallet de veulla*) Dimanderio ara le fosette ✂.

VALLET (*Eun s'ajitèn*) Na n'i oublià le fosette !

Lo Seunteucco avèitse mal lo vallet, lequel se vionde é spédèi Attila, lo cantogni, a tsertchi de fosette. Dimouèn lo Seunteucco tsertse de contegni lo discoù.

SEUNTEUCCO Adón remercherio euncoa Monseur de noutra parrotse, lo cappe di-z-alpeun, le pompi, la Pro-Loco que l'a aprestou-no eun petchoù casse-croûte é aprì remersio euncó la tsantiì. ... Na ! La tsantiì na ! Vo remersio tcheu vo seuilla prézèn !

Dimèn dou mèinoù de la Gaie Famille, douàn la Bouteucca de l'éve, sopendon eun lon ribàn neur é rodzo. I mimo ten arreuve Attila avouì eun grou sicateue. Lo baille i vallet, que lo moutre i Seunteucco. Sensa tan d'atre soluchón, lo Seunteucco pren lo sicateue é finalemèn l'è preste pe copé lo ribàn pe l'inaougarachón di distributeur.

SEUNTEUCCO Decllaro iverta la Bouteucca de l'éve !

Le dzi boueuchon di man, mi lo Seunteucco arreuve pa a copi lo ribàn. Pe l'èidjì eunterveun Attila que avouì eun grou Opinel lo coppe a mèitchà.

Teuppe 🍷.

Scène III – GEORGE É L'ÉVE NATURELLA

L'è choui-z-aoue di mateun.

🏠 CHAN DI POU 🏠

Desì la Bouteucca de l'éve, iao l'è plachà eun grou pleuro, n'a le dou cantognì que son dza prest pe fé leur servicho. Naturellemente son panco bièn réchà 🤔.

A drèite, iao n'at eunna banquetta pe s'achouatì, arreuvon le premì dzi : eunna mamma avouì eunna petouda é eunna madama (Claudine) bièn arbeillaye avouì eun crè tseun deun sa bursa. La mamma avanche ver la machina é teurie eun litre d'éve. Dimèn, Attila, avouì eun grou modeun pe la polenta, modde le potreungue que Diego tappe dedeun lo pleuro. Can la mamma l'a fenì de terì l'éve, chor foua avouì sa feuille é la madama avouì lo tseun s'aprotse i distributeur.

CLAUDINE Oh, a forse ! (I tseun) Vitto George ! Féyèn totte a galoppe, pèi aprì te pourto a féye la cacca !

MACHINA (Avouì eunna cadense électrique) Eun-se-rì la tes-se-ra.

Claudine teurie foua la tessera é l'eunsérèi deun la machina. Dimèn areuvve eun mètre di-z-esquì (Giacò) avouì an quése de botèille. Semble bièn prisó .

MACHINA (Comme douàn²) Ché-dre la ca-le-toù de l'é-ve.

2. Dèi-z-ara lo icrièn : C.d.

CLAUDINE (*I tseun*) Donque senque no prégnèn ? Senque te di té ?
Prégnèn naturella.

*Gnaque lo botón de l'éve cherdiya. Le dou cantogni l'an pa
comprèi queunta éve l'è itaye cherdiya.*

MACHINA (*C.d.*) Pré-djì pi for é di-ye i mi-cro-fon-ne l'é-ve cher-
di-ya.

CLAUDINE Ouff, que complecoù ! (*Eun s'aprotsèn i microfonne é
eun prédzèn pi for*) Na-tu-rel-la !

*Le dou cantogni, can sentèison la caletou cherdiya, se boudzon
pa é reston tranquilo a leur plase. Dimèn areuvve eugn'atra
fenna (Giada) que s'achouatte tranquila si la banquetta.*

MACHINA Pla-chi le bo-tè-ille.

CLAUDINE Ouff, que complecoù !

Claudine plache le botèille.

MACHINA Ché-dre la can-ti-toù.

CLAUDINE Prègno dou litre.

GIACO (*Eun tsemièn nervezamente*) Adón no no boudzèn ? ! Nen
pouì pami ! Dèyo fé lesón mé é l'è do-z-aoue de ten que si
protso (*eun moutrèn Giada*) de seutta stoufianta !

CLAUDINE (*Épouvantaye*) Eun momàn, tchica de pachense !

GIACO Pachense ? Pachense pe senque ? Pe prende d'éve naturella ?
Mi va ba eun Djouiye la prendre ! Saquetta, mi rècha-té lo
mateun !

CLAUDINE (*Offenchaye*) Mé me rècho totte le mateun pequé dèyo
porté George a féye le bague de llou 🍷.

GIACO Qui t'a ?

CLAUDINE (*Eun moutrèn la bourssetta*) George !

GIACO Senque l'è eun lapeun 🐭 ?

CLAUDINE L'è lo tseun de mé!

GIACO Ah té t'i eunna de salle veullatchiye que vardon le tseun pe le mitcho é can l'an fata de fé leur bague le porton ià desì le terrèn di-z-atre.

CLAUDINE Que dzen carattéro! Voualà n'i fenì, si cou poui alé-menèn!

Claudine se nen va eun borbottèn. Giaco se plache douàn la machina.

Scène IV – DJI LITRE, PA DE PI!

GIACO (*Avouì eun ton amical*) Tchao Machina!

MACHINA (*Todzor avouì eunna cadensa électrique*) Tchao Gia-co!

GIACO Adón, véyèn tchica senque n'at : mousseu na, éve naturella, éve djeusto que boudze é éve que bouleuque... Oh voualà la min-a : microfiltre i Tsarboùn Actif Ionizaye.

GIADA Ah, l'è-ti bon-a salla?

GIACO (*Bièn blagueur*) Seutta? Seutta l'è la rèina di-z-éve! Te fé féye de rotte que te le sen tanque a Seneun!

MACHINA Eun-se-rì la tes-se-ra.

GIACO Eun momàn de pachense!

Pierre eunserèi la tessera é plache eun boteillón. Aprì selechoun-e la caletou é le dou cantogni gnoun-on a tappé ba deun lo pleuro totte sorte de pousse blantse.

Aprì doe seconde se sen eun son deun seblé : lo vallet de veulla entre eun scène é se plache douàn Giaco.

VALLET (*A Giaco*) Mesieu, se pou pa!

GIACO Te di a mé?

VALLET Ouè, lo rèillemèn prévèi la possibilitoû de prende dji litre é vo v'ouèi chouï boteillón, que vou diye doze litre, que vou diye dou litre eun pi !

GIACO Ah v'ouite bon-a a fé le contcho ! Adón mé beutto pa plen le boteillón !

VALLET Se pou pa, la machina sa pa que dèi s'arité a dji litre !

GIACO (*Ironique*) Le *software* moderno ! Bon, vou diye que eum-plèiso poui maque sinque boteillón.

VALLET Ouè !

Giacò conteneuvve a eumpleure le boteillón. Areuvve euncó eugn alpeun que s'achouatte si la banquetta pe attendre. Dimèn le dou cantogni traillon pe vouldjì l'éve cherdiya.

VALLET No no boudzèn ?

GIACO Eun momàn de pachense !

GIADA Mesieu Rotto, no no baoudzèn ?

Aprì èi eumpli lo seunquimo boteillón, Giacò pren la cassa é s'apreste a partì.

GIACO Orvouar ! (*Eun terièn foua di pourtafoille dou beillette é eun le baillèn i vallet é a Giada*) Ah se v'ouèide fata de eunna lesón, vo queutto lo beillette. Queriade-mé ! Tanque !

Giacò chor é finalemèn Giada teurie son litre d'éve.

GIADA (*I vallet, eun chortèn avouè sa botèille*) Mersì é orvouar !

VALLET Orvouar.

Scène V – PE LO BIÈN DE L'ÈILLIZE

Totse a Pierluigi, lo chef di groupe di-z-alpeun. Se plache douàn la machina avouè lo barlet de 25 litre. Lo vallet de veulla, que vionde todzor per lé a l'entor di distributeur, can vèi lo grou conténiteur seuble to de chouite.

PIERLUIGI Mi se pou pa féye eugn'esséchón ? L'è pa pe mé, mi pe lo sièje di groupe.

Dimèn si la banquette s'achouatte eunna Seur.

VALLET Se l'è na, l'è na ! Seuilla son tcheut igale.

PIERLUIGI N'i comprèi que sen tcheut igale, mi comèn fiyo oueu l'aviproù avouè le-z-alpeun sensa l'éve de sen Grat ?

VALLET Ou vegnade avouè de botèille eun riilla ou piatro bèyade l'éve i rubinet de mèizón. Va bièn ?

PIERLUIGI Ouff ! Fio pi que téléfon-ì a Piero... mogà me pourte le botèille djeuste.

VALLET Ouè queriade Piero.

Pierluigi pren lo téléfonne é criye son amì alpeun. Lo vallet l'eunvite jantillamente a se tramì avouè son conténiteur pe quetì la plase i-z-atre. Dimèn entre eun vétchot (Prospero) avouè chouì botèille é s'achouatte protso de la Seur. L'è vioù, mi avouè sa baquette tsemie leste.

Partèi eunna réclamme que sponsorize l'éve de Sainte Colombe³.

Eunna persona attraverse lo palque.

SEUR Mesieu lo vallet !

VALLET Ouè madama.

SEUR Pouì-dzò passì ?

VALLET Ouè vegnade maque.

SEUR Mersì !

3. Malerezamente n'en pa accapoù la vidéo. L'è poussiblo la veure (mal) eugn avèitsèn la vidéo de la pièse. Pouèn deu que n'ayè eunna boteille d'éve que colatè ba pe eun prou. Ester Bollon, métresse di-z-esquì, la chouivèi tanque i fon di prou. A la feun, pren la boteille é braille : « L'éve de Senta-Colomba, se te la bèi l'è eunna bomba ! ».

La Seur se levve é s'aprotse i distributeur.

SEUR (A Pierluigi) Bondzor mesieu ! Mi v'ouèide vi que dzenta la poublisitoù ? Finque paì Messner pe fiye la reclamme. La Que-meua l'aré spendì cheur pa pocca !

PIERLUIGI Ah cheur ! Se prégnaon la Chiabotto cheur lèi coutave mouén !

SEUR Sen si beun pa.

Comme douàn, la machina dimande la tessera.

SEUR (Eun refléchisèn) Adón mé la tessera iaou l'è que n'ayoù pouzola ? Ah ouè, inque pouèi. . .

La Seur se teurie si la soutane pe terì foua di tsaousón la tessera é dimèn Pierluigi é lo vallet avèitson queriaou si drolo de comportemèn. Aprè èi prèi la tessera, la Seur l'eunsérèi deun lo distributeur.

MACHINA Ché-dre la cale-cale-cale. . .

Pierluigi baille eun creppe i distributeur. Dimèn entre eugn atro vétchot que s'achouatte protso de Prospero.

MACHINA Ca-le-toù de l'é-ve.

SEUR Éve de Sainte Colombe !

PIERLUIGI Mi squezade-mé : salla l'è la pi tchiya. Nen va la pèin-a ?

SEUR Ouè, ouè créyade-mé, mesieu. Pensade que mé si arrevaye pocca fé de Lourdes é euncó aoutre per li prèdzon de noutra éve. L'éve de Sainte Colombe comme éve de guérizòn !

PIERLUIGI Mi pensa té.

SEUR Ouè é inque a dou dzor torno aoutre avouè le maladdo di pèi. Adón pensavo de pourté eun per de litre é de le vendre. Que restise euntre no. . . (eun bèichèn la vouése) inque la payo satte santime é aoutre la vendo a seun euro i litre ! Pe lo bièn de l'èillize !

PIERLUIGI Ouè cheur... lo bièn de l'èillize ! Mi eugn éffé l'è pa mal comme magniye pe féye le sou. Caze caze dèyo prédji-nen avouè lo directif : se arrevisan euncó no a vendre la noutra de sen Grat... magà eunsemblo i *vin brulé* a la véillà de Tsarvensoù... .

SEUR Crèyade-mé que l'è eun bon affiye. Voualà ! Fenì euncó mé. Vo v'ouèi dza prèi la voutra ?

PIERLUIGI Na. N'i pa poui pequé lo conténiteur de mé (*eun desuèn lo vallet*) va pa bièn.

SEUR Ah... eummajin-o que vo prégnade l'éve de sen Grat, vrèi mesieu ? (*Se fé lo signe de la croueu*) Se vèi de louèn !

PIERLUIGI Ah cheur... é aprì se t'i alpeun te la paye euncó mouèn. L'è clè que te fa alì eun Quemeua fiye eun papì asprése pe seutta dzenta é comodda ajévolachón. Mi squezade... se vouillade pouade vegni euncó vo amì di-z-alpeun ! Pouai pe tsaque sinque litre que teriade reusparmiade eunna santima.

SEUR (*Émochon-aye*) Eunna santima ! Mersì mesieu que v'ouèide di-me seutta bagga fran dzenta ! Ara fa scapì, mi lèi penso pi ! Mersì é... eunna péгна bénédichón a tcheutte.

Baille la bénédichón é aprì chor.

Scène VI – PROSPERO

Ià la Seur, Pierluigi vèi arrevé Piero.

PIERLUIGI (*Eun chortèn*) Oh l'è arrevouè Piero !

Di momàn que n'a pa gneun douàn lo distributeur, Prospero se levve de la banquetta, pren le botèille é avouè la baquetta tram-pèille ver lo distributeur. I mimo ten, Pierluigi entre é acappe Prospero douàn de llou. Tsertse, dunque, de lo pouchi ià.

PROSPERO (*A Pierluigi*) Euh na, na ! Lèi si mé ara ! Fiade pa lo feun !

PIERLUIGI Mi senque diade ? Mé l'è dza eun momàn que si seuilla é ara totse a mé.

PROSPERO Mi lèi penso fran pa. Mesieu lo vallet sit fé lo feun !

Lo vallet seuble é se beutte i mentèn di dou. Dimèn areuvve euncó l'atro vétchot pe queriaouzé.

VALLET (A Pierluigi) Te pou pa fiye comme t'a voya té ! Te fa torna fiye la quiya. (I vétchot) Vo mesieu, soplé, réstade achouattó lé que lèi penso mé !

Lo vallet acompagne lo vétchot a la banquetta é aprì tourne protso di distributeur pe controlé la discuchón.

PROSPERO (A Pierluigi) La quiya l'è la quiya. (I vallet) L'an la plima eun tita é penson de itre va sai qui ! Alisan ba a l'Adunata !

PIERLUIGI Mi mesieu lo vallet, si seuilla dèi sinque mouèn car é poui pa tourni i fon djeusto perqué n'ayoù pa le conténiteur djeusto.

VALLET Vouillade eun verbal ?

PROSPERO Ouè, vouillade eun verbal ?

VALLET (A Prospero) Soupli, lèi si mé pe seutte bague.

PROSPERO Ouè, ouè, mi fiade-lèi maque eun dzen verbal. Se lo meutte !

PIERLUIGI (Démoralizòù) Adón voui pa lo verbal ; (ironique) tourno aoutre eun Veulla é voualà ! Tante n'i to lo dzor !

VALLET Ouè, sayo.

Pierluigi pren son conténiteur é s'achouatte si la banquetta.

PROSPERO (I vallet) Te vèi que lèi fièn pouiye a sit eh ? !

VALLET Ouè, ara totse a vo, mi boudzade-vó !

MACHINA Eun-se-rì la tes-se-ra.

PROSPERO (I vallet) Cougnì vito !

VALLET Ouè boudzade-vó que n'a tchica de dzi, soplé.

Prospero teurie foua di pourtafoille la tessera é l'eunfeuille deun lo distributeur.

MACHINA Eun-se-rì la tes-se-ra.

PROSPERO Mi n'i djeusto eunseri-la ! Se vèi que la li pa !

*Prospero pren la tessera é la poulite : la lètse é lèi souffle desi.
Aprì tourne la catchi dedeun.*

MACHINA Ché-dre la ca-le-toù de l'éve.

PROSPERO (*Eun plachèn la botèille*) Adón la caletou de l'éve... me rapello pami, n'ayoù icri-lo seu mateun si lo beillette mi n'i perdi-lo... senque l'iyè... ah ouè ! V-Power de Moriòn ! Dèi can bèyo so n'i pami de mou a l'itsin-a é avouè la fenna totte semble pi amoddo. Si pa se me compregnade madame lo vallet 😊 !

Le cantogni tappon ba pe lo pleuro de drole pousse.

VALLET Ouè, ouè soplé !

Entre eun volontéo avouè an tanica de 15 litre é s'achouatte si la banquette. Dimèn Prospero teurie sa éve avouè bièn de calma.

PROSPERO Mi... eh ouè... l'a fi beur totta la senà é baille tourna beur ! Ren a fiye ! Seutta senà l'a pa voya de chotre si solèi !

PROSPERO (*Eugn avèitsèn foua di palque*) Tchao, tchao ! Ouè sen seu a proué lo moublo nouo. Ouè, ouè, la fenna lèi va beun, l'è i mitcho tranquila. Mi son tcheu dou de té ? Mondje se l'è crèisì lo premi ! Mi l'è igale a mamma, toutouteun a la mamma ! Que dzen botcha ; te queutto que la botèille l'è plèin-a. Tchao, tchao !

Prospero plache eugn'atra botèille é conteneuvve a fé la conta.

PROSPERO (*I vallet*) Si pa se le cougnisade...

VALLET Eh na !

PROSPERO Llou l'a marià... atèn... me rapello pamì se... na (*i vallet*) vo cougnisade pa !

Prospero se beutte a seblì 🤪 eun pégno refrain.

PROSPERO (*I dzi achouattoù*) Deh vouillade savèi eunna conta que fé riye ?

Le dzi achouattoù si la bantse repoundon : « Na mersi ! ».

PROSPERO Adón vo la counto ! N'atte eun Italièn, eun Fransé é eun Angllé...

VÉTCHOT ... mi l'ïye pa eun Maroqueun ?

PROSPERO Mi te la sa pa ! Comèn te fi a saèi que l'ïye eun Maroqueun ?

Douàn de contenevì, Prospero s'apersèi que la botèille l'è plèina. Galoppe (eun trampeillèn) ver lo distributeur pe plachi-nen eunna vouida.

PROSPERO (*Tourna ver le dzi achouattaye*) Adón tourno diye : n'ayè eun Maroqueun, eun Fransé é eun Angllé... é si cou n'at lo Maroqueun. Son ià pe lo bouque é eun l'a frette pequé l'è iveur. Adón sitte di a l'atro : « Beutta de bouque 🍷 i fornet pequé fi frette ». L'atro lèi di : « Nen n'ario ! Lo ferio bièn volontchè ! ».

Prospero se beutte a riye to solette. Tcheu le-z-atre s'avèitson senza diye ren.

PROSPERO Seutta l'è eunna di pi dzente que si !

Scène VII – 25 LITRE PE LE VOLONTÉO

VOLONTÉO (*A Prospero*) Ouè, v'ouite a poste mesieu ?

PROSPERO Ouè si arrevouè i dèrè litre !

Lo volontéo se levve avouè sa tanica é s'aposte a Prospero.

PROSPERO Iaou alade-vó avouè si conténiteur ?

VOLONTÉO Mé si volontéo ! No volontéo n'en la convenchón. Tanque a 25 litre pouèn terè.

PROSPERO Na, na, seu pouade maque terè tanque a 15 litre !

VOLONTÉO Na mi mé n'i beun de papì (*eun tsertsèn deun le secotse*)... voualà ! (*Eun terièn foua eun foillette*) L'é to icrì neur desì blan : volontéo di secour, 25 litre.

Prospero pren lo foillette é se beutte a lie eunsemblo i vallet de veulla. Dimèn s'euntremelle euncó lo vétchot.

PROSPERO (*I vétchot*) Mi sit senque vou ? ! L'è tcheu le momàn seu !

VALLET (*Eun prégnèn pe eun bri lo vétchot*) Soplé ! Alade vo achouatti que seu lèi penso mé !

Lo vallet accompagne lo vétchot a la banquetta.

VOLONTÉO (*I vallet*) Todzèn i mesieu (*eun moutrèn lo vétchot*) que l'a tchica de problème de santé...

VALLET Vouillade eun verbal euncó vo ?

VOLONTÉO Na, na.

PROSPERO (*I vallet*) Vegnade vèi sé !

Eunsemblo lion lo foillette. Lo vallet comprèn to de chouite que l'è totte eun riilla, mi Prospero lèi beutte bièn pi de ten a lie é semble pa tan convencù.

PROSPERO Ouè sembleriye beun tot a poste.

VOLONTÉO Me baillade lo papì ?

Prospero ren lo papì i volontéo.

PROSPERO Adón teriade maque.

Prospero gave ià la dériye botèille di distributeur é reprèn sa tessera.

PROSPERO ... pregnèn la tessera, vi que salle que n'i queuttoù de-deun le-z-atre machine l'an foutu-me seun euro ! Seutte machine !

Dimèn lo vallet lèi pren lo tsaèn di botèille pe bailli-lei eunna man é pe fé pasé lo volontéo.

PROSPERO Mi iaou alade avouì le botèille de mé !

Prospero avouì eun sate pren lo tsaèn, mi lo vallet lo molle pa. Comenchon avouì bièn d'énerji a se terì ver leur lo tsaèn, tcheu dou eun braillèn : lo vallet vou maque bailli eunna man, Prospero vou pa itre èidjà. Aprì eun per de seconde, lo tsaèn tsi pe tèra. Lo volontéo galoppe per recoilli le botèille.

PROSPERO (I vallet) Lazarón !

VALLET Ah sitte l'è lo remersiemèn que me baillade ? ! Mé (eun tra-mèn lo tsaèn de douàn lo distributer) vo baillo eunna man...

PROSPERO ... é tourna !

Lo volontéo baille a Prospero eunna botèille que l'iye tsiziya.

VOLONTÉO (A Prospero) Mesieu lo pacemaker l'è a poste ?

PROSPERO (Inervou) Ouè ! Vouillè (ver lo vallet) me pourti ià le botèille !

VALLET Na, n'i maque bailla-vo eunna man !

PROSPERO (Todzor pi malechà é offenchà) Mi n'i pa fata de vo pe sen ! N'i fata d'atro !

Euncó eunna mia malechà, Prospero pren son tsaèn é se plache protso di distributeur. Dimèn lo volontéo se plache douàn le distributeur é eunserèi la tessera.

VOLONTÉO Donque... (*eun lièn le caletaye*) sen Grat, Moriòn, Tsarbón...
ah voualà : l'éve *effervescente* naturelle de Ponteille. D'abor le
medeseun diyon que l'è l'éve pi boun-a pe le maladdo !

PROSPERO Éve ?

VOLONTÉO Ponteille ! Salla que reboudze ba pe lo torón !

Lo volontéo plache lo conténiteur dézò la brotsetta. Entre Luciano eun saoutèn la quiya.

PIERLUIGI (*A Luciano*) Oh mi iaou alade ? N'a la quiya !

LUCIANO Acoutta, mé si eun retar.

PIERLUIGI ... é senque m'eunteresse que t'i eun retar ? !

Lo vallet eunterveun pe bloqué la discuchón que dimèn s'it-saoude euntre Luciano, Pierluigi é lo vétchot. I mimo ten, pe queriaouzé, s'aprotse euncó Prospero.

Aprì eun per de seconde la situachón se calme é Luciano vèi lo grou conténiteur di volontéo.

LUCIANO Ouè mi sitta véo de litre l'at a terì ?

PROSPERO (*Eun prégnèn Luciano a par*) Na l'è totte a poste. N'i dza totte avèitchà mé.

Lo vétchot se levve eugn atro cou de la banquetta pe acouté sen que Prospero di, mi i mimo ten lo vallet lo reprodze.

PROSPERO Adón n'i dza totte avèitchà mé é sitte pou terì tanque a 25 litre pe dzor pequé l'è di secours.

LUCIANO Vouè mi mé a do-z-aoue vou travaillì. Si dza eun retar !

PROSPERO Attégnade pi eun momàn eun pi, comme tcheut ! No n'en tcheut atégnì.

LUCIANO Ouè mi oueu l'è demicro !

PROSPERO É adón ?

LUCIANO V'ouite todzor a tsaplèti é vo sade pa le bague pi eum-portante. Lo demicro l'éve avouè lo gas l'è bièn pi gazaye !

PROSPERO Mi pe dabón ? 🤔 Comèn fiade a savèi so ?

LUCIANO La fenna de mé, l'atro dzor, l'è vin-a seuilla i distribu-teur devàn que l'iverteua é dèi avèi senti, si pa da qui, seutta dzenta novalla. Mi diade-ló pa a tcheut... perché piatro fièn tro de quie lo demicro é a mé totsériye magà partì demì aoura devàn de mèizón.

PROSPERO Na, na, tranquilo diyo ren a gneun !

LUCIANO (*Ver lo volontà*) Vouè mi sitte l'è euncó seuilla. (*A Prospero*) Acoutade : pouè queuttì a vo lo tsaèn di botèille ?

PROSPERO Mi n'i pa pouè to si ten. Mé n'i euncó lo courti, le jira-nión... n'i pa lo ten !

LUCIANO Jiranión d'iveur ?

PROSPERO Mi a no d'Ampaillan areuvvon douàn !

LUCIANO (*Eun baillèn lo tsaèn a Prospero*) Fiyo passì pi tar la fenna a lo reterè ! (*Eun lèi baillèn la tessera*) Voualà la tessera é supergazaye de Fontan-a Tsada.

PROSPERO Ouè vèyo sen que pouè fiye. Si pa cheur...

LUCIANO Mi ouè l'è an bagga de dji meneutte de ten. Mersì !

PROSPERO Salì.

Luciano galoppe ià. Dimèn lo volontà l'a fenì d'eumpleure lo conténiteur de 25 litre.

PROSPERO (*I volontà*) Si cou l'è plen !

VOLONTÉO Eh ouè, pouèi le maladdo son contèn. Orvouar !

Lo volontà chor eun trèinèn la tanica plèin-a d'éve.

Scène VIII – LA FLEMMÀ DI VÉTCHOT 🤨

VALLET (*I vétchot*) Voualà mesieu totse a vo ara ! Plan planotte, alade maque.

Avouï an flemma que la mèitchà baste, lo vétchot se levve é, to todzèn, s'aprotse i distributeur.

VÉTCHOT (*I vallet*) Mi senque fa fiye ?

VALLET Se vouillade l'éve, teriade l'éve... mi vo manque la botèille. Se vouillade pouade la dimandé i mesieu (*eun moutrèn Prospero*) que l'è bièn jantillo...

Aprì èi eunserì la tessera, lo vétchot s'aprotse a Prospero.

VÉTCHOT (*Eun prégnèn eunna botèille di tsaèn de Luciano*) Mesieu, que v'ouite tan jantillo, poui prendre eunna botèille ?

PROSPERO (*Aprì èi avèitchà mal lo vétchot*) Mi ouè teriade maque voutra éve.

Lo vétchot tsertse de plachì la botèille, mi sa man tremble trop. Prospero eunterveun eunfastedjà.

PROSPERO Mi èita ! Deh so va rotte ! L'è nouo ! Se v'ouite pa bon mandade la fenna ! Beutto mé !

Prospero pren la botèille é la plache dezó la brotsetta.

VALLET Todzèn !

Aprì èi terià l'éve, lo vétchot reteurie la tessera é, accompagnà pe lo vallet, chor foua.

Pierluigi s'aprotse i distributeur, teurie finalemèn l'éve pe le-z-alpeun é chor.

Prospero pren lo tsaèn de Luciano é teurie l'éve. Dimèn entre eunna fenna poua, avouï eun grou cartel de cartón avouï l'icrita

«SI SENZA SOU» é s'achouatte pe téra pe dimandé l'armoun-a
.

MATASSA Avèitsa sé que dizastre ! Gnenca eun poste libro pe pouzi
 le dzin-aou, i mentèn de sise escremèn de tseun é tsatte ! Le
 dzi l'an fran pa de reuspet pe no pouro matasse senza sou.

PROSPERO Que no euntéresse a no !

*Dimèn que la botèille se reumplèi, Prospero s'aprotse a la fenna
 pe liye lo cartel.*

PROSPERO Senque l'è so ? (Eun lièn mal) Si-senza-sou, sisensa-sou,
 sisensasou, si-sensasou !

Scène IX – JOHN, JACK É L'AMOUR

*Entron, man deun la man, Jack é John, eunna cobla homo-
 sexuelle.*

JACK (Tot(ta) grasieu(za), ver Prospero) Oh Prosper !

JOHN (C.d.) Oh Prospé !

PROSPERO Oh mondjeu !

*Le dou s'aprotson a Prospero pe bailli-lèi eunna man : tsertson
 de lèi passé le botèille pe teri l'éve.*

PROSPERO Beuttade ba seutte botèille ! N'i pa fata de vo-z-atre !
 Alade ià !

*Avouì la baquetta é lo tsaèn, Prospero tsertse de le vardé louèn
 de llou é tchica pe cou se trame di distributeur.*

JOHN Ouè mi que caratéo !

JACK (A John) Avèitsa Pippi ! L'è todzor dzen tourni seuilla, na ?


JOHN Ouè, lo poste iaou sen cougni-no, meneun !

JACK Mersi a si poste ma viya l'a prèi fourma. N'i torna vi le couleur a la plase de vèrè totte blan é ner !

JOHN Te te rapelle s'i dzor li ? Mé me lo oubliériyo jamì ! T'a fé-me passì devàn é mé n'ayoù dza perdi lo queur pe té. Mé l'iyo eun tren de chédre la caletou pouèi é . .

John se plache douàn lo distributeur.

JACK . . . é mé n'i moutrou-te comèn se eumpléyave l'écran, pouèi . .

Jack se plache dérì John, eun l'eumbrachèn.

JOHN Que dzen momàn ! É totte mersi a si distributeur.

John, euforique, eumbrache Prospero, que, digoutó, se reveurie.

MATASSA Baillade caque tsouza pe eunna poua femalla sensa sou !

JACK Mi avèitsa seutta ! Mi senque te vou ? (*Eun tsertsèn pe le se-cotse*) Mé n'i pa de pise, té John ?

JOHN Mmm . .

JACK (🤔) Fé-me senti se ta de pise . .

Jack, to todzèn, s'aprotse a John pe lo totchì, mi John recule jèinó tanque i poueun de pitì le pià de Prospero, lequél, tourna eunfastedjà, avouè la baquetta lèi baille eun creppe si lo qui.

JOHN Ahia !

JACK (*A Prospero*) T'a fé mou a John ! 🤬

PROSPERO (*A John*) Mi fé-té feun !

JOHN T'a fé-me de mou !

JACK Queutta pédre John, veun sé. (*A la fenna sensa sou*) T'a lo léteur di carte ?

MATASSA Na.

JACK É adón ren. N'en pa de pise.

MATASSA Ah, adón demàn m'atresso pi euncó mé. Prègno pi lo lecteur di carte !

JACK Ouè, ouè, va bièn, pourta sen que t'a voya. (A John) John ! Cherdèn la caletou de l'éve.

JOHN Douàn cherdèn la lenva.

JACK Djeusto ! Adón : italien... .

JOHN Italien... . naaa !

Dimèn entre eunna femalla d'origine tunizine avouè seun mèi-noù.

JACK Fransé ?

JOHN Naaa !

JACK Patoué ?

JOHN Patoué !

JACK Oh ! Patoué particuillé 😊 !

JOHN Particuillé !

Jack é John se totson lo dèi eun fièn le maron-ette. Dèi-z-ara la machina prèdze avouè eunna vouése fémininle.

MACHINA Eun-se-rì la tes-se-ra.

JACK John t'a té la tessera ?

JOHN Ouè.

John se viounde pe moutrè lo qui a Jack é lèi fé comprendre que la tessera l'è dedeun la secotse di pantalón. Émochon-ou, Jack la pren é la eunserèi deun la machina.

MACHINA Tan-que i fon !

JACK (Eun pouchèn la tessera tanque i fon) Tanque i fon !

MACHINA Tes-se-ra pa va-li-da.

JACK Pa valida ! John ! L'è pa salla djeusta ! Iaou l'è salla djeusta ?

JOHN Ah ouè, adoùn l'è dedeun lo boursset.

John s'aprotse a Jack eun lèi moutrèn lo boursset. Le dou moun-gouyon eun momàn pe tsertchì la tessera deun lo boursset. Can l'acappon fan eun viondolet é a la feun l'eunserèison deun lo distributeur.

MACHINA Pla-chì le bo-tè-ille.

JACK Le ou...

JOHN ... la?

MACHINA (Avouè eunna vouése grave é pouissante) Eunna botèille !

John pren eunna botèille deun la bursa é la plache dézò la brotsetta.

JOHN La botèille ! Pégnò Jack, prégnèn torna l'éve que n'en prèi si dzor li ?

JACK Ouè ! Raffor plus plus plus ! Eun prodouè formidable !

JOHN Euh Prospé ! Seutta nite te veun danchi avouè no ?

PROSPERO N'i pa lo ten pe sen ! Fiade vo voutre bague !

JACK Tante no t'envitaon pa Prosper !

Jack é John prègnon leur botèille plèin-a d'éve.

JACK Ara no prégnèn la botèille é la pourtèn i mentèn di verte de Comboé comme si cou lé é la ditoppèn... é can la ditopèn ferè : pouf !

PROSPERO Mi sampouza fiyo pi mé pouf !

JOHN Jack, la ditoppèn pi plan plan que lo pouo *forcello* pouise s'accoblì tranquillemente !

Le dou salion Prospero. John comenche a chotre ver la gotse.

JACK John ! Mi atèn-mé !

*John tourne eun déri é Jack lèi pren la man. Tcheu dou sourièn,
chorton eunsemblo.*

Scène X – 1000 LITRE !

*La fenna tunizine s'aprotse i distributeur avouè sinque mèinoù
é eun grou tsaèn desì la tita, iaou n'at eunna matse de botèille.*

NAIMA (*Ver la fenna poua*) Bondzor ! (*A Prospero*) Bondzor ! Mèinoù, boudzade-vó, déri de mé !

PROSPERO Euh na, na ! V'ouèide tro de litre ! Me semble tchica tro de conténiteur !

NAIMA Adón véyade de pa me aggredi de seutta magniye. Mé n'i drouet a chouì litre pe mèinoù é ouette pe mé que si mamma senza ommo.

PROSPERO Fiade pa tan le feun ! Fiade maque vère le documàn.

NAIMA Le documàn ? ! Qui v'ouite-vó pe me dimandì le documàn ?

PROSPERO Madame lo vallet !

Eun seblèn, lo vallet entre.

VALLET Senque n'at euncó ?

NAIMA Me dimande le documàn !

VALLET Ah fiade veure le documàn !

NAIMA Le documàn ? Dimandade a mé le documàn ?

VALLET Ouè, ouè a vo. V'ouèide le documàn ?

NAIMA N'i pa de documàn. Dimandade a salla lé (*eun moutrèn la fenna poua*) le documàn !

VALLET Na, le dimando a vo.

NAIMA Mé n'i pa le documàn, n'i maque la carte oro. (*Eun baillèn la carte i vallet*) L'a bailla-me-là la *Communauté de Montagne* é n'i 100 litre d'éve pe mèis gratouì. Mé é le mèinoù de mé !

PROSPERO (*Eun avèitsèn la carte*) So l'è la carte oro ?

NAIMA Ouè oro, carte d'or. (*Eun se reprègnèn la carte*) Maque no n'en drouet a so.

Dimèn le mèinoù son achouato-se protso de la fenna poua.

NAIMA (*Ver le mèinoù*) Mi adón mèinoù ! Si de lé ! Mi l'è pa pous-siblo ! Vegnade sé, alèn quì l'éve ara.

Naima baille eunna botèille a tita i mèinoù é tcheut eunsemblo comenchon a teri l'éve. Dimèn entre François, lo pión di péi.

FRANÇOIS Squezade, qui l'è lo dèrì ?

NAIMA Si mé la dériye.

FRANÇOIS (*Eun moutrèn la banquetta*) Adón me beutto sé.

Lo vallet, eun véyèn François eunna mia eun difficultó, lèi baille eunna man pe reustì drette.

PROSPERO François ! La fèi t'a trompoù poste !

FRANÇOIS Na, na.

PROSPERO ... pequé sé baillon maque l'éve !

FRANÇOIS Sitte l'è lo poste djeusto. Pequé demàn n'i le-z-analize. Adón le vioù diyon que se te bèi eunna botèille d'éve de sent'Anna te tchoué tcheu le battère, tcheutte ! Proua euncó té !

PROSPERO Mi mé n'i pa fata. (*Ver Naima*) Euh madama aritade-vó, soplé. Pouade fiye passì lo mesieu que tante l'a djeusto eunna botèille ? An pégna botèille !

NAIMA Pensa té se dèyo baillì eunna man a llou ! Mé n'i totte le botèille di mèinoù seu !

PROSPERO Fièn maque pasé douàn llou, l'a maque eunna pégna botèille.

NAIMA Mi penso fran pa, maque de drouet vouillade. Pa poussiblo !

PROSPERO Baillade-mé eunna man, soplé !

NAIMA ... é adón baillèn eunna man !

Naima é Prospero prègnon, eun pe couti, lo pouo François, mi, aprì eun mètre, Prospero lo queutte tot a Naima, laquelle, eun trebelèn, areuvve a pouté François i distributeur. Eun véyèn an mia dobro, François eunserèi la tessera é plache la botèille. Dimèn, Naima trame le botcha, louèn de François que l'è todzor preste a tsire.

PROSPERO (A François) Adón t'areuvve a séléchoui l'éve ?

FRANÇOIS Ouè, ouè... sent'Anna.

*François gnaque lo botón de l'éve sent'Anna.
Teuppe 🍷 .*

🌧️ UEFA CHAMPIONS LEAGUE ANTHEM 🌧️

Lemiye 💡.

VALLET Vo imajinade ghenca sen que l'è capitou-vo ! La sosiétou que fé seutte machine l'a vendi-vo ara lo litre numéró 1000 !

*De dameun la Bouteucca de l'éve, le dou cantogni sparou pe l'er de confetti.
Areuvve euncó lo Seunteucco.*

SEUNTEUCCO Mondjemé, n'i falli galoppi to de chouite eun sé !
Mi que dzenta noalla ! N'en no, a Tsarvensoù, lo venqueur di litre numéró 1000 ! (I vallet) Va crii to de chouite lo TG3.

SEUNTEUCCO (A François, eun lèi sarèn la man) Complemàn, complemàn de la par de totta la Jeunte, complemàn !

François veun tellamente sopató pe lo Seunteucco que reusque de tsire pe tèra.

NAIMA Mi pensa té sitte ! Se passavo mé avouï mon litre, lo prégnò mé lo litre numéroté 1000 ! 🤔

*Entron eugn opérateur di reprèize RAI é eunna journaliste.
Dimèn, le dou cantogni bèichon ba di distributeur.*

VALLET (*I Seunteucco*) Mondje que chansa ! L'ian seuilla dèrì a fiye eun servicho desù le jiragnón de Mariolino Bonadé.

JOURNALISTE RAI (*I Seunteucco*) Qui l'a gagnà ?

SEUNTEUCCO (*Eun moutrèn François*) Llou, llou !

La journaliste se plache protso de François é l'opérateur di reprèize se pozechoun-e pe le reprendre. François l'è vardó drette grase a Attila ; protso de leur n'at euncó Prospero que salie la machina di reprèize.

JOURNALISTE RAI Bondzor a tcheutte ! Sen seu pe sentì sen que l'at a no diye lo mesieu que la terià lo litre numéroté 1000 a la Bouteucca de l'éve. Ara vèyèn sen que l'a gagnà. (*Eugn aprotsèn lo microfonne ver François*) Adón mesieu . .

FRANÇOIS (*Eun se medzèn le paolle*) Francois Treuncaillette.

JOURNALISTE RAI François comèn vo sentade aprì avèi i eunna satisfachón di janre ?

FRANÇOIS Eh ?

JOURNALISTE RAI Diavo, comèn vo sentade aprì avèi i eunna satisfachón di janre ?

FRANÇOIS Ah, a mé l'è pa tchandjà ren.

Lo Seunteucco eunterveun eun prégnèn lo microfonne.

SEUNTEUCCO Adón fa diye que no sen contèn d'èi sé a Tsarvensoù lo gagnàn di litre numéroté 1000 de la Bouteucca de l'éve. La sosiétou que l'a vendi-no la machina bailléré a mesieu François eun bon de 200 litre pe caletou d'éve da dzoure devàn lo 31/12/2012.

Prospero s'aprotse i microfonne.

PROSPERO Se va bièn nen avanchéré trèi car ! 😂

JOURNALISTE RAI Ouè adón de Tsarvensou l'è totte, mersì a tcheutte
é orvouar a l'an que veun !

🇸🇦 TSI LA TÈILA 🇸🇦

Derì le ridó

Réjì

Paola Corti

Collaborateur

Valentina Ferré

Mijì

Renzo Bollon

Souffleur

Jasmine Comé

Tramamoublo

Jean-Pierre Albaney

MATTE... SEN TCHEUTTE MATTE

Pièse icrita pe Le Digourdi

Téatro Giacosa de Veulla, 26 avri 2013

Le Digourdì di 2013



Drette: Ester Bollon, Giada Grivon, Marco Ducly, Simone Roveyaz, Ilaria Linty, Laurent Chuc, André Comé, Pierre Savioz, Jordy Bollon.

Achouatoù: Sophie Comé, Jasmine Comé, Joël Albaney, Joëlle Bollon, Francesca Lucianaz, Paolo Cima Sander, Stephanie Albaney.

🎮 MATTE... SEN TCHEUTTE MATTE 🎮



Lo souvenir de l'acteur

« Eun souvenir particulié de « Matte... sen tcheutte matte » l'è la fasilité avouè laquelle n'en cherdì la protagoniste de la counta : « Qui de no s'arbeuille fran mal é l'et a la retsertse de l'amour de sa via ? » ; tcheutte son viondo-se ver mé. Pouò pa diye de na !

Dèyo diye que aprì seutta pièse n'i belle meillorou deun lo chouà di coteillón (si pa mé que lo diyo ! L'è Laurent Chuc que l'a deu-mello !) ... é pe sen que regarde l'amour de ma viya pouo diye que ara si mamma d'eun mèinoù mervèilleu, que (boneur !) l'a ren a veure avouè Twitter !

N'i euncó eun souvenir de seutta pièse, que me fé todzor moueure di riye : le patèle é le creppe que Ester baillè ba i pouo Marco can eunterprétoon la parodi de SOS tata. De salle baquettaye desì l'itseun-a ! »

Joëlle Bollon

Queriauouzitou

- Pierre Savioz l'a i eun problème technique avouè son micro-fonne. Can l'a falli chotre pe tsandji-lo, l'a desidó de resté fous *scène* pe eun bon momàn, eun fièn eunna mia tracachì Jordy Bollon (que l'ie maque lo secón cou que resitè si lo palque). Mi can l'è entroù l'a bièn esplecoù i pebleuque pe-qué l'ayè falli scapé fous !
- Pe lo premì cou, la présentachón di-z-acteur l'è itaye féta de fasón diffienta reuspé a la tradichonella magniye de queri eun aprì l'atro tcheu le-z-acteur a la feun di spectacle. Tcheu le-z-acteur son itó présentó a l'entérieur de la danse *chorégraphique* finale.

Scénographie

- 1 pégnò chofà, pe doe personne, é 1 télécomanda ;
- 1 sidel de Popcorn ;
- 1 péгна tabla, ata tchica mouèn d'eunna caèya ;
- 1 fondal gri ou *beige*, lardzo eun car di palque ;
- 1 pourtamanti ;
- 1 manequen fenna avouè eun coteillón élégàn ;
- 1 meriaou ;
- 1 poltronna de pi maròn ;
- 5 caèye coloraye ;
- 1 tabouré de bouque ;
- 1 tabla pe maenda é 1 pe traillè avouè l'ordinateur ;
- 3 caèye de bouque seumple, pe lo mitcho ;
- 1 balón d'éponje pe le mèinoù ;
- 1 grousa busta de bouque, ata 2 mètre é lardze 3. Atatchà i panel de bouque n'at eun secón panel triangulère que, eun cou iver, moutre eunna fenitra.

 PERSONADZO

AUGUSTE	Vétchot avouè todzor la repounsa presta, eunterprétoù pe PIERRE SAVIOZ.
JOSEPH	Vétchot que comenche a pédre eun per de creppe, eunterprétoù pe JORDY BOLLON.
GUILLAUME	Imitachón de Enzo Miccio de la trasmechón <i>Ma come ti vesti?!</i> , eunterprétoù pe LAURENT CHUC.
CHÉRIE	Imitachón de Carla Gozzi de la trasmechón <i>Ma come ti vesti?!</i> , eunterprétaye pe FRANCESCA LUCIANAZ.
ALICE	Feuille dzouveunna, sa pa s'arbeillè é l'a pa euncó acapoù l'ommo de sa viya, eunterprétaye pe JOËLLE BOLLON.
MARIE DE FELEUNNA	Imitachón de Maria de Filippi, eunterprétaye pe SOPHIE COMÉ.
TANTEUN	Eun tronista de la trasmechón <i>Uomini e Donne</i> , <i>tombeur de femmes</i> que vou acapé la fenna de sa viya, eunterprétoù pe PAOLO CIMA SANDER.
LOUISE	<i>Trans</i> inamoroù de Tanteun, eunterprétoù pe ANDRÉ COMÉ.
SPÉRANCE	Dzouveunna grasieuzza mi bièn déterminaye a gagné lo queur de Tanteun, eunterprétaye pe STÉPHANIE ALBANEY.
TWITTER	Garsón eumpestoù é vichà, botcha de Alice é Tanteun, eunterprétoù pe MARCO DUCLY.

TANTA FINE	Imitachón d'eunna <i>babysitter/tata</i> de la trasmechón <i>SOS Tata</i> que eunsègne comèn teri si le botcha, eunterprétaye pe ESTER BOLLON.
IPAD	Feuille adolésante de Alice é Tanteun, eunterprétaye pe STÉPHANIE ALBANEY.
GEPPINO	Posteillón de la trasmechón <i>C'è posta per te</i> , eunterprétoù pe SIMONE ROVEYAZ.
TURI TOUNEUN	Imitachón d'eun consèilli réjonal de la XIIIa léjislature, eunterprétoù pe JOËL ALBANEY.

ACTE I

SE IVRE LO RIDÓ

Scène I – SAMSUNG... LO QUEZEUN DE BALAN

Lemiye a gotse di palque, iaou acapèn eun vétchot achouatoù si eun chofà. L'è eun tren d'atendre son meillaou amì.

JOSEPH (*I pebleuque*) Di-me té si ommo ! L'è todzor eun retar, ma-leur ! Senque l'ayè tan a fé, me dimando mé. L'a pa de-z-oréo si ommo.

Se sen bouéchì a la pourta.

JOSEPH La fèi l'è lli !

AUGUSTE (*D'èi déri le ridó*) Permì ?

JOSEPH Ouè veun maque !

AUGUSTE Salì !

L'amì d'Auguste entre.

JOSEPH Oh lo noutro, comèn l'è ?

AUGUSTE N'a pamì de demì sèizón !

JOSEPH Sourtoù sit an !

Auguste s'avèitse a l'entor é comenche a baillì de pégno creppe i solàn é i meur.

JOSEPH Senque t'i eun tren de fé ?

AUGUSTE L'è-ti bon lo simàn ?

JOSEPH Lo simàn ? Pe fose que l'è bon. T'a euncó finque bailla-me eunna man a eumpasté la betumeuza ! Te rapelle pa ? L'ion le-z-àn '70 ! Mimo ten que l'an fé le-z-icoulle a Tsarvensoù.

AUGUSTE Fran sen que me tracache ! Fé-lo contrôlè !

JOSEPH Mi soplé, achouatta-té, macaco !

Auguste s'achouatte protso de Joseph.

JOSEPH Adón, que te counte ? T'atégnao pi vito. T'i todzor lo mimo !

AUGUSTE N'i rontè la moutra é n'i pamì eugn oréo.

JOSEPH Pequé ? Se te ron la moutra te pou pamì sèi quent'aoua l'è ?

AUGUSTE Na, avèitso le-z-itèile mi dèyo attendre la nite pe sèi l'aoua.

JOSEPH Acoutta eunna bagga, pequé te fé pa comme tcheu le-z-atre Tsarvensolèn que l'an la noua magniye pe sèi l'aoua ?

AUGUSTE Queunta ?

JOSEPH Lo mateun, can van travaillè, se euncrouèijon salla que galoppe pe lo plan d'Ampaillan, adón son tranquilo de teumbré eugn oréo ; can, i contréo, la euncrouijon i Fossà, son belle que tracachà !

AUGUSTE Ah ! (*Eun tsandzèn discoù é eun moutrèn eun poueun douàn lli*) Belle dzen lo nouo cadre que t'a pendì i meur.

JOSEPH Queun cadre ?

AUGUSTE Si lé to neur, dzen !

JOSEPH Si lé to neur ? Caró ?

AUGUSTE Ouè, to neur, dzen !

JOSEPH Ouè, dzen si cadre ! N'i atseto-lo sit an a la Fèira, lo nouo sculteur, si itrandjè que l'a portoè pe lo premì cou !

AUGUSTE Cougniso, cougniso...

JOSEPH L'at euncó finque lo non marcó dézò... Samsung ! Te lo cougnè ? L'è fameu !

AUGUSTE Djèique que lo cougniso !

JOSEPH Macaco ! Te vèi pa que l'è eunna télévijón i LED !

AUGUSTE (*Éton-où*) Télévijón i senque ?

JOSEPH I LED ! Ara te l'aleummo...

Joseph tsertse la télécomanda.

JOSEPH Te baillo euncó le gran de meurga di-z-Amériquèn...

Joseph teurie foua eun grou sidel de Popcorn é lo baille a Auguste. Aprì aleumme la télévijón. Can s'aleumme, la lemiye é le couleur son tellamente forte que Auguste dèi clloure le joueu !

JOSEPH Avèitsa que couleur !

AUGUSTE Mondjemé ! Atèn que beutto le lenette di solèi !

Auguste se beutte eun grou per de lenette di solèi.

AUGUSTE Oh ouè ! Ara ouè, fran dzen ! Mi... n'at eunna émichón que comenche ? Senque l'è ?

JOSEPH Èita... son euntellijante seutte télévijón. Baste gnaqué eun botón é te di totte.

Joseph gnaque eun botón é li lo titre de l'émichón.

JOSEPH « Comèn te t'arbeuille ? ! ».

AUGUSTE (*Douteu, eun s'avèitsèn le pateun*) De pantalón, ganeussón, la tsemize é lo tsapi !

JOSEPH Mi senque t'i eun tren de me diye té ?

AUGUSTE M'arbeuillo pouèi mé !

JOSEPH Mi na ! « Comèn te t'arbeuille ? ! » l'è lo non de l'émichón ! Te sa beun senque l'è ?

AUGUSTE Na ! Mé avèitso pa seutte bague.

JOSEPH ... é adón dimanda touteun ! Donque... t'euspleuccon comèn t'arbeilli a la modda.

AUGUSTE N'i la fèi que t'avèitse pa tan chouèn seutta émichón. T'a todzor le mimo dra de can t'ayè 20 an !

JOSEPH (*Eun rièn*) Té ouè que t'i seumpateucco ! Ara quèi que comenche.

Teuppe 🍷.

Scène II – MI COMÈN TE T'ARBEUILLE ? !

Lemiye 💡 a drèite.

Eun scène n'a Chérie, Guillaume é eun manequen arbeillà avouè eun dzen coteillón. Comme fondal n'at eunna tèila desì laquelle l'è proyettoù lo logo de la trasmechón.

GUILLAUME Bonsouar a tcheutte ! Oueu a la trasmechón « Mi comèn te t'arbeuille ? ! » no éidzèn Alice, 28 an, eumplouayé réjonalla.

CHÉRIE T'a bièn deu Guillaume, oueu lèi tsandzèn sa magniye de s'arbeilli. Alice entra maque !

Entre Alice avouè eun pourtamantì plen de dra.

ALICE Bonsouar !

Guillaume é Chérie braillon épouvantó.

GUILLAUME Comme te vèi Chérie, Alice fé caquì !

CHÉRIE Guillaume t'i finque tro jantilo.

ALICE Mi comèn ? Oueu n'i finque betoù le botte de la mima couleur de la tsemize. Can mimo l'è beun vrèi que tcheutte me diyon que m'arbeuillo pa tan bièn... é l'è fran pe sen que si viin-a seuilla : pe vo dimandé eunna man.

CHÉRIE L'an rèizón le-z-amì de té ! Mi ara alèn veure le pateun que l'at.

GUILLAUME Alèn veure son armouare.

Chérie é Guillaume s'aprotson i pourtamantì de Alice. Chérie pren eunna maille é iternèi.

CHÉRIE Mondjeu ! Si allerjeucca i tissù di tchinèis !

Chérie braille comme se l'ise vu lo djablo.

GUILLAUME Mi senque t'a vi ? Eun rat ?

CHÉRIE Pire ! Avèitsa !

Chérie teurie foua eun cachiné¹.

ALICE Dzen sitte ! L'a fé-me-ló magàn.

CHÉRIE Magàn ?

GUILLAUME Magàn ? Ouè, avouè eunna man é avouè l'atra fiave la sepetta !

Chérie tappe ià lo cachiné.

ALICE (*Dispéraye*) Mi na !

CHÉRIE Ouè se pouè pa veure.

Chérie teurie foua eun foulard blan.

CHÉRIE (*Ver Alice*) ... é so ?

ALICE So can fi frette.

CHÉRIE (*Digoutaye*) Mondjeu flèrie finque !

Alice pren lo foulard di man de Chérie.

ALICE ... avèitsa te fiyo vère : can fé frette mé fiyo pouai...

Alice moutre a Guillaume é Chérie comèn se toppe di frette : avouè lo foulard se fèiche la tita.

CHÉRIE Mi l'è pa eun burqa ! É t'i pa pi eunna seur ! Ià so !

Alice baille lo foulard a Chérie.

1. *Écharpe* eun fransé ou *sciarpa* eun italièn.

GUILLAUME (*Ver Alice*) Avèitsa dèrì de té! Lo dahu!

Alice se vionde. Sensa pédre de ten, Chérie tappe ià lo foulard.

ALICE Mi n'i pa vi-lo!

CHÉRIE Mi que damadzo... ara Alice te présentèn lo bon gou. Te fièn veure comèn te dériye t'arbeillì.

Guillaume é Chérie moutron a Alice lo manequen.

CHÉRIE Voualà! N'en cherdì pe té eun tissù de Paris : Louis de Cagnon.

ALICE Senque?

CHÉRIE Louis de Cagnon! Totsa maque lo tissù!

Alice totse eun tissù a case.

GUILLAUME Mi na! Senque te fé? N'en deu-te Louis de Cagnon!

ALICE Mi senque vou diye?

CHÉRIE Cotón! Ouff...

GUILLAUME Ara que te cougnì tcheu le secret de la modda, va fé la spèiza di dra, pren la carte de *crédit* é que lo bon gou...

CHÉRIE E GUILLAUME ... sise avouè té!

Guillaume fé tsire pe tèra la carte. Alice la pren é galoppe foua totta contenta.

Scène III – A TSASSE D'ÉLÉGANSE

Partèi eunna vidéo iaou Alice entre pe eun négose pe atseté de-z-arbeillemèn. Guillaume é Chérie, dimèn que avèitson la vidéo, dzeudzon sen que combin-e Alice².

2. Tanque a la feun de la proyéchón, le-z-achón é le battiye de Alice icrite deun si teste son salle que lleu eunterprète deun la vidéo.

Teuppe 💡.

👤 COMÈN TE T'ARBEUILLE?! 👤



ALICE (*Eun entrèn deun lo négose, ver la serventa*) Mé si l'amia de Chérie é Guillaume de la trasmechón « Mi comèn te t'arbeuille?! » ...

GUILLAUME Ah! Mé la denoncho!

CHÉRIE Mi selón té n'en de-z-amie que s'arbeuillon mal pouai?

ALICE Fio eun tor, avèitso tchica de bague...

GUILLAUME Eun tor? Mi arbeillaye pouai te fé eun tor i bitche!

CHÉRIE Ouè pa de pi! Avèitsèn sen que pren.

Alice cher eun coteillon bièn dzen mi lo pren pa.

CHÉRIE Mi si lé l'ye dzen! (*Eugn avèitsèn la vidéo*) É ara... dzen sise peundeun, i mitcho nen n'i eun per igale...

Alice cher eunna jupe orribla.

ALICE Sitte ouè! Avouè seutta jupe sario presta pe fé eun apéro.

GUILLAUME A Comboé te fé l'apéro!

CHÉRIE Salla jupe te la eumplèye comme nappa!

Alice pren eun coteillon orriblo.

ALICE Ouè! So l'è cheur comèn s'arbeuille Chérie, l'è fran sa magniye de s'arbeilli.

CHÉRIE (*Scandalizaye*) Mi selón té m'arbeuillo pouai? Guillaume! Galoppa! Vito!

GUILLAUME Vou mé! Lèi penso mé!

*Guillaume chor de scène é i mimo ten entre deun la vidéo.
Reprodze Alice pe le beur pateun que l'a djeusto cherdì é lèi
pren de coteillón élégàn.*

Feun de la vidéo.

Lemie 💡.

CHÉRIE (*I pebleuque*) Boneur que l'è arrevouè Guillaume ! Vo rendade contcho comèn s'arbeuille salla fenna ? Guillaume !

Entre Guillaume.

GUILLAUME Chérie, n'i pensou-lei mé. Alice l'è fantastique. Alice entra maque !

Entre Alice avouè eun dzen coteillón neur.

CHÉRIE Oh que dzenta que t'i ! T'i contenta ? T'i dza vi-te i meriaou ?

ALICE Na !

CHÉRIE Vou lo prendre to de chouite.

Chérie chor é torne dedeun avouè eun grou meriaou.

CHÉRIE (*Ver Alice*) T'i presta ? Eun, dou, trèi...

Chérie vionde lo meriaou ver Alice.

ALICE Wow ! Mi si fran mé ?

GUILLAUME Ouè Alice !

ALICE Na lèi crèyo pa !

CHÉRIE Oué é to mersì a no !

ALICE Mersì Guillaume, mersì Chérie !

CHÉRIE Acoutta Guillaume, va veure deun lo poubleuque se n'a lo pappà de Alice, mogà l'a quetsouza a no deue.

GUILLAUME (*Ver lo pebleuque*) V'ouite lo pappa de Alice ? Ah na... eugn éffé l'è tro arbeillà amoddo pe itre lo pappa de Alice... probablemàn l'an pa fé-lo entré.

CHÉRIE Ouè cheur. (*Ver Alice*) Mi adón di-no sen que te nen pense té vi que lo pappa l'è pa.

ALICE Ara crèyo beun d'itre an mia pi dzenta, fran dzenta... mi n'at euncó eun petchoù problème.

CHÉRIE Queun ?

ALICE Me manque eugn ommo !

CHÉRIE ... é adón senque te atèn ? Va lo tsertchè ! Galoppa !

Tcheu trèi chorton contèn.

Teuppe 🍷.

Scène IV – DOU SEN PÉE É EUN SAOUTÓN

Lemiye a gotse 💡.

AUGUSTE Mi baillon-tì todzor seutta counta foula ?

JOSEPH Ouè, ll'è eunna counta noua tcheu le dzor. A propoü de counte... é salla di Sen Pée ? Avouï totte le dzi que trebeullon deun la viya é dèyon travaillì tanque a 70 an, pe lo premì cou deun l'istouére l'è alló lo Sen Pée eun penchón !

AUGUSTE Pouè pa fé comme tcheu le-z-atre ?

JOSEPH Ouè pequé son de chouà que porton euncó de consecanse ! Imajinate-ló eun quiya a la pousta pe reterì la penchón !

AUGUSTE Prèdza-mé pa de penchón ! Avouï sise cattro tri que n'i areuvvo pa a la feun di mèis ! Mi ara tsandzerèn le bague... pequé mé baillo pi la vouése a sise di saoutón !

JOSEPH A qui ?

AUGUSTE Saoutón ... Grillo ! Pequé llou, avouì le noue-z-éléchón nachonalle, tsadzeré totte !

JOSEPH Le noue-z-éléchón nachonalle ? Mi se n'en djeusto fé-le eun mèis fi !

AUGUSTE Comèn que n'en djeusto fé-le ? N'isan fé-le, le bague sarian tsandjaye. Avèitsa si i Gouvernemàn : n'a todzor le mimo é lo Prézidàn de la Repebleucca... tourna llou !

JOSEPH Eugn éffé t'a beun pa tcheu le tor gneunca té.

AUGUSTE (*Eugn avèitsèn la télévijón*) Can mimo... la réclamme l'è fenìa.

JOSEPH Ouè. Senque gnouerè ara ? Dimandèn a Samsung.

Joseph gnaque eun botón de la télécomanda.

JOSEPH « Ommo é Fenne » ... te sa senque l'è ?

AUGUSTE (*Eumbarachà*) Na avèitso pa seutte bague.

JOSEPH Adón demanda ! L'è suffizàn dimandé a Samsung é llou repón .

Joseph gnaque eun gn atro botón.

JOSEPH Ah ouè n'i comprèi... donque pe la diye avouì de paolle seumple, ll'et eugn ommo que dèi chédre de fenne... tchica comme i martchè di vatse. La présentatrise l'è Marie de Feleunna, la blounda.

AUGUSTE Ouè cougniso... l'ommo l'è... atèn que me veun pa lo non...

JOSEPH ... mondjeu euncó mé me veun jamì son non... ah oué ! Maurice, Maurice !

AUGUSTE Ouè Maurice Costan ! Couscrì a té ?

JOSEPH Na touteun, l'è bièn pi dzouveun-o. Can mimo mersì, vou deu que pourto fran bièn le-z-àn !

AUGUSTE Ara quèi que gnoue.

Auguste se beutte le lenette di solèi.

Teuppe 🍷.

Scène v – OMMO É FENNE

Lemiye 💡 si la drèite di palque.

I mentèn n'at eunna poltronna eun pi, a gotse trèi caèye coloraye é a drèite eun tabouré de bouque. Comme fondal n'at eunna tèila desì laquelle l'è proyettoù lo logo de la trasmechón é la fotografiye de Marie de Feleunna.

Entre Marie de Feleunna.

🏠 *Uomini e Donne - Jénérique* 🏠

MARIE DE FELEUNNA Bonsouar a tcheut é bienvin-à a la 43^a é deriye émichón de « Ommo é Fenne » ! Oueu, noutro Costanteun, pe tcheut « Lo Dzen Tanteun », cherderè sa compagne de viya. Adón fien-ló to de chouite entré : Tanteun !

🏠 *Uomini e Donne - Jénérique* 🏠

Di pebleuque pouye si lo palque Tanteun, tot arbeillà élégàn. Dimèn que fé lo défilé, mande de poteun é saliye le fenne di pebleuque.

TANTEUN Bonsouar a tcheut, bonsouar Marie, mi sourtoù bonsouar a totte le feuille que m'avèitson, me mioulon é que son belle itsaoudaye pe mé seutta nite !

Tanteun é Marie s'achouatton : Tanteun si la poltronna (lo trone) é Marie si lo tabouré de bouque.

TANTEUN (Ver Marie) Aprì to lo ten passò eunsemblo avouì totte le feuille que n'en cougnì sen arrevòu a la feun de seutta dzenta trasmechón. Te dèyo diye eunna bagga Marie : l'è fenì mon ten comme fleungàn !

MARIE DE FELEUNNA Ouè, te faré praou ataqué a beti la tita a poste !

TANTEUN La tita a poste ? Marie t'arito to de chouite. Dièn que tsertseriyo de fé tchica l'ommo tranquilo pe le prochèn dou ou trèi dzor.

MARIE DE FELEUNNA Dou ou trèi dzor ? Tanteun ! Seutta l'è eunna trasmachón sérieuza ! Fa pa fé seutte bague. Pe eunna tin-a désijón pouriye nèitre eunna noua fameuille.

TANTEUN (*Eunna mia perplecse*) Va bièn, adón... comenchèn ?

MARIE DE FELEUNNA Ouè, perdèn pa d'atro ten. Fièn entré la premiye feuille. Oueu lo nite n'en Louise, 20 an, eunna mia particuilliye... eun tsertsa de l'ommo de sa viya. Adón fien-là entré. Louise !

🏡 *Uomini e Donne - Jénérique* 🏡

Di pebleuque pouye si lo palque Louise. Pèi rouze é avouè de tsambe eunna mia tro peluye, Louise fé lo défilé eun salièn tcheut. Louise prèdzerè todzor avouè eunna vouése déguizaye, bièn femminile.

LOUISE Bonsouar Tanteun, que dzen te reveure, fiyo pa d'atro que pensè a té.

TANTEUN (*Eunna mia digoutó*) Bonsouar Louise, (*ironique*) si fran contèn de te veure.

LOUISE M'achatto ?

TANTEUN Ouè ouè.

Louise s'achatte si eunna caèya a drèite de Tanteun.

MARIE DE FELEUNNA La secounda feuille l'è Alice : l'at 28 an, eumplouayé réjonalla é l'è bièn lamaye par noutro Tanteun. L'a maque eun petchoù problème : l'é pa tan bon-a de s'arbeillè. Adón vièn sen que l'a fé, oueu lo nite, pe plère a noutro Tanteun. Alice ! Entra !

 Uomini e Donne - Jénérique

Di pebleuque pouye si lo palque Alice avouè lo coteillón cherdì pe Guillaume é Chérie. S'aprotse a Marie é Tanteun.

ALICE (*Dousa é gracheuza*) Bonsouar a tcheut, Bonsouar Tanteun.

TANTEUN Bonsouar Alice.

ALICE Spéo que t'ise passó eunna bon-a senà.

TANTEUN Ouè bièn amoddo...

ALICE Mé n'i tsertchè de fé lo poussiblo pe te plére tchica de pi, va bièn ?

TANTEUN (*Eugn avèitsèn to lo cor de Alice*) Ouè, me semble que quètsouza l'è beun meillorou !

ALICE Adón vou m'achaté.

Alice s'achouatte protso de Louise.

MARIE DE FELEUNNA (*I pebleuque*) Voualà, é ara la dériye feuille l'è noutra Spérance : lleu s'atèn pa de grouse bague de seutta trasmechón, lleu vou maque eugn ommo pe bèye eun cafi de tenzentèn lo desandro ou pe fé de chortiye caque cou. Adón fièn entré Spérance.

 Uomini e Donne - Jénérique

Di pebleuque pouye si lo palque Spérance avouè eun coteillón d'ipaouza. Fé eun petchoù défilé é s'aprotse a Marie é Tanteun.

SPÉRANCE Bonsouar a tcheut, bonsouar Tanteun !

TANTEUN (*Éton-ou*) Bonsouar, mi comèn t'i arbeillaye ?

SPÉRANCE Squiza, mi n'i fran betoù la premiye бага seumpla é comodda que n'i acapoù pe l'armouare.

TANTEUN La pi seumpla é comodda ? !

Spérance s'achouatte protso de Alice.

Scène VI – LE-Z-ARME DE L'AMOUR

MARIE DE FELEUNNA Ara que no sen tcheutte inque, mé dze vo fériyo to de chouite vère eunna *vidéo* de sen que la combin-à seutta senà noutro dzen Tanteun. *Vidéo* !

Si la tèila l'è proyettaye la chortiya amoureusea de Tanteun é Spérance : eunna romantique sin-a i restoràn Monte Emilius.

Teuppe 🍷.

👤 AMOUR I MONTE EMILIUS 👤



Lemie 💡.

LOUISE Mi Spérance, spleca-mé eunna бага : pequé t'a pa betoù si grou-z-arbeillemèn blan, que te semble eunna pouetta féta i crotset, pe alì prendre eun apéritif ou medjì sin-a ?

SPÉRANCE N'i la fèi, Louise, que té t'a pa vi amoddo la *vidéo*... é can mimo fran té te prèdze ? Que t'i todzor arbeillaye comme eunna patoille ? Iaou te crèi de itre ? A Rio de Janeiro ? Avèitsa que lo carnaval l'è fenì é dèi tchica !

LOUISE Mi Marie, t'a senti comèn m'eunseurte ? Acouta seuilla bella ! Mé si eunna patoille mi oumouèn n'i le bale pe deue sen que penso... pa comme vo doe ! Eunna reste quèya é l'atra se catse dèri eun grou-z-arbeillemèn blan !

ALICE Louise ! Rapella-té que pe prédjì maque pe baillì flo a la botse, l'è miou resté quèi... ou quèya ; (*ver Spérance*) é té planta-là lé de te arbeillì avouì sise patrasse blan. Pequé Tanteun pourteré mé a l'aouté... avouì mon charme !

Spérance, offenchaye, se levve é s'apreste pe chotre.

SPÉRANCE Marie! Mé deun seutta condichón queutto la trasmechón. Me sento fran prèiza pe lo C.

Alice se levve é eunvite Spérance a s'achouaté.

ALICE Mi soplé saquetta! Tourna t'achouaté!

SPÉRANCE Senque? Di-mé pa sen que dèyo fiye!

Le doe s'achouatton, mi conteneuvvon a tsacoté eun lévèn todzor pi la vouése. Dimèn...

LOUISE (A Tanteun) Tanteun fièn eunna danse?

Tanteun se levve é comenche a danchi avouè Louise. Marie, dimèn que Alice é Spérance mollon pa de tsacoté, avouè eun jeste fé partì :

 UNCHAINED MELODY - THE RIGHTEOUS BROTHERS

Alice é Spérance s'apersèison de la danse é queutton de s'euncheurté. Louise é Tanteun son todzor pi llatou : s'avèitson, s'acarèson, s'eumbrachon... Tanteun, dousemàn, bèiche le man é sare lo qui de Louise. A si poueun Alice é Spérance se levvon é divijon Tanteun é Louise.

ALICE (A Tanteun é Louise) Oh mi senque fiade?

TANTEUN Eunna péгна danse, ren d'atro.

SPÉRANCE Me semble fran pa lo ca de fi seutte danse!

TANTEUN Mondjeu que counte foule!

Tcheutte s'achouatton a leur poste.

ALICE Marie! Mé si pa viin-a seuilla pe vère dou mèinoù que rijon to di lon. Dimanderiyo a Mediaset de pourti foua seutte doe caramban-e!

MARIE DE FELEUNNA Praou ! Praou ! Praou ! Ara l'è lo momàn iaou noutro Tanteun dèi chédre sa compagne de viya. Tanteun te dèi to de chouite me baillè lo non de la premiye feuille de oueu lo nite.

TANTEUN (*Douteu*) L'è defesilo... senque diye. Donque... comencheriyo avouè... Louise.

Louise souspire, spèranseuze.

TANTEUN Louise n'i porto-te seuilla perqué tsertsavo de bague noue, diféente, mi si apersi-me que a la feun di contcho l'è fran la normalitoù sen que tsertso. Adón poui maque te diye que t'i pa la fenna pe mé.

LOUISE (*Eun plaouèn*) É beun Tanteun, te sa pa sen que te te per ! T'i eunna grousa délujón .

TANTEUN Touteun si beun que t'i pa eun gramo garsón, (*jèinoù* 😊) eunna grama feuille ! Mi t'a pa i de chance, squeza-mé.

MARIE DE FELEUNNA Louise, t'i restaye-lèi praou mal... pren eun motchaou.

Marie baille son motchaou a Louise.

LOUISE Mersì Marie. Tanteun l'ayè bailla-me l'eumpréchón de itre bièn euntérésoù a mé. Ara me nen vou !

Louise chor.

MARIE DE FELEUNNA Me diplé fran tan pe Louise. Mi no fa alé eun devàn. Tanteun, avouè qui te vou prédjì ? Bailla-nó eun non.

TANTEUN Eugn atro non ? L'atro non l'è si de Spérance.

Spérance souri.

TANTEUN Spérance... adón la viya l'è pa maque prendre eun seum-plo apéritif eunsemblo ou eunna crè sin-a i restoràn. Donque, te diyo que t'i pa té la fenna pe mé.

SPÉRANCE Mi Tanteun ! Selón té dze si arbeilla-me pouèi pe senque ?
T'i fran eun marón !

Spérance chor.

TANTEUN (*I pebleuque*) Euncó di marón n'i tchapó .

MARIE DE FELEUNNA Adón dze poui pensé que la feuille que t'a
cherdi l'è...

TANTEUN (*Eun sourièn*) Alice !

Alice se levve émochon-aye.

TANTEUN Mi avèitsa que dzenta, veun sé ! (*Eun moutrèn son dzin-
ao*) Achatta-té sé !

Alice s'achouatte si Tanteun.

TANTEUN (*A Marie*) Te vèi que dzenta ? É l'è pa maque euntelli-
janta, sa sourtoù resti quèya can se dèi ! Caletaye i dzor de
oueu bièn eumpourtanta ! (*Ver Alice*) Senque te nen di ? Alèn
ià ?

*Alice souri amoureuxa. Le dou chorton avouì lo refrèn de la
trasmehón .*

Teuppe 🍷.

Scène VII – TSARVENSOÙ-BECCA-DE-NOUA

Lemiye 💡 a gotse.

AUGUSTE Baillon de-z-émichón bièn euntellijante !

JOSEPH Maleur, maleur ! Deh, senque l'è salla réclamme ? (*Eugn
avèitsèn la télévijón*) Èita ! To lo bouque que beurle... Il'è euncó
eunna verdzasse... é ara peuque eun bonbón. Mi senque fé ?
Levve la patta é... pette ? !

Le dou stchoppon di riye.

AUGUSTE Eunna verdzasse que pette !

JOSEPH Mi se pou-ti de bague di janre ? ! Mé n'i jamì vi de verdzasse pété. Maleur la télévijón. N'i todzor deu que medji de bonbón fé pa tan di bièn. Todzor mioù eun dzen toque de saouseuse.

AUGUSTE Ouè ! Mi tsandzèn discoù : n'i pamì sentì prédji de Corméyaou... salla counta...

JOSEPH Queunta ? Lo caille de La Saxe ?

AUGUSTE Na... que vouillon tsandji lo non de la Quemeua eun Courmayeur-Mont-Blanc.

JOSEPH Ouè ! Te sa pa la dériye : euncó noutro Seunteucco l'a désidoù de tsandji lo non de la Quemeua. L'a dimandó lo condjà i Prézidàn ! Te sa comèn vou la queri ?

AUGUSTE Na.

JOSEPH Tsarvensoù-Becca-de-Noua !

Le dou stchoppon di riye.

JOSEPH A fose l'è fenìa la réclamme !

AUGUSTE A fose !

JOSEPH (*Eun prégnèn la télécomanda*) Avèitsèn sen que gnoue... Samsung !

Joseph gnaque eun botón . Le dou saron le joueu pe lie.

JOSEPH Ara comenche « Èidza-mé tanta ». (*Ver Auguste*) Te sa senque l'è ?

AUGUSTE Na, avèitso pa seutte bague !

JOSEPH Adón demanda ! (*Eun gnaquèn eun botón*) Samsung ! Donque, eunna fameuille dispéaye... dimande l'èidzo de tanta Fine. Té t'a comprèi quèichouza ?

AUGUSTE Na...

JOSEPH Mé ghenca ; adón quèi é avèitsa.

Teuppe 🍷.

Scène VIII – ÈIDZA-MÉ TANTA

Lemiye 💡 a drèite, iaou acapèn doe table : eunna pe maenda é l'atra pe travaillì avouì l'ordinateur. Comme fondal n'at eunna tèila desì laquelle l'è proyettoù lo logo de la trasmachón « Èidza-mé Tanta ».

A gotse de la scène n'at Alice. Achouataye, se fé le-z-onlle é avèitse son mèinoù, Twitter, que djouye dézò la tabla. A drèite n'at Tanteun, atatchà a l'ordinateur, bièn eungadjà avouì lo traillè. Twitter, botcha fran bièn eumpestoù, molle pa de fé de braillò é d'eunfastedjì pappà Tanteun.

TANTEUN Vio de bague que n'i euncó a fiye oueu, maladetto d'eun travaille...

Twitter, avouì eun pistolé a éve, icreutte d'éve i vezadzo di pappà.

TANTEUN ... é planta-là euncó té soupli, botcha eumpestoù ! Avouì totte le bague que...

Twitter icreutte euncó d'éve.

TANTEUN (Malechà) Molla !

ALICE Papi ! Papi ?

TANTEUN (Inervoù) Mé si pa papi a té ! Véò de cou n'i deu-te que mé si l'ommo ! Marón mé que, si dzor a salla trasmachón de Marie de Feleunna, n'i cherdi-te. N'iso cherdì Spérance !

ALICE (Eun lèi baillèn pa fèi) ... é beun, papi, te sa senque l'è capitò ?

TANTEUN Na !

ALICE Sit an i Grande Fratello nen prègnon maque onze a la plase de doze comme l'an passou !

TANTEUN (*Ironique*) Mi pensa que bague bièn eumpourtante : onze pitoù que doze !

TWITTER Pappa ! Pappa !

TANTEUN Senque ?

Twitter teurie eun balón eun tita a Tanteun.

TWITTER Booom !

TANTEUN (*Malechè*) Maladetto d'eun botcha eumpestou ! Mi va djou i mentèn de la rotta réjonalla !

ALICE (*A Twitter, sourienta*) Ah lo popón de mé ! Papiii !

Silanse.

ALICE Papiii !

TANTEUN Mi senque n'at ?

ALICE Te sa senque l'a deu-me Tine ?

TANTEUN Tine ? Na...

ALICE L'a deu-me que son eun tren de tsertchè de bouye pe fé le seuntchiye de Cavalli.

TANTEUN (*Ironique*) Todzor de bague eumpourtante t'a pe la tita.

Twitter teurie eugn atro balón si la tita de Tanteun.

TANTEUN Mi te la plante li ? Te tchouèyo !

ALICE Mi na mon petchoù...

TANTEUN (*Inervou, ver Alice*) Pren si botcha soplé que me fé gnenca travailli !

ALICE Mi l'è tan sayo.

TANTEUN Tan sayo ? Si cou n'a praou. Ara lèi penso mé !

Tanteun gnouye a icriye.

ALICE Ouè pensa-lèi té... Twitter veun avouï mamma.

TANTEUN Queun non l'a-ti salla trasmechón iaou veun salla ville, salla tanta, pe baillì eunna man pe seutte (*moutre Twitter*)
bague eumpestaye que te roviyon la viya ?

ALICE Si pa.

TANTEUN « Èidza-mé Tanta » ! Voualà queun non l'at. Ara l'acappo si Google...

Tanteun icrì eunna e-mail. Dimèn Twitter conteneuvve a lo eunfastedjì. Alice, i contréo, djouye avouï lli.

TANTEUN (*A Twittter, greuffo*) Se t'acappo ! (*Eun icrièn*) « Souplì, chère tanta, si eun pouo ommo de 34 an, resto a Tsarvensoù. N'en eun botcha marón é nen pouèn pamì. Souplì, veun seuilla a Feleunna 36 ». Voualà !

Scène IX – TANTA FINE

TCHÉQUEUN

TANTEUN ... é ara qui n'at ?

ALICE Papiii ! Va té veure...

TANTEUN Tourna avouï si Papi ? ! Papi l'è eun tren de travaillì. Va té veure !

Eun dzemotèn, Alice chor.

ALICE (*Jantila*) Bondzor, entrade maque.

SOS tata - Jénérique

Entron Alice é Tanta Fine. Fine l'è arbeillaye avouï eunna londze jupe bleuvva é eunna djaquetta de la mima couleur. Avouï eun

per de lenette si la poueunte di na, l'è bièn sérieuze é autoritaire. Deun eunna man l'at eun dossier, deun l'atra eunna baquetta.

TANTEUN (*Eun avèitsèn Fine*) Mi seutta бага de iaou chor ?

TANTA FINE (*Seuria*) Mé si Tanta Fine.

TANTEUN (*Sourpri*) Oh Tanta Fine ! N'i djeusto mando-vo eunna mail.

TANTA FINE Donque v'ouite vo Tanteun ?

TANTEUN Ouè.

TANTA FINE Amoddo. N'i désidó de vegnì péqué si la pi saventa.

TANTEUN Adón sen a poste !

Fine se vionde é vèi Twitter.

TANTA FINE (*Eun s'aprotsèn a Twitter*) Que dzen si popón.

Fine sare for lo bouigno de Twitter.

TANTA FINE Tchao ! (*Eun sarèn euncó pi for*) Tchao ! Comèn te te queurie ?

Twitter, épouvantó, se catse dézò la tabla. Alice tsertse de téri-lo foua.

ALICE (*Ver Twitter*) Alé, di-lèi queun non t'a ?

Twitter repoùn pa.

TANTA FINE L'è tchica chor ?

TANTEUN Na l'è marón .

ALICE Mi na, l'è que mon popón l'è tchica timido. (*Eugn alondzèn la man ver Twitter*) Veun seuilla...

Twitter scappe.

TANTEUN (*Eun braillèn*) Mi di-lèi tchao !

Tanta Fine baille eunna baquétaye si lo qui de Twitter.

TWITTER Ahia !

ALICE (A Fine) Llou se queurie Twitter.

TANTA FINE (Chocaye) Senque ?

ALICE Twitter !

TANTA FINE Mi v'ouèide de paentó ba pe de lé ?

TANTEUN Na, na, pa de paentó pe la Basa Valaye.

ALICE Na, na, mé é mon omme n'en pensoù de bailli-lèi eun non actuel, moderno !

TANTA FINE Can mimo... si pa se cougnisade le riille de seutta...

Twitter tappe lo balón coudre papp. Fine, pe pénitense, lèi baille eunna baquétaye si le dèi.

TWITTER (Avouè le larme i joueu) Ahia !

TANTEUN (Satisfé) Ah t'a tchapou-la !

TANTA FINE ... si pa se cougnisade le riille de seutta trasmechón...

ALICE Na.

TANTA FINE Vo fiade maque voutra viya de tcheu le dzor, mé me beutto pe eunna coueugne é can n'a caque bague que va pa (avouè la baquetta lévaye) mé eunterveugno !

TANTEUN (Ver Fine) Va bièn, adón mé conteneuvvo a travailli ?

TANTA FINE Ouè.

Tanta Fine se beutte pe eunna coueugne.

Scène X – LE TRÈI RIILLE

ALICE Amoddo... adón té Twitter fé lo sayo. Veun seuilla...

Twitter s'aprotse a mamma é Alice lèi baille lo ciuccio.

ALICE ... fé lo sayo é fé pa malechì pappa. Mé vou presté maenda.

Alice chor. Tanta Fine, sévère, boueuche la baquetta desì la tabla.

TANTA FINE Riilla numéro eun ! Mi touteun Tanteun ! (*Eun mou-trèn Twitter*) L'a caze choui-z-àn, ià si ciuccio !

TANTEUN Proua-lèi té a lo gavì !

Tanta Fine s'aprotse a Twitter, pren lo ciuccio é tsertse de teri-lèi-ló ià avouì bièn de forse. Twitter molle pa de saré le di. A si poueun, Fine lèi baille eunna baquétaye si lo qui.

TWITTER Ahia !

Fine tape ià lo ciuccio. Twitter comenche a plaoué.

TANTEUN (*Satisfé*) T'a tourna tchapou-la avouì la Tanta ! Te vèi que a forse te comenche a comprendre.

Eun sentèn le braillo de Twitter, entre Alice avouì eunna cachoula é de-z-éze.

ALICE Mondje senque l'è capitoù ? (*Ver Twitter*) Senque l'a fé-te ? (*Malechaye, ver Tanteun*) Senque t'a fé-lèi ?

TANTEUN Ara l'è coulpa de mé ! Todzor a mé ! Dimanda a la Tanta !

Alice preste tabla pe maenda.

ALICE Euncó avouì le mèinoù te te la pren ! Mi l'è pa poussiblo. (*Ver Twitter*) Senque l'a fé-te pappa ? A propoù Twitter... oueu mamma l'a prestoù catro sate eun pila ! Veun t'achatì que l'è preste.

TWITTER Na, pa voya !

ALICE (*Dousa*) Sayo Twitter, fé pa malechì !

TWITTER N'i pa voya !

ALICE Twitter !

TWITTER Pappa ! Pappa !

TANTEUN Senque ?

Twitter teurie lo balón eun tita a Tanteun.

TANTEUN (*Malechà*) Mondjeu, lo tchouèyo si botcha !

ALICE (*Eun braillèn*) Todzor la mima counta deun si mitcho ! Twitter l'è preste. (*Euncó pi for*) Twitter ! Veun seu t'achouaté.

TWITTER Na n'i pa voya !

Alice areuvve pa a fée achouaté Twitter si la caèya ; dunque lo pren é lo plache pe tèra protso de la tabla.

ALICE Achatta-té seu. Todzor la mima counta ! Te vou medjì avouè le man ? Meudza avouè le man !

Alice pren lo platte é lo beutte pe téra devàn a Twitter. Tanta Fine eunterveun. Avouè la baquetta boueuche si la tabla.

TANTA FINE (*Ver Alice*) Mi l'è pa pi eun tseun ! Riilla nouméro dou : se meudze tcheutte a tabla ! (*Ver Twitter*) Pren lo platte.

Twitter ignore Tanta Fine. Fine levve la baquetta. Épouvantó , Twitter galoppe ià é s'achouatte a tabla. Fine lèi pren lo platte é lo pouze si la tabla.

TANTA FINE Tanteun.

TANTEUN (*Eugn avèitsèn l'écran de l'ordinateur*) Ouè...

TANTA FINE (*Eun moutrèn la tabla*) Feulla.

TANTEUN (*Avouè reuspé*) Squeuza, to de chouite.

Tanteun s'achouatte a tabla.

ALICE (*A Tanteun*) Vèyo que beutte eun riilla euncó té !

TANTEUN (*Eun avèitsèn lo platte*) Mi senque t'a combinouè seuilla ? Todzor le mime bague. Senque l'è so ?

Tanteun pren avouè le man eun Sofficino é lo boueuche si la tabla. Di son l'è deur comme eun bèrio : l'è pa itó praoou didzaló . Tanteun, démoralizó, tsertse de medji-lo.

TWITTER Mamma ! Cacca !

ALICE (*Dispéraye*) Acoutta... t'a lo Pampers, fé lé é ita tranquilo.

TWITTER Na ! Cacca, n'i fata !

TANTEUN Mi planta-là lé avouè seutta cacca ! Reumplèi bièn lo pannoleun é can t'a reumpli-lo mamma te lo tsandze !

Tanta Fine eunterveun eun bouéchèn sa baquetta si la tabla. Tanteun tchappe pouiye.

TANTA FINE Riilla nouméro trèi : *pipi* é *popò* dedeun lo pisepot.

ALICE Mi lo aprèn pa avouè la trasmechón di Teletubbies ?

TANTA FINE (*Chocaye*) Mi soplé ! Vou prendre lo pisepot.

Fine chor é, doe seconde aprì, entre avouè lo pisepot. Lo pouze i mentèn di palque.

TANTA FINE Voualà lo pisepot. (*Ver Twitter*) Veun seuilla.

TANTEUN (*Eun rièn*) Pensa-té se areuvve a caquì lé dedeun.

Twitter se boudze pa de la tabla. Fine, todzor avouè sa détermínachón, lo pren pe eun bouigno é lo teurie tanque i pispot.

TWITTER (*Dimèn que lèi teurie lo bouigno*) Ahia, ahia, ahia !

I mentèn di palque, Twitter comenche a djouè avouè lo pisepot. Fine lèi baille eunna baquétaye si le dèi.

TANTA FINE Mi pa pouèi ! Mi sitte l'è fran marón pe dabón !

Tanta Fine plache amoddo lo pispot dézò lo qui de Twitter.

TANTA FINE Voualà ! Poucha ! Ara poucha !

Twitter gnouye fé de grimasse.

TANTA FINE (*Eun l'euncoadzèn*) De pi, op !

TANTEUN Poucha !

Twitter conteneuvve a fé de grouse grimasse. Alice é Tanteun son surprì.

ALICE (*Ver Tanteun*) Avèitsa ! Noutro popón !

TANTEUN L'è eun tren de caquì ! Mi pensa té !

*Pappa é mamma se levvon é s'aprotson a Twitter. Son émochon-
où. Cocolon, avouì eunna matse de complemèn, lo botcha que,
to rodzo lo vezadzo, conteneuvve a pouchi.*

ALICE Lèi crèyo pa !

TANTEUN Ouè mi que grouse bague que teurie foua !

ALICE (*Ver Fine*) Mersì Tanta !

TANTA FINE (*Eugn avèitsèn lo pispot*) L'è eun per de dzor que caque
pa !

ALICE Pouo noutro Twitter...

TANTEUN (*Ironique ver Alice*) Avouì sen que meudze l'è normal
itre costipoù !

TANTA FINE Can mimo... mé pe oueu n'i fenì, torno demàn. Va
bièn ? Salì !

 SOS tata - Jénérique 

Tanta Fine chor. Alice é Tanteun, contèn, la saliyon.

Teuppe 🍷.

Scène XI – LA PENDEULA DE LA POUSTA

*Lemiye 💡 a gotse, iaou acapèn maque Auguste achouatoù si
lo chofà.*

Entre Joseph.

JOSEPH Squeza-mé, mi seutta *prostata* me fé to di lon galoppé i ben! Mi tracacha-té pa que n'i to sentì lé achouató . (*Polemique*) Di-me té se n'a fata de eunna tanta que vegnisse te diye comèn fa élevé ton mèinoù. Sen-ti pa matte?

AUGUSTE I dzor de oueu ouè! T'i té que te comprèn ren! T'i vioù! Vioù!

JOSEPH (*Caze malechà*) Vioù? Mé? Te rapello que mé si bon a eumplèi lo téléphoneun, alemé é tchouéye l'ordinateur é n'i euncó finque aprèi a eumplèi l'iPad! Té t'i bon?

AUGUSTE Ouè ara dze aprègno pi euncó mé a eumplèi l'iPad, vi que lo baillon a tcheutte. *iPad* pe tcheutte!

JOSEPH Ouè, n'i sentì seutta counta... mi fa douàn gagni le-z-éléchón!

Le dou riyon.

 PENDEULA 

JOSEPH La pendeula soun-e... (*Ver Auguste*) Te sa senque vou diye? Que l'è 9 aoue.

AUGUSTE ... é adón?

JOSEPH Comenche Walker, fa tsandji canal.

AUGUSTE N'a pa Walker lo devendro.

JOSEPH Djeusto.

AUGUSTE Macaco!

JOSEPH Ll'è « N'a de pousta pe té »!

Auguste se levve.

AUGUSTE Adón doe meneutte é areuvvo.

JOSEPH Mi iaou te va ?

AUGUSTE Vou prendre la pousta.

JOSEPH Mi na ! Eun télévijón ll'è « N'a de pousta pe té » ! Veun seuilla, tranquilo, achouatta-té.

Auguste, perplecse, s'achouatte.

AUGUSTE Eugn'atra émichón ?

JOSEPH Ouè, te sa senque l'è ?

AUGUSTE Na, cougniso pa...

JOSEPH ... é adón demanda ! Pe seutta n'a pa fata de demandé a Samsung pequé la cougniso euncó mé. Adón, pe « N'a de pousta pe té » n'a todzor Marie de Feleunna...

AUGUSTE Tournà ?

JOSEPH Ah ouè, mé la lamo tan ! L'è tan dzen la veure salla fenna lé, avouè salla dzenta vouése ! Can mimo, comèn diye... pe la fé seumpla : te mandon de pousta pe te prédjì.

AUGUSTE Praou ?

JOSEPH Praou. T'a comprèi ?

AUGUSTE Ouè, seumplo.

JOSEPH Adón quèi é avèitsa.

Auguste se beutte le lenette di solèi.

Teuppe 🍷.

Scène XII – N'A DE POUSTA PE TÉ

🏠 LOVE THEME - BARRY WHITE - JÉNÉRIQUE 🏠

Lemiye 💡 a drèite. Comme fondal n'at eun écran desì loquel l'è proyettoù lo logo de la trasmechón. A drèite n'a catro caèye,

a gotse eunna caèya é eun tabouré de bouque si loquel acapèn Marie de Feleunna. Can lo refrèn fenèi, Marie comenche a prédji.

MARIE DE FELEUNNA Bonsouar a tcheutte é bienvin-ì a eunna noua émichón de « N'a de pousta pe tè ». Oueu lo nite n'en la conta de eunna fameuille que l'a de grou problème pe acapì eun traille a leur mèinoù. Perdériyo pa d'atro ten é dze fériyo to de chouite entrì la fameuille : Tanteun, Alice é le dou mèinoù : Twitter é Ipad.

Entre la fameuille é s'achatte a gotse iaou n'a le catro caèye. Tanteun l'a betoù si de pèi blan é Twitter ara l'è eugn ommo dzouveun-o.

MARIE DE FELEUNNA Adón Tanteun, va-ti ?

TANTEUN (*Sensa forse*) Bonsouar Marie. Ouè, ouè va bièn. . .

MARIE DE FELEUNNA Se me troumpo pa no sen vi-no caque-z-àn fé deun eunna de mé-z-émichón, vrèi ?

TANTEUN (*Comme douàn*) Ouè, malerezemàn. Dèi si dzor l'è comenchà mon eunfer !

MARIE DE FELEUNNA Ézajèra pa ! T'a beun eunna dzenta fameuille, na ?

TANTEUN Ouè, dzenta. . . mi oueu sen seuilla pe pourti a cougnisanse de tcheut noutro problème de travaille.

MARIE DE FELEUNNA Contegnade maque. . .

TANTEUN Ouè. . . (*eun moutrèn Twitter*) noutro pégnò marón. . .

Alice baille eunna caoudó a Tanteun.

ALICE Prèdza amoddo ! Sen pa i mitcho !

TANTEUN Squezade. Noutro pégnò Twitter l'a ren voya de travaillì é pa tan voya de itedji ; adón reste todzor i mitcho a bamban-ì, mi no nen pouèn pamì.

ALICE L'è fran pe so que sen seu avouì té Marie, t'i noutra dé-riye spéranse. No n'en eun problème é no cougnisèn eunna persona que selón no pouriye no baillì eunna grousa man, comme l'a dza bailla-la a tan d'atre.

TWITTER (Contèn) Sen eun tren de prédjì de Turi Touneun !

MARIE DE FELEUNNA Va bièn. Adón mé dze dimanderio a Geppino de pourté la busta a noutro Tony.

Si la tèila l'è proyettaye eunna vidéo iaou Geppino, lo postèillón de Marie, va eun beseclletta, dézò la plodze, a Palase Régional pe pourté a Turi Touneun l'eunvitachón a « N'a de pousta pe té ». Tony assepte de partisipé a la trasmechón .

Teuppe 🍷.

👤 N'A DE POUSTA PE TÉ 👤



Lemie 💡.

Scène XIII – LA BUSTA DE TONY

MARIE DE FELEUNNA Fériyo to de chouite entré la busta. (Eun braillèn) Geppino ! La busta !

GEPPINO Areuvvo, eun momàn...

Geppino pourte eunna grousa busta de bouque, ata dou mètre é lardze trèi, é la plache i mentèn de la scène.

MARIE DE FELEUNNA Geppino, Tony l'a assétoù de vin-ì inque avouì no ?

GEPPINO Ouè Marie, Tony l'a assétoù l'eunvitachón é l'è inque avouì no. Vou lo queryì.

🌈 LOVE THEME - BARRY WHITE - JÉNÉRIQUE 🌈

Entre Turi Touneun. S'achouatte protso de Marie.

TURI TOUNEUN Salù Marie.

MARIE DE FELEUNNA Bonsouar Tony, va-ti ?

TURI TOUNEUN (*Eunna min-a tracachà*) Ouè, ouè, va bièn... *plus au moins.*

MARIE DE FELEUNNA Te vèyo tchica tracachà...

TURI TOUNEUN Si tchica tracachà ouè ! Pequé, pequé... n'i pouiye que me fisan de dimande si lo Conseille réjonal.

MARIE DE FELEUNNA Mi na ! Lèi si mé inque, itade tranquilo. Donque... te cougnè le riille di djouà ?

TURI TOUNEUN Na n'i jamè poui vère.

MARIE DE FELEUNNA Adón, inque (*eun moutrèn la busta de bouque*) no-z-ivréren la busta é de l'atro couti n'arè caqueun que vou vo prédjì. Vo itade quèi é acoutade. A la feun pouade lèi re-poundre. To comprèi ?

TURI TOUNEUN Ouè, va bièn.

MARIE DE FELEUNNA (*Eun braillèn*) Geppino ! Veun ivrì la busta !

Geppino entre avouè eun garsón pi ate de llou. Atatchà a la grousa busta de bouque n'at eun secón pannel triangulère de bouque que toppe eunna fenitra. Lo garsón levve lo pannel é lèi plache dézò eun baquette de fasón que la busta reustise iverta. Pe mézo de la fenitra, la fameuille é Tony se vèyon pe lo premi cou.

Geppino é lo garsón chorton.

TURI TOUNEUN (*Surprì, ver Marie*) V'ouèide spendi eunna matse de sou pe seutta tecnolojì !

MARIE DE FELEUNNA Shhht, silanse !

Silanse. Tony é la fameuille, de l'atro couti de la busta, s'avèis-ton.

TURI TOUNEUN (*Eun prédzèn plan*) Marie... senque vouillon sise ?

MARIE DE FELEUNNA Shhht, itade quèi !

TWITTER Salì Mesieu Turi Touneun, mé si Twitter 437.

TURI TOUNEUN (*Eun rièn*) Mi senque l'è ? Eunna marca di botte ?

MARIE DE FELEUNNA Shhht !

TWITTER (*Conteneuvve*) Mé si séilla péqué vo cheur me cougnisade pa, péqué mé n'i djeusto 19 an é tanque a pocca ten fi pouavo pa votì. (*Eun sourièn*) Mi ara poui... é comèn se poui ! Donque si séilla pe vo eusplequé noutro problème : mé n'i pa eun travaille, pappa to lo dzor l'è stouffie, me traite male é m'euncheurte é mamma l'è stouffie de me difendre. Mé si pamì comèn fiye, n'i djeusto vo comme dériye spéanse... pouade vo m'acapé quetsouza ?

TANTEUN (*Inervou*) Ouè, 20 an desù la tita é l'a panco portoù eun sou i mitcho !

ALICE (*Douse*) Mi na, l'è que noutro petchoù Twitter tsertse eun travaille pa tro pezàn é adón n'en pensoù a vo. Mogà dedeun caque voutro oufficho v'ouèide eunna plase, finque eun *part-time*...

TURI TOUNEUN Madama... (*ver Marie*) poui-dzò prédjì Marie ?

MARIE DE FELEUNNA Ouè, ara ouè.

TURI TOUNEUN (*Conteneuvve*) Madama sen mal betoù euncó no, n'en pamì de grouse bague, sen a la lemite... sen, sen fran i *sgoccioli* ! N'en pamì ren. (*Ver Marie*) Si pa que fiye Marie, la deriye baga que me veun a pensé l'è... si pa... poui-dzò fé eunna téléfon-où pe vère se acappo euncó eunna péгна plase ?

MARIE DE FELEUNNA Se pouriye pa mi fiade maque.

TURI TOUNEUN Adón prouo.

Touri pren lo téléphone é queurie caquen.

Scène XIV – PAMÌ DE PLASE

TURI TOUNEUN (*Eun prédzèn i téléphone*) Ouè si mé, si Tony Touneun. Te me passe lo Gran Chef?

Silanse.

TURI TOUNEUN (*Avouì reuspé*) Tchao si Tony. Si pe eunna trasmechón, se t'avèitse lo Sinque te m'acappe. Acouta, mé si seuilla é n'at eunna fameuille que l'a fata d'eun poste de travaille... si qué que tcheut lo dimandon dérimente, mi me fa acapé québague, poui pa fé de fegueue pouai douàn tcheut... mé pensao... se fise CVA? Sariye beun pa mal? (*Eugn avèitsèn la fameuille*) Vo sarie d'acor vo pe CVA? Vo plériye?

La fameuille di de ouè ató la tita.

TANTEUN Ouè, ouè va bièn!

TURI TOUNEUN (*Todzor eun prédzèn i téléphone*) La fameuille di de ouè; avèitsa se t'a quetsouza... ah na. To plen. To fenì euncó lé. Ah pompì! Pe la fameuille va cheur bièn... ah na. Fa atendre ara lo concoù... *Forestale*? Atèn que lèi dimando. (*Ver Twitter*) T'i bon a eumplèi lo *motosega*?

TWITTER (*Eun bleuffèn*) Ouè!

TURI TOUNEUN (*Comme douàn*) Ouè me di que l'è bon... ah, atèn que lèi dimando euncó sen. (*A Twitter*) La résetta?

TWITTER (*Todzor eun bleuffèn*) Euncó sen si bon.

TURI TOUNEUN (*I téléphone*) Ouè, ouè l'è bon... (*a Twitter*) l'a deu de l'emplèi i mitcho, n'a pamì de poste. (*I téléphone*) Sen mal betoù, adón te queutto, can fenèi te crio, no sentèn, tchao.

Beutte ba lo téléphone.

TURI TOUNEUN Marie si pa, mé n'i prooù de tot, mi n'en pa.

IPAD Soupli Tony! (*Eun moutrèn Twitter*) Lo pachento pamì si strumèn pe lo mitcho! Acappa quetsouza!

ALICE (*Malechaye*) Tanteun te fé resti quèya ta megnotta?!

TURI TOUNEUN Megnotta? Marie, sise prèdzon tchica pezàn, sen eun télévijón! Megnotta de sé, megnotta de lé...

Marie reprèn eun man la situachón.

MARIE DE FELEUNNA Can mimo mé si pa sen que vo diye. N'i jamì i eugn'émichón pouèi queurta. Mesieu Tony, vouillade le-z-ambrachì?

TURI TOUNEUN Ouè, ouè bièn volontchì.

MARIE DE FELEUNNA (*Eun braillèn*) Geppino! Veun vèi gavì seutta busta i mentèn di pià!

 LOVE THEME - BARRY WHITE - JÉNÉRIQUE 

Geppino é lo garsón dzouveunno pourton ià la busta. Tony eumbrache eun pe cou totta la fameuille. Turi l'è bièn sourièn é dzouze si momàn de télévijón pe se fé fé de fotografiye avouì totta la fameuille; i contréo, Tanteun é Twitter son malechà avouì llou.

Scène XV – MATTE... SEN TCHEUTTE MATTE

TURI TOUNEUN Amoddo, mé n'i salia-le. Marie, ecco, vi que si seu eun trasmichón é vèyo douàn mé la télévijón, me vériye voya de fé eun discoù, de diye québague pequé me semble *anche logico*... poui-dzó?

Marie l'è an mia tracachaye pe la requête de Turi.

MARIE DE FELEUNNA (*Douteuza*) Si pa, crèyo pa mesieu Tony.

TURI TOUNEUN (*Eun lèi pourtèn ià lo microfonne di man*) Mi ouè, alé! Fiyo vito eun discoù!

MARIE DE FELEUNNA (*Malechaye*) Adón fiade!

Turi se plache i mentèn di palque é ataque eun comise politique.

TURI TOUNEUN Mé vouillavo djeusto diye que ara n'en tsertchè d'èidjì tcheutte, ecco me semble que n'en tsertchè d'èidjì pi de fameuille; oueu sen pa arrevou à ten, mi me semble que... (*eun tsandzèn discoù*) avèitsèn que dzenta fameuille que n'en seu devàn. Seutta ouè que l'è eunna fameuille; ara si botcha l'a pa acapoù de travaille *ma* pourè nen acapé eun demàn! Ecco, restèn avouè le pià pe tèra...

Dimèn la fameuille se nen va. Euncó Marie queutte la trasmachón.

TURI TOUNEUN *Ma* restèn avouè le pià pe tèra!

Dimèn que Tony conteneuvve avouè son discoù vouido, di palque veugnon portaye ià totte le caèye. Dousemàn partèi eunna tsansón; Tony s'avèitse a l'entor é réalize d'itre solette.

TURI TOUNEUN (*Dizorientou*) Mi seu... mi seu se nen van tcheutte!

Teuppe 🗨️.

TURI TOUNEUN Mi seu son tcheu matte!

Lemiye 💡.

Totta la compagnì entre é ataque la chorégraphie de :

🏠 MATTE... SEN TCHEUTTE MATTE 🏠



🇸🇩 TSI LA TÈLA 🇸🇩

Derì le ridó

Chorégraphie

Joëlle Bollon

Èidzo réjì

Flavio Albaney

Vidéo

André Comé

Souffleur é mezeucca

Jasmine Comé

Giada Grivon

Ilaria Linty

TANTA BETSII

Pe eugn'idoù de Paolo Cima Sander,
pièse icrita pe Flavio Albaney
revezetaye pe Joël Albaney

Téatro Splendor de Veulla, 26 avrì 2014

Le Digourdì di 2014



Drette: Francesca Lucianaz, André Comé, Sophie Comé, Ilaria Linty, Paolo Cima Sander, Marco Ducly, Pierre Savioz.

Achouatoù: Joëlle Bollon, Laurent Chuc, Stephanie Albaney, Jordy Bollon, Joël Albaney, Simone Roveyaz.

🎮 TANTA BETSII 🎮



Lo souvenir de l'acteur

« Sayoon mé, pappà é Peppino Camandona (*bonanima*), lé a medjì la trippa a la Caritas de la Pagoda ; eun momàn tchica particulié, i mentèn di-z-ansièn, di pouo, di maladdo.

L'ion eun tren de fé la counta can Peppino ataque a no counti de si cou que l'an falli pourtè si pe Cogne an quése di mor avouè eunna Fiat. Can son arrevoù si, son entroù pe lo mitcho é l'an accapoù, a gotse, lo mor deun la coutse é a drèite, deun l'atra tsambra, l'abeuque que teriè ba d'éve de viya !

Ver mèitchà matin-où, cllouzon lo mor deun la quése é passon l'atra mèitchà de la matin-où eun compagni di paèn, di-z-amì di mor é... de l'abeuque !

Dimèn l'a attacoù a nèire détchis ; naturellement gneun l'è rendi-se contcho de ren é pe l'aoua de la seporteua n'ayè belle demi mètre de nèi. La Fiat l'ye pa 4x4, mi sitte l'ye pa lo dérì di problème. Lo vrèi défi l'è itó pourté foua si le-z-ipale la quése sensa se euntsabotté pe la nèi... l'an beun i tchica de difficultó, mi a la feun totte l'è aloù amoddo.

Seutta donque l'ye l'inspirachón que l'a fé nèitre « Tanta betsii ». Lo dzor aprì de la trippa de la Caritas, n'i terià ba le personadzo, eun per de-z-achón é avouè Joël Albaney n'en désidoù de beti la betsii i poste de l'abeuque. Aprì avouè to lo reste di groupe n'en djountó de-z-idó comique, comme le Tirolèis é la danse tsaque cou que la paolla *kartoffen* l'ye prononchaye.

É naturellement lo final... to lo Splendor l'ye pléyà eun dou di riye. Eun *crescendo* de ritme, « é ara comèn fièn, maladetto n'en pa la quése, comèn fièn, iaou la betèn, l'è pa poussiblo sise dzouveun-o é l'*internet*, é ara comèn fièn... » ; lé mé é Pierre no no avèitsèn, aprì avèitsèn la mii... doe secoude aprì sen foua di palque dézò lo bouéchì di man di pebleuque. »

Paolo Cima Sander

Queriaouzitòu

- Lo titre « Tanta betsii » l'è eun djouà de paolle avouè bièn d'eunterprétachón : 1) la tanta responsabla de la betsii ; 2) la tanta l'è la tseur de la betsii ; 3) a l'italienne lo titre semble a « an matse de betsii ».
- Pe le digourdì, « Tanta betsii » l'è itaye la premiye pièse eunterprétaye i Téatro Splendor de Veulla.
- « Tanta betsii » l'è la pièse pi queurta de totta l'istouère di Digourdì : 34 meneutte !
- Ver mèitchà piése, Paolo Cima Sander s'oublie todzor eun-na battiya a propou di boui. Pe tsertchi de lèi la fé rappeli, Pierre, can comprègnè que Paolo l'ye eun tren de s'oublie la battiya, dijà « Oh flotte ! ». Naturellamente, euncó lo dzor di spettacolo Paolo l'è oublia-se la battiya... vo queuttèn la queriaouzitòu d'accapé si momàn.
- Qui avèitserè la *vidéo*, for probablo s'apesèiserè d'eun pégno *vaff****lo* que noutro Paolo l'è queutto-se scapé ! Paolo se squeuze avouè vo tcheutte !

Scénographie

- 3 fondal gri, ate 4 mètre pe reprézanté lo meur d'eun grou garage ;
- 1 viille crédense de bouque ;
- 2 table de la Pro Loco ;
- 1 *bombola* di gas  é 1 fornelleun ;
- 1 mii¹ pe fé betsii ;
- 3 caèye ;
- Eunna mia de cartón pe pa pouertchè pe tèra ;
- De matériel pe fé betsii : caouti, plati, Scottex, sidel, ca-choule, eumbouéleuza... ;
- De gou é de-z-engrédiàn pe la betsii : so, pèivro, aille, ro-maneun, sarrieula, veun rodzo, cllou de garoffe, gnoué mos-catta, trifolle, carote rodze.

1. s. f. *Pétrin*, maie, coffre dans lequel on pétrit, où on mouille la pâte du pain, la viande tritée des saucisses. Avouï la grafie de Cerlogne : *arbion*, *mat*, *mèt*.

 PERSONADZO

CÉSAR	Ommo de Lucie que l'a jamè fé ren pe le mitcho, eunterprétoù pe PIERRE SAVIOZ.
RÉMY	Garson  de César é Lucie, 25 an é djeusto laou-réou, man blantse sensa caille é arbeillà avouè de pateun firmou, eunterprétoù pe JORDY BOLLON.
HÉLÈNE	Feuille  de César é Lucie, 25 an, arbeillaye <i>punk</i> ; euncó lleu l'a djeusto fenè l'université, donque l'a jamè traillà, eunterprétaye pe STÉPHANIE ALBANEY.
HERMANN	Betchi tirolèis, eunterprétoù pe PAOLO CIMA SANDER.
PETER	Dzouvin-o tirolèis, betchi, secón de Hermann, eunterprétoù pe JOËL ALBANEY.
KATRIN	Siaou de Peter avouè eun for caratéo é de magniye de fé grouchiye, eunterprétaye pe FRANCESCA LUCIANAZ.
LUCIE	Fenna de César é nevaouza de tanta Melanie, eunterprétaye pe ILARIA LINTY.
GERMAINE	Viille fenna de Battista, 80 an  , vezeun-a di mitcho é bièn queriaouza, eunterprétaye pe SOPHIE COMÉ.
BATTISTA	Eun mastoque d'ommo de 80 an  , vezeun di mitcho é ommo de Germaine, eunterprétoù pe ANDRÉ COMÉ.
PRÉYE	Monseur de la parotse, eunterprétoù pe MARCO DUCLY.

ACTE I

Vouése deri le ridó 🍷 : « Comme d'abetide, tcheu le-z-àn i mitcho de tanta Melanie, eunna viille fenna pa mariaye é acotemaye a comandé, son eun tren de féye la tradichonella betsii. A la betsii, tcheu le parèn son obledjà d'itre prézèn pe prende le-z-ordre de la tanta é féye tcheu le travaille nésesséo. Sit an le bague son diffiente : tanta Melanie pou pa lèi itre pequé l'è maladda é l'è platta a la coutse 😞. La donque falli prende tot eun man César que, vu que l'è jamì itoù eun tita a la bagga, tsertse de organisé le dzornaye comme l'è bon. César l'a marià Lucie, niése de tanta Melanie, é l'a dou mèinoù. Oueu totta la formachón l'è desì lo poste de travaille é l'a dza gnevoù la premiye dzornoù ».

🍷 SE IVRE LO RIDÓ 🍷

Scène I – APRESTEN-NÓ

Lemiye 💡.

I mentèn di palque n'a doe table de la Pro Loco avouè de matériel é de-z-engrédiàn pe fé betsii. Dézò la tabla l'è plachaye la mii. I fon di palque n'a trèi fondal : si di mentèn l'at eunna pourta que permé i-z-ateur d'alì eun tsambra de tanta Melanie. Dèrì la tabla n'at euncó eunna viille crédense iaou n'a de botèille é d'atre baradziye.

César é le dou mèinoù son eun tren d'apresté to sen que servèi pe la betsii : César, i mentèn di palque, euncolle le cartón pe tèra pe pa eumpouertchì lo solàn, Rémy, a gotse, tsertse d'atatchi la bombola di gas i fornelleun, Hélène, achouataye a drèite, pleumme le trifolle é le carote rodze.

CÉSAR (*Bièn ajitoù 😞 é pa cheur de sen que dèi féye*) Garsón! A queun poueun v'ouite? Maleur! Mi l'è dza nou aoue, de sé a eun momàn areuvve Hermann di Tirol é no sen seu to pe l'er!

RÉMY Pappa veun seuilla! Chor pa lo gas!

CÉSAR (*I galoppe ver Rémy*) Trama-té... mi pe fose que va pa! T'a pa praou saró... soplé bailla-mé le cllo!

RÉMY Salle di mitcho?

CÉSAR (*Dispéouè*) Mi na, na Rémy! Le cllo pe saré lo tibo di gas!

RÉMY N'a de cllo pe saré?

CÉSAR Maleur! Queutta pédre. Fiyo mé que pappa l'a de dèi que son de trequèize!

Avouè bièn de forse, César sare lo tibo di gas.

CÉSAR ... chor ren...

César levve la bombola.

CÉSAR Pe fose Rémy! La *bombola* l'è vouida.

RÉMY Donque fa l'eumpleure!

CÉSAR (*Ironique*) Que drolo! Mi te l'eumplèi pa té, te l'atseutte dza plèin-a.

RÉMY Adón vou ba i LIDL...

CÉSAR Iaou?

RÉMY I LIDL! Vendon-ti pa le *bombole*?

CÉSAR Mi soplé Rémy! Pitoù... t'a lo téléphone?

RÉMY Ouè.

CÉSAR Pren lo téléphone é te sen mamma que l'è ba eun Veulla pe fé de commichón pe tanta; te lèi di de passì eun tchi Paolina aoutre a Gressan pe prendre an *bombola* di gas.

HÉLÈNE L'an passou à avou à tanta Melanie l'ie to pi comodo. L'leu pensave a totte é n'ayé pa de fastide.

CÉSAR (*Eun trebelèn pe euncollé le cartón pe tèra*)

Hélène soplé... Tanta Melanie l'è platta a la coutse avou eunna fivra da caval é fa no dibroillì. (*Eun s'avèitsèn a l'entor*) É ara comèn apeuillo sise cartón pe tèra? Danchèn lo boogy-boogy se le ficho pa. (*A Rémy*) T'a de *nastro* pe le secotse?

Rémy repón i téléphone é avou eun jeste di a pappa de resti quèi.

RÉMY Ouè mamma, iaou t'i? Adón te torne eun dèrì é te va eun tchi Paolina. Te fa prendre eunna *bombola* di gas. Véo de kilo? (*I pappa*) Mamma dimande de véo de kilo fa la prendre...

CÉSAR (*Ajitoù*) Que fisa lleu, pe itsaoudé l'éve pe le trifolle! Que nen si mé... trèi kilo!

RÉMY (*Douteu 😞, todzor i téléphone*) Trèi kilo! Ah, senque nen fièn de trèi kilo? É adón mamma, fé té!

Rémy cllou la téléphonaye.

CÉSAR (*A Rémy*) Acoutta Rémy t'a de *nastro* que me fa fichi le cartón?

RÉMY (*Ironique*) N'i plen le secotse de *nastro*!

CÉSAR (*A Hélène*) Hélène té t'a de *nastro*?

HÉLÈNE (*Ironique*) Ouè que nen n'i : lo vou-te de cotón, de veli, dzano, rodzo, trasparèn?

CÉSAR (*Malechà*) Hélène! Avou tcheu le problème que n'en, te semble-ti lo cas de me prendre eun bala? Pitoù de diye de counte foule, téléphonna a mamma que passèye i bazar pe atseté euncó de *nastro*.

Dimèn Rémy reumplèi d'éve la cachoula pe le trifolle. Hélène

pouze lo caouti 🍷, digoutaye 🤢 se gave le gan, pren lo téléphone é queurie mamma.

HÉLÈNE Mamma que acro fé si travaille ! Acoutta, pappa l'a fata de *nastro*. (*Ver pappa*) Mamma dimande comèn te lo vou...

CÉSAR (*Todzor pi inervoù*) Mi que apeillise !

HÉLÈNE (*I téléphone*) L'a deu-me que apeillise... si pa fi té.

Hélène beutte ba lo téléphone.

CÉSAR Senque l'a deu ?

HÉLÈNE (*Ironique*) De alé te graté ! Can mimo lèi pense lleu.

CÉSAR A la plase de diye de counte foule, a queun poueun t'i avouè le trifolle ?

HÉLÈNE Mi mé n'i comenchà a plemi le premiye...

CÉSAR Senque t'i eun tren de fé ? Ti eun tren de t'apresté pe la fèira de sent'Or ?

HÉLÈNE N'i comenchà mi si pa véo nen van !

CÉSAR (*Dispéou*) Fa le fé perboliye ! Fa maque le froté, n'ayò to euspleco-te, n'i finque icri-te to si lo beillette !

HÉLÈNE Mi t'ayè deu-me té de fé pouèi.

CÉSAR (*Comme douàn*) Maleur ! Trèi trifolle l'a plimo-me ! De seu a eun momàn areuvve Hermann lo betchì di Tirol é si l'è mèit-chà tédesque ! Qui lo sen ? ! Qui lo arite pamì can comenche a braillè pequé acappe pa preste ? ! (*Ajitoù*) Maleur le trifolle !

César tsemin-e a drèite é a goste pe lo palque tanque can lèi veun eugn'idou.

CÉSAR (*A Hélène*) T'a eun pappa trop euntellijàn ! Te va ba i conjélateur, te lo ivre, a drèite n'a le trèi saque de la Bofrost... te pren si salle é fièn alé salle !

HÉLÈNE Va bièn, mi pappa lo conjélateur iaou l'è ?

CÉSAR (*Dispéou*) Hélène ! (*Ver Rémy*) Va té soplé !

Rémy chor eun gantèn la tita.

HÉLÈNE Adón mé seu n'i fenì poui alé.

CÉSAR (*Ironique*) Ouè va maque te fé eun tor eun Veulla, mogà eun Plase Chanoux tanque aoutre a l'Arc, te te meudze eunna bon-a glase... (*malechà*) mi iaou te pense de alé Hélène ? ! T'a euncó totte le carote rodze que te fa plimì ! Maleur, mi avoui té perdo la pachense ! T'ayè le trifolle a froté é le carote rodze a plimì. Doe bague !

Hélène, que l'ïye presta a chotre, sbouffe é se avèitse a l'entor pe comprende sen que fé. César dimèn plache douàn lleu le casette di carote rodze.

HÉLÈNE Senque ? To so ? Trèi casette ?

CÉSAR Ouè trèi casette !

HÉLÈNE To mé soletta ?

CÉSAR To té soletta é tsertsa de gavé le *ridotte*.

I galoppe, tsardjà comme eun melette, entre Rémy avoui de grou saque de la Bofrost.

CÉSAR Oh brao Rémy ! Tapèn ba salle trifolle.

RÉMY Fa didzalé-le douàn !

CÉSAR N'a pa lo ten !

Rémy é César vouidzon le saque di trifolle de la Bofrost deun la cachoula.

 MACHINA QUE POSTÈDZE 

César é Rémy son tracachà.

CÉSAR Saré dza pa Hermann ?

CÉSAR N'i pouiye de ouè.

Rémy tappe ià le saque di trifolle.

Scène II – HERMANN BETCHI

*Entre Hermann avouè eunna maletta iaou lèi son tcheu le ca-
outi de llou pe fe betsii. L'è arbeillà avouè le dra tipique di Tirol.
Prèdze eun patoué avouè eun for acsàn tirolèis.*

HERMANN Bondzor a tcheut !

CÉSAR Bondzor Hermann !

HERMANN Comèn l'è César ? Te vèyo eun plèin-a fourma !

CÉSAR Ouè avèitsa : sen tcheut preste !

HERMANN Tot amoddo pe seuilla ?

CÉSAR Tot amoddo !

HERMANN (*I dou mèinoù*) Sise dou poutinèn² qui son-ti ?

CÉSAR Son le dou botcha de mé... Rémy é Hélène.

HERMANN N'ario cheur pa recougni-le. (*I dou mèinoù*) Pensade de
resté lé to rette comme vo fisa dzalouè ou alade me ditsardjì
lo Volkswagen ?

Rémy é Hélène chorton i galoppe.

HERMANN (*Ver César*) Donque, n'i sentì tanta Melanie ; l'a deu-me
que sit an no pouré pa no baillì eunna man pequé l'è maladda.

CÉSAR Malerezemàn ouè.

HERMANN Pe si motif n'i i eugn'idoù : n'i portoù avouè mé eugn
amì é sa siaou. Te présentò Peter é Katrin.

*Entron Peter é Katrin. Le dou son arbeillà comme Hermann,
avouè le dra tirolèis. Peter entre eun pourtèn eunna grousa ca-*

2. Caque cou Hermann se eunvente de paolle pequé sa pa amoddo lo patoué.

*setta avouè dedeun de tseur. Euncó leur dou prèdzon eun micl-
lèn lo patoué avouè lo tirolèis. Peter sa pa tan bièn lo patoué;
donque prèdze bièn plan.*

*Eunsemblo a leur, entre euncó Héléne; s'achouatte é comenche
a plimé le carote.*

PETER (*Eun sarèn la man a César*) Bondzor !

CÉSAR Bondzor !

PETER Mé si Peter Schwartzer é veugno di Tirol. N'i traillà de-z-àn
avouè Hermann é si bon a fé betsii.

CÉSAR Spéèn.

PETER N'i quetoù la fameuille eun Tirol é so me fé tchica plaoué.

Peter plaoue.

CÉSAR Mi na Peter !

*Hermann gnoue a baillè de creppe si l'itseua de Peter pe lo
consolé.*

HERMANN Soplé Peter, plaoua pa !

Peter se reprèn.

PETER ... é n'i portoù ma siaou avouè mé.

Katrin prèdze avouè eunna vouése pouissante é autoritaire.

KATRIN (*Eun sarèn for la man de César*) Plèizì Katrin !

CÉSAR (*Éton-où é ipouvantó*) Bondzor !

KATRIN Mé cougniso *abastansa* bièn lo patoué péqué n'i travaillà
dou-z-àn si eun Pila.

CÉSAR V'ouède cheur fé la *gattista* !

KATRIN Na pisteur !

HERMANN (*Eun tsandzèn discoù*) Adón César, comèn sen betoù
seuilla ?

CÉSAR Caze amoddo...

HERMANN (*Pa convencù*) ... le trifolle ou, comme dièn no-z-atre eun Tirol, le *kartoffen* son-ti dza frèide?

CÉSAR Dzalaye!

KATRIN N'i sentì *kartoffen*?

PETER *Kartoffen*!

 DANSE TIROLÈISE

Hermann, Peter é Katrin danchon eunna danse tipique di Tirol. Can fenèi la mezeucca, César l'a le man pe le pèi, dispéou.

CÉSAR Mi senque l'è si charabàn?

HERMANN (*Avouì lo flo queur*) Squeza-mé César, mi no-z-atre no sen cotemoù can no sentèn seutta paolla...

CÉSAR Queunta?

HERMANN *Kartoffen*!

KATRIN *Kartoffen*?

Katrin s'apreste pe la danse, mi l'è to de chouite blocaye pe Peter é Hermann.

HERMANN (*Eugn aritèn Katrin*) Na, na! (*Ver César*) Diavo... no sen cotemoù de fé noutra danse... can mimo, tornèn a no : comèn sen betoù seuilla? Le boui son dza deun l'éve tsada?

CÉSAR Maleur le boui! Hermann squeza-mé mi le boui n'i fran oubli-le.

HERMANN (*Malechà*) Mi adón comèn no fièn? Lo *gادين* saré dza rapoù é pouèn pa catchi-lo tourna dedeun lo bouat, la vatse l'è trèi dzor que l'è pendia é mé n'i pa to si ten a pédre avouì vo!

César sa pa sen que diye.

HERMANN (*Ironique*) No-z-allèn pamì reterì la vianda, dièn i dzi que son si « Scherzi a parte » ?

CÉSAR (*Ajitoù*) Acouta... me diplé... renque pe eun per de boui saré pa la feun di mondo ? !

HERMANN Se pou pa ! Mèinoù a 50 an ! T'isse eunterecha-te de pi l'an passou, a la plase de maque avèitchi le-z-atre que travaillavon ou alé ià to lo dzor pe fi de commichón pe la tanta, mogà ara no sarian betoù mioù !

CÉSAR Mi qui pensè que sit an tanta vegnè maladda ? !

HERMANN (*Malechè, eun bouéchèn si la tabla*) Maladda ou pa maladda, t'ayè jamì pensou-lèi que eun dzor ou l'atro te faré té prendre eun man la *situachonèn* ?

CÉSAR T'a bièn deu, eun dzor ou l'atro... mé pensao a l'atro.

Entre Rémy.

RÉMY Lo Volkswagen l'è ditsardjà.

HERMANN (*A Rémy é Hélène, todzor malechè*) É vo dou, de-z-àn é de-z-àn desì le livro a itedji é ara v'ouite gnenca bon, diyo pa a chédre la vianda ou tsapotì lo gadeun ou beti de drogue, mi beti si eunna marmitta d'éve tsada ! De la mima *forsen* de voutro pappa !

HERMANN (*A César*) N'ayoù deu a Katrin é Peter de vin-ì eun Val d'Outa avouì mé, pouèi fiavon euncó eun tor pe la vezeté... mi ara na ! Dèyon traillì to lo ten !

PETER (*A César*) Ouè pensao de fé tchica de vacanse ! Vouillavo vère Corméyaou...

CÉSAR Ouè dzenta Corméyaou, fa renque fé tchica atenchón i bèrio que rebatton... mi piatro dzen.

PETER Vouillavo vère Casinó...

CÉSAR Pa cheur de lo acapé iver sise dzor ...

PETER Mi na, ara pouè pa é me fa travaillè pe fota de vo !

Eun tédesque, Peter dimande eunna бага a César que, naturellement, comprèn pa. Peter, adón, dimande a Katrin de tradouire pe llou.

KATRIN César, sen payà ?

CÉSAR (*Eun bleuffèn*) Ouè, ouè... Hermann vo payerè.

Peter souri to contèn, se beutte lo faoudè é attaque a trafetchi desì la tabla.

HERMANN Adón comenchèn ! César... mé n'i dza sèi... beutta foua quetsouza a bèye.

CÉSAR Amoddo ! Vi que l'è dza belle nou aoue beutto si eunna cafetchiye !

HERMANN (*Offenchà*) Nou aoue ! Varda leunna ! No-z-atre lo cafi a nou aoue lo béyèn pa ! Sen lévou-no a sinqu'aoue di *matin*, n'en prèi la brétella pe Trento é n'en fi didjón bièn devàn que té ! Ara beutta maque foua eun tsequet de Vodka ou de Martini blan.

PETER (*A Hermann*) Vodka ? Pouèi euntanèn lo Speck que n'en portoù.

HERMANN Ià !

Todzor eun prédzèn tédesque, Peter dimande a César iaou l'è lo ben.

CÉSAR (*A Rémy*) Mi mé sit lo comprègno pa, mi senque l'è ? Albanèis ?

Peter, eun mimèn que dèi pichì, fé la mima dimanda a Hermann, lequel, a jèste é todzor eun tédesque, lèi moutre iaou l'è lo ben. Peter chor.

CÉSAR Hermann ! Mi pequé t'a mando-lo eun caldaia ?

Peter torne eun déri. Hermann lèi moutre eugn'atra rotta.

CÉSAR Ah l'a fata de alé i ben !

HERMANN *Ià, pissing !*

CÉSAR Ah n'i comprèi, *pissing* vou deu pichè !

Scène III – TE ME BAILLE EUNNA MAN ?

Areuvve Lucie tsardjaye comme eun melette : bourse de la spèiza, paquet, saquet é euncó eunna bombola di gas.

LUCIE Chaqueun l'a-ti lo ten é la voya de m'èidjì ?

HERMANN Lucie !

Rémy galoppe ver sa mamma, lèi pren la bombola é la plache pe alemi lo gas. Euncó César s'aprotse a Lucie pe lèi prende le bourse.

CÉSAR Que dzen te veure Lucie ! T'a to prèi ? Lo *nastro* ?

LUCIE Ouè l'è to lé.

*César teurie foua lo *nastro* é comenche a fichi le cartón pe tèra.*

LUCIE (*Amoureuxa, ver Hermann*) Oh Hermy !

HERMANN Lucie que dzen te veure ! Comèn t'i *dzenten* !

Hermann é Lucie s'eumbrachon.

LUCIE Comèn l'è ? Te t'arite euncó sit an chaque dzor eun pi ?

HERMANN Ouè trèi ou catro dzor eun pi... (*malisieu, a vouése basa*) mogà eunna souaré a lambo no la spountèn mé é té !

Lucie s'avèitse a l'entor.

LUCIE Mi seuilla l'è pa euncó preste ren ! (*Malechaye*) L'è euncó to pe l'er !

HÉLÈNE (*A Lucie*) Mamma, l'è pa que te pourie baillì té eun vèyo de Vodka a Hermann ? Mé si pa iaou l'è.

LUCIE Ouè bondzor Hélène ! Féo mé.

Lucie apreste eun vèyo de Vodka pe Hermann. Dimèn, César se euntsambotte avouì lo nastro.

RÉMY (A Lucie) Mamma, aprì te me baille eunna man, soplé ?

LUCIE Ouè areuvvo.

CÉSAR Lucie ! N'ario euncó fata mé d'eunna man seuilla avouì le cartón.

HÉLÈNE Ouè Mamma, euncó mé avouì le carote rodze, n'i fata.

LUCIE Mondjeu ! (Ironique) Que dzen vo reveure. N'i finque faì tchoué lo téléphoneu pequé nen pouò pamì de vo senti !

Lucie soumón la Vodka a Hermann.

LUCIE (A Hermann) Té vèi de pa fé comme l'an pasó, que t'ayè tellamente bi que t'a droguò trèi cou le saouseuse é sayón eumpecable !

HERMANN (Fier) Seutta l'a fran ramplachà tanta Melanie !

RÉMY (Dispéou) Mamma ! Te me baille eunna man ?

LUCIE Areuvvo !

HÉLÈNE Mamma ! Can t'a fenì veun seuilla avouì seutte carotte rodze !

HERMANN (Eun desuèn tcheutte) Ouè, Lucie, mogà can t'a fenì avouì sise trèi inutilo te veun me èidjì a chédre la vianda, a tsacotì é betì le *droguen* ? Aprì a modì, eumbouéli é mogà euncó fé sètchì la vianda ?

LUCIE (Inervaye) Acoutade ! Acoutade-mé tcheutte, mé me fa alé veure tanta Melanie ! L'è maladda é l'a fata di medeseun-e... vo v'ouite eunna blita de dzi é donque dibroillade-vó tchica pe inque !

Lucie chor eun mandèn tcheutte a caqué.

Scène IV – SE COMENCHE !

HERMANN (A César) Té t'a fenì avouì si Scotch é sise cartón ?

CÉSAR Ouè, que traillè ! Oh *flot*³ !

HERMANN Bon, ara caqueun me baillise eunna man pe ditrafetchi le boui.

Silanse. Gneun vou se propozé.

HERMANN (Eun s'avèitsèn a l'entor) Caqueun ?

RÉMY Hélène ! Mé dèyo didzalé le trifolle !

HÉLÈNE Mi l'è tro pouè si travaille pe mé.

HERMANN (Malechè) Va bièn, restade maque *tranquillen* ! Sit an le saouseuse, le boudeun é le salàn le beutterèn deun le *vaschette salva freschezzen* !

CÉSAR N'i to comprèi, Hermann t'èidzo mé !

*César pren lo sidel di flotte é nen pouze eun per si la tabla.
Dimèn Rémy soumón a Hermann eugn atro vèyo de Vodka.*

RÉMY (A Hermann) T'i trop inervoù !

HERMANN Penso beun !

RÉMY Bèi euncó eunna gotta... é iaou l'è la botèille ?

Dèi la crédense Rémy teurie foua la botèille de Vodka.

CÉSAR (A Rémy) Vouedza-lèi euncó eun vèyo i pouo Hermann !

HERMANN Ouè pequé oueu saré eunna londze dzornaye.

Rémy reumplèi lo vèyo de Hermann. Hermann lo bèi ba a qui blan.

3. Lo significachón de seutta drola espréchón l'è décri deun la séchón Queriazitoù.

RÉMY (*Iton-ou*) Ba de Vodka choueudza !

HERMANN *Ià*, son de bague de noutra téra.

Rémy li l'étiquette de la botèille.

HERMANN Distillachón de trifolle ou comme diade vo *kartoffen*.

KATRIN (*Eun braillèn*) *Kartoffen* !

CÉSAR Na !

Comme douàn partèi la mezeucca tirolèise. Peter, que l'ïye euncó i ben, areuvve a galoppe eun se terièn si le pantalón . Katrin, Hermann é Peter atacon leur danse é teurion dedeun euncó Rémy é Hélène. Le dou frée, pi que danchi, tchapon maque de patèle di momàn que san pa fé eun pa djeusto.

Can fenèi la mezeucca, tcheutte tournon a leur poste.

HERMANN (*A César*) Squeza-nó !

CÉSAR Si sensa paolle.

PETER (*A César*) Vou djeusto teri l'éven !

Peter chor é entréré to de chouite aprì.

LUCIE (*Dèrì le ridó, eun braillèn*) Na tanta ! Tanta Melanie ! Na !

HERMANN Mi senque l'è *capitounen* ? César, l'è pa que t'a quetoù la lemiye aviaye i corridó ?

CÉSAR Crèyo pa. Rémy va veure té, mé si seu avouì seutte flotte.

RÉMY Hélène, va té, mé n'i le trifolle.

HÉLÈNE Na, avouì totte le dzi que n'a séilla, fran mé ?

CÉSAR (*Stouffie*) Maleur ! Vo dou v'ouèide praou stoufia-me oueu !
Vou mé veure !

César chor.

HERMANN (*A Peter*) Senque saré capitoù ?

PETER Si pa.

HERMANN Mistère... (*eun se térièn si le mandze*) alé ! Fa pa pédre de ten. Ara que t'a pichà, te pense de me baillè eunna man ?

PETER Ià !

HERMANN Adón aprestèn le *droguen* é beten-lé deun la mii.

Hermann é Peter atacon a drogué la viande eun tsantèn eunna tsansón tirolèiza.

Entre César.

CÉSAR (*Sèrieu*) Hélène, Rémy. L'è mioù que vegnisa euncó vo avouè mé.

RÉMY Ouè va bièn.

Hélène é Rémy chorton avouè lo pappa. Hermann é Peter recomenchon a tsanté é a traillè. Katrin l'è todzor eun tren de plimè le carote.

Scène V – TAN PE DIYE

Épouvantó di-z-eurlo de Lucie, entron Battista é Germaine.

GERMAINE Ouè mi senque l'è-ti capitoù inque ? De braillo sembla-blo.

HERMANN Liye Lucie que criave *tanten, tanten, tanten* ! Ara le trèi inutilo son aloù vère sen que l'è capitoù.

BATTISTA ... é mé que n'ayoù la fèi que fusse itoù lo gadeun a queri pequé l'ie panco mor !

Battista ri to solet pe sa battiya.

GERMAINE N'aré-ti praou a riye ? Son pa de bague di-z-ommo, l'è mioù que aliso mé si veure sen que l'è capitoù. Té, Battista, fé atenchón ! Se te torne i mitcho plen comme eunna botalla comme l'an pasó, te drime foua avouè lo tseun !

Germaine chor.

BATTISTA Sarèn pa magà de bague di-z-ommo mi pe mé si cou tanta Melanie l'a belle fenè de pequì de betsii !

Battista ri tourna to solet pe sa battiya. Peter fé seumblàn de riye.

BATTISTA (*A Hermann, queriaou*) Pèi té te va d'eun couti a l'atro pe fiye la betsii pe le-z-eun é le-z-atre ?

HERMANN (*Inervoù, avouè lo caouti eun man*) Ouè perqué se pou pa ?

BATTISTA (*Eun se squeezèn*) Na, na, diavo maque pèi, tan pe diye.

HERMANN Ah bon !

BATTISTA (*Todzor queriaou*) ... é véo de dzor te beutte-ti pe fiye la betsii d'eun gadeun de 150 kilo é eunna vatse de 25 meuria de carti ?

HERMANN Depèn de eunna matse de bague. Pe fé eugn izeumplo : véyo de dzi me baillon eunna man é (*eugn avèitsèn Battista*) é véyo de dzi me queutton pa travailli ! Seuilla n'aré pe trèi ou catro dzor.

BATTISTA Catro dzor ?

HERMANN (*Eun sarèn lo caouti*) Ouè, perqué se pou pa ?

BATTISTA (*Eun se squeezèn*) Na, na, diavo maque pèi, tan pe diye.

HERMANN Ah, bon !

BATTISTA (*Todzor a Hermann*)... é té t'avèitse-ti la leunna pe fé betsii ?

HERMANN Bièn cheur que l'avèitso. Leunna diya, fret defoua é tsa dedeun iaou se traillè la vianda.

BATTISTA Ah, leunna diya é pa tendro de leunna ?

HERMANN (*Comme douàn*) Ouè, leunna diya, pa tendro de leunna !

Perqué se pou pa ?

BATTISTA (*Comme douàn*) Na, na, diavo maque pèi, tan pe diye.

HERMANN Ah, bon !

Battista se trame ver Katrin.

BATTISTA (*Eun sarèn la man a Katrin*) Plèizì, Battista.

KATRIN (*Avouì forse*) Mé si Katrin !

BATTISTA V'ouite la fenna de Hermann ?

KATRIN Na !

BATTISTA Bièn ! Pequé mé cougniso de salle bague... (*eun moutrèn Hermann*) sitte l'è eun petan-et !

PETER (*Eun rièn*) Ià, peutaetten !

Scène VI – R.I.P. TANTA

Entre César, chouivì pe Rémy é Hélène.

CÉSAR (*Triste, vouése basa*) Squezade... Tanta... Tanta l'a quetou-no.

HERMANN Mi nein !

Hermann fé lo signe de la creu é eumbrache César. Peter, Katrin é Battista se beutton eun feulla é, eun aprì l'atro, présentent leur condoillanse a totta la fameuille. Katrin sare le man é bèije le dzi de fasón bièn grouchiya.

BATTISTA (*Tchica savèn*) L'ayè dza 80 an. A sit éyadzo t'a dza eun pià dedeun la quése !

Battista ri to solet pe sa battiya. Peter fé seumblàn de riye.

HERMANN (*A Battista*) Squeza-mé, mi de queun an t'i té ?

BATTISTA Mé si di 32 ! Classe de Cazemì, Giacco, Filoméne...

HERMANN Donque vio de-z-àn t'a ?

BATTISTA 82 a juliet, pequé se pou pa ?

HERMANN Na, diavo maque pèi, tan pe diye.

BATTISTA Ah bon.

CÉSAR (*A Hermann, bièn ajitò*) Squeza se te direndzo, mi comme te vèi, pe sen que l'è capitó... no n'en prédjà eun fameuille é n'arian pensó de planti lé de fé betsii pe sit an.

Hermann fé tsire lo caouti é avouè la man boueuche for desì la tabla.

HERMANN *Nein, nein, nein, nein, nein !*

CÉSAR (*Épouvantó*) *Nein ?*

HERMANN (*Tourna eun bouéchèn desì la tabla*) *Nein ! Pouèn pa quetì la betsinen ! N'i deутten que lo ten l'è pi que adatto, la vatse l'è dza pendia, lo gadeun l'è rapouè é no-z-atre n'en pa to si ten de resti seuilla a fé ren. Eun pi, se tanta Melanie fise euncó eun viya, sariye contenta de veure que totta sa fameuille porte eun devàn sa betsii ! (Eun levèn la vouése) A-te comprèi ?*

CÉSAR (*Fase*) Djeusto ! L'è sen que diavo douàn i dou garsón de mé. Mi l'an pa vouli m'acouté !

Rémy é Hélène avèitson mal César, lequél, senza se fé senti pe Hermann, se squize. César pourte le dou botcha de llou louèn de Hermann é avouè leur tsertse de rezoudre la situachón.

CÉSAR (*I botcha*) Adón v'ouèide senti Hermann. . . fièn eunna бага, tsertsèn de no dibroilli avouè la betsii i mentèn di pià. Donque, Hélène. . . té te fé eun sate tanque ba di prée, te pense euncó i fleur, te sen la tsantii é le pompì. Rémy. . . té te fé eun sate ba eun Veulla é te tsertse eunna quése.

A Rémy veun eugn'idou é comenche a tsertchi quetsouza pe lo mitcho.

HÉLÈNE Va bièn, mi pappa... pe avijì le dzi di veladzo comèn fièn ?

CÉSAR Sen lèi pense praou Germaine (*avouì la man imite lo bec d'eun canar*) can l'a fenì si dameun avouì tanta !

BATTISTA (*A Hélène*) Va mai tranquila ! Lèi pense lleu !

Hélène chor.

Scène VII – QUÉSE.COM

Rémy teurie foua di tèèn eugn iPad.

RÉMY Pappa ! Avèitsa...

Rémy moutre a César sen que l'a acapouè desì l'iPad.

RÉMY ... n'a pa fata de alé ba eun Veulla pe comandé la quése.

CÉSAR Ah na ?

RÉMY I dzor de oueu, se fé to si Internet !

BATTISTA (*Savèn*) Mé son de-z-àn que eumplèyo Internet !

CÉSAR (*Éton-ouè*) Té ?

BATTISTA Djèique ! Se no Prézidàn sen pa eumplèi Internet, l'è mioù que plantisan lé de fé le Prézidàn !

HERMANN Mi Prézidàn de senque té ?

BATTISTA Prézidàn di groupe di-z-alpeun !

Avouè eun jete Hermann mande a caqué Battista.

CÉSAR Alé Rémy, fé-no vèrè, n'en pa to lo dzor !

Rémy pouze l'iPad desì la tabla é tcheu le-z-atre se plachon déri llou pe vèrè sen que fé. Battista alondze chouèn le man pe totchè l'iPad.

RÉMY (*Eugn icrièn si l'iPad*) Donque... Google... quése di mor...

CÉSAR (*Surpri*) Ah, fran pai ?

RÉMY Ouè. (*Eun baillèn eunna patèla a Battista é Peter*) Soplé totsà pa ! Totsa pa !

HERMANN Mi senque l'è salla dzenta fenna patania ?

RÉMY Na sen l'è de publisitò.

HERMANN Mi l'è fran dzenta, semblè eunna di Tirol !

RÉMY Soplé, avèitsèn le quése !

CÉSAR Seutta l'è pa mal, mi se comprèn pa amoddo de sen que l'è féta... é apri l'è pa marcó lo pri, vourio pa que coutisa trop.

BATTISTA (*Malechà*) T'aré pa de cou voya de beuté tanta dedeun catro lan de beublo ?

HERMANN Si cou l'a rèizón Battista.

BATTISTA Ouè, avouì to sen que lèi queutte !

Battista ri tourna to solet pe sa battiya. Peter fé todzor seum-blàn de riye.

CÉSAR Adón avèitsén-nèn eugn'atra eunna mia pi dzenta...

Rémy conteneuvve a moutré le diffiente quése, todzor eunfastedjà pe Battista que molle pa de totchè l'écran.

HERMANN Pren seutta ! Avèitsa queunta dzenta couleur que l'at.

BATTISTA ... é seutta que l'at euncó finque lo tsapì di-z-alpeun.

CÉSAR (*Eun perdèn la pachense*) Maleur, soplé ! Me fiade vin-ì matte ! Sarè-tì eumpourtanta la couleur ou lo tsapì di-z-alpeun ara ? Rémy veun avouì mé eun momàn.

Rémy é César se tramon pe an coueugne.

CÉSAR (*Eun moutrèn eunna quése desì l'iPad*) Fièn que prendre seutta, que l'è ghenca tan tchiya. Pren salla lé.

RÉMY L'è euncó eun bon pri... l'è tchica queurta... mi pe tanta va cheur amoddo.

BATTISTA La pléyèn se reste pa.

Battista tourne riye to solet. Peter lo desue.

Scène VIII – Sainte BETSII

Entre lo préye.

PRÉYE L'è-ti permì?

CÉSAR Bondzor Monseur! Mi diade-mé, pequé v'ouite entró pe la porta de servicho? Seu l'è to eun pastise, sen eun tren de fé betsii. Pouavade pa entré pe lo portón prensipal?

PRÉYE Tracachade-vó pa. Tote le pourte porton i paradi!

CÉSAR (*Superstisieu*) Oh maleur! Can mimo, vegnade...

PRÉYE (*Eun gneflèn*) Mi squezade, v'ouèide deu-me que v'ouite eun tren de fi betsii... mi sento pa de flou...

HERMANN (*Malechè*) Pe forse sentade pa de flou! Avouì de dzi pai inutilo é eunna morta seu dedeun, penso beun que sentisade pa de flou.

PRÉYE Damadzo, n'ario tan l'amoù gouté salla pata. Sade... son de-z-àn que fiyo pamì de bestii.

BATTISTA Ouè, son de-z-àn que sitte fé pamì betsii, mi nen peuque pi de no!

Battista tourne riye to solet, avouì Peter que lo desue.

PRÉYE (*Offenchà*) Todzor seumpateucco Battista.

CÉSAR Monseur vegnade, n'aré pi eugn atro momàn pe fé la counta é gouté le saouseuse. Vo porto si eun tchi tanta...

César s'aprotse ver la pourta, mi lo préye s'arite protso de la cachoula di trifolle. Rémy lèi nen fé gouté eunna.

PRÉYE Na son euncó criye!

CÉSAR Monseur soplé! Vegnade! Ou mioù... Battista! Porta si té Monseur si dameun, iaou n'a tanta.

BATTISTA Va bièn, vegnade Monseur!

CÉSAR Oh! Si arrevoù a nen fé foua dou deun creppe solette!

Battista é Monseur chorton.

🏠 TSI LA TÈILA 🏠

Scène IX – LA MII?

Vouése deri le ridó 🧐 : « Son pasoù dou dzor. Totta la fameuille l'è eun tren de fenì la betsii. Fa euncó eumbouélé é gropé la dériye tsèin-a de boudeun. Oueu l'è lo dzor de la seporteua ».

🏠 SE IVRE LO RIDÓ 🏠

Eun scène n'at Hermann, Peter; César é Rémy. Déri se vèi la toupie de saouseuse é boudeun pendiye a dou cavalet. César é Rémy son eun tren de eumbouélé lo déri boui. Hermann poulite la mii.

CÉSAR Queunt'aoua l'è-ti?

HERMANN Son dza belle nou aoue.

CÉSAR (Ajitoù) Nou aoue? Mi adón no fa no boudji! Oueu n'at euncó la seporteua é fa to dibarachì.

Peter ataque a seblé eunna tsansón amuzante pe pendre le saouseuse. Can areuvve protso di meur tsertse de la pendre eun saoutèn. Malerezamente l'è tro base pe lèi arrevé. Rémy, que l'a mioulo-lo, lèi baille eunna man : lo pren é lo levve si de fasón que pouse pendre la tsèin-a.

RÉMY Pappa avèitsa té, mogà l'è lo teun.

 TÉLÉFONNE

César tsertse deun le secotse. L'è pa lo téléphone de llou que soun-e. Rémy, comme douàn, levve si Peter pe pendre le saou-seuse.

 TÉLÉFONNE

CÉSAR (*Malechà*) Adón si téléphone !

RÉMY Squezade l'è lo meun !

Rémy repón i téléphone.

RÉMY Ouè... ouè l'è seuilla... (*a César*) pappa, l'è pe té.

CÉSAR N'i pa lo ten Rémy ! Si eun tren de gropé.

RÉMY (*I téléphone*) Na squezade mi l'è djeusto chortì... ah l'è eum-pourtàn ?

Silanse. Rémy sa pa senque diye.

RÉMY Que chance ! L'è tornoù ara. Vo lo paso.

César pren lo téléphone.

CÉSAR Ouè... ouè si mé César... (*triste*) malerezamente tanta Melanie l'a quetou-no. Ouè djeusto, oueu n'a la seporteua, a trèiz-aoue. Ah la quése... ouè n'en prèi-la si *internet* ! Diade-mé maque... la quése... senque ? La fèi n'i pa comprèi amoddo... (*eun lévèn la vouèse*) senque ? ! Maleur !

César tappe lo téléphone ver lo pebleuque.

CÉSAR (*Rodzo comme eun pèivrón*) Rémy ! Te sa qui l'iye ?

RÉMY Sise de la quése.

CÉSAR (*Todzor malechà*) Ouè fran leur ! Te sa senque l'an deu-me ?

RÉMY L'an bèichà lo pri ?

CÉSAR Ouè, l'an bèicha-lo totte. No porton pamì la quése! N'a i eun problème avouè *internet*!

Tcheutte se blocon, paralizoù. Rémy l'a le man pe le pèi.

CÉSAR Ara senque fièn que oueu n'en la seporteua? Te me lo di té?

HERMANN *Nein! Nein quésen!*

CÉSAR (*Dispéou*) Eh *nein*... na!

HERMANN Ara comèn fièn?

CÉSAR Si pa...

Tcheutte san pa senque fé. Hermann tsemie a l'entor de la tabla. To d'eun creppe s'arite douàn la mii. Lavèitse.

HERMANN César... n'en pa de quése...

César repón pa. Hermann, protso de la mii, avouè la man pren le mezeue de la londjaou.

HERMANN (*Comme douàn*) Pa de quése... César!

César avèitse Hermann é gnouye a douté.

CÉSAR (*A Hermann*) Spéo que te sise pa eun tren de pensé sen que penso...

HERMANN (*Eun lévèn la vouése*) Té t'a eugn'idoù meillaouza?

CÉSAR Ara comme ara na.

HERMANN ... dunque?

Peter é Rémy son deri la tabla chocoù.

CÉSAR Eugn éffé...

Hermann é César s'avèitson. Eunsemblo levvon la mii; se la tsardzon si le-z-ipale é chorton.

Derì le ridó

Avanspettacle

Joëlle Bollon

Laurent Chuc

Èidzo réji

Flavio Albaney

Tramamoublo

Simone Roveyaz

DISCO FLAMA

Pièse icrita pe
Le Digourdì de Tsarvensoù
é
Le Beurt é Boun de Pollein

Téatro Splendor de Veulla, 11 avrì 2015

Le Digourdì di 2015



Drette: *Ilaria Linty, Paolo Cima Sander, Christian Brunod, Francesca Lucianaz, Alain Yeullaz, Tania Giannino, Elisa Viérin, Denise Borbey, Jordy Bollon, Pierre Savioz, Ester Bollon, Joël Albaney, Aline Dalbard, Sophie Comé, Giada Grivon, Jasmine Comé.*

Achouatoù: *Marco Ducly, Valérie Marguerettaz, Laurent Chuc, André Comé, Michel Squinabol, Joëlle Bollon, Simone Roveyaz, Marlène Jorrioz, Ilenia Squinabol, Federico Squinabol.*

DISCO FLAMA



Lo souvenir de l'acteur

« L'idoù de résiti eunsemblo a la compagnì Le Beurt é Boun de Pollein l'ie chortiya foua de la tita de Joël Albaney é Michel Squinabol. Pe totte é doe le compagnì l'è itaye la premiye espérianse de collaborachón.

Me rappello euncó que l'è itoù lo premi cou iao tcheu le-z-acteur l'an partesiyou a l'icriteua di teste. Sen divija-no eun trèi groupe (Tsarvensolèn é Pollentchón micllà eunsemblo) pe icriye le trèi-z-acte de Disco Flama. Tsaque groupe l'ayè fé eunna retserte approfondiya pe caractérisé amoddo l'époque deun laquelle lo local (Disco Flama) l'ie reprézentoù : costume, mezeuque, *scénographie* é euncó finque le dzi que l'an viqui réellamente lo local.

Collaboré avouì Pollein l'è itaye eunna dzenta espérianse. Mi can mimo, euncó avouì eugn'atra compagnì, sen arrevó a fé de pastisse (é sitte me lo rappello amoddo pequé la fegueua n'i fé-la mé). A la feun di spectaclle, n'en fé eunna danse de groupe, le Tsarvensolèn avouì eunna maille rodze é le Pollentchón avouì eunna bleuvva. Mé si lo seul que l'è entroù eun *scène* avouì eunna maille diffienta, comme lo pedzeun neur i mentèn di pedzeun dzano.

Ah ! La coulpa l'ie pa de mé, mi de si macao d'eun Jordy Bolon que, déri le ridó, i mentèn de la confujón, l'ayè tchapou-me la mailletta. »

Marco Ducly

« Eun jénéral n'i eun dzen souvenir de Disco Flama, sourtoù pequé tcheut eunsemblo n'en fé eugn énorme traille de retsertse istorique. La counta l'è divijaye eun trèi époque diffiente ; dunque, pe tsaque *scène* sen aloù tsertchi le coteillón, le tsansón, le danse ou le *cocktail* tipique d'eunna périoda istorique. Mi sourtoù l'è itoù euntéressàn é amezèn decouvri le querelle euntre Tsarvensolèn é Pollentchón, salle de noutro paèn é pappagràn !

Aprì, deun la counta n'en euncó betó de personadzo que l'ion pa fran llatoù i Disco Flama, mi que can mimo carattérizaon amoddo eun local valdotèn. Dorina a l'entraye l'ie la Dorina di Trompeurs de Cogne, avouì sa battiya « V'ouèide-ti prénotoù ? » ; éto Dino ou mioù. . . Dino Banana !

For probablo l'è itoù lo premi cou que doe compagnì l'an betoù eunsemblo le forse pe réalisé eunna pièse pe eunna souaré di Printemps Théâtral é personellamente seutta collaborachón, cheur pa seumpla a nivó d'organizachón, l'et eun souvenir que vardo avouì plèizi : « *Alla faccia del campanilismo !* » comme dijave lo titre d'eun journal caque dzor aprì lo spettacolo. »

Valérie Marguerettaz

Queriauouzitòu

- « Disco flama » l'è itaye la premiye collaborachón avouì eun gn'atra compagnì téatralla pe réalisé eunna pièse. For probablo l'è itó euncó finque lo premi cou deun l'istouére di Printemps Théâtral.
- Pe Marlène Jorrioz, future Prézidanta di Digourdì, « Disco flama » représente son débù deun la compagnì.
- Eunna particularitòu de « Disco flama » l'è la forta contrapozichón euntre le dou patoué de Tsarvensoù é Pollein. Doe Quemeue eunna atatchaye a l'atra, mi avouì eunna fone-teuca diffienta di patoué : mogà/magà ; iaou/ioù ; bon/boun.

Scénographie

- De fondal gri é maròn pe toppé totta la lardjaou di palque ;
- 1 crédense avouè de vèyo é de botèille (bira, veun, dijéstif, ju de frouite...) ;
- 1 lavandeun ;
- 1 réjistrateur de quése ;
- 1 ban de la cantin-a ;
- 1 caèya ata ;
- 1 remiza di dra avouè de pourtamantì ;
- 3 fotografie de Little Tony, Mike Bongiorno é de Gène (patrón di local) ;
- 2 pégne banquette de bouque ;
- 1 palque de 3 pe 3 mètre, ate eugn'eunpanna, avouè eun tapis rodzo desì ;
- 2 pégne cllende de bouque ;
- 1 *guitare*, 2 microfonne avouè lo pià, 1 *batterie*, 1 *clavier* ;
- 1 tabla é 3 caèye ;
- 1 *jukebox* ;
- 3 poltronne base ;
- 1 sidel de la llase avouè eunna botèille de Champagne ;
- 1 cubo pe fé danchì eunna professioniste de la danse ;
- 1 tabla blantse avouè desì 1 *console* pe lo DJ.

Costume Di momàn que la pièse se deroule si trèi-z-acte deun lo ten (an '60, '80 é '90), le-z-arbeillemèn, le pereuque é lo maquiadzo seràn diffièn é coérèn avouè l'époque istorique reprézentaye.

 PERSONADZO

LAURENT	Présentateur tsarvensolèn, eunterprétoù pe LAURENT CHUC.
TANIA	Présentatrice pollentchon-a, eunterprétaye pe TANIA GIANNINO.
GÈNE	Patrón pe le-z-àn '60 di local Disco Flama de Pollein, eunterprétoù pe JORDY BOLLON.
DORINA	Serventa di local Disco Flama (40 an), eunterprétaye pe VALÉRIE MARGUERETTAZ.
WALTER	Eun pollentchón costó di-z-àn '60, gran buveur, todzor achouató i ban é amì de Selmo, eunterprétoù pe ALAIN YEULLAZ.
GEMMA	Dzouveun-a pollentchon-a, choze de Walter, eunterprétaye pe ILENIA SQUINABOL.
ILEANA	Dzouveun-a pollentchon-a amia de Gemma é Ketty, eunterprétaye pe ALINE DALBARD.
JOUEUR	<i>Band</i> que soun-e i Disco Flama pe le-z-àn '60 : eun <i>batteur</i> eunterprétoù pe ANDRÉ COMÉ, eunna <i>claviériste</i> eunterprétaye pe ELISA VIÉRIN, eun chanteur é eun <i>guitariste</i> eunterprétoù pe JOËL ALBANEY é MARCO DUCLY. Tcheu le joueur son arbeillà igale : coteillón ou tsemize grize avouì bièn de payette. Le-z-ommo l'an tcheut eunna craotta rodze.
SELMO	Pollentchón amì de Walter, pappa de Giulio é djouyao di tsan, eunterprétoù pe MICHEL SQUINABOL.
KETTY	Dzouveun-a tsarvensolentse di-z-an '60, amia de Gemma é dézidéraye pe tcheu le-z-ommo, eunterprétaye pe FRANCESCA LUCIANAZ.

PINO	Ommo tsarvensolèn di-z-an '60 que lame eus-tegué, pappa de Vilma, eunterprétoù pe PAOLO CIMA SANDER.
GEPPINO	Ommo tsarvensolèn que lame tapé de benzin-a si lo fouà di pompaye de son amè Pino, eunterprétoù pe SIMONE ROVEYAZ.
BERTA	Feuille de Gène, inamoraye de Giulio, eunterprétaye pe DENISE BORBÉY.
VILMA	Feuille de Pino, 20 an, dzenta, sourienta é inamoraye de Giulio, eunterprétaye pe JOËLLE BOLLON.
VANDA	Pollentchon-a, 20 an, amia de Vilma é Ornella, eunterprétaye pe ESTER BOLLON.
ORNELLA	Pollentchon-a, 18 an, amia de Vilma é Vanda, eunterprétaye pe MARLÈNE JORRIOZ.
DINO	Piornatsón é malereu di veladzo, a tsasse de dzente feuille, eunterprétoù pe JOËL ALBANEY.
GIULIO	Garsón de Selmo, 20 an, beur, bièn timido é inamoroù de Vilma, eunterprétoù pe CHRISTIAN BRUNOD.
DJOUYAOU I	Djouyaou di tsan de Pollein, eunterprétoù pe FEDERICO SQUINABOL.
DJOUYAOU II	Djouyaou di tsan de Pollein, eunterprétoù pe ALAIN YEULLAZ.
MARTEUN	Tsarvensolèn de Roulaz que djouye a tsan avouè sise de Pollein, eunterprétoù pe MARCO DUCLY.
HÉLÈNE	Serventa trèinasoque di local Disco Flama pe le-z-àn '90, eunterprétaye pe ELISA VIÉRIN.
CUBISTA	Danseuze professioniste di Disco Flama, eunterprétaye pe SOPHIE COMÉ.

DJ BERTINO	Lo <i>Disk-Jockey</i> (DJ) di Disco Flama pe le-z-àn '90, eunterprétoù pe SIMONE ROVEYAZ.
PIERRE	Dzouveun-o di-z-an '90 avouè tan de voya de fé fita, eunterprétoù pe PIERRE SAVIOZ.
LOUIS	Ami de Pierre, 20 an, entuziaste de fé fita, eunterprétoù pe JORDY BOLLON.
FEDERICO	Ami de Giulio, bièn mastoque é grouchè, eunterprétoù pe FEDERICO SQUINABOL.
MARCO	Ami de Giulio, onéto é sayo, eunterprétoù pe MARCO DUCLY.
MICHEL	Lo meillaou ami de Giulio, eunna mia stcha-peun, eunterprétoù pe MICHEL SQUINABOL.
VALLET	Vallet de veulla fenna, avouè la pachón pe lo dizarbeillemèn, eunterprétaye pe ALINE DALBARD.
SAMI	Brazienna <i>caliente</i> avouè (litérellemente) le bale, eunterprétoù pe ANDRÉ COMÉ.
PAUL	Garsón pégnò, bièn arrogàn que sa fé viondé amoddo la lenva can l'è prosto de son ami Auguste, eunterprétoù pe JOËL ALBANEY.
AUGUSTE	Eun costó de garsón, ate é ipesse, todzor ià avouè son petchoù ami Paul, eunterprétoù pe ALAIN YEULLAZ.
DJOUYAOU I	Djouyaou di fiolet de Tsarvensoù, eunterprétoù pe LAURENT CHUC.
DJOUYAOU II	Djouyaou di fiolet de Tsarvensoù, eunterprétoù pe PAOLO CIMA SANDER.

🤪 AVANSPETTACLE 🤪

Lemiye 🤪 si lo proscenium.

Laurent entre eun fièn le paolle crouijaye.

LAURENT Avouì seutta nite dèyo pe fose fenì le paolle crouijaye... satte ba... « Abile, actif, euntellijàn » ... Digourdì ! Tchica comme no Tsarvensolèn.

Laurent icrì la repounsa.

LAURENT Dji plan : « Téatro populéo valdotèn » ... fasilo ! *Printemps*... ah na, comenche avouì la c...

Silanse.

LAURENT Ah ouè ! « Consèille réjonal » : lèi ite pa to mi lo icrio pégnò. Ara, 22 ba : « Fenèi can te moueue... lo *mutuo* ; 17 aoutre : « Eun tchi no saouton, le vezeun de no le peucon ».

Silanse.

LAURENT Le renoille ! Eugn éffé maque a Pollein pouon medji le renoille ; 24 ba : « Can te lo baillon l'è pe l'éternitoù » ... lo tombó di semeteurio ! Donque, 16 aoutre : « Se di de eunna persona tchica blaye ». Comenche avouì la p. Tchica blaye...

Silanse.

LAURENT Le Pollentchón ! Avouì noutra dzenta é grousa Beccade-Noua devàn, l'è normal que prègnon pa lo solèi ! Ara finalèmàn sen arrevoù a la dériye ; 26 ba : « Quemeua protso de Tsarvensoù » ... Gressan ! Na ! Comenche avouì la p.

Silanse.

LAURENT Ah ouè ! Plan-Feleunna !

Entre Tania.

TANIA (*Malechaye*) Praou ! Praou ! Si cou praou ! T'a stoufia-me !

LAURENT (*Arrogàn*) Mi a té... qui l'a cria-te ?

TANIA A mé qui l'a cria-me ? Mi te te ren countcho de sen que t'i eun tren de diye ? Seutta l'è pa la souaré di Digourdì !

LAURENT (*Eun desuèn Tania*) L'è pa la souaré di Digourdì ! Comèn na ?

TANIA Oueu lèi sen euncó no, le Beurt é Boun de Pollein. Pe lo premì cou dedeun lo *Printemps* n'a doe compagnì que resiton eunsemblo.

LAURENT Qui se nen pippe de vo de Pollein ! (*Eun moutrèn lo pebleuque*) N'a pa gneun de Pollein ! Son tcheu de Tsarvensoù, avèitsa : Remo, Arthur, Renzo... son tcheu seuilla. Se n'a caqueun de Pollein, lévisa la man !

Tania é Laurent avèitson lo pebleuque.

LAURENT Avèitsa, n'a gneun ! Ah na... lé ba i fon nen vèyo eun tchica blayo, avouè le renoille que lèi sauton pe l'estomaque. Si pou itre eun di voutre !

LAURENT Planta-là li, planta-là li, si cou t'a stoufia-me (*eun moutrèn le paolle crouijaye*) é planta-là de fi seutte counte foule. Can mimo, mé me rapéllo que eun cou, ba i Disco Flama pe le-z-àn '60, mollòn pa pi mi de fi seutte counte...

LAURENT ... pe le-z-àn '60, i Disco Flama, ba a Pollein ?

Teuppe 🍷.

LE-Z-ÀN '60

SE IVRE LO RIDÓ

Scène I – EUN twist PE COMENCHÌ

Lemiye 💡 si to lo palque.

La scène prensipale l'è lo local istorique Disco Flama de Pollein, lleu de rencontre di Pollentchón, iaou chouèn passoon euncó de Tsarvensolèn.

I mentèn n'at eunna caèya ata, lo ban, eun lavandeun é eunna crédense avouì plen de botèille é de vèyo. A gotse, n'a la remiza di dra avouì de pourtamanti. A drèite, desì eun petchoù palque cllendó, n'a le-z-enstrumèn di joueur ; protso di palque lèi son de banquette é lo caro pe danchi.

Acapèn Gène, propétéo di local, é Dorina, la serventa. Déri lo ban, Gène baille bèye i dzi. Deun la remiza di dra, Dorina beutte eun caro le paltó. I ban n'at eun joueur é eun cliàn abituel (Walter, achouató si la caèya). A drèite, achouataye si eunna banquette, n'a doe feuille.

Gène moutre l'aoua i joueur pe lèi fé comprendre que l'è l'aoua de comenchì. Lo joueur bèi ba la dériye gotta é va s'aprestì iaou n'a tcheu le-z-enstrumèn. Pe s'itsaoudé, baille eun per de creppe a case si la batterie.

Entre la claviériste, salie le doe feuille achouataye é arite lo collègue de lleu que l'ye eun tren de fé maque de tapadzo. Proue lo clavier, riille l'atchaou di microfonne é proue sa vouése (eunna mia tro ata).

Entre lo chanteur : tita ata é fier de lli. Eunna di doe feuille, can lo vèi, lo arite pe lèi dimandé eugn autographe.

WALTER (*Ironique, a Gène*) T'i aloù tsertchi-le i martchè sise ?

GÈNE Dèyo finque le paì !

DORINA ... é areuvvon tcheut eun aprì l'atro.

Lo chanteur proue lo microfonne avouè eun per de « sa, sa ».

Entre lo dèrì joueur avouè eunna guitare.

GÈNE (*I dèrì joueur, ironique*) Can t'a voya va maque...

Lo guitariste se plache protso di-z-atre joueur é teurie foua la guitare de la catse. Can son tcheu preste, lo chanteur se vionde é baille l'ataque pe lo premi bocón de la souaré.

 LET'S TWIST AGAIN - CHUBBY CHEKER

Le doe feuille saouton si pe l'er é atacon a danchi. I ban, tcheutte bouéchón lo ten.

Can fenèi la mezeucca, le doe feuille s'achouaton. Pe to l'acte, can le-z-atteur prèdzon, n'aré todzor eunna mezeucca de fon.

Scène II – Trallallà I BAN

GÈNE (*A Dorina*) Que dzen coteillón que t'a ! Totta dzenta teriaye... te me fé vù le cliàn tsa senza que béisàn !

DORINA Gène di pa pèi, te sa que mé me jèino ! N'i mai betoù la premi бага que n'i acapoù pe l'armouère ! Te lo sa que a la feun di countcho mé si eunna fenna bièn seumpla.

GÈNE Seumpla comme le pateun que t'a adosse.

Gène poulite lo ban. Acappe pa lo Scottex. De dézó lo ban (ma-jiquemèn¹) saoute foua lo Scottex.

1. Noutro pouo Pierre Savioz l'è itó to lo premi acte dézó lo ban maque pe tapé si lo Scottex pe Gène !

GÈNE Si eun tren de squersì. Mé n'i de chanse : té t'a lo *savoir faire*, eunna finesse que pocca de local eun Val d'Outa se pouon permettre.

WALTER (*Dimèn que bèi, eunna mia tsa*) Ouè *savoir faire*, sario mé sen que fée avouè lleu... (*a Dorina, triste*) mi t'a jamè cacou-me !

DORINA Walter ! Resta quèi que t'i finque fianchè ! Èita... ara areuvve Gemma é te fé pi pasé le voye.

Gemma se levve de la banquetta é, demè malechaye, tsemin-e ver Walter. Dimèn entre Selmo. Sensa diye ren saliye Dorina, paye l'entraye é se plache i ban. Gène lèi soumón eunna bira.

GEMMA Walter ! Alèn i mitcho ? Mamma l'a deu d'itre i mitcho pe onz'aoue, pa pi tar.

WALTER L'è euncó vito, dèyo maque bèye eunna gotta avouè Selmo que l'è djeusto arrevoù... é aprì pouèn alé.

GEMMA (*Per la pachense*) Mi comèn bèye euncó eun crep avouè Selmo ! T'a gnenca fé-me danchi eun cou seutta nite. Si cou si stouffia. Mamma l'a todzor deu-me : « Té, dzenta é fin-a, ià avouè eun *trallallà* di janre ! ».

WALTER *Trallallà* mé ?

GEMMA Fi-té feun ! Te me vèi pami !

Gemma chor malechaye. Mande euncó a caqué Selmo.

SELMO (*A Walter*) T'a tchapouè sèque !

WALTER Ouè, tanque a demàn, aprì lèi pase. N'i beun tchapouè pi sèque é l'è todzor tornaye .

SELMO Ah ouè ?

WALTER (*Moutchicco*) Selmo, bèi eun Martini avouè mé.

SELMO Adón fenèiso la bira.

WALTER Gène, beutta dou Martini.

GÈNE Acouta... t'a tourna voya de t'eumpiornì euncó oueu comme la senà passaye ?

DORINA Beutto mé le dou Martini.

GÈNE (A Dorina) Ouè mersì.

WALTER M'eumpiornì avouì de Martini ? Me fa nen bèye doe bo-tèille, mé si rebeusto ! Si pa pi eun dandolèn !

GÈNE (A Selmo) Ouè rebeusto ! N'i beun vi comèn l'è fenìa la senà passaye : l'a to rebetoù douàn lo tabaqueun !

Selmo stchoppe di riye.

GÈNE Lo dzor aprì, tcheu lèi colataon desì !

WALTER L'ìye maque eunna péгна eundijestiòn... sayò pa piòn.

Dorina soumón le dou Martini.

DORINA Voualà le Martini son preste. Son 250 lire !

WALTER Sen inque totte le senà é t'a jamì paya-no a bèye.

DORINA (Eun perdèn la pachense) Walter ! Se te vou bèye senza paì te fa prédjì avouì Gène. Si pa mé la patroun-a di local.

Gène eunterveun pe difendre Dorina.

GÈNE Prèdza mai avouì mé. (A Selmo, eun moutrèn Walter) Son 20 an que atseutto la fontin-a avouì son pappa é l'a jamì regalou-me ren !

Dimèn areuvve Ketty. Protso de la remiza di dra, tchatchare avouì Dorina.

GÈNE (A Walter) ... dunque, paya maque, to lo tor !

WALTER Adón teun... (eun terièn foua eun per de pise) é varda la resta, acrapì !

SELMO (*Eun levèn lo vèyo*) Adón santé! L'an betó eugn'oliva de-deun, mi si pa pequé.

WALTER Mogà fa medji-la... can mimo santé!

Le dou bèyon eun crep de Martini.

Scène III – CACANÉNÉ A QUI ?

Ketty, que l'a tsapletó tanque ara avouè Dorina, s'aprotse a Walter.

KETTY (*Avouè suspé*) Walter, acouta, iaou l'è Gemma ?

Selmo can vèi Ketty veun matte. Comenche a s'ajité.

WALTER Saré alaye i mitcho.

KETTY Comme de couteuma t'aré fé-la malechì! L'è pa pousiblo Walter, tcheu le cou! Dèijoon no veure seuilla...

Walter gnoue a itre pión é comenche a se medji le paolle.

WALTER ... l'ye tchica greundze, si pa.

KETTY Ouè quetèn pédre, ti todzor lo mimo.

Ketty se plache i ban pe comandé lo bèye. Selmo l'è rodzo comme eun pèivron.

SELMO (*A Ketty, bièn jèinó, comme eun mèinoù*) Salì Ketty, comèn te va ?

KETTY (*Digoutaye*) Salì! Amoddo, té ?

SELMO Bièn ara que t'i arrevaye.

KETTY (*A Gène*) Te me fé trèi *Long Island* pe plèizi ?

Gène apreste le cocktail.

SELMO Le payo mé, le payo mé! Payo mé le *Long Island*! Véo te dèyo Gène ?

GÈNE Son 5000 lire.

Eun pensèn a véo de-z-aoue de traille son 5000 lire, Selmo paye lo contcho.

WALTER (A Selmo) Dèi can le fenne bèyon ?

SELMO Té te sa pa de lleu ! Lleu veun de l'Amérique ! L'è acotemaye a bèye seutte poutreungue ; é bèi euncó d'atro.

Sensa remersì Selmo, Ketty pren le cocktail é s'achouatte si la banquetta avouì le-z-amie de lleu.

WALTER N'i comprèi, mi té planta-là lé de pédre le bave dérì salla dandolentse ! Saquetta !

SELMO (*Dispéou é inamoroù*) Saquetta... mé can la vèyo m'ajito, tremblo, chouéyo comme eun gadeun !

WALTER Ouè se sentèi praou euncó lo flou !

SELMO (*Eun se gneflèn dézò le bri*) Te di que se sen ?

WALTER Ouè, t'i lé que te tremble to, l'è normal... te me semble eun cacané !

SELMO (*Ofenchà*) Cacanéné, a mé ?

WALTER Ouè !

SELMO Adón te me cougnì pa euncó amoddo. Ara te fiyo vére mé qui l'è lo cacané.

Selmo va ver le joueur.

SELMO (*I chanteur*) Sotcho ! Beutta salla que lamon le feuille !

Le joueur s'apreston. Selmo pren lo microfonne é va protso de Ketty.

SELMO Ketty... seutta l'è pe té.

Lo chanteur baille l'ataque i joueur é partèi la tsansón :
Selmo pren coadzo é tsante :

 PICCOLA KATY - POOH (KARAOKE)

Oh oh petchouda Ketty (x2)

Oh oh

*Petchouda Ketty
que dzen t'i arrevaye
Té t'i eunna feuille
tan dzenta é bièn saye
Ara mé vouillo danchi
avouì té
pai te fiyo vére
qui l'è lo cacanéne*

*Lo déri cou
que n'i prouou-lé avouì té
t'a plantou-me an locca
é t'a rontu-me an di*

Oh oh petchouda Ketty (x2)

Oh oh

*Petchouda Ketty
la viya l'è dzenta
é mé oueu a noua
n'i medjà la polenta
avouì lo lasi
de ma chère Tormenta
é eun bon bocoùn
de fontin-a piquenta
so pe te diye
an бага pe té
té t'i la feuille
salla djeusta pe mé*

Oh oh petchouda Ketty (x2)

Oh oh

Selmo conteneuvve mi lo chanteur lèi gave lo microfonne. Ketty gante la tita.

SELMO (A Ketty) Nieunca pai ?

KETTY Na.

SELMO Te lame pa comèn tsanto ?

KETTY Mi selón té a mé euntéresse se t'a medjà la polenta ou la fontin-a piquenta ?

SELMO La polenta l'è de mamma. . .

KETTY Amoddo, adón medza-là avouì mamma !

Selmo tourne i ban ba de moral. L'è dispéoù. Le joueur comprend non la situachón é désidon de soun-ì eun lento.

 NON HO L'ETÀ - GIGLIOLA CINQUETTI

Selmo bèi eun vèyo pe se consolé. Dorina é Gène tsertson de lo convencre de alì tourna da Ketty pe la fé danchi. Selmo pren coadzo é partèi. Pren pe eun bri Ketty é la trèine i mentèn di palque.

KETTY (A Selmo, malechaye) N'i deu de na !

SELMO ... é mé n'i deu de ouè !

Ketty s'achouatte.

SELMO (Déterminoù) Mé vouillo danchi avouì té ! Veun seuilla !

Selmo trèine pe lo secón cou Ketty i mentèn di palque.

KETTY N'i deu de na !

Selmo se tappe si Ketty é l'eumbrache. Eun la sarèn for, comenche a danchi lentamente. Ketty, a si poueun, avouì le joueu reverià, danche avouì Selmo.

Scène IV – ÈITA COMÈN SE DANCHE !

Lo volume de la mezeucca bèiche. Selmo é Ketty danchon a drèite di palque.

Dimèn areuvvon dou garsón de Tsarvensoù. Entron sensa paì.

DORINA (*I dou Tsarvensolèn*) Bonsouar ! Pensade de payi ?

PINO Mi fa euncó paì a st'aoua ?

GÈNE (*Totchà deun l'orgueuill, ver Pino*) Acrapì que t'i pa d'atro !
Seutta l'è pa an crotta ! Si si solàn l'an tsemià de dzi comme
(*eun moutrèn le fotografiye*) Petchoù Tony, Mike Bondzor...
payade maque l'entrée.

PINO (*Eun bèichèn la crita*) Va bièn adón payèn.

Le dou Tsarvensolèn se gavon lo paltó, lo baillon a Dorina é payon l'entrée.

PINO (*A Dorina*) Varda maque la resta.

DORINA Voualà le dou beillet, entrade maque ara.

S'avèitson a l'entor é van i ban.

PINO (*A Geppino*) Senque báyèn ?

GEPPINO (*A Gène*) Dou corni !

Gène apreste le vèyo.

PINO (*Blagueur, ver Walter*) Senque te bèi té ? D'ive ?

WALTER Na, vo sade pa que l'éve fé vù reillèn ?

PINO Crèyo beun ! Sen no Tsarvensolèn le patrón de l'ive de la Becca !

GEPPINO (*Gradasse*) Djèique, l'è de no !

WALTER Fiade pa tan le ganasón. L'è pa pi icrì Tsarvensou i sondzón de la Becca. L'éve l'è de tcheutte... é can mimo no vo pourtèn ià le rèine !

PINO Le rèine ? Pe doe rèine que v'ouèide...

WALTER ... é mogà vo portèn euncó ià le dzente feuille. (*Eun mou-trèn Selmo*) Èita lé mon compagnón comèn danche...

PINO Ouè èita comèn l'è mal betoù !

WALTER T'a vi comèn la sare ? Salla l'è eunna Dandolentse !

PINO (*Tracachà, ver Geppino*) L'è vrèi...

WALTER Selmo ! Veun vèi baillì eun cou de man !

SELMO Te vèi pa que n'i da fiye ?

WALTER (*Eun provoquèn le dou Tsarvensolèn*) Comèn véyade l'è bièn eungadjà Selmo.

Pino pouze lo vèyo é s'aprotse déterminou ver Selmo, mi Walter l'aplane.

PINO (*A Walter*) Ehi ! Totsa-mé pa !

Geppino pouze lo vèyo é se plache i mentèn de Pino é de Walter.

PINO Brao, té pensa a sitte que mé vou avouì l'atro que l'è tchica pi pégno.

Pino rejouèn Selmo, que l'è eun tren todzor de danchi eun lento avouì Ketty.

PINO (*Eun bouéchèn si l'ipala de Selmo*) Comoddo fé lo gagà avouì eun lento !

GEPPINO Djèique, comoddo avouì eun lento !

Selmo se ditaste de Ketty é se vionde bièn malechà ver Pino.

SELMO ... é té qui t'i ?

PINO Mé si eun Tsarvensolèn !

Ketty, eunfastedjaye, s'achouatte si la banquetta.

SELMO Mondjeu euncó le Tsarvensolèn pe sèilla... é senque t'ou ?

PINO Ara te fiyo vére !

*Pino va ver la Band é dimande i chanteur de fé eunna tsansón
pe danchi.*

PINO (*I chanteur, eun blaguèn eun anglé*) Dik Dik, fé la stend alai
of de biji of de vuord !

*Lo chanteur fé seumblàn de comprende, s'apreste é baille l'attaque
i-z-atre joueur.*

 YOU SHOULD BE DANCING - BEE GEES 

Pino é Selmo, a ten de mezeucca, se bataillon eun danchèn.

*Aprì eun per de mouvemàn de danse euntredeutte, le dou s'eun-
cruijon é s'euntsambotton. La mezeucca s'arite.*

Scène V – PATÈLE É VÉYO ICLLAPOÙ

PINO Maladetto ! (*A Selmo*) T'a fé-lo esprése, sayò eun tren de ga-
gnì !

SELMO Mi senque te di ? Té t'i vin-i-me countre !

Selmo é Pino comenchon a se beti le man adosse.

KETTY (*Malechaye*) V'ouite fran dou marón !

Ketty chor eun mandèn a caqué Pino é Selmo.

PINO Avèista, t'a fé-la scapé !

SELMO Té t'a fé-la scapé !

Le dou contenevvon a se pouchi.

PINO Totsa-mé pa pégno Pollentchón !

SELMO Mé te rounto le corne !

PINO Mé te tchouèyo !

Pino é Selmo se baillon ba. Eunterveugnon euncó Geppino é Walter. Lo local ara l'è eun ring pe boxeur. Le vèyo s'icllapon, le caèye tsizon pe tèra é Gène avouì totta sa forse tsertse de pouchi foua di local Pino, Geppino é Selmo.

Aprì eun per de seconde de poueun pe le coute é de patèle i dzoute, Gène tsache foua a piataye Pino, Geppino é Selmo. Walter tourne s'achouatté i ban.

DORINA (Dispéraye) Que dizastre. L'an to cllapoù le vèyo !

Dorina pren eugn'icaoua é gnouye a recoilli le toque de vèyo.

GÈNE (A l'amia de Ketty) L'an to icllapoù, me fa clloure !

L'amia de Ketty chor ipouvantaye.

GÈNE (I joueur) Me fa clloure, l'è minite !

Le joueur s'avèitson é tcheut eunsemblo fan lo jèste di sou pe fé comprendre a Gène que vouillon itre payà douàn de ali ià.

GÈNE Ah la paye !

WALTER Sise l'an euncó lo coadzo de dimandé de sou !

Gène, to prisó, pren de sou é paye le joueur. La band beutte eun secotse le sou é chor avouì le-z-eunstrumèn.

GÈNE (A Walter) Té te pense-ti de dizarpì ?

WALTER Pensò de bèye euncó eun tor. . .

Gène lèi tappe eunna bira eun lèi fièn comprendre de chotre di local. Walter pren la botèille é chor.

GÈNE L'an to pouertchè ! Ara iaou n'i betó la servietta ?

La servietta saoute foua dèi dézò lo ban. Gène la pren é comenche a poulité.

DORINA Sise dou Dandolèn son todzor le mimo ! Djeusto de pastisse combin-ó.

GÈNE L'è pa poussiblo. Ara cllouzèn maque lo local.

🇸🇮 TSI LA TÈILA 🇸🇮

👤 AVANSPETTACLE 👤

Lemiye 💡 si lo proscenium.

Entre Tania avouè lo journal eun man.

TANIA Lièn queunte son le noualle : maque de-z-éléchón, dèi la premì padze tanque a padze 19 n'a maque de-z-éléchón de totte le Quemeue. Acappo pa lo manifeste de la fita di re-noille... de Pollein n'a ren. La Pro Loco l'aré oublià de beti-lo ! Inque n'a totte le Quemeue mi de Pollein ren... i contréo n'a totta eunna padze si Tsarvensoù ... drolo... queun produi tipique n'at a Tsarvensoù ?

Silanse, Tania tsemiye eun pensèn.

TANIA Lièn mioù l'articlo... *Festa del Peperoncino* ! Seutta l'è dzenta ! L'è fran vrèi que a Tsarvensoù son maque bon a medji de pé-pérontcheun é bèye d'éve di distributeur.

LAURENT (*Deri le ridó*) Praou, praou !

Laurent entre.

LAURENT (*A Tania, malechà*) Planta-là lé de prédji mal de Tsarvensoù ! Mé meudzo pa de pépérontcheun é bèyo ghenca l'éve di distributeur !

TANIA Vo de Tsarvensoù v'ouèide fata de noutra Grand-Place pe organizi de grouse fite. A Tsarvensoù v'ouèide ghenca de caro !

LAURENT L'è mioù que no Tsarvensolèn organizisan de fite a la Grand-Place pitoù que vére le dzi catchà dèri le bouèissón que binòcolon le feuille que se dezarbeuillon... ou pitoù que vére sise de Pollein que dzouyon a Tsan eun *serie C* !

TANIA Grama lenva ! Èitsa que no de Pollein n'en pi finque gagnà lo *Championnat de serie A* !

LAURENT Ouè si qué ! Mi l'ye pe le-z-àn '80, 35 an fé, mersì i
dzouyaou de Roulaz é de Feleunna ! É te rapello que sise de
Roulaz é Feleunna son de Tsarvensolèn !

TANIA Ara que lèi penso... pe le-z-àn '80...

LE-Z-ÀN '80

🔴 SE IVRE LO RIDÓ 🔴

Scène I – DOU DE PEUQUE

Lemiye 💡.

Sen todzor i Disco Flama, mi si cou sen pe le-z-àn '80. Aca-pèn Gène, dèrì lo ban, é Dorina, protso de la remiza di dra, avouè 20 an de pi. Tcheu dou l'an le pèi blan. Gène, sourtoù, l'è bièn reillèn deun la jestchón di local. Pe bailli-lei eunna man, acapèn protso de llou Berta, sa feuille.

Lo local l'è tsandjà reuspé a 20 an fé. A gotse n'at eunna tabla avouè trèi caèye rodze, a drèite, a la plase di banquette de bouque n'a de pégne poltronne é a la plase di joueur l'è plachà eun jukebox.

A drèite acapèn trèi feuille dzouveun-e de Tsarvensoù : Ornella, Vilma é Vanda. Son eun tren de danchi é tsaplétì. Vanda l'a djeusto fenì de pipé eunna sigaretta.

VANDA Ornella ! Que dzenta la noua tsemize que t'a atsetoù !

ORNELLA Te remersio. N'i dimandoù a pappa le sou péqué mamma l'ariye jamè bailla-me-leu : 32 meulle lire !

VANDA Mi son fran tan !

ORNELLA Lo si, mi pappa avouè mé l'è todzor disponiblo pe me baillì de sou... te sa, mé si lo prendre.

VILMA A mé l'ariye deu-me que n'a la crize é de sou n'a pa.

VANDA A mé igale.

ORNELLA (*Eun moutrèn l'entrée*) Avèitsade qui areuvve !

Entre Giulio. S'aprotse a la remiza di dra, paye lo beillet, baille la djacca a Dorina é s'aprotse i ban. Dimèn le trèi feuille conte-neuvvon a tsaplèti.

VANDA Mondje, que tipo, que gramo Pollentchón...

ORNELLA ... é aprì blagueur, avèitsa que stat !

Vilma ite quèya. Chouèn avèitse Giulio avouì de joueu amoureux.

VANDA Sit l'è tcheu le desando seuilla é va todzor eun blan.

ORNELLA Fé finque pèin-a.

VILMA Na... selon mé fé maque seumblàn, l'a cheur de grouse caletaye catchaye.

ORNELLA Mi senque te di ? Te vèi pa que pase totte le nite a bèye solette ?

VANDA (A Vilma) Aprì avèitsa-ló : sit l'at euncó de grou problème de santé.

Dimèn entre Dino. Paye lo beillet é se plache i ban.

ORNELLA Ouè mondjeu ! Mé que si totte, l'an finque deu-me que l'è itó opéroù can l'ye mèinoù.

VILMA (*Eun perdèn la pachense*) Ara plantade-là lé !

VANDA Péqué ? Te penserè pa de t'approtchì a salla бага lé ?

ORNELLA Ouè, avouì totte le counte é deusquechón que l'an i pappa de té é lo seun.

VANDA Son euncó ara eun tren de deusqueté pe l'éve : Pollein é Tsarvensou alerèn jamì d'accor.

ORNELLA Sen tro diffièn.

VILMA Ara plantade-là lé pe dabón. Se fran vouillade la savèi totta... vo la diyo totta : mé è Giulio son dji dzor que no no véyèn.

ORNELLA Té é Giulio, dji dzor que vo vo véyade ?

VANDA Mi t'i matta ?

ORNELLA Se lo veun a savèi ton pappa, té te chor pami pe catro mèis.

VANDA Ouè cheur.

Dimèn Vilma avèitse Giulio. Le dou se sourion, s'avèitson a catsón, djouyon avouè leur joueu. Malerezamente, i mentèn de si djouà de regar é souri, n'a Dino, que se beutte eun tita que Vilma l'è eun tren de lèi proué avouè llou. Di ban l'avèitse, man deun le secotse, preste pe partì a l'ataque.

DINO (A Gène, avouè le joueu ver Vilma) Bella, bella salla, ah ah !

GÈNE Dino...

DINO Oh !

GÈNE (Eun moutrèn Vilma) Te la vèi salla ba lé i fon ?

DINO ... é beun ?

GÈNE Selón mé...

DINO Lèi reste ?

Gène se vionde é pren dou vèyo é eunna botèille.

GÈNE Èita, pourta-lèi doe mentine...

DINO Ah ouè, doe mente ! Doe ! Beutta doe !

Gène reumplèi le vèyo.

DINO (Eugn avèitsèn Vilma) Bella ! (Eun mioulèn Gène) Beutta doe igale ! Praou pai ! Véo l'è ?

GÈNE Son 500...

Dino teurie foua le sou é le pouze si lo ban.

DINO Paì é moueure, todzor a ten.

Dino pren le mentine é s'aprotse a Vilma.

DINO (A Vilma) Oh bella ! Danche ? Te bèi ?

VILMA (Digoutaye) Te prèdze a mé ? Mi pe plèizì !

DINO Te bèi ?

Vilma se varde louèn de Dino é rejouèn le-z-amie de lleu que dimèn se son tramaye.

VILMA Bèi solette, lèi manqueriye pi finque.

DINO Adón bèyo mé. . .

Dino se plache pe eunna coueugne é bèi le doe mentine.

Scène II – L'È DE MÉ

Vilma déside que l'è lo momàn de s'aprotchì a Giulio. Partèi é va ver lo ban, mi, douàn de lleu, areuvve Berta.

BERTA (Chalereuza, ver Giulio) Giulio ! Comèn va ?

GIULIO (A Berta, eugn avèitsèn Vilma) Tot amoddo.

Giulio tsertseré todzor de clloure lo discoù avouì Berta pe s'acapé avouì Vilma, que, bièn eunfastedjaye, tsertse de lo queryi avouì de pégnò pouteun, de souri é de joueu douse.

BERTA Giulio senque t'i eun tren de fiye ? Te lame ma noua maille ?

GIULIO (A Berta, eugn avèitsèn Vilma) Ouè, ouè dzenta !

BERTA Dzenta vrèi ? L'a atsetoù-me-la pappa. Can mimo Giulio. . . senque te fé inque todzor to solette ?

GIULIO Solette. . . te sa. . . mé si tchica defesilo.

BERTA Giulio, soplé ! T'a stoufia-me ! Té te veun tcheu le dzor inque maque pe veure (*moutre Vilma*) salla saquetta li ! (*Malechaye*) Giulio ! L'è finque de Tsarvensoù !

GIULIO Fi pa ren. A mé pli Vilma !

BERTA (*Dousa*) Mi lèi si mé inque pe té. . .

GIULIO Té? Si pa...

BERTA Acouta Giulio... veun danchi avoué mé!

 **TUCA TUCA - RAFFAELLA CARRÀ** 

*Ivron le danse Dino é Vanda. Avoué la squeuza di Tuca Tuca
Dino alondze tchica tro le man si Vanda que, sensa lèi pensé
dou cou, repón avoué eun per de patèle é piataye que spédèison
Dino pe eun anglle.*

*A souivre, Berta pren Giulio pe eun bri é lo pourte danchi i
mentèn di palque. Vilma, rodze comme eun pèivron pe la ja-
louzi, galoppe ver la cobla é fé de totte pe pourté ià Giulio :
pouche ià Berta, danche avoué Giulio, diplache Berta, teurie
pe eun bri Giulio can Berta danche avoué llou. A eun ser-
tèn poueun, le doe feuille teurion Giulio eunna pe eun couti
é eunna pe l'atro.*

*Aprè eun per de « l'è de mé » é « na l'è de mé », Berta tsi pe tèra.
Eun plaouèn galoppe ver Gène, que sensa itre tan euntéréchè
a sen que l'è capitó, console la feuille avoué eun vèyo d'éve.
Dimèn, Giulio é Vilma danchon amoureu dou pa di Tuca Tuca.*

Fenèi la mezeucca.

GIULIO (A Vilma) Alèn bèye caque tsouza?

VILMA (Eun sourièn) Ouè.

Le dou s'aprotson i ban.

GIULIO (A Gène) Doe gazeuze.

GÈNE (Caze digoutó) Senque?

GIULIO Doe gazeuze, mersi!

*Giulio se refeuze de soumondre de gazeuza. Lèi pense adón
Berta.*

GIULIO (A Vilma) T'i fran dzenta oueu, finque le pèi...

VILMA Mersì, euncó té...

BERTA Giulio! N'ì la gazeuza pe té...

GIULIO Oh mersì.

Berta, bièn dousa é jantila, soumón lo vèyo a Giulio.

BERTA (A Vilma) ... é seutta l'è pe té...

Berta voueudze si lo coteillón de Vilma totta la gazeuza.

VILMA (Ibaiya) Èita seutta beurta saquetta! Giulio! Avèitsa sen que l'a fé-me!

Gène l'è étó ibai.

GÈNE (A Berta) Mi té t'ì foula!

VILMA (A Giulio, eun braillèn pi for) Avèitsa sen que l'a fé-me!

GIULIO Tappa-lèi seutta!

Giulio baille son vèyo a Vilma é, senza lèi pensé dou cou, Vilma lo tappe si lo coteillón de Berta.

VILMA Té t'ì fran foula!

BERTA Pappa! Avèitsa sen que l'a fé!

GÈNE (Bièn malechà avouì Berta) Silanse! Foua, va ià de seu!

BERTA Mé salla la pachento pa!

Berta caye eun panamàn si Vilma. Gène, chocoù, apreste dou nouo vèyo de gazeuza é i mimo ten tsertse de tsachì foua Berta.

GÈNE (A Berta) Foua! Ita quèya!

Gène soumón le gazeuze a Giulio é Vilma.

GÈNE (Diplèizi) Squezade-mé... seutte son pe vo é payo to mé.

BERTA Mi pappa!

Gène se vionde ver Berta é per la pachense.

GÈNE (*Eun braillèn*) T'i euncó seu ? ! N'i deu foua de seuilla ! Va si avouè mamma ! Foua !

Berta chor eun plaouèn.

DINO Matta ! Salla l'è matta !

Scène III – NI BOU, NI VI

Entron catro djouyaou di Tsan de Pollein. Le premiè trèi s'achouat-ton a tabla. Eun de leur l'è Selmo.

DJOUYAOU I Salì Gène !

GÈNE Bonsouar !

DORINA (*I déri djouyaou*) Lo déri de vo paye l'entrée ?

DJOUYAOU II Todzor lo mimo paye, pa lo déri.

Lo djouyaou II paye é aprì s'achatte a tabla avouè le-z-atre.

GÈNE (*I djouyaou*) V'ouèide spounto-la ?

DJOUYAOU I N'en gagnà ! Gène... beutta cattro rodzo !

DJOUYAOU I (*I compagnón*) V'ouèi vi que pertse que n'i acapoù ?

DJOUYAOU II L'ye beun pi euncó l'aoua ! Se oueu gagnoon pa a Sen-Cretoublo pouoon belle quetì de djouè i Tsan.

Gène é Dorina voueudzon lo rodzo i cattro djouyaou.

SELMO Te pou lo diye. L'ye doe demendze que perdon-o doe tsa-chà contre eunna. L'ye belle l'aoua de gagni-nen eunna !

DJOUYAOU I (*Eun moutrèn Marteun*) ... é fa beun diye que se fise pa itó pe lli n'arian perdi euncó le doe demendze devàn !

DJOUYAOU II Ara blaga-ló pa trop. L'arè djouyà bièn eunna partiya... magà doe ! Pa de pi !

SELMO Ah ouè ! (*Eun squersèn*) Si gramo Tsarvensolèn... pouè fé la séchón aoutre eun tchi lli, pitoù que tin-ì tsa seuilla a no !

MARTEUN Rapella-té que si mé que n'i lévoù la valeur de noutra équipe, rapella-te-ló!

SELMO Mi di pa de counte foule! T'a euncó la mailletta diffienta di-z-atre!

MARTEUN Pe fose! V'ouèide bailla-me vo seutta maille viille!

DJOUYAOU II (*Todzor eun squersèn*) Pe mé te pou torni a djoui a Tsarvensoù... a Rebatta, i Fiolet ou i pétanque!

SELMO Ah, ah, ah!

DJOUYAOU I Vo de Roulaz n'en jamì si ioù vo plachì. Vegnade a l'icoula de Pollein é votade a Tsarvensoù!

DJOUYAOU II Ah, ah! Ni bou, ni vi a Roulaz!

SELMO Ah, ah! (*Eun pouzèn la man si l'ipala de Marteun*) Bon, praou ara... pouo Marteun! Queten-lo itì, piatro ataque lo plaouo!

DJOUYAOU I (*Eun lévèn lo vèyo de rodzo*) Dimèn béyèn pe oueu que n'en gagnà! Pe Pollein!

Le cattro djouyaou lèvon lo vèyo.

MARTEUN Santé pe seutta! (*Ironique*) Demendze que veun vo fiyo pédre, pai véyèn sen que diade!

SELMO N'a pa de reusque, magà perdèn touteun.

Le cattro bèyon lo crep.

Scène IV – BON TSACHAOU

 SAY YOU, SAY ME - LIONEL RICHIE 

Giulio é Vilma danchon. Aprì eun per de secónde la mezeucca bèiche.

DJOUYAOU II (*A Selmo*) Avèitsa ton garsón Giulio comèn danche!

MARTEUN Sa lèi fiye !

SELMO Giulio l'è de caletou. Si pa se vo rapelade 20 an fi comèn n'i son-ou si Tsarvensolèn ? !

Totta l'équipe di Tsan ri.

DJOUYAOU I Ouè me rappello, que riye si dzor ! Dimanda euncó a Gène. . .

GÈNE (*Eunfastedjà*) Que riye ? V'ouèide icllapou-me eunna blita de vèyo !

DJOUYAOU II Avouè to sen que n'en bi n'en dza paya-te trèi cou le vèyo.

DINO (*A l'équipe*) Payade eun vèyo ?

DJOUYAOU I Mi ouè ! Gène beutta euncó eun vèyo a Dino !

DINO (*A Gène*) Eun vèyo plen ! Bèye !

SELMO (*Eugn avèitsèn son garsón*) Can mimo. . . mé si pa senque vo diye. No n'en la caletou pe le femalle. N'en de djette é bièn aloù que si arrevoù a lo passé i garsón de mé.

DJOUYAOU II Aprì salla l'è euncó eunna bella livra !

SELMO Giulio l'è eun bon tsachaou comme lo pappa.

MARTEUN (*A Selmo*) Bon tsachaou ! Comèn fiyo a fé danchi salla dzenta feuille ba lé i fon ?

DJOUYAOU II Selmo va té a lèi fiye vère comèn se danche va.

SELMO Queunta ?

MARTEUN (*Eugn avèitsèn Ornella*) Salla avouè la maille a fleur. . .

DJOUYAOU I Selón mé sitte l'a renque fata d'eun meaclo !

SELMO Te fiyo vére mé Marteun !

Selmo se levve é pren pe eun bri Marteun.

MARTEUN Mi na ! Squersao !

SELMO Na, na veun maque ! T'a deu-lo, ara te lo fé. Vouì vére comèn te tappe la tsamba.

Selmo é Marteun passon douàn lo ban.

SELMO (A Dino) Salì sotcho ! Tot amoddo ?

DINO Paye eun vèyo ?

SELMO Na aprì !

Selmo é Marteun s'aprotson i poltronne iaou son achouataye Ornella é Vanda.

SELMO (A Ornella) Squezade demouazella ! Mé n'i eugn amì que l'è tchica euntredeutte é sa pa comèn dimandì pe danchi é adón lèi fiyo vère mé...

Ornella souri. Selmo pren pe man Ornella é Marteun é le pourte i mentèn di palque.

SELMO Premì бага : pa pité le pià ! Secounda : sara-là amoddo mi... beutta pa ba le man !

Marteun eumbrache Ornella pe danchi.

SELMO (I bouigno de Marteun) ... é trèjjima... souffla-lèi pe le bouigno... leur lamon !

MARTEUN Te di ?

Selmo gante la tita é se plache i ban.

Lo volume de la mezeucca se levve. Aprì eun per de pa, Marteun souffle dou trèi cou pe le bouigno de Ornella.

ORNELLA (Eunfastedjaye) Mi va drimì i solèi !

Ornella tsache ià Marteun é tourne s'achouaté protso de Vanda. Marteun, démoralizòu, s'achouatte a tabla avouì Selmo. Lo volume de la mezeucca bèiche.

SELMO Senque l'è capitoù ?

MARTEUN « Souffla-lèi pe le bouigno » t'a deu-me ! Brao ! Dzen consèille !

DJOUYAOU II T'aré cretou-lèi le bave !

SELMO Mi l'è pa poussiblo Marteun !

Scène V – AMOUR AMER

Giulio s'aprotse a la tabla.

GIULIO (A Selmo) Pappa. . . vi que t'i seuilla, veun sé eun momàn. . . voui te présenté ma choze.

SELMO (Émochon-ou) Mi cheur ! To de chouite ! Me perdo pa si momàn !

Selmo se levve é, eunsemblo a Giulio, va i mentèn di palque, iaou n'a Vilma.

GIULIO Lleu l'è Vilma.

SELMO (Eun sarèn la man de Vilma) Oh Vilma, a fose me la fé cougnitre ! L'a todzor prédja-me-nèn ! Ouè mi. . . t'a euncó acapou-la dzenta ! Comèn t'a fi ?

GIULIO (Timido) Si vin-ì inque i Flama é n'i danchà eun momàn.

SELMO Brao ! (Ver Vilma) Squeza-nó eun momàn.

Selmo trame Giulio eunna mia pi louèn de Vilma. Dimèn entre Pino, pappa de Vilma. Se plache i ban pe bèye eun creppe.

SELMO (Eun prédzèn plan i bouigno de Giulio) Acouta botcha de mé. . . rapella-té eunna бага : proua-nèn pi eun per douàn de beti si fameuille ! Piatro aprì l'è tro tar ! T'a comprèi ?

GIULIO Ouè, ouè. . .

SELMO (Fier) Mi comèn t'a fé a acapé eunna dzenta pèi ? Mé si belle contèn !

Pino l'è prisó, vou alì ià. Bèi la dériye gotta é s'aprotse a Vilma.

PINO Vilma l'è dza tchica tar, ara alèn i mitcho ?

VILMA Na pappa, euncó eun momàn.

PINO Euncó eun momàn ? L'è dza minite, aprì te sen té mamma ?

VILMA Na pappa, maque eun petchoù momàn.

PINO Soplé, ara alèn !

Pino pren dézò bri Vilma pe chotre eunsemblo. Le dou van ver la chortia, mi malerezamente euncrouijon Selmo é Giulio. Le doe coble se blocon, paralizaye, eunna douàn l'atra. Le joueu de Pino é Selmo s'eunflamon. Vilma é Giulio son terrorizoù.

SELMO Comèn ? Té senque te fi sèilla ?

PINO (*Inervou*) Mé senque fiyo ? Si vin-ì prende la feuille de mé !

SELMO (*Eunfastedjà*) Mi poui pa lèi crèye ! Pino !

PINO Selmo !

DINO ... é Dino !

SELMO (*A Giulio*) Mi euncó té te faè fran acapé la feuille de lli ?
Avouì totte salle que n'at !

PINO (*A Vilma*) Senque l'a deu ?

VILMA Ouè pappa, mé lamo Giulio !

PINO (*Malechà*) Senque t'a deu ? Té te prèdze a salla бага (*eun moutrèn Giulio*) lé pai ! Avèitsa comèn l'è combin-où ! Vilma se l'è maque pe lo non, n'en euncó no-z-atre i Bourni eun Giulio que l'è ren mal !

VILMA Mi na pappa, mé voui (*inamoraye, eugn avèitsèn Giulio*) llou !

PINO (*Digoutó*) Mi avèitsa eun que stat l'et ! Comèn l'è arbeillà !
Salla бага lé !

SELMO Euncó té Giulio ! Avouì totte salle que n'at aoutre a Grand-Pollein : Rosinetta, Touanetta é totte le-z-atre ! Fran seutta te

diè acapì?

GIULIO (*Timido*) Mi, mi... (*eun sequeillèn*) m-m-m-é lamo Vilma!

Giulio galoppe ver Vilma é dousemàn lèi pren la man pe la téri ver llou.

GIULIO ... belle s-s-s-e l'è de Tsarvensoù.

PINO (*Eun flame, ver Vilma*) Mi sen-ló! Sequeueille finque! Semble finque maladdo!

DINO Amour! L'è amour!

Avouì le doe man Dino fé lo signe di queur é se tappe i mentèn de la discuchón. Selmo é Pino lo tsachon ià.

Scène VI – PATÈLE É VÈYO ICLLAPOÙ II

Selmo s'aprotse ver Pino, lo dèi drette ver lo vezadzo.

SELMO ... é té prèdza pa mal di botcha de mé!

PINO Beutta ba si dèi, piatro te planto eun...

SELMO ... piatro l'è tourna l'aoua!

PINO (*Avouì la vèin-a i cou*) Te te rapelle 20 an fi lo paillano que n'i bailla-te?

SELMO (*Avouì le nerfe tendi*) Te planto seun dèi!

PINO (*Comme douàn*) Me tremblon tourna le man!

Selmo tchappe Pino pe la craotta é le dou comenchon a se baillì ba. Dino se tappe i mentèn pe le divijì, mi nen tchappe pi di-z-atre. Vilma é Giulio scappon ià. Areuvve Gène que, avouì la forse que pou èi eun vioù, tsache foua di local Selmo, Pino é Dino.

DORINA Que dizastre! Tot icllapoù le vèyo.

GÈNE ... é l'è euncó finque do-z-aoue! Me fa clloure.

GÈNE (*I djouyaou di tsan*) Garsón... dèyo clloure.

MARTEUN Adón beutta euncó eun tor.

*Gène pren eun boteillón de rodzo é lo régale i trèi djouyaou
pe le tsachì foua di local. Le trèi lo prègnon contèn é chorton.
Dimèn Dorina l'è alaye prendre eugn'icaoua pe ramachì le vèyo
cllapoù.*

DORINA (*A Ornella é Vanda*) Mademouazelle, squeeze... cllou-
zèn lo local. L'è tar. Me diplì.

Ornella é Vanda chorton.

GÈNE Tcheu le-z-àn...

DORINA ... pason le-z-àn é la counta l'è todzor la mima.

🏠 TSI LA TÈILA 🏠

👤 AVANSPETTACLE 👤

Lemiye 💡 si lo proscenium.

Entron Laurent é Tania.

LAURENT (A Tania) Pensao... l'a pa de sanse i dzor de oueu no fé la guèra euntre Valdòtèn ; l'a pa de sanse se fé la guera euntre vezeun.

TANIA T'a rèizón. Ara comme ara fa pensì i futur. Ara se prèdze de beti eunsemblo le Quemeue, de collaborachón pe lo bièn di parrotse é selón mé déyèn pensé a quetsouza de nouo. Pe fé eugn izeumplo : senque te nen di se no de Pollein prégnèn catro dzor eun pi voutro medeseun ?

LAURENT Ouè, dzenta idé ! Pe eun discoù de collaborachón pourian fé pouèi... mi eun tsandzo vo de Pollein no betade pe icrì que can noutro prée l'è maladdo ou l'è pa eun servicho veun si si de Pollein. Pouèi messa comenche eugn oréo, fenèi pi vito é n'en euncó lo ten de bèye eun blan !

TANIA Maque a so pensade !

LAURENT D'acor ?

TANIA Ouè ! Mé n'i eugn'atra idì : senque te di se fièn la patse pe le montagne ? Tsamoli, Martchaouchi... comprègno pa pequé le Tsarvensolèn vardon salle de Pollein é le Pollentchón vardon salle de Tsarvensou.

LAURENT Braa, si d'acor... é pourian euncó troué eugn acor pe le doe formachón di palón.

TANIA Ah na ! So va pa bièn pe no. A Pollein n'en pa la formachón di palón ; no tegnèn maque i vrèi spor valdotèn : lo Tsan.

LAURENT Lo Tsan ! Te me vou fé crèye que vo de Pollein v'ouèi

eunventó lo Tsan ? Mi pe case t'a vi de queunta couleur son le maille de sise de Pollein ? Te la sa pa la counta ?

TANIA Queunta couleur di maille é queunta counta ?

LAURENT Adón... l'ye lo 6 juillet 1964, can Jozé Louis Squinabol, nèisi a Barcellona, l'è vin-i eugn Itali pe tsertchi forteun-a. L'è tramou-se eun Val d'Ousta, l'è arrevoù a Pollein é l'a prèi lo mitcho i Dredji. Avouè llou, l'a portoù eun sé de l'Espagne si djouà : lo Tsan ! Eugn Espagne se queriè pa lo Tsan... l'ye la Pertica ou la Perticas... é eun son oneur le Pollentchón, vi que lamaon tan si djouà, l'an desidó de lèi fé chédre la couleur di maille. Pouè chédre le couleur di péi iaou l'è nèisi, Barcellona, ou salle di son veladzo... Dredji !

TANIA Mi planta-là li !

LAURENT Aprì doe ou trèi nite iaou l'a pa tan drimì, l'a desidó pe Barcellona ! Pouèi v'ouèide la maille di Barcellona !

TANIA (*Stouffie*) T'a fenì de di de counte foule ? Soplé, pensèn a de bague sérieuze. Mé n'i reflèichì desì eugn'atra бага : senque te pense se vo louyèn la Grand-Place pe trèi ou catro dzor la senà ? No divjérian le spèize de manutenchón.

LAURENT (*Pa convencù*) Mé diriyo... fièn eugn atro discoù pe la Grand-Place. Pitoù que le spèize de manutenchón, mé vo baillé-rio a vo de Pollein l'oneur de fé si voutro territouéo... l'oneur de fé la fita di pépérontcheun !

TANIA Na ! Na, na ! La fita di pépérontcheun vardade-vo-là ! No l'è di-z-àn '90 que n'en la Grand-Place é de fite pouèi le vouillèn fran pa.

LAURENT Te me vou fé crèye que a Pollein pe le-z-àn '90 v'ouèide jamì fé de fite drole pouèi ?

Teuppe 🍷.

LE-Z-ÀN '90

SE IVRE LO RIDÓ

Scène 1 – SEN PRESTE ?

Lemiye 💡.

La streutteua de la scénographie l'è la mima, mi avouì eun per de tsandzemèn pe la rendre pi moderna : si lo ban l'è plachà lo sidel de la llase pe lo Champagne é a drèite, iaou n'ayè lo jukebox, n'at eunna danseuse é la consolle di DJ. Déri lo ban, pendia i meur, n'a eunna fotografie de Gène.

Ara la propriétéa di local l'è Berta (feuille de Gène). A la remiza di dra n'a todzor Dorina, avouì dji-z-àn de pèi blan eun pi é eun per de decibel eun mouèn. Achouataye li eun libro, mi eun réalitò, avouì de grou biicllo di solèi, l'è eun tren de drimì. Déri lo ban acapèn Hélène, serventa di local. L'è minite é le premi cliàn dérian arrevé de sé a pouza.

Berta entre inervaye.

BERTA Dorina !

Dorina pren pouiye é se rèche.

BERTA Adón ? Rècha-teu vèi ! Soplé, beutta eun caro mon paltó.

Berta se gave lo paltó é lo baille a Dorina, que, mèitchà eundrimiya, lo pen i pourtamantì.

BERTA Acoutta bièn... pen-ló louèn de si di cliàn ! Pa comme lo déri cou que aprì s'eumplèi de flou di feun ! N'i djeusto portou-lo lavì.

Berta s'aprosté i ban.

DORINA (*Eun prédzèn todzèn*) Oueu l'è greundze !

BERTA (*A Hélène, todzor inervaye*) Hélène ! Hélène senque t'i eun tren de fiye ?

Hélène cllou lo journal.

HÉLÈNE (*Naïf*) Sayoù eun tren de lie lo journal.

BERTA (*Malechaye*) Hélène ! Selón té mé te payo pe ité inque a liye lo journal ?

HÉLÈNE Mi l'è to vouido lo local ! N'ayè maque Dorina que drimave.

BERTA Acoutta-mé amoddo Hélène ! Mé si alaye ià pe fé de comichón é n'ayoù deu-te de ité inque pe aprestì totte . . .

HÉLÈNE Ouè n'i tot aprestoù.

BERTA Ouè véyèn . . . dunque, t'a reumpli lo frigo ?

HÉLÈNE Ouè.

BERTA T'a tsandjà lo fuste de la bira é di gas ?

HÉLÈNE Na.

BERTA Comèn na ?

HÉLÈNE Na, a la crotta n'ayè pamì de fuste é adón n'i prèi de botèille de bira.

BERTA N'i dza de-te-ló l'atra senà que te fayè atseté le fuste ! Te lo sa que le botèille son bièn pi tchiye !

HÉLÈNE (*Eun tsertsèn de squize*) Beh . . . son pi bon-e.

BERTA Ouè, te me le paye té. Can mimo . . . lo Champagne t'a betoulo deun la llase ?

HÉLÈNE (*Eun moutrèn lo sidel si lo ban*) Ouè, doe botèille i frique.

BERTA Djeusto doe ?

HÉLÈNE Ouè baston !

BERTA Se baston pa te va pi a la crotta a le prendre i galoppe !

HÉLÈNE Va bièn... ah ! N'i euncó aprestit le frique pe la Caipirinha, la menta pe lo Mohito é... na... n'i oublià lo *lime* !

BERTA (*Dispéraye*) Mi comèn t'a oublià lo *lime* ? Te lo sa que oueu l'è eunna souaré eumpourtanta. Oueu l'è la dériye nite comme garsón pe Giulio é seutta nite si local saré plen de plen : Giulio é tcheutte le-z-amì de lli ! Ah... é fé attenchón que sise lé l'an le man crevaye ! Ara feulla to de chouite prendre si *lime* !

Hélène chor de coursa avouì le pèi drette.

DORINA (*A basa vouése*) Oueu l'è greundze !

DORINA (*A Berta*) Moito, Capirina, Pépito... senque son-ti totte seutte potchacaye ?

BERTA Dorina soplé ataca pa euncó té avouì seutte rentse !

DORINA Pe fose que le dzouveuno i dzor de oueu reston malle pe de dzor. (*Mélanconique*) I ten de mé, n'ayè pa totte seutte potchaquiye. No béyaon todzor lo Vermouth ! L'ye boun lo Vermouth !

Hélène tourne dedeun avouì lo lime.

BERTA (*Stouffie*) Ouè Dorina, ouè.

Entron lo DJ é la cubista, que s'aprotse a Hélène pe ataqué a fé la counta.

DJ (*A Dorina*) Ouélla ! Dzenta tanta ! Sopatta-té di pidze é de la poussa que oueu ou te mando i paadi o a l'enfeur !

DORINA Malpoulite ! Dibroilla-té maque que t'i dza eun retar é Berta l'è dza ajitaye é greundze.

BERTA Seutta t'a bièn deu-la Dorina ! (*I Dj*) Boudza-té é va aprestit le baradziye de té... avouì sen que te payo !

DJ Ouè, queunse sou ? Gneunca sisan ba pe le-z-ivrière i Milù !

BERTA Rabadàn !

BERTA (*Ver Hélène é la cubista*) ... é vo doe ? Senque v'ouite eun tren de fiye ?

HÉLÈNE Prédjì !

BERTA (*A la cubista*) Va t'aprestì !

Eun silanse la cubista se plache si lo cube.

BERTA Hélène t'i todzor eun tren de pédre de ten ! Planta-là li ! Poulita si ban soplé !

HÉLÈNE Ouè va bièn.

BERTA ... é t'a vi ? Seutta nite n'en finque prèi eunna *cubista* !

HÉLÈNE Pequé ? N'ayè pa fata de eunna *cubista* seutta nite.

BERTA Mi Hélène ! N'i deu-te que oueu l'è la dériye nite comme garsón pe Giulio !

HÉLÈNE Djeusto ! Mi touteun. ... paì eunna *cubista* pe Giulio !

BERTA Si mé que la payo, pa té ! É aprì pa maque eunna *cubista*. ... te vèi pì queun squerse n'en organizou-lèi !

HÉLÈNE Ah ouè ?

Lo DJ fé partì la mezeucca que saré todzor basa de volume dimèn que la counta avanche.

Scène II – DZEN SI LOCAL

Entron dou dzouveun-o, eun poumpa pe fé fita é s'amuzé. Galloppon drette i ban.

DORINA Iaou alade vo dou ?

PIERRE Iao alèn ? Alèn dedeun, te vèi pa ?

DORINA V'ouèide-tì prenotoù ?

PIERRE Prenotoù ? Mi se l'è vouido, n'a gneun ! Fa-ti euncó prenòti ara ?

DORINA Ouè, lo local l'è to prenotoù !

DORINA Can mimo, v'ouèide de chance ! Desi lo carnet n'i euncó do plase libre... vo fiyo entrì. Quetade-mé maque le paltò inque a mé.

PIERRE Oh que jantila, mersi !

Louis é Pierre queutton le paltó a Dorina é se plachon i ban.

DORINA ... é paì ?

PIERRE Fa euncó paì ? (A Louis) Paya té que t'i dzouveun-o.

LOUIS Féo mé, tracacha-té pa.

Louis paye é aprì rejouèn i ban Pierre, que l'a dza tapó lo joueu si Berta é Hélène.

PIERRE (Tchica tchapeun) Bonsouar madame !

BERTA (Frèide) Bonsouar.

PIERRE (A Louis) Senque báyèn ?

LOUIS Mojito !

PIERRE Top ! (A Hélène) Dou Mojiti !

LOUIS Tsardjà !

PIERRE Avouì lo lime !

Hélène gnouye a aprestit le dou cocktail.

LOUIS (A Pierre, entouziaste, eugn avèitsèn lo local) Que poste !

PIERRE (Eun sourièn) Ouè, que dzen !

Louis vionde la tita ver la cubista é reste éton-où.

LOUIS (Eun moutrèn la cubista) Èitsa que qui ! Èitsa-ló !

Euncó Pierre l'è eumpréchon-où, le joueu foua de la tita.

PIERRE Mi senque l'a salla? Lo fouà i qui! Èita comèn danche!
Belle se sen a Pollein, l'è dzen si local!

LOUIS Sen jamì entroù, mi la prochène senà sen seu.

PIERRE Belle demàn se son iver.

LOUIS (A Berta) V'ouite iver demàn?

BERTA Ouè sen todzor iver.

PIERRE Adón prenotoù, pe dou!

Hélène soumón le Mojiti.

HÉLÈNE ... é seu son le dou Mojiti.

Pierre é Louis prègnon le Mojiti é fan santé.

PIERRE A no! Alèn aoutre lé que n'a de plase pe s'achaté.

*Pierre é Louis s'achatton si de pégnò chofà a drèite di palque,
dèi iaou pouon bièn veure totta la danse de la cubista.*

BERTA (A Hélène) T'a sentì senque l'an deu le dou garsón?

HÉLÈNE Na...

BERTA (Fière) « Que dzen local »!

HÉLÈNE (Émochon-aye) Pequé n'a no dedeun.

BERTA (Gramà) Pequé lèi si mé dedeun.

Berta, orgueilleuza, se viounde ver la fotografie de pappà Gène.

BERTA Mon cher pappà, se te pousise veure euncó té... Hélène, té
t'a beun cougni-lo pappà, na?

HÉLÈNE Na mé si tro dzouvin-a.

BERTA Hélène senque vou diye? Euncó mé si dzouvin-a!

HÉLÈNE Pa comme mé!

BERTA (Sensa baillì fèi a Hélène) Pousise veure euncó lli comèn
son tsandjaye le bague! Mersì a mé! Èitsa que dzen local,

pa comme l'ïye eun cou. Sarie bièn countèn de mé. Can l'ïye euncó lli seu dedeun mé pouò pa fé ren, maque to lo dzor travailli, travailli é travailli ! Pouliti, lavì le vèyo, panì le vèyo, pouliti é panì le vèyo. Fiyò pa d'atro que travailli.

HÉLÈNE (*Ironique*) Squeuza... té te lavave le vèyo, lavave le vèyo, lavave le vèyo ?

BERTA Ouè, mé lavavo le vèyo, lavavo le vèyo, lavavo le vèyo. Fran mé... é ara te pou veure comèn l'è vin-ì si local ! Grase a mé !

BERTA Ah ! Aprì se sise inque avouì no, é véise Pino é Selmo a tabla eunsemblo, crériye pa a seun joueu ! Mi si cou son belle oblidià a alì d'acor : la senà que veun leur dou mèinoù se marion ; l'an fenì de deusqueti. Avouì to sen que l'an fé-lèi pasì !

HÉLÈNE Senque l'an fé-lèi pasì ?

BERTA Pe de-z-àn é de-z-àn tcheu le cou que s'acavon seuilla se verlaon !

DORINA Eunna blita de vèyo icllapoù !

BERTA Totte icllapavon... é mé poulitavo.

HÉLÈNE Té te poulitave ?

BERTA Ouè. Can mimo... l'è dza belle tchica tar... Giulio é le-z-amì de lli dérian pa tardi a arevè. Beutta eugn odre lo ban !

HÉLÈNE Ouè, ouè tracàcha-te pa.

Scène III – OUASSA PE LO MOTEUR

Entron Giulio é trèi seun amì : Federico, Marco é Michel. S'aprotson i ban eun tsemièn tchica tose : son dza tcheu catro belle tsa.

DORINA (*I catro garsón*) V'ouèide-ti prénotoù ?

FEDERICO (*Eun desuèn Dorina*) Mi comèn v'ouèide-ti prénotoù ?

MARCO Mi se sen todzor séilla !

MICHEL Aprì l'è pi maque minite ! N'a pa euncó gneun !

BERTA Maque minite ? L'è dza eun bon momàn que vo-z-atégnavo.

FEDERICO (*Eun se medzèn le paolle*) Squeza-nó... no sen aritó a fé benzin-a ; pe sen que sen arrevoù eun retar.

MARCO N'ayón finque fené le boun !

MICHEL Pouèi sen vin-ì a pià di Pon. (*Eun s'aprotsèn a Dorina*) Sen so que flou de la chao que n'i...

Michel levve lo bri é lo pourte i na de Dorina.

DORINA Ah na, na ! Va maque llouèn ! A mé semble que pitoù que fé lo plen a la machina, v'ouite reumpli-vo euntre vo !

FEDERICO Ouè, mi pa pi de *super* ! (*Eun tapèn son paltó a Dorina*) Tchappa so caramban-a !

DORINA A sentì l'èina que t'a, me semble pitoù que martsade a ouassa.

Michel dimèn paye l'entraye pe tcheutte.

GIULIO Ouè Dory l'a belle rèizoun ! (*Eun s'aprotsèn a Berta*) Berta, eumbracha-mé que oueu l'è ma dériye nite comme garsoùn !

BERTA (*Digoutaye, eun se ditatsèn de Giulio*) Ouè, ouè, acoutta, beutta ba le man pe plèizì, soplé !

Le-z-amì de Giulio se plachon i ban.

GIULIO (*Comme douàn*) Desando queun me mario !

BERTA (*Comme douàn*) Ouè lo si Giulio que te te marie, mi te rappello que mé ara si eunna feuille eungadjaye... é aprì te rappello que can te pouè, dji-z-àn fi, t'a pa pi beto-lèi tan a me mandì a si péi !

GIULIO Sayoon d'atre ten...

BERTA (*Malechaye*) Ouè d'atre ten. (*A Dorina*) Dorina, le paltó de leur pe tèra, pa pi protso di meun !

MARCO Hélène ! Beutta-nó eun tor !

HÉLÈNE Senque vo baillo ?

FEDERICO (*Gadeun, eugn alondzèn le man*) Sario prao mé sen que no baillì, mi maque a mé !

Hélène fé eun pa eun déri é Michel bloque Federico.

BERTA (*A Federico, seuria*) Soplé, beutta ba le man.

HÉLÈNE Donque, senque vo beutto a bèye ?

MARCO (*Eun terièn foua le sou*) Beutta-nó catro sidel de Mimosa !

HÉLÈNE Mimosa ? Senque l'è ? L'è pa pi la fita di femalle !

MICHEL (*A Hélène*) Te sa pa senque l'è la Mimosa ? L'è lo cocktail di momàn ! Mi iaou te viquèi ?

BERTA Mondjeu Hélène ! Senque te payo a fiye ?

FEDERICO Mi queunta Mimosa ! Beutta ba catro sezeleun de bira !

HÉLÈNE Oh sen ouè !

Scène IV – SI LE MAN !

Lo DJ levve lo volume de la mezeucca.

DJ Salì Pollein !

Tcheutte braillon é salion lo DJ.

DJ Qui levve pa le man, areuvve pa a demàn !

Partèi la fita : Hélène pourte lo bèye, Berta counte le sou, le-z-amì fan santé pe la dériye nite de Giulio, la cubista ataque a danchi. Pierre é Louis lèi beutton eun per de beillette deun le pantalón.

La mezeucca bèiche.

GIULIO (*A sé-z-amì*) Mi salla feuille li que danche ? V'ouèide pensó a to so pe mé ?

MARCO Ouè, salla li l'è pe té é rapella-té que sen que capite seutta nite i Flama reste i Flama !

GIULIO Adón alèn aoutre !

MARCO Partèi a l'ataque !

Giulio s'aprotse eun danchèn ver la cubista. Pierre é Louis son todzor a l'entor de lleu.

PIERRE (*A Giulio*) Sotcho ! Beutta-té eun quiya !

Giulio se vionde ver sé-z-amì ; comprèn pa.

MARCO (*A Giulio*) Bailla pa fèi a sise Tsarvensolèn. Dancha maque euncó té !

Marco s'aprotse euncó lli a la cubista pe baillì de coadzo a Giulio.

DJ Adón Pollein v'ouite tsa ?

Tcheutte braillon. La mezeucca se levve : Giulio é Marco baillon campa.

Lo volume de la mezeucca bèiche.

MICHEL (*A Berta*) Adón Beurta...

BERTA Berta !

MICHEL ... v'ouèide aprestó lo squerse ?

BERTA Oue tranquilo, lèi penso mé.

DJ Pollein v'ouite euncó tsa ?

Tcheutte braillon, levvon le man é danchon. Dimèn Berta s'aprotse i DJ, lèi di quetsouza i bouigno é aprì chor.

La fita conteneuvve : Giulio veun prèi di-z-amì de llou é tappó si pe l'er eun per de cou. La mezeucca l'è forta.

To d'eun creppe entre eun vallet de veulla fenna avouì eun manganel eun man.

VALLET Adón ! Senque l'è si vacarno ? Tchouéyade la mezeucca !

La mezeucca se tchoué. La fita s'arite. Tcheutte son ibai.

VALLET (*Ver Hélène*) Qui l'è la patroun-a di local ? Queriade-là !

HÉLÈNE Vou la querì to de chouite !

VALLET Vito ! (*I-z-atre présèn*) Vo tcheut, si le man é foua le documàn.

Tcheutte levvon le man.

MICHEL Ouè mi comèn fièn a terì foua le documàn se n'en le man lévaye ?

VALLET Douàn foua le documàn !

PIERRE (*A Louis*) N'ayó deu-te de pa queuttì la machina desì lo martsepià, que seuilla a Pollein comprègnon pa seutte bague.

VALLET Vo dou silanse ! V'ouite pa pi dzen di-z-atre !

LOUIS (*A Pierre, eun baillèn lo documàn i vallet*) T'ayè beun rèizón.

VALLET Qui l'é Giulio de Beccafrantse ?

Tcheutte moutron avouì lo dèi Giulio, que dimèn l'ìye aprotchase a la chortia.

MICHEL Giulio te tsertson !

Michel pren Giulio dézó lo bri é lo plache i mentèn di palque.

VALLET Ah v'ouite vo ?

GIULIO (*Ajitó*) Si mé pequé ?

VALLET Vegnade seuilla. Vo sade pequé mé si inque ?

GIULIO Na... senque n'i fi ?

VALLET Na ? Vo sade pa ?

GIULIO Na.

VALLET Adón vegnade inque, que vo fiyo vin-ì eun devàn to de chouite lo pequé.

Giulio terrorizó s'aprotse.

VALLET (*I-z-amì*) Vo ! Portade seuilla eunna caèya é èidzade-mé a lo llatì.

Le-z-amì de Giulio prègnon eunna caèya, achouatton Giulio é lo llaton.

GIULIO (*Todzor pi ajitó*) Eun lèi pensèn mioù, pou se fiye que can sayò pitchouè magà n'i roboù eun per de caaméle... pa d'atro !

VALLET Silanse !

GIULIO Can n'i robo-le sayò solette !

Giulio ara l'è to llató a la caèya. Le-z-amì se plachon dérì de lli, protso di ban. Tcheutte riyon eun silanse dimèn que lo squerse conteneuvve.

VALLET (*Arroganta*) Ita quèi ! Eun manganel desì l'itseun-a t'a jamì tchapou-lo ?

GIULIO Diqué ?

VALLET Eun manganel !

GIULIO Mondjemé, na ! L'icaoua de tenzentèn ouè avouè mamma... mi lo manganel na !

VALLET Adón n'a todzor eun premì cou !

Lo vallet baille eun crep de manganel si l'itseun-a de Giulio. Le-z-amì riyon for.

VALLET ... é ara comenche la fita !

GIULIO La fita ?

Partèi eunna mezeucca dance. Lo vallet comenche a se dizar-beillì; vionde a l'entor de Giulio, lo acaresse.

GIULIO (*Bièn pi relassoù*) Ouélla !

Le-z-amì de Giulio, Pierre é Louis son électrizoû ; l'an le man si pe l'er é dzouzon lo spettacolo.

Scène V – TOTCHÌ, MI PA AVÈITCHÌ !

Aprì eun bon momàn, la mezeucca se tchoué é lo vallet, avouï sa craotta, toppe le joueu de Giulio, que dimèn fricotte si la caèya.

DJ Oueu l'è eun dzor spésial pe noutro amì Giulio é fran pe sen l'è preste eun cadó djeusto pe lli ! Si le man garsón !

Repartèi la mezeucca.

DJ Renque pe té Giulio, renque pe seutta nite, eun cadó djeusto arevó di Brézil. . . bouichèn for le man pe Sami !

Entre eun trans brazilièn : perruque roze, foulard rodzo, tse-mize dzana, jeans é de grou pià que chorton foua di-z-infradito. La mezeucca tsandze pe créé eunna ambianse pi brazilienne. Lo vallet se plache i ban pe quetì la plase a Sami.

Sami danche a l'entor de Giulo, se frotte si de lli, lo caèche. Tcheu le-z-atre danchon eun fièn lo tréneun. Euncó Hélène se fé prende pe la fita, mi Berta la redriche to de chouite.

La mezeucca bèiche. Sami s'achouatte desì Giulio é lèi prèdze avouï eunna vouése ata é feminine.

SAMI Adón Giulo, vegnèn i donque !

GIULIO Mondjemé ! Que man souple que t'a !

SAMI T'i to tsa !

GIULIO Se te me tazeuille pouai sento to fromiati ba pe l'itsin-a !
Gava-mé la benda, gava-mé la benda !

SAMI Na ! Totchè mi pa avèitchi !

GIULIO D'acor, mi si llatoù !

SAMI Adón te diillatto.

Sami diillatte Giulio. Giulio se levve é avouè le man tsertse Sami.

GIULIO Iaou t'i Sami ?

SAMI Seuilla !

Sami pren Giulio é lo pourte i mentèn di palque pe eunna danse sensuelle, iaou Giulio pou totchè eunna mia de pi. Dimèn le-z-amì conteneuvvon a riye é a fé fita.

GIULIO (*Eun totsèn le-z-ipale, douteu*) Mi... Te me semble pi granta que totar...

SAMI Que dzen que t'i !

GIULIO Ouè t'a rèizón. Acoutta ! Gava-mé ià vito seutta benda pai pouè vére iaou beti le man !

SAMI Bièn cheur mon cher !

Sami gave ià la craotta di joueu de Giulio.

SAMI (*Avouè sa vouése d'ommo*) Cou-cou !

GIULIO Mondjemé la barbuta !

Giulio baille la balta. Tcheutte son pléyà eun catro di riye.

SAMI Lo shock l'a tchoué-lo !

Le-z-amì se plachon a l'entor de Giulio é tsertson de lo réchi. Sami l'è desè de lli é lèi fé d'er avouè sa perruque. Aprè eun per de secónde, Giulio se rèche.

GIULIO (*Dizorientou*) Djablo sen que n'i sondjà !

Giulio levve la tita é vèi Sami desè de lli.

GIULIO L'ye eugn ommo !

Giulio capote eun secón cou. Tcheutte riyon; i contréo, Berta é Hélène son eunna mia tracachaye pe Giulio. Hélène pourte de coursa eun vèyo d'éve.

HÉLÈNE (A Michel) D'éve, d'éve !

Michel pren lo vèyo d'éve é eunsemblo i-z-amì lo voueudze si lo vezadzo de Giulio, que se rèche é se teurie si eun catro catro ouette.

MARCO L'è reprèi-se !

MICHEL (A Giulio, eun fièn semblàn d'itre tracachà) Pensao que t'ye de l'atro djette !

GIULIO Mi de squerse pai ? Euncó tchica é me vegnave eun creppe !
(Ver Sami) É euncó té avouè salla vouése n'ayò pa comprèi !
Se me vèyè Vilma me mariave pamì... é senque l'an totchè seutte man ! Ara si coudzì de alì i coumeun... avouè to sen que n'i totchè !

MARCO Se t'ioù le copèn.

MICHEL Ara ézajèra pa, t'a dza totchè d'atro !

Giulio chor.

SAMI Mé vou me tsandjì.

MICHEL Ouè é aprì béyèn eun creppe avouè Giulio.

Sami chor.

MICHEL (A Hélène) Beutta tourna eun tor.

BERTA Douàn paya-ló.

Marco beutte le sou si lo ban. Dimèn Louis é Pierre se nen van eun salièn tcheutte. Federico nen profite pe s'achouaté si le poltronne protso de la cubista.

LOUIS (A Marco) No scapèn, mi nen tro riette ! Tro seumpateucco.

MICHEL Tournade !

PIERRE (A Michel) Dzen squerse !

MICHEL Sali sotcho ! Fé lo sayo !

LOUIS No véyèn !

PIERRE (A Hélène) Lo Mojito l'iye pa tan bon !

Berta avèitse mal Hélène.

BERTA Voualà, gnenca bon-a a fé sen.

Scène VI – DOU DOBLO ZIBIBBO

Louis é Pierre son caze foua can euncrouijon d'atre dou garsón : eun bièn ate é ipesse, l'atro base é méyo comme eun pioù. Lo petchoù, Paul, baille eun cou d'ipala a Louis. Louis se reveuriye, mi lo pi grou, Auguste, lo pouche contre Pierre.

PIERRE Oh tchappa tchuque ! Adón !

Le catro (eun réalitò le trèi, Auguste contre Pierre é Louis) comenchon a se pouchi. Auguste l'è braamente pi for. Pierre é Louis se tramon ver la chortia, a tita ata, eun djabléyèn countre le dou mal poli.

PIERRE Avèitsade vèi iaou betade le pià ! Alèn ià Louis... mi pensa té sise !

Paul é Auguste se plachon i ban.

LOUIS Bièn aló que t'a tegna-me.

PIERRE (A Dorina) Le paltó, soplé.

Dorina baille le paltó a Louis é Pierre é le dou se nen van.

HÉLÈNE (Ver Paul é Auguste) Vouillade bèye ?

AUGUSTE Dou Zibibbo.

PAUL (Arrogàn, eun bouéchèn la man si lo ban) Fé-ló dobro !

HÉLÈNE Ouè.

BERTA (*Tracachaye, a basa vouése*) Hélène ! Veun inque. . . soplé fé
 attenchnon a sise dou. Le cougnisèn, te lo sa que tcheu le cou
 veugnon inque maque pe tsertchè rize.

HÉLÈNE Ouè va bièn.

*Hélène soumón le dou Zibibbo. Dimèn entron Vilma, Vanda é
 Ornella.*

DORINA Iaou alade vo trèi ! V'ouèide-ti prénotoù ?

VILMA Mi na que n'en pa prénotoù ! Comèn te pou-no queti foua
 oueu ? L'è ma fita !

DORINA Mondjemé ! Comencho belle a pèdre la tita ! T'i maria-te
 oueu ?

VANDA Mi na ! Te vèi pa comèn l'è arbeillaye ? Oueu l'è sa dériye
 nite de feuille !

DORINA Oh que dzente seutte fite ! Mé me rapello can n'i fitoù ma
 dériye nite de démouazella ! Sen aloù si i sondzón di veladzo,
 pe eun pailleue. . .

*Vanda se stouffie de seutta counta. Pren Vilma é Ornella é le
 pouche dedeun lo local. Dorina conteneuvve a prédjì, mi Vanda
 lèi saoute si eun l'eumbrachèn. Lèi baille dou pouteun é la sa-
 lie. Aprì rejouèn Vilma é Ornella, que son i mentèn di palque
 preste pe danchi.*

DJ Senque vèyon mé joueu ! L'è arrevaye l'ipaouza. . . é seutta tsansón
 l'è totta pe vo !

 WHIGFIELD - SATURDAY NIGHT 

*Vilma, Ornella é Vanda atacon eunna danse de groupe. I ban
 Paul é Auguste bouéchon lo ten avouì lo pià. Michel, Marco
 é Federico tsertson d'alé dèrì le pa de la danse que fan le trèi
 feuille.*

La mezeucca bèiche. Vilma é sé-z-amie conteneuvvon a danchi.

AUGUSTE (A Paul) Senque fan totte seutte polaille solette ? L'arèn cheur fata de compagnì.

PAUL Ouè, alèn vère.

Arrogàn, man eun secotse, Paul é Auguste s'aprotson i feuille. Paul pounte Vilma.

PAUL (A Vilma) Deh dzenta polaille !

VILMA (Eun sourièn, ipouvantaye) Senque t'ou ?

PAUL T'ou fé catro danse ?

Vilma pouche ià Paul, mi llou l'è todzor pi agasàn. Vilma danche pamì. Dimèn, Ornella é Vilma son itaye pouchaye ià pe Auguste.

VILMA (Seuria) Na mersì.

Vilma vou scapé ià, mi, can se vionde, acape Auguste douàn lleu.

PAUL Veun protso de mé que danchèn, alé !

VILMA Na ! (Terrorizaye, eun braillèn) Giulio !

PAUL Veun danchì, bailla campa !

Paul comenche a tazeillì Vilma. Lleu tsertse de se difendre, mi l'è gnacaye i mentèn de Paul é Auguste.

Areuvve de coursa Giulio que, a tita ata é sensa pouiye, baille de pégnò creppe si l'ipala de Auguste. Auguste, comme se l'ise senti eunna moutse si l'ipala, se vionde. Vilma dzouze lo momàn pe scapé.

PAUL (Ver Vilma) Mi avèista salla critin-a ! Critin-a !

Scène VII – PATÈLE É VÈYO ICLLAPOÙ III

Giulio l'è drette douàn Auguste ; lo avèiste avouì la poueunte di na si pe l'er.

GIULIO (*A Auguste, avouè coadzo*) Vilma l'è de mé ! L'è eunna fenna eungadjaye, avouè mé !

Auguste tappe pe tèra Giulio.

 DUNE BUGGY - OLIVER ONIONS

Le-z-amì de Giulio pouzon lo vèyo é eunterveugnon pe lèi bailli man forta. Partèi eunna bagarre a la Bud Spencer & Terence Hill : eun aprì l'atro, Giulio, Michel, Federico é Marco, se batton avouè Auguste, que, sensa de grou-z-ifor, le tappe tcheutte ba pe tèra ; Hélène é Berta beutton ià tcheu le vèyo ; lo DJ, lo valet é la cubista se catson dézó la consolle ; le feuille baillon ba a Paul, que, eun boquèn deur, scappe foua di local. Dimèn areuvon euncó dou djouyaou di fiolet de Tsarvensoù. Vilma le souplie de èidjì Giulio é sé-z-amì. Eun véyèn Auguste, le dou son pa tan cheur de s'eumpouertchì le man, mi, eun prégnèn coadzo, lèi sauton contre. Chouì contre eun, Giulio, le-z-amì é le dou Tsarvensolèn areuvon a tapé foua di local Auguste.

La mezeucca se tchoué. Dorina pren eugn'icaoua é comenche a poulité lo solàn.

BERTA (*Dispéraye*) Que dizastre, que dizastre ! N'ayó bièn deu-lo que fayé fé atenchón a sise dou ! (*Malechaye, i DJ*) Mi t'i inutilo té ! Gneunca bon d'alì le-z-èidjì ! (*Triste*) Hélène, l'an tourna tot ibofou-no !

HÉLÈNE Mé poulito !

BERTA Ouè ! Té poulita, mé payo !

DORINA Véó de vèyo icllapoù !

BERTA Todzor mé que le payo ! Mi iaou son fenè le-z-atre ? (*Eugn avèitchèn foua*) Garsón vegnade ! Vegnade dedeun. Si cou vo lo payo mé eun tor.

Entron Giulio, Vilma é tcheu leur amì.

BERTA Vi que v'ouèide tsachà ià sise atacarize... Hélène, beutta eun tor pe tcheutte ! Payo mé !

HÉLÈNE Va bièn !

BERTA (*Eun prédzèn i pebleuque*) Qui l'arì jamì deu-lo que eun dzor Pollentchón é Tsarvensolèn l'arian betoù de coutì totte leur discuchón é plantou-la li de tsacotì pe de counte foule... va savèi tanque a can !

DJ Pollein ! Disco Flama ! Euncó oueu n'en fé seunq'aoue di mateun ! Ara tcheutte a danchi la dériye tsansón :

 BE MY LOVER - LA BOUCHE

Tcheu le personadzo entron pe danchi. Le-z-acteur tsarvensolèn avouè eunna maille rodze avouè l'icrita « Tsarvensoù pa de mioù » é sise de Pollein avouè eunna maille bleuvva avouè l'icrita « Pollentchoùn le pi boun ». Ver la feun de la danse le Tsarvensolèn é le Pollentchón se divijon eun dou groupe, eun a drèite é eun a gotse di palque. Sembleria que sisan tourna preste a se battre é a tsacoté...

La mezeucca se tchoué. Berta se plache i mentèn di doe fachón.

BERTA Oh na ! Lèi sen tourna ! Pollentchón é Tsarvensolèn alérèn jamì d'acor !

 TSI LA TÈILA

Derì le ridó

Chorégraphie

Joëlle Bollon

Collaborateur

Flavio Albaney

Enrica Pieiller

Souffleur é mezeucca

Jasmine Comé

Giada Grivon

Ilaria Linty

Maquillaje

Muriel Pomat

N'EN PA LO TEN

Pièse icrita pe Le Digourdi

Téatro Splendor de Veulla, 9 avrì 2016

Le Digourdì di 2016



Drette: Paolo Cima Sander (avouì son tseun Margot), Francesca Lucianaz, Marco Ducly, Simone Roveyaz, Jordy Bollon, Thierry Jorrioz, André Comé, Sophie Comé.

Achouatoù: Marlène Jorrioz, Joël Albaney, Stephanie Albaney.

👤 N'EN PA LO TEN 👤



Lo souvenir de l'acteur

« Lo 2016 l'è itó l'an de la tranzichón euntre le fondateur di Digourdì é la relève. Lo premi Prézidàn di Digourdì, que pe *privacy* ara querièn Pippo, l'a fitó son premi an comme ex-Prézidàn avouì eunna mia tro d'alcol. . . mi pa aprì la pièse, douàn !

Sen partì vito lo mateun pe tsardjì la *scénographie*. Tsardjà le-z-Ape é le camiontcheun, n'en bi dou creppe eun tchi Pierre Savioz é Remo Comé. Aprì, avouì totta la compagnì n'en fé maenda i restoràn Monte Emilius. Damadzo que le dijestif n'en bi-le eun tchi Michel Celesia é noutro *ancien Président* l'è chortì de la cantin-a belle tsa. Can sen arrevoù i Splendor, la *scénographie* l'ie dza belle plachaye ; dunque, pe Pippo l'ie l'aoua de l'apéro eun tchi le Moldave, euncó se l'ie catr'aoue é de lé a pouza fayè proué. Lé me rappello que n'en asséléroù é Pippo l'è présentou-se pe la proua jénéralla complètemàn liquidó. Finque si lo palque, dimèn que ré-sitave douàn lo pebleuque, l'ie eun fourma.

Fenì lo spettacolo, Pippo l'ie apersi-se que son *taux* alcolémique l'ie caló, mi pa prao pe èidji-no a dibarachì. A ditsardjì totta la *scénographie* sen restó, bièn euncatsó, mé, Jordy é Simone.

Pouì deue, dunque, que lo 2016 l'è itó l'an de la tranzichón euntre fondateur é relève, mi l'è itó euncó l'an iaou n'en comprèi que fallè divin-ì bièn pi professionel. »

André Comé

Queriauozitòu

- Margot, noutra amia a catro patte protagoniste de la *scène* finale, l'è itaye vardaye dèrì le ridó pe lo pappa de Paolo Cima Sander. Pe la vardé tranquila, l'a fallì lèi baillì eunna matse de croquette. . . for probablo que l'è dèi salla nite lé que l'a attacoù a èi tchica de problème de santé !

- La pièse « N'en pa lo ten » counte de fasón bièn ironique la fiacca di buró pebleuque. Deun l'an 2016, pe le Digourdi n'ayè bièn de-z-atteur que trailloon pe de-z-ouficho réjonal, mi pe seutta pièse gneun de leur l'a partésipoù. Gneun de leur l'ie refezo-se ; l'ie fran itó eun case. Anse... aprì la pièse sayoon tcheu triste pe pa èi partésipoù a l'icriteua di teste, vi que l'arian i bièn de-z-idoù pe rendre euncó pi comique la counta.
- « N'en pa lo ten » représente lo débù deun la compagnì de Richard Cunéaz, lo premì atteur itrandjì di Digourdi. Sa extraordinaire capasitoù, malgré euncó dzoueun-o, d'eunterpreti de personadzo vioù ou tipique de la tradechón valdoténa, l'a pouchà lo directif a lo téri dedeun la compagnì, eun clouzèn eun joueu pe le-z-orijine pompiolentse ! Pe seutta pièse Richard pouye pa si lo palque, mi prite sa vouése derì le ridó.
- Pe diye « # » (*hashtag* ou *cancelletto*), lo sembole eumpléyà si Instagram pe décriye le fotografie, la compagnì l'a propozòù eun néolójisme : petchoudacllenda.
- Eunna partiya di spettateur l'a pa tan apprèchè ou l'è sentise offenchaye pe la parodi si la fiacca di buró pebleuque. Naturellamente, seutte creteuque son itaye fête pe eunna partiya de sise que trailloon deun l'administrachón pebleucca. Mi, can mimo, le Digourdi recougnison que, a nivó de réalizachón, l'è cheur pa itaye eunna di pièse pi dzente.

Scénographie

- 1 streutteua de bouque pe représenté eun *accueil* de eugn ouficho pebleuque ;
- 1 trebeillet¹ pe fé entré le-z-eumpléyà deun lo buró é pe le fé teumbré lo cartelleun². Pe le-z-*handicapé* n'at eun petchoù portaille ;
- 3 fondal gri, ate 4 mètre pe représenté le meur d'eun ouficho ;
- 1 pourtapaapleu avouì dedeun eun per de paapleu é eugn'èima di fiolet ;
- 1 planta dèrì laquella n'at catchaye 1 peura pe djouì i fiolet ;
- 5 table avouì 5 ordinateur é de baradziye de tsaque eumpléyà : plime, papì, documàn, botèille, frouite (pomme é banane deun lo téèn de Touéno), plante, tasse, mase de carte (deun lo téèn de Richard Foille) ;
- 5 caèye pe l'ouficho ;
- 1 armadiette avouì dedeun 2 fezi de tsasse. Lo dèrì de l'armadiette l'è iver pe pouèi fé entré Margot, lo pégnò tseun de tsasse de Touéno Lo Gra. N'at euncó d'atrèssateua pe djouì i Ping Pong ;
- 1 pourtamanti avouì bièn de patrasse desi : de-z-arbeillemèn pe dou tsachaou, 1 tsapì, 1 per de biicclo pe colaté, 1 djacca di-z-esquì. Dezò tcheu sise pateun n'a catchà 1 per de-z-esquì ;
- 1 casque é eugn arbeillemèn pe alì eun beseclletta (dezò la tabla de Richard Foille) ;
- 1 atressateua pe djouì i Golf (catchaye dezò la tabla de Otino Spritz) ;

1. *Roue d'un moulin à eau, de baratte actionnée par l'eau - Nouveau dictionnaire de patois valdôtain*. Deun seutta pièse eumpléyèn trebeillet pe diye *tornello*.

2. Calque su la paolla *cartellino*.

- Deun l'*accueil* : 1 cafetchiye, 1 grou mase de cllo, 1 coulan-a hawaïenne, 1 déodoràn, 1 *torche* 🔥, 1 djacca di Tsarvensoù Fiolet ;
- 1 trotinette ;
- 1 saquette avouì 3 brioche é eun sélèi ;
- 4 *lampe frontale* (deun lo téèn de Touéno Lo Gra) ;
- 1 pourtapacque, 1 cartón de Spritz é 1 paquette de papì ;
- 1 cabarè avouì 4 tase di cafì é eun vèyo de Limoncello ;
- 1 grou matelasse ;
- 1 besecletta pe le mèinoù.

 PERSONADZO

OTTINO SPRITZ	Eumpléyà réjonal que lame l'aoua de l'apéritif, eunterprétoù pe SIMONE ROVEYAZ.
THIERRY	Eumpléyà réjonal jamè entroù pe eugn ou-ficho, eunterprétoù pe THIERRY JORRIOZ.
SANDRINO	Valet di buró réjonal, eunterprétoù pe MARCO DUCLY.
GENE	Vétchot di peì eun penchón, eunterprétoù pe JORDY BOLLON.
TOUÉNO LO GRA	Eumpléyà réjonal fagnàn, que meudze (surtout la tseur) é bèi to lo dzor (pocca d'éve), eunterprétoù pe PAOLO CIMA SANDER.
GEROMINE COUCHOTTA	Eumpléyaye réjonalla végane, salutiste é que lame lo <i>Zumba</i> , eunterprétaye pe STÉPHANIE ALBANEY.
RICHARD FOILLE	Eumpléyà réjonal bièn gropoù a la nateua é i bièn di bitche, eunterprétoù pe JOËL ALBANEY.
FINE SAVENTA	Eumpléyaye réjonalla que eumplèye tcheu le <i>social</i> (Facebook, Twitter, Instagram) é sa totte le bague di-z-atre, eunterprétaye pe MARLÈNE JORRIOZ.
COURSIÉ	<i>Courrier</i> avouè pocca voya de trailli, eunterprétaye pe FRANCESCA LUCIANAZ .
ÉLECTRISIÈN	Électrисиèн de Palase Réjonal, eunterprétoù pe THIERRY JORRIOZ.
SERVENTA	Serventa d'eunna cantin-a protso de Palase Réjonal, eunterprétaye pe SOPHIE COMÉ.

GRAN DIRECTEUR
CARLO TRÈISOÙ

Lo Cap di buró, bièn sportif é actif, eun-
terprétoù pe ANDRÉ COMÉ.

ACTE I

🏠 SE IVRE LO RIDÓ 🏠

Scène I – L'AOUA DI CARTELLEUN

Teuppe 💡.

*Pe totta la pièse saré proyéttaye eunna vidéo si eun écran pozichon-
où déri la scène preunsipalla. La vidéo moutre eunna grousa moutra
que s'arite can la scène partèi pe counté sen que capite a sall'aoua.*

👤 MOUTRA 👤



*Lo palque l'è eun buró réjonal. A gotse n'a l'accueil avouì lo trebeillet,
iaou tcheu le-z-eumpléyà teumbron lo cartelleun. Fran a l'entraye,
n'at eun pourtapaapleu. I mentèn di palque lèi son sinque table é
sinque caèye. Deussì le table son plachà eugn ordinateur é totte sorte
de documàn, plime é foillette. N'at euncó eunna planta, eugn ar-
mouare de feur é eun pourtamantì.*

*Vouése derì le ridó 🧠 : « Sitte l'è eun di pi-z-eumpourtàn buró réjo-
nal. Aprì de jénérachón de poleteucco vijonéo é la crize économique,
lo peuple valdotèn l'a ottin-ì eugn ate nivó de maturachón : le cam-
pagnar, le posteillón, le bitchoulì, le mijì, le masón, le cordan-ì é
surtoù le-z-eumpléyà pebleuque l'an finalemàn comprèi que la pro-
ductivitoù l'è la rèise di bien-être de la sosiétoù é la seula rotta pe
chotre de la crize. Dedeun le-z-ouficho pebleuque é dedeun l'ame de
tsaque petchoù eumpléyà l'è nèisì eun nouo, euncrouayablo, misté-
rieu é vichaou attatsemèn i travaille ».*

Teuppe 🍷, avouï pocca de lemiye si l'écran que moutre l'aoua : chouï-z-aoue di mateun.

Entre Ottino Spritz. L'è djeusto reteria-se. Saoute lo trebeillet. Vèi pa iaou beutte le pià é avouï lo téléphone se fé de lemiye.

SPRITZ (Bâillèn) Mondjeu, se clèrie ren.

Boueuche l'artchaou contre quetsouza.

SPRITZ Ahi que mou ! L'ye miou se restavo euncoa avouï le-z-amì a nen bèye euncó eun. . . é na, n'i pa pouï. . . é pequé ? Pequé dèyo vin-ì seu traillì ! Lo deleun l'è todzor eun dizastre. Bon, comenchèn la dzornoù avouï eun dzen cllopeun. (*Eun tramèn quetsouza desì sa tabla*) Tramèn ià so. . . Mondjeu oubliavo ! Lo badge ! Dèyo queti-lo a Sandrino, pouèi me teumbre llou a ouett'aoue.

Ottino pouze son badge si la tabla de l'accueil. Aprì s'itaoule si la tabla de llou.

SPRITZ Si cou banì a tcheutte !

La moutra, proyétaye si l'écran, avance. Ara l'è ouett'aoue di mateun.

Vouése derì le ridó 🧐 : « La pountoualitoù deun le-z-ouficho pebleuque l'è fondamantala é a ouett'aoue totte le prézanse son réjistraye ».

Entre Thierry. L'è eun ganesón é dimèn bèi eun cafì.

THIERRY L'è dza ouett'aoue ! Me fa timbré lo cartelleun di-z-atre eumpléyà.

Teurie foua eunna rentse de cartelleun é le timbre eun aprì l'atro.

THIERRY Si de Touéno lo Gra, si de Fine Saventa, si de Couchotta é si de Richard Foille.

Entre deun lo buró é pouze le cartelleun si le table di-z-eumpléyà.

THIERRY L'è dza ouette é sinque ! Alèn fé eun cllopeun !

Thierry chor.

Scène II – L'È DELEUN

Entre Sandrino.

SANDRINO L'è deleun é la scène recomenche. Alemèn le lemiye.

Lemiye 💡.

SANDRINO (*Eugn avèitsèn Ottino*) L'atro l'è dza lé que drime.

Sandrino se plache a l'accueil.

SANDRINO Lo journal n'en atsetou-lo... betèn si la cafetchiye pouèi no no réchèn amoddo. (*Eugn ivrèn lo journal*) N'a finque l'eun-ser di Fiolet é de la Rebatta ! Lo avèitsèn aprì que n'i tro a fiye... mondjeu ! Lo cartelleun de Ottino Spritz !

Sandrino pren lo cartelleun é galoppe ver lo trebeillet.

SANDRINO Vito que piatro areuvve eun retar !

Sandrino timbre lo cartelleun é tourne a sa postachón.

La moutra marque ouette é dji di mateun. Entre Gene.

GENE (*A Sandrino*) Bondzor !

SANDRINO Bondzor.

GENE Si vin-ì pe la prateuca de...

SANDRINO Ouè, ouè... baillade-mé eun documàn.

GENE Va bièn.

Gene baille a Sandrino la carte d'identité. Sandrino marque lo non di vétchot si eun papì é aprì lèi baille eun pass.

SANDRINO Voualà lo *pass*. Djeusto eun momàn...

Gene pren lo pass é atèn Sandrino, que va ver l'ouficho pe vère se n'a caqueun. Aprì, to todzèn, tourne a l'accueil.

SANDRINO (A *Gene*) Mesieu, squezade mi n'a panco gneun disponible.

GENE L'è ouette é dji é n'a gneun ? A ouett'aoue fa ataquè a traillè !

SANDRINO N'a panco gneun opératif. Me diplè.

GENE (*Eun s'inervèn*) Mé n'i pa lo ten d'attendre, senque féo ara ?

SANDRINO Tournade aprì.

GENE Adón vardo lo *pass*.

SANDRINO Mesieu dèyade me baillè lo *pass*.

Gene vionde l'itseua é partèi ià.

SANDRINO (*Eun braillèn*) Mesieu ! Baillade-mé tourna lo *pass* !

GENE Na, vardo lo *pass*.

SANDRINO (*Comme douàn*) Mesieu ! Dèyade me baillè tourna lo *pass* !

GENE Mé payo le-z-empoù é adón vardo lo *pass*.

SANDRINO (*Eun s'aprotsèn*) Na, vardade pa lo *pass* ! Baillade-meló ara !

Sandrino stchanque ià di man lo pass a Gene é lèi ren lo documàn.

GENE (*Eun chortèn*) Maledecoù !

SANDRINO Ouè maledecoù ! Mesieu !

Gene tourne eun dérì inervoù.

GENE Ouè...

SANDRINO Alade maque bèye le doze blan que bèyade tcheu le mateun é prégnade lo polet a la fenna !

GENE (*Eun chortèn bièn eunfastedjà*) Ouficho pebleuque !

Scène III – MEDJÌ É BÈYE

La moutra avanche é marque ouette é car di mateun.

Vouése deri le ridó 🍷 : « Ouette é car. Finalemàn fé sa entroù lo premì eumpléyà réjonal : Touéno lo Gra. Eugn ommo to d'eun toque é llatoù i tradechón ».

Entre Touéno lo Gra. L'è conflo comme eun balón. Pe le man l'at eun dossier é eun saquette.

TOUÉNO Salì Sandrino ! Adón ? Tot amoddo ?

SANDRINO To bièn, té ?

TOUÉNO (*Eun se totsèn la panse*) Mondjeu queun feun senà !

SANDRINO T'a medjà ?

TOUÉNO (*Eun fièn eun petchoù rotto*) Ouè. Té to bièn lo feun senà ?

SANDRINO Ouè...

TOUÉNO Sen tourna seu a no a rontre le bal...

SANDRINO (*Eun bloquèn Touéno*) Ouè, ouè Touéno, brao !

Touéno tsertse de pasì dézó lo trebeillet mi areuvve pa, l'è tro gra.

SANDRINO Te lo saoute ? O fa t'ivri ?

TOUÉNO Na lo saouto eugn atro cou !

SANDRINO Va bièn, areuvvo !

Sandrino teurie foua eun grou mase de cllo é comenche a tsert-chi salla djeusta.

TOUÉNO Acapou-la ?

SANDRINO (*Eun tsertsèn*) Seutta l'è salla di mitcho... ah la voualà !

Sandrino ivre la péгна pourta protso di trebeillet.

TOUÉNO Bièn mersì !

Sandrino tourne a l'accueil.

TOUÉNO (*Bièn lagnà*) Tourna seu... l'è deleun. Tro de bague a fiye.

Touéno pouze le bague de llou si sa tabla. Aprì se vionde ver Ottino, que l'è euncó eun tren de drimì si la tabla.

TOUÉNO Comèn l'è Ottino ? Amoddo ?

Ottino se rèche.

SPRITZ (*Eun se viondèn de l'atro couti*) Ouè, té t'a praou medjà ?

TOUÉNO Ouè tot amoddo. Té lo feun senà ? Bièn aloù ?

SPRITZ (*Bièn lagnà*) Bondàn bièn !

TOUÉNO Adón tranquilo, travailla maque tranquilo.

Touéno, to todzèn, tourne a seun poste é s'achouatte.

Scène IV – TENDRO

La moutra marque ouette é demì di mateun.

Vouése derì le ridó 🧐 : « Ouette é demì. Fé son euntraye Geromine Couchotta. Dipendenta réjonalle que lame lo spor, lo Zumba, medjì pocca, san é naturel ».

Entre Geromine Couchotta, totta sourienta é eun fourma.

GEROMINE Bondzor Sandrino !

SANDRINO Oh bondzor Couchotta !

GEROMINE Comme da cotima t'apreste to té ?

SANDRINO Ouè apresto mé ! Té dimèn beutta so ...

Sandrino baille a Couchotta eunna coulan-a hawaïenne.

SANDRINO ... é itsaouda-té !

 SAMBA DO BRASIL - BELLINI

*Sandrino fé parti eunna mezeucca brazilienna :
 Couchotta se beutte la coulan-a hawaïenne é s'itsaoude. Sandrino levve l'atchaou di trebeillet é Geromine, a ten de mezeucca, lèi pase dézó sensa lo totchè, eun fièn lo Limbo. La mezeucca s'arite.*

GEROMINE (*Contenta*) Oueu l'è bièn aloù ! (*A Sandrino*) Mé diriyo que demàn pouèn bèichè ba euncó de 4 cm !

SANDRINO D'acor Couchotta, bèichèn ba totte demàn.

Sandrino, douàn de tourni a son poste, bèiche lo trebeillet é dimèn Couchotta s'aproste a sa tabla.

GEROMINE (*A Touéno*) Bondzor Touéno ! Tot amoddo ?

TOUÉNO Salì Couchotta ! Tot amoddo...

GEROMINE (*Ver Ottino*) ... é seu Spritz ?

Spritz boudze pa, conteneuvve a drimì. Geromine s'achouatte a sa plase.

GEROMINE (*A Touéno*) Comèn l'è aloù lo feun senà ? T'aré prao medjà ?

TOUÉNO Mondjeu ! Eugn amì de mé l'a pourto-me eun carti de *cerf* ! Que bon ! Lo desando n'en to medja-lo. Que bon ! Que tendro...

GEROMINE Oh ! Foula mé que n'i demando-te senque t'a medjà ! Le repounse le si dza.

TOUÉNO ... é la demendze mateun n'en tchoué eun *canard* é n'en medja-lo, que bon, l'ye grou pai ! Apri lo nite n'en medjà eun pégnò lapeun que l'ye eunna бага ! Mondjeu !

GEROMINE (*Bièn malechaye*) Senque t'a fi ?

TOUÉNO N'en medjà eun lapeun !

GEROMINE Eun lapeun ! (*Presta a plaoué*) Mi na lo lapeun... son tan sayo, tan delecatte, tan tendro...

TOUÉNO ... tendro ! Ouè, euncó magàn que l'a maque an di, l'a to tritou-lo ba ! Que bon ; é pe clloure... euncó dou-z-où pe cayi to ba.

GEROMINE Voui pamì acouté eunna paolla de sen que te di. Prao.

TOUÉNO Va bièn. Pitoù té senque t'a fé ?

GEROMINE (*Bièn contenta de repoudre*) Adón n'i fé de bague trè-z-euntéressante. Lo desando iproui si allaye eun Veulla pe manifesté, pe difendre le droué di dzeleunne !

TOUÉNO (*Éton-où*) Le droué di dzeleunne ?

GEROMINE Oué euncó leur l'an de droué !

TOUÉNO (*Ironique*) Tcheu van lo desando pe difendre le dzeleunne, normale !

GEROMINE Derian tcheut alé ! La demendze, i contréo, avouï eun per de-z-amì sen divija-no pe totta la Val d'Outa é sen aloù ibofé le batón di bitchoulì, sise que eumplèyon pe fouétì noutre saye é dzente vatse sensa drouette.

TOUÉNO (*Ironique*) Wow ! Véo de bague eumpourtante t'a fé ! Bièn aloù, pa fé de mou ! Pitoù, senque t'a medjà ?

GEROMINE N'i medjà eunna бага que te pouria lamé euncó té. L'ye eun gonégeun avouï eunna reduchón de-z-andive é dou gran de sa roza de l'Himalaya ! L'ye la feun di mondo !

TOUÉNO Te vèi que euncó té te meudze la vianda... é lo gonégeun ! Aprì se son sise de Ferré avouï la trifolla de Feleunna, que can te la queurie nen areuvve eunna !

GEROMINE Na Touéno ! T'a pa comprèi ren. Lo gonégeun l'ye de *soia* !

TOUÉNO De *soia* ?

GEROMINE Ouè pequé i dzor de oueu avouè le-z-OGM³ te pou medjì sensa fata de tchoué le biche.

TOUÉNO (*Dispéou*) Soplé, prèdza-mé pa de seutte counte foule di-z-OGM, nen prèdzon to lo ten lo journal, la radió... na, na mé si pe lo veun é la tseur rodze. Prédzèn d'atro... pitoù, l'ommo iao t'a quetou-lo ?

GEROMINE (*Triste*) Touéno, tcheu le cou seutta dimanda. Te sa beun que n'i pa lo choze.

TOUÉNO Djeusto, l'è vrèi que té te lame pa lo salàn !

Scène V – LA NATEUA DI COUCOUILLE

La moutra marque nou mouèn car di mateun.

Vouése derì le ridó 🍷 : « Nou mouèn car. Sensa prisa entre nou-tro catrimo eumpléyà réjonal : Richard Foille. La sovegarda de la nateua l'è sa rèizón de viya ».

Entre Richard Foille desù eunna trottinette é s'arite douàn Sandrino.

RICHARD Bondzor Sandrino ! Comèn l'è ?

SANDRINO Amoddo, mi t'a atsetoù eun nouo moublo ?

RICHARD Ouè, n'i atsetoù eun nouo moublo é l'è comoddo, (*eugn ézajérèn*) mi te diyo que l'è comoddo ! L'è comoddo pequé pouè quetì la machina i mitcho...

SANDRINO ... é te paye pa le postèdzò eun Veulla !

RICHARD Sen l'è vrèi mi vouillao pa diye sen. L'è comoddo pequé eun quetèn la machina i mitcho èidzo la Réjón a reuspecté le *Protocolli de Kyoto* !

SANDRINO *Protocolli de Kyoto* ?

3. *Organisme Génétiquement Modifié.*

RICHARD Ouè ! Si fran contèn é aprì si moublo servèi da matte euncó pe le pouse fin-e. Te sen pa (*eugn aneflèn l'er*) queunta grama er que n'at ?

SANDRINO Ouè, mi sen l'è Touéno que l'è pasoù devàn. . . l'a medjà pezàn lo feun senà é te sa. . .

RICHARD Mi na ! Si eun tren de prédji di. . .

Sandrino teurie foua eun déodoràn é comenche lo dziflé pe l'er.

SANDRINO Betèn eunna mia de so que l'è mioù.

RICHARD Mi na ! Gava ià salla бага, queunta grama бага ! So fé pa di bièn a la nateua ; no no fa tsertchè de préservé la nateua ! Squersa pa !

SANDRINO Na na squerso pa.

RICHARD Acoutta, èidza-mé a pource si moublo deun l'ouficho.

SANDRINO Va bièn, adón tsertsèn tourna la cllo.

Sandrino teurie foua lo grou mase de cllo é dimèn pren la trottinette de Richard. Richard pase eun dziillón dézó lo trebeillet.

RICHARD Te me pase lo moublo, soplé ?

Sandrino l'è euncó eun tren de tsertchè la cllo djeusta pe ivri lo trebeillet.

SANDRINO (*Stouffie*) Mi va caquì seutte cllo ! Fièn pouèi. . .

Sandrino levve la trottinette é la fé passé desì lo trebeillet.

RICHARD (*Eun prégnèn la trottinette*) Ouè fièn pi vito pèi.

Sandrino tourne a son poste.

Richard, to contèn é pozitif, vionde i mentèn de l'ouficho avouì la trottinette. Geromine l'è eun tren de bèye eunna tizan-a.

RICHARD (*I collègue*) Bondzor, adón v'ouite eun fourma ?

TOUÉNO Ouè, tot amoddo.

RICHARD Comenchèn la senà.

GEROMINE Amoddo, (*eun somondèn sa tase*) t'ou eunna péгна gotta?

RICHARD Senque l'è sen?

Richard s'aposte pe anefli, mi a demì mètre de distanse se teurie eun déri.

RICHARD Na, na, soplé na!

TOUÉNO (*Eugn avèitsèn la trottinette*) Richard mi de iaou t'areuvve?

RICHARD De mèizón! Mi si moublo l'è formidablo, avouì so te fé de kilomètre é te t'apersèi gnenca!

TOUÉNO Ouè mi tot eun pouchèn avouì le pià!

RICHARD Djèique! Té avouì la panse que t'a... gnenca demì de té reste seu desì!

TOUÉNO (*Ironique*) Té todzor eunna dzenta paolla pe mé! Can mimo, counta vèi, comèn l'è aloù lo feun senà?

RICHARD Lo feun senà l'è bièn aloù! Pouzo si moublo é vo counto tot.

Richard pouze la trottinette countre lo meur.

RICHARD Adón demendze a doze é doze si vin-ì secretéo de la F.S.C.V.!

TCHEUTTE De senque?

RICHARD (*Ver Touéno*) F.S.C.V., te sa pa senque l'è?

TOUÉNO Na.

RICHARD Mi te sa ren té. (*Ver Couchotta*) Té?

GEROMINE Na, lo non me di pa ren.

RICHARD Fédérachón pe la Santé di Coucouille valdoténe!

TOUÉNO Oh mondjemé ! Ara si queriaou, euspleuca vèi sen que l'è seutta counta.

RICHARD N'en eunna blita de travaille, sourtoù dérimente ! Le coucouille fa l'èidjì, fa bailli-lèi eunna man pe le fé saouté si, leur vouillon tsire pe tèra, mi fa le pouchi si pe l'er... mi aprì... le dzi vouillon le tchoué !

GEROMINE Senque ? Vouillon tchoué le coucouille ? Mi senque l'an fi-le, son tan saye.

TOUÉNO Mi l'è normal, avouì tcheu le dan que fan !

RICHARD Mi queunse dan ? Le coucouille son eumpourtante !

TOUÉNO Mi iaou son eumpourtante ? I mitcho de té !

GEROMINE Pe la nateua son eumpourtante.

RICHARD (*A Couchotta*) Touéno comprèn ren. No le coucouille l'èidzèn, le pouchèn si pe l'er, lèi baillèn finque eunna man pe se reproduiye...

TOUÉNO (*Ibai*) Na, na, na, squeeze-mé, finque se reproduiye ? Espleuca-mé seutta бага.

RICHARD Adón, pe se reproduiye fa itre a dou... eun la varde de devàn é lèi ivre eunna mia le-z-ale, l'atro de dérì nen pouche eunna, mi lèi baille eunna péгна man, djeusto pe sen que fat ! Tsertsèn de fé lo poussiblo.

TOUÉNO Donque té te sariye secretéo pe pouchi eunna coucouille dedeun eugn'atra ?

RICHARD Té te comprèn ren ! Ita achouatoù si ta caèya é meudza pi de pomme !

GEROMINE Touéno soplé l'è eumpourtàn, alèn euncó no !

TOUÉNO Pe senque fiye ? Pe pouchi de coucouille eunna desì l'atra ? Saré pa eunna бага utilla ?

GEROMINE Mi ouè !

RICHARD (A Couchotta) Té ouè que te comprèn, t'a eunna martse eun pi. Veun avouè no, n'en fata de dzi comme té deun la Fédérachón.

GEROMINE Volontchì !

Richard satisfé s'achouatte.

RICHARD Can mimo ara quetade-mé pédre pequé n'i le papì de la F.S.C.V. que dèyo pourté eun devàn.

Scène VI – PETCHOUDACLENDA⁴

La moutra marque nou aoue di mateun.

Vouése deri le ridó 📺 : « Nou aoue. Finalemàn l'ouficho l'è i complete. Areuvve Fine Saventa, eumpléyaye que sensa la tecnolojì di-z-àn 2000 sa pa iaou bouéchì la tita. Sensa lo téléfonne sa dzornoù sariye vouida é platta ».

Entre Saventa avouè eun saquette de brioche.

SAVENTA Bondzor Sandrino !

SANDRINO Bondzor.

SAVENTA Euncó oueu si passaye prendre doe brioche pe comenchì bièn la dzornoù. Te la vou i-z-armagnaye, chocolà ou vouida ?

SANDRINO L'è todzor eun plèizì te vère, te pourte todzor de bon-e bague ! Fièn chocolà.

Saventa baille la brioche i chocolà a Sandrino.

SAVENTA Acoutta, fièn la foto di mateun ?

SANDRINO Mi ouè lèi manqueriye !

Fine teurie fouda lo téléfonne é fé eun selfie avouè Sandrino. Si l'écran chor fouda, pe eun per de secoude, la fotografie de Saventa e Sandrino.

4. Néolojisme eunventoù pe la Digourdì pe diye *hashtag/cancelletto/#*.

SAVENTA & SANDRINO



SAVENTA (*Eugn icrièn si lo téléfonne*) Petchoudacllenda deleunma-teun, petchoudacllenda sandrinotodzorveuste, petchoudacllenda sensabriochesecomenchepa. (*Eugn avèitsèn lo trebeillet*) Sandrino ! Coudiye que t'a panco iver-me ?

SANDRINO (*Eun prégnèn le cllo*) T'arè pa prisà ?

SAVENTA N'i pa de ten a pèdre seu avouè té ! Boudza-té !

SANDRINO Eun momàn que me fa acapè la cllo.

Sandrino comenche a tsertchè la cllo djeusta.

SAVENTA (*Ironique*) Mogà fa nen gavé eunna mia di mase !

SANDRINO N'i pa lo ten de fé tcheu sise travaille. Ah èita-là séilla !

Sandrino ivre la pégnà pourta protso di trebeillet é Saventa entre eugn ouficho. Aprè la fremme é torne a l'accueil.

SAVENTA Bondzor amè ! Bondzor a tcheutte.

TCHEUTTE Salè Fine !

SAVENTA (*Eun moutrèn Ottino*) Lo noutro l'a tourna fé fita ieur lo nite ?

TOUÉNO Djèique !

RICHARD Mé n'i gnenca vi-lo ! (*Ver Ottino*) T'a prèi de couleur der-nièramente !

SPRITZ (*Eun se réchè*) Di pa de counte foule !

Ottino tourne drimè.

SAVENTA (*A Richard*) Richard t'ioù armagnaye ou vouida ?

RICHARD Se t'a-z-armagnaye, mé vou matte pe le-z-armagnaye !

Saventa baille a Richard la brioche.

SAVENTA (*Ver Couchotta*) Pe té que t'i ma péгна vegana, n'i vi si la padze Facebook de Fenna Moderna que seutta senà l'è salla di selei...

GEROMINE Ouè.

SAVENTA ... é adón so l'è djeusto pe té.

Saventa teurie foua eun selei é lo baille a Couchotta.

GEROMINE Wow ! (*Eun gneflèn lo selei*) Lo flou l'è bon, mi l'è bio ?

TOUÉNO Se l'a prèi-lo eun tchi Bisson l'è finque trio !

SAVENTA Ouè son kilomètre zéro !

RICHARD Mi comèn fièn a diye kilomètre zéro ? Prédzèn de Gressan-Tsarvensoù : n'a pa zéro kilomètre. N'a a di 1 kilomètre. Soplé fiade le pountuel !

TOUÉNO (*A Richard*) Mi té t'a todzor quetsouza a diye !

SAVENTA (*A Richard*) Todzor quetsouza que te va pa ! (*A Touéno*) Pe té Touéno l'è avanchaye renque salla vouida...

TOUÉNO Bailla-me-là sé la vouida ! Lèi cayo dedeun questouza mé !

Touéno pren la brioche, la ivre é lèi beutte eunna banane dedeun.

Tcheutte lo avèiston mal.

RICHARD (*A Touéno*) Se pou pa te vère. Te fé fran acro !

TOUÉNO T'a todzor quetsouza a diye !

RICHARD T'areuvve cheur pa a 75 an !

TOUÉNO Tracàcha-te pa que avouì la grama lenva que t'a t'areuvve

gнення a 40 !

Scène VII – SI PE COMBOÉ

SAVENTA Can mimo ! Mé n'ario eunna noella. (*Ver Touéno*) Senque t'a fé desando l'éproù ?

TOUÉNO Desando l'è lo dzor de la tsasse. Si aloù si pe Comboé a tsasse...

SAVENTA (*A Richard*) ... é té ? Euncó té a tsasse pe Comboé ?

RICHARD A tsasse na, mi si aloù si pe Comboé.

SAVENTA V'ouite pa euncrèja-vo ?

RICHARD Mi feguea-té !

TOUÉNO (*Eun moutrèn Richard*) Seutta beurta бага ? Mi penso fran pa.

SAVENTA Ébeun, mé pe seutta bouite (*moutre lo téléphone*) n'i eunna vidéo que dimoutre lo contréo... vegnade maque veure !

Tcheutte, mouèn que Ottino, se levvon é se plachon a l'entor de Saventa.

Si la tèila l'è proyettaye eunna vidéo iaou véyèn Touéno teryì eun creppe de fezi si eugn aouji plachà si eunna brantse de eunna planta, dézò laquella Richard l'ye eun tren de fé eunna boccon-ou avouì sa fameuille.

Teuppe 💡.

👤 TOUÉNO LO GRA VS RICHARD FOILLE 👤



Lemie 💡.

Tcheutte s'achouatton a leur poste, mouèn que Richard que ataque a deusqueté avouè Touéno.

RICHARD Té t'i eugn assasseun ! T'a tchoué-me l'aoujì, mé n'ayoù caze prèi-lo eun man mon pégno aoujì !

TOUÉNO T'a fé-me scapé ià le do tchevreuille !

RICHARD Ouè é mogà euncó finque le tchevrèi de Marco Fragno !

TOUÉNO Mé payo lo carnet de tsasse !

RICHARD Sen eun tren de prédji d'aoujì, t'a tchoué-me l'aoujì ! T'a reuscou de fé-me de mou, n'ayoù caze prèi-lo eun man ! T'i eugn assasseun !

RICHARD (*Ver Couchotta*) Vrèi ou na ? Couchotta ! Bailla-mé eunna man !

GEROMINE (*A Touéno*) T'i eunna grama dzi !

RICHARD Assasseun ! Arrogàn !

Richard s'achouatte a son poste.

TOUÉNO Arrogàn ? Mi pren-te varda, grama lenva !

RICHARD Èita ara se lèi penso me veun caze voya de plaoué...

GEROMINE (*A Richard*) Te comprègno Richard...

RICHARD Pouo aoujì... fièn-no coadzo, fa alì eun devàn.

TOUÉNO Mi pensa té sise dou ! Comenchade a traillì, a fé quetsouza que l'è mioù.

Scène VIII – TERIÈN I RÈI

RICHARD Acoutade, tsertsèn de pa lèi pensé... pouo aoujì, pouo matasse. Ara tsertsèn de fé quetsouza de utilo pe l'ouficho. Belote ou pinacola ?

Richard teurie foua di cassette dou mase de carte.

GEROMINE Pe la pinacola fa aprotchì le table, se no fièn la belote nen baste eunna.

Silanse.

SAVENTA Se fa aprotchì le table... a qui no dimandèn ?

TOUÉNO A Tchande ! Atèn que lo queurio.

Touéno queurie Sandrino avouè lo téléphone di buró .

TÉLÉFONNE

Sandrino repón.

TOUÉNO Tchande, acoutta... n'en eunna prateuca bièn eumpour-tanta...

SANDRINO Areuvvo i galoppe !

Beutton ba lo téléphone. Sandrino avouè calme entre deun l'ou-ficho.

SANDRINO Diade-mé.

GEROMINE Sandrino te pouriye dimandé a sise di plan dézò se l'an voya de vin-ì sé pe no tramè le table...

SANDRINO N'i senti-le douàn pe eugn'atra бага é l'an deu-me que l'an pa lo ten.

Sandrino tourne a son poste.

RICHARD Èita que eun réjón l'an fran voya de fé ren ! Acoutade, vi que n'en pa gneun que no trame le table, fièn la belote.

TOUÉNO Fièn la belote. Mé me tramo pa, vegnade sé eun tchi mé.

Richard, Saventa é Couchotta aprotson le caèye a la tabla de Touéno. Richard a drèite de Touéno, Couchotta a sa gotse é Saventa a la gotse de Geromine. Dimèn Touéno fé de caro si la tabla.

GEROMINE Pe le coble ?

TOUÉNO Terièn i rèi !

SPRITZ (*Eun se réchèn*) V'ouèide fata de eun catrimo ?

TCHEUTTE Na, na, na ita maque tranquilo !

SPRITZ Adón me viondo de l'atro couti.

Ottino vionde lo queusseun é tourne a drimi.

TOUÉNO Terièn i rèi adón !

Touéno teurie i rèi : Couchotta dèi djouì avouì llou.

GEROMINE Mi na torna avouì té, mi na. Te m'eunseurte to di lon.
Aprì n'i pa voya de me tramì.

SAVENTA Fièn que pe si cou pouèn djouì pouèi.

RICHARD Tourna mé avouì Geromine ? Perdèn todzor mé é lleu,
lleu l'è fran eun dizastre. (*A Couchotta*) Té t'ariye fran fata de
eunna périodda avouì Gallo... ah se te driche.

TOUÉNO N'i micllà le carte... Richard coppa...

Teuppe 🍷.

La moutra marque dji-z-aoue di mateun.

Lemiye 💡.

Entre Gene.

GENE (*A Sandrino*) N'a caqueun ara pe le-z-ouficho ?

SANDRINO Vo dio to de chouite.

Sandrino queurie Touéno.

☁️ TÉLÉFONNE ☁️

TOUÉNO Tcheu le cou ! Mi senque vouillon ?

Touéno repón i téléphone.

TOUÉNO Ouè...

SANDRINO Acoutta n'a séilla eun pe eunna prateuca.

TOUÉNO Prateuca ? Na, na, n'en pa lo ten.

SANDRINO Va bièn, mersì.

Beutton ba lo téléphone.

SANDRINO (A Gene) Mesieu, l'an pa lo ten. Vo fa pasé aprì.

GENE (Eun chortèn eun borbotèn) Inutillo !

Scène IX – DE SPRITZ PE OTTINO

Entre eun coursié avouè eun pourtapaque pe transporté eun cartón de Spritz é eun paquette de papì.

COURSIÉ (A Sandrino) Bondzor n'i eun cartón pe Ottino Spritz !

SANDRINO Va bièn, eun momàn...

Mima scène di cillo, iaou Sandrino lèi beutte eunna blita de ten pe ivrì lo portaille.

COURSIÉ Ouè boudzade-vó, mé n'i pa to si ten.

Sandrino douàn de ivriye entre eugn ouficho é se dirije ver le djouyaou de la Belote.

SANDRINO (Ver tcheutte) Garsón, betade ià le carte ...

TCHEUTTE Pequé ?

SANDRINO L'è arrevoù lo coursié.

Tcheutte catson le carte é se plachon douàn l'ordinateur de Touéno eun fièn seumblàn de travaillè. Sandrino chor de l'ouficho é tserste le cillo.

COURSIÉ (A Sandrino) Tcheu le cou seutta counta, mi pouade-vó pa marquì queunta l'et ?

SANDRINO Tro seumplo pai !

COURSIÉ Djeusto, vo fa beun fé pasé lo ten.

SANDRINO Voualà ! Acapou-la !

Sandrino ivre lo portaille é tourne a son poste. Lo coursié entre deun l'ouficho.

COURSIÉ Bondzor. Senque v'ouite eun tren de fiye tcheu seuilla ?

RICHARD Fièn eunna retsertse...

GEROMINE ... de martchè.

COURSIÉ Ouè di martchè di demarse !

RICHARD Vo tracachàde-vo pa de seutte bague.

COURSIÉ Acoutade, mé n'i fata de Ottino Spritz, Spritz Ottino.

Tcheu moutron avouè lo dèi la tabla de Ottino. Lo coursié s'aprotse a Ottino.

COURSIÉ Ah, drime ?

TOUÉNO Na, na... l'è eun tren de pensì.

RICHARD Ottino ! Can t'a eunna idi eumpourtanta, di-no-là !

Ottino se rèche.

COURSIÉ (*Ver tcheutte*) Mi l'è pa que v'ouèide eun poste seu euncó pe mé ?

RICHARD Na, sen djeusto.

COURSIÉ (*A Ottino*) V'ouite Spritz Ottino ?

SPRITZ Ouè.

COURSIÉ N'i eun cartón pe vo.

SPRITZ L'atégnavo, betade maque sé si la tabla.

Dèi si momàn Ottino l'è réchè é avèitse si pe l'er to lo ten sensa fée ren.

Lo coursié ditsardze lo cartón, mi lèi tsi ba pe tèra.

COURSIÉ (*Ver tcheutte*) L'è to ba ! Caqueun veun m'èidjì ?

TCHEUTTE Na n'en pa lo ten.

COURSIÉ Ouè n'i comprèi, quetèn pédre. (*A Ottino*) Dimèn betade eunna croué seuilla.

Ottino avouè la plima firme eun documàn si lo téléfonne di coursié.

RICHARD (*I coursié*) Mi madama ! Son-ti arrevoù le paquette de papì pe stampé le documàn ?

COURSIÉ Ouè, vegnade vo le prendre.

Richard se levve é pren le paquette é le plache dézò son écran.

RICHARD N'ayoù fran fata pe beté-le dézò l'écran de mé.

Lo coursié s'aprotse a la chortia de l'ouficho é Sandrino areuvve avouè le cllo.

COURSIÉ (*Ver tcheutte*) Cheur que v'ouèide pa eun poste euncó pe mé ?

SAVENTA Sen i complet.

COURSIÉ Damadzo.

SANDRINO Si cou n'i to de chouite la cllo djeusta !

Sandrino ivre lo portaille.

COURSIÉ A forse ! Au revoir !

Lo coursié chor de scène, Sandrino cllou lo portaille é tourne a son poste.

Scène X – EUN MEGNIYE

Teuppe 🍷.

 GRAMO SON D'ÉLECTRISITOÙ

TOUÉNO Tourna ià la lemiye !

RICHARD Èita que mogà va finque bièn pouèi.

TOUÉNO Comèn finque bièn ?

RICHARD Pequé pouèi consemèn tchica mouèn d'énerjì deun nou-
tra Réjón !

GEROMINE Ouè si d'acor.

RICHARD Acoutade-mé, n'i eunna dzenta man, fa alé eun devàn.
Cher collègue « foua le lemiye comme eun megniye » !

*Le catro belotiste teurion foua eunna lampe frontale é se la
plachon si la tita. Dimèn areuvve eun électrisièn avouè eunna
lemiye eun man.*

ÉLECTRISIÈN (A Sandrino) Salì, si seuilla pe l'électrisitoù.

SANDRINO Areuvvo ! Tsertso le cllo. Fiade-mé tchica de lemiye,
que dza l'acappo pa avouè la lemiye... feguea-té i teuppe !

*Sandrino avouè l'èidzo de l'électrisièn tsertse le cllo é ivre lo
portaille.*

SANDRINO Voualà, entrade maque, queutto iver, can chortade cl-
louzade.

ÉLECTRISIÈN Va bièn.

Sandrino tourne a son poste.

ÉLECTRISIÈN (Ironique ver le belottiste) Ouè, tcheu blette de tsa
a fose de traillì. Avouè tcheu le-z-ordinateur que v'ouèide é
gneun que le-z-eumplèye nen consomade de électrisitoù !

SAVENTA (A l'électrisièn) Ouè prèdza mouèn é trailla.

GEROMINE Pren gnenca pamì lo Wi-Fi.

SAVENTA Pamì de connéchón !

L'électrisièn trafeutse eun momàn a l'anglle de l'ouficho. Aprì eun per de seconde le lemiye se avion 💡.

ÉLECTRISIÈN Voualà, to fé.

RICHARD (A Touéno) Oh finalemàn ! Sensa llou sarian perdi !

TOUÉNO (A l'électrisièn) Comme té nen n'a pamì !

L'électrisièn, douàn de chotre, s'aprotse a la tabla.

Le belottiste gavon ià le lampe frontale é recomenchon a djouì.

TOUÉNO Adón euncoa doe man.

Couchotta djouye eunna carta.

ÉLECTRISIÈN (*Eugn avèitsèn le carte de Geromine*) Mi na t'i eunna tsasotta ! Djouya lo valet d'atoù !

GEROMINE Adón se t'i pi bon djouya té !

ÉLECTRISIÈN Na n'i pa lo ten, deyo fé lo tor di-z-atre ouficho !

L'électrisièn chor.

SAVENTA ... é la dériye a mé ! N'en gagnà !

RICHARD (*Eun se dispèèn ver Geromine*) Mi t'a si rèi é seutta dame de belote, djouya-leu ! Te me djouye seutte scartin-e !

GEROMINE Mi se té te me di pa sen que t'a eun man mé poui pa savèi sen que djouì !

RICHARD Mi mé poui pa te diye sen que n'i ! Té pitoù, se t'a eugn ase dénona-ló !

Geromine é Richard se mandon a caqué é van a s'achouaté a leur poste. Dimèn Saventa s'aprotse a Touéno.

SAVENTA Touéno fièn eunna petchouda fotografie pe rappelé si momàn !

TOUÉNO Na, na, na.

SAVENTA Ouè soplé, pouai la beutto si Instagram é tcheutte pouon la veure.

TOUÉNO Adón fièn seutta бага.

Saventa é Touéno se fan eun selfie é, to de chouito, Saventa lo tsardze si Instagram.

SAVENTA Adón petchoudacllenda lerèidelabelote, petchoudacllenda tchicaderepoùéaprinotraillèn.

La fotografie l'è proyettaye si l'écran pe caque secounda :

 POUTEUN A SAVENTA 



Saventa s'achouatte a son poste.

Silanse.

Scène XI – G.B. DI '95

SAVENTA Richard ! N'i acapòu si Facebook eugn articlo pe té !

RICHARD Pe mé ?

SAVENTA Lo titre l'è : « Euncrouayablo ! Poue vatse maltrattaye » !

GEROMINE Na ! Senque l'è capitoù ?

SAVENTA Lo F.S.V.V., Fédérachón pe la Santé di Vatse Valdoténe, l'a denonchà eun grandjì de Tsarvensoù, G.B. di '95...

TOUÉNO Qui ?

SAVENTA G.B. di '95.

TOUÉNO Cougniso pa.

SAVENTA (*Conteneuvve a liye*) ... pe « torteua contre vatse inno-sante ». Lo Prézidàn de la Fédérachón, devàn lo dzeudzo, l'a accuzó lo grandjì eun dièn : « Son de personne cruelle ! Grop-pon le quiye di vatse i plafón, sensa gneun motif é gavon a la bitche salla pocca d'euntimitoù que l'at ! ».

RICHARD Djeusto ! A fose eun que pense eunna mietta i bitche. Pensade a seutte poue vatse ; todzor itaye topaye, mi ara lèi levvon la quiya é tcheutte vèyon sen que l'an dézó. Mi vo semble lo case ?

GEROMINE T'a rèizón, poue vatse.

TOUÉNO Mi comèn poue vatse ? Lèi groppon la quiya pe le-z-ary !

RICHARD Mi l'è comme se té te fusse sensa ganesón ! Saré pa normal !

GEROMINE (*A Touéno*) Te sisa té eunna vatse, te sarie contenta ?

RICHARD Djeusto Couchotta ! Té t'i eunna de no !

TOUÉNO Mi l'è normal gropé le quiye pe le-z-ary ! L'an todzor fé-lo.

RICHARD Té t'i restoù eugn omme d'eun cou !

TOUÉNO D'eun cou mi san é normal !

RICHARD T'i maque restoù té pouèi ! Avèitsa-té a l'entor !

TOUÉNO Mi avèitsa-teu é avèitsa le coucouille de té ! Prédzen-nèn pami !

RICHARD Ouè quetèn pédre.

Silanse. Tcheutte fan ren.

La moutra marque dji-z-aoue.

RICHARD Mondjemé ! N'en dza fé dji-z-aoue.

GEROMINE Oué dji-z-aoue.

RICHARD Gneunca apesì, euncroyablo.

GEROMINE Can eun l'at a fé lo ten pase.

RICHARD (A Ottino) Euncó té t'a pa apesì... .

SPRITZ Na ren.

RICHARD Mi a queunt'aoua areuvve lo Gran Chef di Plan Dameun ?

SAVENTA A dji é demì.

RICHARD Adón vou eun devàn avouè le prateuque de la F.S.C.V.

Silanse.

Scène XII – L'AOUA DI CAFÌ

TOUÉNO Mi se béisàn eun bon cafi ?

TCHEUTTE Ouè !

TOUÉNO L'è l'aoua di cafi. Ategnade eun momàn que queurio nou-tro Sandrino.

Touéno queurie Sandrino i téléfonne.

 TÉLÉFONNE 

Sandrino repón.

TOUÉNO Sandrino n'i eunna prateuca bièn eumpourtanta, te vé-riye inque ?

SANDRINO Areuvvo to de chouito i galoppe.

Sandrino avouè lo pa de la fiacca s'aprotse a l'ouficho.

SANDRINO (A Touéno) Di-mé.

TOUÉNO Salì Sandrino, bailla eun cou de fi ba i Bar é di-lèi de pourté si le cafi.

SANDRINO D'acor ! San dza to leur ?

TOUÉNO Ouè comme da coutima san dza totte.

SANDRINO Va bièn.

Sandrino tourne a son poste é comande le cafì.

GEROMINE Mi Tsalendre queun dzor l'è sit an ?

TOUÉNO Saventa avèitsa si ton téléphone...

SAVENTA (*Étonaye*) Eun demicro !

TOUÉNO Demicro ? Adón Sen-Itcheunne l'è eun dedzoù...

RICHARD ... é lo 27 pregnèn repoù...

GEROMINE ... 28 é 29 son eun desando é eunna demendze...

SAVENTA ... 30 é 31 comme le vallet de Romma sen eun *mutua*...

SPRITZ ... lo premì de l'an sen i mitcho pe no reprendre de la piorna di dèrì de l'an...

TOUÉNO ... lo 2 é lo 3 pregnèn repoù...

RICHARD ... lo 4 é lo 5 son desando é demendze...

GEROMINE ... lo 6 l'è la fita di rèi é sen i mitcho...

TCHEUTTE ... é voualà eun pon de tréze dzor !

Entre eunna serventa avouè eun cabaret plen de tasse.

SERVENTA Bondzor Sandrino, te me ivre lo portaille ?

SANDRINO Ouè.

Sandrino se levve é gnouye la retsertse de la cllò.

SANDRINO (*A la serventa*) Queunta l'è selón té ?

SERVENTA (*Eun moutrèn eunna cllò*) Seutta selón mé.

SANDRINO Na pa seutta. Ah... la voualà !

Sandrino ivre lo portaille é la serventa entre.

SERVENTA Bondzor a tcheutte ! Euncó oueu plen de travaille ?

GEROMINE Sen tsardjà !

La serventa fé lo tor de tcheutte pe leur baillè lo cafè.

SERVENTA (*Ver Couchoutta*) Pe té cafè queur avouè de lasi de soia.

SERVENTA (*Ver Touéno*) Mesieu Touéno cafè *corretto*.

SERVENTA (*Ver Ottino*) T'i finque réchà ?

SPRITZ L'an récha-me !

SERVENTA Pe té eun Limoncello.

SPRITZ Saye petouda !

SERVENTA (*Ver Saventa*) ... é pe té Saventa eun *cappuccino* avouè eun dzen souri to pe té.

SAVENTA Mersi, que dzen ! Fièn eunna fotografie ...

Saventa fé an foto i cappuccino. La fotografie l'è proyétaye si l'écran pe eun per de seconde.

 CAFI DI MATEUN 



SAVENTA (*Eugn icrièn si lo téléphone*) petchoudacllenda cafilomateun, petchoudacllenda lobarnovoudibièn.

SERVENTA (*Ver Richard*) Lo cafè euncó pe té. ... é pe si cou n'en fenè.

RICHARD Acouta. ... lo vèyo l'è biodégradable ?

SERVENTA Ouè.

RICHARD Lo cafè l'è de no-z-atre ?

SERVENTA Ouè de Gene.

RICHARD Lo seucro de canna ?

SERVENTA Ouè comme tcheu le mateun !

RICHARD Adón lo bèyo !

SERVENTA (*Ver tcheutte*) Pe payi ?

TOUÉNO Payo mé comme de coutima !

Touéno baille a la serventa de bon.

GEROMINE Tro jantilo Touéno, te no fé sise plèizi tcheu le dzor, t'i fran jantillo.

SERVENTA Adón vo queutto a voutro travaille, boun-a dzornoù !

TCHEUTTE Boun-a dzornoù !

Sandrino areuvve pe ivri lo portaille. La serventa chor de l'ouficho.

SERVENTA Sandrino, té ren comme de couteumma ?

SANDRINO Na mersi. N'i la cafetchiye... semble pa, mi eugn euro pe dzor son 30 i mèis é a l'an son 365 euro... é aprè n'i pa lo ten...

Dimèn la tsambriye l'a pa cacou-lo é l'è chortia. Tcheutte bèyon lo cafi.

Scène XIII – LO GRAN DIRECTEUR CARLO TRÈISOÙ

La moutra marque dji é demì di mateun. Sandrino galoppe ver l'ouficho.

Dèi-z-ar la moutra plan planotte avancheré tanque a midzor.

SANDRINO Garsón ! L'è eun tren d'arrevé lo cappe !

Tcheutte gavon ià le tasse di cafi é tsertson de beti eugn odre le table.

Areuvve lo Gran Directeur Carlo Trèisoù. S'aprotse i trebeillet.

Can lo vèyon le-z-eumpléyà s'ajiton é se levvon tcheutte.

TRÈISOÙ Gneun que fé sen que dèi fiye seu dedeun, vo baillade-ti pa lagne ? V'ouite arrevoù vito lo mateun é v'ouèide fé ren ! Vegnade pa peu me deue que v'ouèide panco i lo ten !

TOUÉNO Na, na...

GEROMINE Squezade.

SPRITZ Lo fièn pamì.

RICHARD V'ouèide rèizón.

TRÈISOÙ Que sise lo dèrì cou que areuvvo é ma plase l'è pa presta !

RICHARD Pardón. Fièn ara.

TRÈISOÙ Sistémade totte !

🏠 GBL 386 - STOMP CHERZI - GIAMPIERO BONESCHI 🏠

*Le-z-eumpléyà tramon le table é plachon eun grou matelasse
dézò lo trebeillet. Lo Directeur se tsandze avouè eun arbeille-
mèn sportif.*

La mezeucca s'arite.

TRÈISOÙ Bon, si prest !

*Pe se fé coadzo dimande de bouéchì di man a tcheutte, euncó
i pebleuque.*

RICHARD Alé Chef !

*Trèisoù saoute lo trebeillet eun fièn eunna pirouette si pe l'er.
Can tsi desì lo matelasse, tcheu lèi boueuchon di man, entu-
ziaste.*

TRÈISOÙ Sensa voutro soutièn lèi la ferio pa !

SAVENTA Bravo, bravo ! Eunna fotografie tcheut eunsemblo !

TRÈISOÙ Na, maque avouè le doe feuille.

Saventa se fé eunna fotografie avouè Couchotta é lo Cape.

La fotografie l'è proyéttaie si l'écran pe caque secounda.

SAVENTA (Eugn icrièn si lo téléphonne) petchoudacllenda SiL'èMon-
Cappe, petchoudacllenda Trèisoùeugnézeumplotpetcheutte, pet-
choudacllenda decappecommetélamammanenfépamì

 POUTEUN PE CARLO TRÈISOÙ 



TRÈISOÙ ... é rapelade-vó que se vouillade fiye tsemeun seuilla dedeun, déyade vin-ì de-z-atlet comme mé é saouté lo trebeillet mioù que mé.

RICHARD V'ouèide rèizón !

TRÈISOÙ (*Ver Touéno, eun lèi bouéchèn la man si lo ventre*) Touéno, té te trebelerè eunna mia. Mi crèi-lèi é te lèi arreverè.

TOUÉNO Lèi prouo ! Mersì Chef !

TRÈISOÙ Ara comenchèn a fiye quetsouza.

Tcheutte beutton eugn odre l'ouficho : gavon ià lo matelasse é plachon amoddo le table comme l'ion douàn. Lo cape se beutte la tsemize é le pantalón.

Scène XIV – COURSE PE LE DIPENDÈN

TRÈISOÙ (*Ver Sandrino*) Sandrino, beutta djeusto foua lo pannel « Uficho cllouzi pe course di dipendèn ».

SANDRINO Ouè, l'è dza preste.

Sandrino plache lo pannel douàn lo trebeillet.

Trèisoù, eugn avèitsèn avouì supèriorité le dipendèn, comenche a fé eunna léchón si comèn prodouiye de pi.

TRÈISOÙ Mé cher dipendèn, son pa de-z-àn comoddo pe noutra poua é dzenta Réjón ! Mi vo, é diyo vo-z-atre, pouade, eun traillèn seuilla achouatoù, tsandjì le bague ! Vrèi ou na ?

TCHEUTTE (*Eun braillèn*) Ouè !

TRÈISOÙ (*Énerjique*) Pequé se mé vouillo tsandjì, pequé se vo v'ouèide voya de tsandjì... to lo mondo pou tsandjì!

TCHEUTTE (*Comme douàn*) Ouè!

TRÈISOÙ Ara ataquèn lo course. N'i aprestit eunna présentachón pe vo-z-esplequì le noue metode pe massimizé la produchón deun le-z-ouficho pebleuque. (*Ver Touéno*) Touéno te me prite ton ordinateur?

Touéno s'ajite é comenche a cloure de vidéo/fotografie.

TRÈISOÙ (*Eugn avèitsèn l'écran*) ... é totte seutte fenne?

TOUÉNO Na, na, ren... (*eun baillèn de creppe si lo clavier*) ESC, ESC, ESC!

TRÈISOÙ Te per pa lo vicho!

TOUÉNO (*Todzor pi ajitoù*) Na, ouè, voualà lèi sen... voualà l'è totte amoddo!

Trèisoù tsardze la présentachón é i mimo ten son joueu tsi desì lo revèille.

TRÈISOÙ Ouè mi... l'è dza dji é demì!

RICHARD Ouè, dunque?

TRÈISOÙ (*A tcheutte*) Senque no fièn a dji é demì tsaque deleun mateun?

TCHEUTTE Djeusto!

TRÈISOÙ L'è l'aoua di Ping Pong! Aprestade la tabla!

Le-z-eumpléyà tramon le table pe créé eunna tabla de Ping Pong.

🏠 GBL 386 - STOMP CHERZI - GIAMPIERO BONESCHI 🏠

Teuppe 🍷 a drèite di palque. La mezeucca s'arite.

Entre lo vioù.

GENE Si tourna seuilla. . .

SANDRINO Me dipli mesieu, se vegnavade sinque meneutte fé sayoon tcheutte disponiblo.

GENE Senque ?

SANDRINO Se arrevavade sinque meneutte fé sayoon tcheutte disponiblo.

GENE Senque ?

SANDRINO (*Eun braillèn, eunna paolla pe cou*) Se arrevavade sinque meneutte fé sayoon tcheutte disponiblo !

GENE (*Malechè*) N'i comprèi, l'iye pe diye « euh, mi l'è pa poussiblo » !

SANDRINO Adón diade « euh, mi l'è pa poussiblo » ! Aprì liade lo cartel. . .

GENE (*Eun lièn eunna paolla pe cou*) Uficho clouzi pe course di. . . !
Ah na, ara vou veure. . .

A lambo Sandrino bloque Gene.

SANDRINO Na, na mesieu ! Itade seuilla, alade pa aoutre, v'ouèide pa lo pass.

GENE Eunna dzornaye perdiya é n'a gnenca eun cantchè iver pe ali cretequé sise pouo-z-aouvri !

SANDRINO Fiade eun бага : tornade demàn !

GENE Na, n'i pa lo ten ; vo mando caqueun que vo rèche ! Inutilo !
Tchetchasoù ! Mé payo le-z-empoù é vo ren ! Inutilo !

Gene chor.

SANDRINO Va bièn. . . é co sitte l'è ià.

Scène XV – PING PONG

Lemiye 💡 si to lo palque.

La moutra marque onj'aoue. Touéno l'a djeusto gagnà contre Richard.

TRÈISOÙ ... é ara Touéno contre Couchotta. Dériye partia, djeusto eun tsandzo : qui gagne, gagne. Rapello le riille mesieu : si que gagne déside qui euntre vo-z-atre ite inque tanque chouiz-aoue pe fé le prateuque de tcheutte... dimèn que le-z-atre son ià pe se divertì.

Touéno é Couchotta se plachon i dou couti de la tabla ; tcheu le-z-atre (euncó Sandrino) avèitson.

TRÈISOÙ Servicho pe Touéno.

Touéno baille eun creppe sèque é fé lo poueun. Saoute si pe l'er to contèn, le-z-atre bouéchon di man é lèi fan la fita. Couchotta l'è dispéraye.

TRÈISOÙ Gagne Touéno !

TRÈISOÙ (*Ver Touéno*) N'ayoù pa la féi. . .

TOUÉNO Mi ouè, n'i fran fé eunna dzenta gnacaye lé si la drèite, si la coueugne. . .

TRÈISOÙ T'i eun canón ! Jamì vi eunna gnacaye comme la tin-a !
Mi ara di-me vèi. T'a dza désidoù qui dèi resté inque pe trailli totta l'iprou ?

TOUÉNO Adón... l'ommo ou la fenna que dèi resté seu pe trailli tanque lo nite l'è. . .

Eunna mia de suspanse.

TOUÉNO (*Eun braillèn*) Couchotta !

GEROMINE Mi Touéno na, tcheu le cou que te gagne té te fé resté inque mé. Devendro can djouyèn i plimeun te tchapperè eun paillano !

TRÈISOÙ (*Ver Couchotta*) Vo feré la repeuille devendro, mi ara t'i té que te reste inque a trailli.

Eun remersièn Touéno, le-z-eumpléyà tramon le table a leur poste. La moutra marque midzó.

Scène XVI – FEUN DZORNOÙ

TRÈISOÙ Vi que l'è belle midzó, mé dirio que pouèn alé no divertì !

 SAMBA DEGLI ASSENTEISTI - BRUNO ZAMBRINI 

Eun aprì l'atro le-z-eumpléyà chorton de l'ouficho, mi douàn de chotre queutton si la tabla de Geromine le prateuque que derè fée.

A ten de mezeucca, tsaqueun chor avouì quetsouza que dimoutre sen que feré pe totta l'iproù.

Saventa s'arbeuille pe alì colaté é teurie foua eun per de-z-esquì; Ottino chor avouì totta l'attressateua pe djouì a golf; Sandrino se beutte eunna maille di Tsarvensoù Fiolet é chor avouì eugn'èima é eunna peura; Richard s'arbeuille pe alì eun beseclletta é chor desì eun petchoù vélo di mèinoù; Touéno é Trèisoù s'arbeuillon pe la tsasse, prègnon le fezi é de l'armouére teurion foua lo tseun de la tsasse : eun cré barbontcheun !

Fenèi la mezeucca.

Lemiye base.

Couchotta, dispéraye, pouze la tita si la tabla.

Vouése derì le ridó 🧠 : « Ouè, sit an le Digourdi l'an beun tchica ézajéroù avouì leur sarcasme, l'è vrèi. Mi lamérian quetì deun tcheu vo eunna péгна refléchón. Sen-nó cheur de itre contèn de noutro travaille ? No baillèn totte noutro eungadzemèn pe bièn réusi i rézultà final ? No metèn tcheu le dzor la paye ? I ten que no viquisèn, a vo la reponsa ».

Teuppe 🧠.

🏠 TSI LA TÈLLA 🏠

Derì le ridó

Vidéo é son

Laurent Barmaverain

Miji

Renzo Bollon

Camion

Diego Bollon

Vouése derì le ridó

Lo dzouveun-o Seunteucco de la Repebleucca de Pompioù

LA RECONSTITUTION

La vèille di gran dzô

Administrachón comunale de Tsarvensoù

Tsarvensoù, 2016-2017

Le Digourdì di 2017



Dameun : Paolo Dall'Ara, Joëlle Bollon, Paolo Cima Sander, Marco Ducly.

I mentèn : Marlène Jorrioz, André Comé, la tsantiù avouè Renzo Bollon, Jordy Bollon, André Comé é Ronny Borbey, Jordy Bollon.

Dézò : Richard Cunéaz, Aimé Squinabol, Joël Albaney, Simone Roveyaz.



RECONSTITUTION

LA VÈILLE DI GRAN DZÔ



Eun court-métrage ?

Deun l'aoutón di 2016, l'iye pa euncó cheur que lo Printemps Théâtral sarie itó organizoû. I mimo ten, le Digourdî l'ayoon resî pe l'Administrachón comunale la propozichón de réalisé eun courmé-tradzo avouî eunna équipe de professioniste. L'iye cheur eun projé pa seumplo pe eunna péгна compagnî de téatre sensa espérianse deun lo mondo di *cinéma*. Mi, i mimo ten, l'iye eun projé que l'arie baillà i Digourdî eunna noua voya de recomenchî, aprî eunna dériye pièse, « N'en pa lo ten », que l'ayè eunna mia tchoué l'entouziassme dedeun la compagnî.

Donque, lo directif l'ayè désidoû de pa partisipé i Printemps Théâtral di 2017, deun lo cas que fuche itó organizoû¹, pe pouèi bouré totte le-z-énerjî deun la produchón di premi *court-métrage* di Digourdî.

Lo souvenir di Seunteucco

« N'en vouli counté l'istouére moderne de noutra Quemeua avouî eun langadzo directe, *visuel*, eun proupouzèn i Digourdî eun défi : dzoure leur caletaye é leur espérianse téatrale pe réalisé eun *court-métrage*. Imajin-î la vèille di premiye-z-éléchón tsarvensolentse aprî la Secounda Guèra mondiale l'a bailla-no la possibilitoû de rappelé tcheu sise que l'an i a queur Tsarvensoû, mimo aprî le-z-àn teuppe di fasisme ; mi surtoû de commémoré le sinque Père de Tsarvensoû (comme lamo le querî mé), que l'an portoû la Quemeua i premiye-z-éléchón de Tsarvensoû reconstituiya.

Personellamente, l'è itó émouvàn veure comèn se pou baillî viya a eun bocón d'istouére avouî l'*art cinématographique*. Mimo lo fé que le-z-acteur sayoon de dzouveun-o Tsarvensolèn l'è eun souvenir prèsiu que n'î... pequé, eunsemblo, n'en cougnî, é eun caque magniye viquî, eunna padze eumpourtanta de noutra Communoté. »

1. *Heuresement* l'è itoû organizoû.

Ronny Borbey

Queriauouzitou

- « La vèille di grand dzô » l'è itó lo premi *court-métrage* de la compagnì Le Digourdì.
- « La vèille di grand dzô » l'è euncó lo débù de Aimé Squinabol deun Le Digourdì comme acteur. L'ie dza pouyà si lo palque deun l'an 2012, mi maque avouì eunna péгна appa-richón sensa battiye.
- Renzo Bollon, que eunterprète eun tsantre de la parotse, sayè pa qué que dèijè fée l'acteur. Jordy l'ayè maque deu-lei que dèijè baillì eunna man pe tramé de moublo.

 Scénographie

- Éillize de *Sainte Colombe* - Tsarvensou;
- Lèitì di veladzo di Plan - Euntroù;
- *Maison Bruil d'Euntroù* - Crotta avouì 1 tabla, 3 caèye, 1 botéillón, 3 vèyo é eunna bocon-ou;
- Pailleu avouì 1 banquetta;
- 1 tsaèn avouì de boate;
- *Centre d'études francoprovençales* René Willien - Quezeun-a di-z-àn '40 avouì 1 tabla é 2 caèye.

 PERSONADZO

EMERICO	Emerico Comé, Tsarvensolèn classe 1890, directeur de la tsantiù deun le-z-à '40, eunterprétoù pe PAOLO DALL'ARA.
Tsantre I	Tsantre de la parotse de Tsarvensoù, eunterprétoù pe JORDY BOLLON.
Tsantre II	Tsantre de la parotse de Tsarvensoù, eunterprétoù pe RENZO BOLLON.
Tsantre III	Tsantre de la parotse de Tsarvensoù, eunterprétoù pe RONNY BORBEY.
Tsantre IV	Tsantre de la parotse de Tsarvensoù, eunterprétoù pe ANDRÉ COMÉ.
PRIYE	Abbé Hilarion Vection, priye de Tsarvensoù, eunterprétoù pe MARCO DUCLY.
LOUIS	Louis Lucianaz, Tsarvensolèn classe 1901, eunterprétoù pe JOËL ALBANEY.
ADELLINE	Adelline Lucianaz, métressa de l'icoula de Tsarvensoù deun le-z-à '40, eunterprétaye pe MARLÈNE JORRIOZ.
AMÌ DE AIMÉ I	Eun Tsarvensolèn que lame djou à la moura, eunterprétoù pe RICHARD CUNÉAZ.
AMÌ DE AIMÉ II	Eun Tsarvensolèn que lame djou à la moura, eunterprétoù pe SIMONE ROVEYAZ.
AIMÉ	Aimé Damien Borbey, Tsarvensolèn classe 1897, eunterprétoù pe JORDY BOLLON.
JOSEPH	Mèinou tsarvensolèn di-z-à '40, eunterprétoù pe AIMÉ SQUINABOL.

JUSTIN	Justin Donzel, Tsarvensolèn classe 1898, eunterprétoù pe ANDRÉ COMÉ.
SABINE	Sabine Lucianaz Savioz, fenna de César Savioz, eunterprétaye pe JOËLLE BOLLON.
CÉSAR	César Savioz, Tsarvensolèn classe 1897, eunterprétoù pe PAOLO CIMA SANDER.

RECONSTITUTION

LA VÈILLE DI GRAN DZÔ

Aprì la Secounda Guèra mondiale, lo 17 di mèis de mi di 1945, lo préfè de Veulla Alessandro Passerin d'Entrèves publiye eunna *circulaire* pe la reconstituchón de totte le Quemeue rantchaye pe lo réjime fasiste.

Lo 27 janvieur 1946, 424 Tsarvensolèn é Tsarvensolentse di-mandon a la Préfetteua de Veulla la reconstituchón de la Quemeua de Tsarvensoù. Lo 30 avrì 1946, lo prof. Federico Chabod, Prézidàn di Consèille de la Val d'Outa, décllare la reconstituchón de Tsarvensoù.

Lo 30 joueun 1946, son èlì sinque *membre* de la jeunte eun-tsardjaye de refondé la Quemeua : Aimé Borbey, Emerico Comé, Justin Donzel, Louis Lucianaz é César Savioz.

Lo 23 novembre 1946, vèille di premiye-z-éléchón comunale de Tsarvensoù reconstituiya, Aimé, Emerico, Justin, Louis é César vi-quèison Tsarvensoù comme totte le-z-atre nite, mi avouì lo queur que boueuche i dzor aprì, lo gran dzor. Eunna nite coloraye avouì salle attivitoù jénuine d'eunna péгна communoté : le proue de la tsantiì, la lèiti, le counte avouì le-z-amì, le traile de la véillà, la chaleur de la fameuille. Eunna nite icllériaye di fouà de la spèranse que briille deun le joueu quèriaou di péгно Joseph. Demàn se re-comenche, *démocratiquement*, avouì eun Consèille tsarvensolèn.

Derì le ridó

Sujé é teste

Le Digourdì
Chiara Bernardi
Ronny Borbey

Traduchón

Raffaella Lucianaz

Son

Giovanni Corona
Raffaele D'Anello

Produchón ézécutive

Giulia Di Francescantonio

Produchón

Ezechiele 25:17

Fotografie é réjì

Alessandro Stevanon

TODZO PI DIGOURDÌ

Pièse icrita pe Le Digourdi

Téatro Splendor de Veulla, 10 marse 2018

Le Digourdì di 2018



Drette: *Sophie Comé, Ronny Borbey, Francesca Lucianaz, Paolo Cima Sander, Julie Squinabol, Joël Albaney, Michel Comé, Marco Ducly, Stephanie Albaney, Thierry Jorrioz, Simone Roveyaz, Aimé squinabol, Marlène Jorrioz, Paolo Dall'Ara, Richard Cunéaz.*

Achouatoù: *Evi Garbolino, Joëlle Bollon, Pierre Savioz, Jordy Bollon, Laurent Chuc, André Comé.*

🧑‍🎤 AVANSPETTACLE 🧑‍🎤



🧑‍🎤 TODZO PI DIGOURDÌ 🧑‍🎤



Lo souvenir de l'acteur

« La pièse « Todzo pi Digourdì » l'è itaye icrita eugn'occajón di dji-z-àn de la Compagnì. Lo sujé di teste l'è la *biographie ironique* di Digourdì. Personellamente « Todzo pi Digourdì » resterè todzor deun mon queur, pe bièn de rèizón.

L'è itaye la dériye pièse comme Prézidàn di Digourdì ; l'è eunna pièse avouì laquella eugn itrandjì pou comprendre amoddo sen que vou deue itre Digourdì, di momàn que lo *fil rouge* de la counta l'è l'esprì comique de totta la compagnì, avouì voya de riye pe fée riye ; l'è itoù lo premì cou iaou la Compagnì l'a prooù a tsandjì *style* téatral : *scénographie* redouite i *minimum*, *scène* reprézentaye deun difièn conteste *espace-temps*¹, *mimétisme* é surtoù bièn de *méta-théâtre*. »

Jordy Bollon

Queriauouzitou

- La grafie di titre de la pièse l'è pa correcte : « Todzo » se devriye icriye « Todzor ». Dièn pa lo non di/de la responsablo/a de seutta erreur pe pa provoqué de discuchón inutile. Can mimo, va la pèin-a de soulignì pequé n'en desidoù de vardé lo titre trompou. Pe doe rèizón : premì, pe no rappelé de fé pi atenchón avouì la grafie di teste que no publièn ; secón, di momàn que la pièse counte de fasón *autoironique* sen que vou deue itre Digourdì, eun titre avouì eunna petchouda erreur l'ìye bièn reprézentatif di sujé de la pièse mima.
- Deun la scène X - La Nite di-z-Oscar, noutro Paolo Cima Sander repette, deun eunna meneutta é demì, nou cou « can

1. Eun premì tentatif l'ìye itoù fé avouì la pièse « Matte... sen tcheut matte » deun lo 2013.

mimo » é chouì cou « eumpourtàn » !

🧑 CAN MIMO VS EUMPOURTAN 🧑



- Deun l'avanspettacle, le dou présentateur son réellamente lo Seunteucco é lo Vise Seunteucco de la Quemuea de Tsarvensoù.

 Scénographie

- 1 poltronna moderna ;
- 1 chofà ;
- 1 peuccapoussa  *automatique* ;
- 1 *hoverboard* ;
- 1 *album* di foto ;
- 1 ban de eunna cantin-a iaou aprésté lo bèye pe le cliàn ;
- 2 pégne table, comme salle di cantin-e ;
- 15 caèye que se pouon plèi, comodde pe itre tramaye eun pocca ten ;
- 1 volàn di poulmeun ;
- 1 *pupitre* ;
- 1 busta ;
- 1 Oscar.

 PERSONADZO

LAURENT	Premì prézentateur, lo Vise Seunteucco de Tsarvensoù, eunterprétoù pe LAURENT CHUC.
RONNY	Secón prézentateur, lo Seunteucco de Tsarvensoù, eunterprétoù pe RONNY BORBEY.
MAGÀN	Magàn Sophie 🧑, sa eumplèi amoddo lo téléphone é la tecnolojì, eunterprétaye pe SOPHIE COMÉ.
PAGÀN	Pagàn Paul 🧑, euncó llou bièn tecnolojique, eunterprétoù pe PAOLO DALL'ARA.
NEVAOU	Nevaou de pagàn Paul é magàn Sophie, eunterprétoù pe AIMÉ SQUINABOL.
NEVAOUZA	Nevaouza de pagàn Paul é magàn Sophie, eunterprétaye pe JULIE SQUINABOL.
SERVENTA	Serventa d'eunna cantin-a de Tsarvensoù, eunterprétaye pe STÉPHANIE ALBANEY.
FRANCESCA	La vrèya Francesca Lucianaz di Chef-Lieu, eunterprétaye pe MARLÈNE JORRIOZ.
PIERRE	Lo vrèi Pierre Savioz di Tsatì, eunterprétoù pe PIERRE SAVIOZ.
JOËLLE	La vrèya Joëlle Bollon di Chef-Lieu, eunterprétaye pe JOËLLE BOLLON.
JOËL	Lo vrèi Joël Albaney d'Ampaillan, eunterprétoù pe JOËL ALBANEY.
VÉTCHOT	Eun vétchot 🧑 di pèi, tchica boutro, eunterprétoù pe RICHARD CUNÉAZ.
CIMA	Lo vrèi Paolo Cima Sander de Feleunna, eunterprétoù pe PAOLO CIMA SANDER.
MARCO	

	Lo vrèi Marco Ducly de Feleunna, eunterprétoù pe MARCO DUCLY.
SIMONE	Lo vrèi Simone Roveyaz di Pon-Sià, eunterprétoù pe SIMONE ROVEYAZ.
ÉLEVEUR	Éleveur tsarvensolèn, eunterprétoù pe THIERRY JORRIOZ.
MAMMA	Eunna mamma d'eun atteur di Digourdì, eunterprétaye pe STÉPHANIE ALBANEY.
TSACHAOU I	Eun tsachaou de Tsarvensoù, eunterprétoù pe JORDY BOLLON.
TSACHAOU II	Eun gn atro tsachaou de Tsarvensoù, eunterprétoù pe ANDRÉ COMÉ.
FOTOGRAFE	Vioù fotografe di Printemps Théâtral, an mia trambelin, eunterprétoù pe THIERRY JORRIOZ.
CHAUFFEUR	<i>Chauffeur</i> di poulmeun pe la chortia annuella di Digourdì, eunterprétoù pe ANDRÉ COMÉ.
JORDY	Lo vrèi Jordy Bollon di Chef-Lieu, eunterprétoù pe JORDY BOLLON.
THIERRY	Lo vrèi Thierry Jorrioz di Chef-Lieu, eunterprétoù pe THIERRY JORRIOZ.
STEPHANIE	La vrèya Stephanie Albaney d'Ampaillan, eunterprétaye pe STEPHANIE ALBANEY.
CONDUCTEUR	Conducteur télévizif de la nite di-z-Oscar, eunterprétoù pe RICHARD CUNÉAZ.
ASSISTANTA	Assistanta di conducteur télévizif, eunterprétaye pe STEPHANIE ALBANEY.

👤 AVANSPETTACLE 👤

Lemiye 💡.

Laurent l'è si proscenium que avèitse lo pebleuque.

LAURENT Bonsouar é bienvenù a tcheutte a seutta souaré di Prin-temps Théâtral avouï le Digourdì de Tsarvensoù. Me semble ieur can no sen acapó lo premì cou comme compagnì é n'en désidoù de beté si le Digourdì. Dèi si dzor lé n'en fé tan de souaré é de chortie, todzor eun vardèn lo mimo esprì, la mima voya de riye é de fée riye. Donque, eugn'ocajón de noutro anniverséo, n'ayoon désidó de pourté inque si lo palque eun momàn bièn tipique, é sourtoù bièn téatral, de sen que l'iyè la viya valdoténa : lo Consèille réjonal. Mi aprì no no sen deu : « mi le dzi veugnon sé pe riye ou pe plaoué ? » Pe riye ! É adón no no sen deu : « na, na, na ! » L'è vrèi que lo téatro é la poleteucca son bièn gropoù ; bièn de cou te comprèn pa qui fé la poleteucca é qui fé lo téatro. Mi i mimo ten, euncó no Digourdì pouèn pa tan cretequì la poleteucca ; euncó no n'en noutro pégnò euntsardzo eun poleteucca. La Joueunte comunale de Tsarvensoù l'è compozaye pe cattro Digourdì si sinque ! N'en la majoranse ! É l'unique que l'è pa eun Digourdì, lo seul que l'a jamì resitó desì si palque (é de so dèi se baillì lagne)... l'è noutro Seunteucco ! Seunteucco que, comme tcheu le vrèi politisièn, l'è vin-ì eun salle de téatro, l'a saròu la man a tcheutte, l'è fé-se vére, l'a fé de grou sourì... é ara iaou l'è aloù ? L'è aloù ià ! Mi l'a pa comprèi que sise que l'an resitoù devàn sayoon sise de Brutchón ! Pa de Tsarvensoù ! Mi se pou beté Seunteucco eun que prèdze gnenca noutro patoué ? Mé ara dimando a tcheu vo... mi se pou voté eun Seunteucco que...

Ronny Borbey, Seunteucco de Tsarvensoù, entre eun scène.

RONNY Laurent ! Avèitsa que... se te vou conten-ì a fé lo Vise Seunteucco tanque lo 2020... fé atenchón a sen que te di !

LAURENT Mi té de iaou t'i entroù ?

RONNY N'a pa d'eumpourtanse de iaou si entroù ! Te semble lo case de diye de bague di janre ?

LAURENT T'a rèizón...

RONNY Ouè que n'i rèizón !

LAURENT Mi ara que sanse l'a deusqueté douàn a totte seutte personne ?

RONNY Na l'a pa de sanse. Surtoù pequé fa planté-la lé de deusqueté comme eun Conseille réjonal. Se comprèn jamì ren : eun chor de la majoranse, l'atro entre deun la majoranse, aprì l'atro euncoa chor de la minoranse, si de douàn entre eun minoranse... se comprèn pamì ren ! Mi prao, fa avèitchi i futur, djeusto ?

LAURENT Ouè ! Mé diyo : pequé profitèn pa de totte seutte personne pe comenché a icriye lo programme di prochèn-e-z-éléchón ?

RONNY Djeusto ! Mi te diyo eugn'atra бага : fièn comme fan le Grilleun !

LAURENT Ah ouè le sinque-z-itèile !

RONNY Djeusto ! Leur senque fan ? Demandon i dzi se son d'acor, beutton eun votachón, fan le *parlamentarie*. Comme lo PD que fé le *primarie*.

LAURENT ... é adón no senque fièn ?

RONNY Fièn le tsarvensarie ! Demandèn i dzi se son d'acor.

LAURENT Va bièn, comenchèn !

RONNY Té pensa a doe bague : i spor é a l'imondicha...

LAURENT Ah l'imondicha ! N'i dza deu-lo eun Consèille, a la majoranse é a la minoranse que l'imondicha l'è pa eunna compétanse de la Quemeua, mi de l'Unité !

RONNY ... é adón pensa i tourisme. Va bièn ?

LAURENT Ouè ; é té pensa a la queulteua é i travó poubleucco.

RONNY Va bièn. Adón atacca té !

LAURENT Atacco... adón... spor... n'i eunna idé dèi can sayò ate pouèi (*avouè la man moutre l'atchaou*), dièn dèi can sayò pé-gno : eunna grousa manifestachón, bièn eumpourtanta...

RONNY ... pa la Becca !

LAURENT Na bièn pi grou ! Vouillo pourté a Tsarvensoù le Jeux Olympiques !

RONNY A Tsarvensoù ? Mi se pou pa ! N'en lo caro pe totte le streutteue ?

LAURENT Ouè ! Fé-me esplequì ! N'en tot : ba pe la plan-a, protso de la grandze, protso di mitcho de Franco Lucianaz fièn eunna grousa streutteua pe saouté avouè le-z-esquì ; aprì fièn lo restoràn iaou betèn traillì tcheu sise de Valpettaz !

RONNY Ah pouèi areuvvon le vouése de Valpettaz !

LAURENT Ouè, 30 ou 40 vouése ! Aprì lo fondo... lo fièn si a Tsan-Plan ; betèn eunna grousa cabouetta pe le beillette, eunna dzenta cantin-a iaou fièn traillì sise di Combes é di Tsatì !

RONNY ... é lé d'atre vouése !

LAURENT Son 200 vouése ! Aprì lo bob : lo fièn partì si i rascar de Combatechiye...

RONNY Mi gneun reste si pe de lé ! Queunte vouése prégnèn ?

LAURENT Ouè mi la feun de la pista di bob la fièn devàn lo mitcho

de Diego Bollon ! Countèn Diego countèn le Bollon, countèn le Bollon countèn Sen-Saló !

RONNY Le Bollon son tan é no voton tcheutte !

LAURENT Mi pe gagnì le-z-éléchón fa euncó avèitchì la partia basa.
Lé fièn eunna grousa *patinoire* é la fièn jéré a Franco Lombardo.

RONNY Lé son 300 vouése ! Sen a poste.

LAURENT Garantì, 300 vouése.

RONNY Me plé !

LAURENT Mé avouì lo spor si a poste. Ara té pensa a la queulteua.

RONNY Acouta-mé : no n'en cherdì le Digourdì pe fé lo *court-métrage* si la Reconstituchón de la Quemeua é le DVD l'an i eun gran sucsé. Adón senque fièn ? Pourtèn a Tsarvensoù lo festival di *cinéma* de Cannes é de Venize ! Imajin-a-té le journal : « Festival di *cinéma* de Tsarvensoù » !

LAURENT Wow !

RONNY Imajin-a le *star* que se fan le *selfie* si la promenade.

LAURENT Ah ah ah ! Mi iaou sarie noutra promenade ?

RONNY Mi n'en euncó no la promenade : lo tsemeun de Veulla.
Imajin-a-té le *star* que van si é ba pe lo tsemeun de Veulla !

LAURENT Si é ba, ba é si !

RONNY Se fan le *selfie* é aprì fièn finque la directe avouì Barbara d'Urso, avouì lo programme « Iproù 5 » !

LAURENT Pa mal.

RONNY Pouèi acapèn euncó le vouése di fenne que steurion.

LAURENT Ouè, djeusto, salle son de tsaplette.

RONNY Ara té pensa i tourisme. . .

LAURENT Tourisme... selon mé fa fé eunna téléférique que partèi de Plase Chanoux, areuvve si i Chef-Lieu, apri pase euncó protso sen di Borbey, conteneuvve tanque si i valón de Comboui é a la feun s'arite si i refuje Arbolle.

RONNY Pa mal !

LAURENT Ouè, pouèi le portèn tcheutte si eugn Arbolle, bèyon lo cafi pi bon i mondo (lo Cafi Olliatti), mi surtoù... payon ! Le fièn paì la tasse de *soggiorno* !

RONNY Pequé sise no voton pa, pequé iton pa a Tsarvensoù.

LAURENT Ouè, no voton pa mi payon ! Baillon de sou a la Quemeua, la Quemeua baille de sou i situayèn, le situayèn son contèn é le situayèn contèn no voton !

RONNY Sen a poste.

LAURENT Ouè ! Mi pe gagni fa todzor prendre eun considérachón eunna бага : le travó poubleucco. Si so, queutto la paolla a té.

RONNY Donque fé-me pensì... n'i pensoù. Adón té te cougnì amoddo la Becca, mi te feré pi eugn'atra manifestachón : Veulla - Tsarvensoù - Mont-Emilius, pouèi te va euncó pi si !

LAURENT Na si pa d'acor !

RONNY Atèn que t'euspleucco. Te sa senque fièn de la poueunte de la Becca ? La copèn !

LAURENT Naaa ! Comèn copé la Becca ?

RONNY Ouè !

LAURENT (*Dispéou*) Na ! Copé la Becca ! Na votade pa ! Na !

RONNY Acoutta ! Copèn la Becca pequé pouèi portèn lo solèi a Roulaz é prègnèn totte le vouése de Roulaz ; no vote finque Anselmino que la jamì votou-no ! Portèn apri lo solèi a Feleunna ! Counta véo de vouése a Feleunna !

LAURENT Mondjemé ! Eunna sentèin-a !

RONNY ... é pourtèn finque lo solèi a Plan-Feleunna ! Counta le vouése...

LAURENT N'i pa prau de dèi ! Va bièn, si caze d'acor ; mi la Becciaou la betèn ?

RONNY N'i pensoù euncó a so : lo pro de la grandze de Plan-Feleunna. Atsetèn lo pro (le tsanéno l'an fata de sou pe se paì la *badante*), plachèn la Becca é fièn Charvland, lo Gardaland de Tsarvensoù ! L'è pa eunna dzenta idoù ?

LAURENT L'è eunna idoù euncrouayabla ! A Charvland lèi betèn a traillì sise de la Giradaz, sise d'Ampaillan, sise di Pont-Suaz. Aprì totte le-z-attivitoù di Pon travaillon de pi é se travaillon no voton.

RONNY Eh ouè !

LAURENT Mé diyo que selón mé n'a la caèya pe 30 an !

RONNY Cheur... mi n'en deu devàn que fa demandé i dzi se son d'acor : fa fé le Tsarvensarie.

LAURENT Mi n'a pa fata avouè si programme !

RONNY Fien-leu pequé no sen comme le Grilleun démocratique... é propozèn eun programme fattiblo.

LAURENT No sen de Valdotèn, sen pa sé pe counté de counte foule ! Sen que dièn lo fièn !

RONNY Se pou fiye ! Adón mé beutto eun votachón : countréo ?

Ronny é Laurent avèitson lo poubleucco.

LAURENT Me semble gneun... té avèitsa si, que mé avèitso ba.

RONNY Gneun ! Amoddo. Ara demando : favorable ?

Ronny é Laurent avèitson tourna lo poubleucco.

LAURENT Avèitsa qui la votou-no ! La votou-no finque Siro Viérin !

Mi demàn nòi !

RONNY N'en l'unanimitoù. Saren-no la man pe la fotografie avouì le journaliste...

Ronny é Laurent se saron la man é sourion pe se fé fée eunna foto. Aprì chorton.

LAURENT Ah na !

Ronny é Laurent tornon i mentèn di palque.

RONNY Na sen oublia-no di Digourdì !

LAURENT Donque vo quetèn avouì lo spettacolo di Digourdì icri eugn'ocajón di djijimo anniverséo de la compagnì ! A vo...

RONNY Todzor pi...

TCHEUTTE ... Digourdì !

ACTE I

SE IVRE LO RIDÓ

Scène I – L'album DI DIGOURDÌ

Lemiye 💡 a drèite di palque, iaou acapèn eun chofà é magàn protso d'eunna poltronna.

Vouése derì le ridó 🎵 : « Tsarvensoù, 4 janvieu 2050 ».

MAGÀN (*Eun s'achouatèn si la poltronna*) Oh... si belle lagnaye !
Ara m'achouatto eun momàn. Ah na ! Me fa euncó poulité lé
pe tèra. Ah ! Mi n'i la soluchón ! Lola !

*Eun peuccapoussa automatique chor foua di chofà é poulite
selón sen que comande Magàn.*

MAGÀN Oh saye ! Voualà, poulita an mia pi a drèite... pi a gotse...
Stop ! Ara tourna i teun poste, a coutcha !

Lo peuccapoussa se bloque.

MAGÀN Seutte baradziye, martson pa. Le beutto a poste mé.

*Magàn se levve é catse lo peuccapoussa dézò lo chofà. Aprì
s'achouatte tourna si la poltronna é teurie foua lo portable.*

MAGÀN (*Eun lièn*) Váyèn sen que conte-tì lo moundo oueu...

Entre pagàn avouì l'hoverboard.

PAGÀN Sophie ! Si arrevoù !

MAGÀN L'ye l'aoua bon !

PAGÀN (*Eun se boudzèn avouì l'hoverboard*) N'i fé eunna dzenta
promin-ada oueu... avouì la dzenta mezeucca de l'Orage n'i
fé belle dou kilomètre !

MAGÀN ... é t'i gnenca tsizì ! T'i fran eun gamba !

Pagàn fé dou tor si lo poste é aprì bèiche ba de l'hoverboard.

PAGÀN Èitsa que mé si eugn esper de seutte machine ! Pa comme té, todzor dérì a si portablo é a Facebook é iPhone !

MAGÀN Èitsa que mé oueu n'i dza to fé, n'i dza to poulitó !

Pagàn s'achouatte si lo chofà.

PAGÀN Ouè, poulitó avouì salle machine que t'a pe lo mitcho... que nen si mé sen que te combeun-e pe lo mitcho ! (*Eun terièn foua lo portablo*) Ara fé-me liye lo journal.

PAGÀN Èitsa Sophie ! Amélie Viérin noua Prézidante de la Réjón... eh, Sophie, dza lo pappa Laurent l'ayè fé lo Prézidàn 30 an fé.

MAGÀN ... é lo pappagràn l'ayè fé-lo dza a son ten !

PAGÀN Ouè, que dzen veure comèn le mitchi se tramandon, l'è dzen so !

MAGÀN T'a fran rèizón !

Le dou nevaou entron eun galopèn avouì eun man eun grou album di fotografie. S'achouatton pe tèra, protso de pagàn.

LE DOU NEVAOU Pagàn, pagàn ! Senque l'è si grou livro ?

NEVAOUZA L'è icrì : « Le Digourdì » !

PAGÀN Aimé, Julie ! Mi iaou v'ouèide acapoù so ?

Pagàn pren lo livro eun man é lèi souffle desì pe lèi gavé ià la poussa².

PAGÀN (*Eton-ou* 😞) Mi sit... (*avèitse Magàn*) té t'a catcha-lo !

MAGÀN Na !

2. Pe fé vère la poussa, deun l'*album* n'a bièn de borotalco.

PAGÀN Si l'è lo libro avouè totte le foto di Digourdì ! La pi renou-maye compagnì de téatro de la Val d'Ousta !

NEVAOU Mi Digourdì qui ? !

PAGÀN Deh Aimé ! Pourta de reuspé pe Le Digourdì ! Le Digourdì l'an portó lo non de Tsarvensoù ià pe to lo moundo !

NEVAOUZA Ah ouè ? Comèn l'arian fé ? Ara éziston-tì euncó ? Can son nèisì ?

PAGÀN (Bièn fier 😊) Adón... vegnade seu...

Pagàn fé de caro si lo chofà i dou nevaou. Le nevaou s'achouatton.

PAGÀN ... ara vo fiyo la conta... l'ye l'an 2000 é... ouette é...

Teuppe 🍷. Lemiye 💡 a gotse é i mentèn di palque.

Scène II – LA NÉSANSE DI DIGOURDÌ

Eun scène n'at eun bancón é doe pégne table avouè eun per de caèye. N'a la serventa que poulite lo ban é eun vétchot achouatou a gotse que li lo journal pe son contcho.

Entron deun la cantin-a Joël, Joëlle, Pierre é Francesca.

FRANCESCA (A la serventa) Bondzor ! T'a eunna plase pe cattro ?

SERVENTA Ouè, salla tabla (eun moutrèn la tabla a drèite) va-ti amoddo ?

FRANCESCA Ouè.

Le cattro-z-amì s'achouatton.

SERVENTA Sade dza senque bèye ?

PIERRE Féo mé pe tcheutte, fièn cattro bire !

FRANCESCA Na, pe mé te me fé eun ju de froui i marteun sèque !

JOËLLE ... é pe mé i-z-ambrocalle !

JOËL (*Eun rièn*) I marteun sèque, i-z-ambrocalle ! Desandro bèya-vade pa tan de ju de froul. . . ou miou : ambrocalle é marteun sèque ouè, mi l'ian dedeun l'éve de viya !

Pierre ri eunsemblo a Joël.

FRANCESCA Euh Joël Albaney ! Fa-ti te rapélé que n'i portó té é llou (*eun moutrèn Pierre*) i mitcho ? É pe teri si sitte tanque si la Basteuille n'en finque rechà Viro !

VÉTCHOT Ouè ! Mé alao si i fèye é sise se retèriaon !

PIERRE (*I vétchot*) Conteneuvva a liye lo journal ! Euncó té can t'ie dzoueun-o t'a fé de fite !

VÉTCHOT Penso beun ! Mi l'an jamì pourto-me i mitcho le femalle ! Todzor arrevó i mitcho avouì l'ape ; é pe to diye, i ten de mé le femalle servichaoun pe d'atro !

JOËL Mi soplé ! Li lo journal !

La serventa pourte lo bèye pe le-z-amì.

SERVENTA Ah ouè . . . me fiade fran riye : acouté vo me semble de vère lo Charaban !

Silanse. Le cattro-z-amì penson.

JOËLLE Ah lo Charaban. . . sarie pa mal beté si eunna compagnì de téatro a Tsarvensoù !

JOËL Pierre ! Pourian beté si eunna compagnì de téatre.

PIERRE Pequé pa ? Pa mal comme idoù.

JOËL (*Todzor a Pierre*) N'arian djeusto fata de fenne. . .

PIERRE Eh ouè sen maque mé é té.

Le dou penson eun momàn dimèn que Joëlle é Francesca comenchon a se amalechi pe pa itre considéraye.

PIERRE (*A la serventa*) Squeuza ! Té te prèdze beun tchica patoué. . .

SERVENTA Pa pi tan...

JOËL Na mi te lo prèdze bièn ! Amoddo !

PIERRE ... é sen a trèi.

JOËL Mi n'a pa praou !

PIERRE (*I vetshot*) A propoû, té que le femalle te le-z-eumpléyae pe d'atro...

VÉTCHOT Senque ?

PIERRE (*I vetshot*) Té que t'i plen de femalle, te sarie no deue se n'a de fenne que pouon itre euntéressaye a fé téatro ?

VÉTCHOT Argh ! Que counte foule, n'i pa lo ten, n'i d'atro pe la tita. Aprì vo senque vouillade fiye ? V'ouite cattro rabadàn nèisì ieur, senque nen sade vo de téatro ? Soplé !

JOËL Rappella-té que no dzouin-o fièn sen que n'en voya se n'en la pachón ! (*A Pierre*) Mé é té sen prest, n'arian fran voya de comenchì !

FRANCESCA Can mimo v'ouite fran pa seumpateucco ! Lèi sen mé é Joëlle !

PIERRE Mi ouè, té é Joëlle ! Djeusto, Joëlle ! Pe case te cougnì pa caque feuille que l'a voya de fé téatro ?

JOËLLE (*Malechaye* 😊) Mi fé-té feun ! Mé é Francesca pouèn pa resité avouì vo ?

JOËL Sayoon eun tren de squersé !

PIERRE L'ye pe riye.

FRANCESCA (*Ironique*) Que riye !

JOËLLE (*Offenchaye*) Fran seumpateucco !

PIERRE Adón fiade-mé fiye le contcho. (*Counte le-z-atteur de la compagni*) Eun, dou, trèi, cattro é sinque avouì la serventa... pe fé eunna compagni no manque euncó caqueun.

JOËL Sen pocca pe ara...

PIERRE Ah ! L'è vin-i-me eunna idoù ! Le premi trèi que entron eun cantin-a le térièn dedeun !

JOËL Na Pierre n'i pouiye. Avèitsa que reusquèn !

PIERRE Mi ouè ! Sen que capite, capite ! A Tsarvensoù sen tcheut amoddo !

JOËL Na, na, na ! (*Ver le feuille*) Vo v'ouite chiye ?

JOËLLE Si pa, prouèn.

PIERRE (*A tcheutte*) Vo fiade de mé ?

FRANCESCA Renque pe si cou.

JOËL Prouèn !

Entre Cima. Le cattro-z-amì se beutton le man pe le pèi.

CIMA (*Ver la serventa avouè pachón*) Bonsouar ! Tot amoddo ? Te me fé eun dzén-epi tsa ? Mi tsa ! Maque comme t'i boun-a té a lo fiye 😊.

SERVENTA Ouè va bièn.

FRANCESCA Ouè mi sitte l'è de Feleunna é sa gnenca lo patoué !

CIMA Feleunna ? Feleunna ! Mi té can te di Feleunna te di Paolo Cima Sander ! Mi garsón, chourtade eunna mia de sise *schemi* ! Chortade de Tsarvensoù, bèichade ba de salla montagne, ivrade le joueu, végnade avouè no que n'en lo solèi to l'an !

JOËLLE (*Eun rièn*) Na, na... sitte l'è tro rabadàn, l'è eun de no !

CIMA Rabadàn ? Joëllina, mé que n'i pasoù totta la viya a te prédjì, mi reusta quèya... can mimo...

PIERRE (*I-z-amì*) Vo dimando squiza mi si cheur que le prochèn dou...

JOËL Na Pierre ! Mé n'i tourna pouiye !

Entron Simone é Marco eun rièn é squersèn. Pierre l'è dispéou.

JOËL (*Eun rièn pe pa plaoué*) Ah ébeun ! L'è pa pi que t'i aloù eun meillorèn !

MARCO (*A Simone*) ... é desando nite iaou t'i spari ?

SIMONE Ouè Marco, n'ayoù mioù a fiye que itì avouè vo !

MARCO Ouè va bièn mi t'a quetou-me a pià a l'Inside 🚫 !

SIMONE Veullanoua-Tsarvensoù a pià l'è pa que te lèi beutte tan. . .

MARCO Ouè doe meneutte !

SERVENTA Senque béyade ?

SIMONE Beutta maque doe bire.

PIERRE Marco, Simone ! Vo laméria fé téatre avouè no ?

MARCO Acoutta mi de feuille nen v'ouèide ?

JOËL Plen pèi !

SIMONE Eunna бага eumpourtanta. . . de chortie foua Val d'Ousta nen fièn ?

PIERRE Ouè cheur ! Tcheu le mèis !

MARCO Pe mé se pou fiye !

PIERRE Adón garsón, vegnade tcheu seuilla !

Tcheutte se plachon a l'entor de la tabla avouè lo vèyo levoù.

JOËL Fièn eun santé a la noua Compagnì de Tsarvensoù !

TCHEUTTE Santé !

Teuppe 💡.

Lemiye 💡 a drèite di palque.

Scène III – PE TO LO MOUNDO 🌍 !

PAGÀN Véo d'émochón ! Son dza belle passoù 40 an !

NEVAOU (*Eunna mia tro savèn*) Seutta l'iye pa eunna compagnì de théâtre ! V'ouyavade eunna compagnì de la crotta !

PAGÀN Grama lenva que t'a té ! Pourta reuspé pe le Digourdì ! Totsa-meu pa le Digourdì !

NEVAOUZA Squeza-mé pagàn, poui-dze te dimandé eunna бага ? Péqué lo non Digourdì ?

PAGÀN (*Fier de seutta dimanda*) Ah ! Seutta l'è eunna dzenta counta : adón, eun dzor... (*comenche a borboté, vague*) dou de no son partì ià pe eun mariadzo ; aprì can son tournoù i mitcho l'iye tar é l'ayoon fata de pantchì d'éve... se son betoù protso d'eun meur, mi l'è chortia la mamma de eun de sise dou... la mamma l'a vouaillà : « Deh ! Me raccomando... fiade pa tro le Digourdì ! » . Voualà ! De si momàn la Compagnì l'ayè son non !

NEVAOU Ouè mi pagàn, se sitte l'è lo non, vouillo pa imajin-ì le pièse que v'ouèide fé !

PAGÀN Aimé ! Pourta de reuspé pe le Digourdì é rappella-té que le Digourdì l'an pourtoù lo non de Tsarvensou ià pe to lo moundo !

Pagàn se levve.

PAGÀN Té pensa que can n'en fé la premiye pièse, n'ayè plen de dzi, n'ayè de machine tanque i mentèn de Veulla, n'ayè finque de pompì volontéo de Cogne é Perloz, n'ayè 600 volontéo de totta la Val d'Ousta que l'an édja-no pe fé la premiye ! Tourno diye : la premiye !

LE DOU NEVAOU (*Sourprì* 🤔) Pe la premiye 600 volontéo ?

MAGÀN (*Eun se levèn*) Mi senque te counte ? (*Eun prégnèn l'album é eun s'achouatèn*) Acoutade mèinoù, de sen que counte pagàn coppade la mèitchà, vardade eun car é tsapotade euncó eunna mia ! Vegnade seuilla que vo counto mé...

Teuppe 🍷.

Lemiye 💡 a gotse é i mentèn di palque.

Scène IV – CATRO TSATTE 🐱🐱🐱🐱

Si lo palque n'a 15 caèye plachaye si trèi feulle. Eun vétchot é eun éleveur bièn annouiya son achouatoù si la seconda feulla.

Eunna mamma entre to de coursa.

MAMMA (*I vétchot, avouè lo flo queue*) Squizade-mé ! L'è-ti dza comenchà ?

ÉLEVEUR Comme tcheu le demicro attaque a ouette é demì.

VÉTCHOT N'a pa de prisa.

MAMMA Amoddo. Mé ara dèyo vardé eun per de plase pe de paèn.

*La mamma comenche a se dizarbeillè pe vardé la plase i paèn.
Se gave lo paltó, eunna maille, eunna botta é le plache si le caèye.*

MAMMA So pe tanta Filoméne, la siaou, lo botcha... é l'oncle Gene ! (*Eun gavèn ià eunna caèya é eun se gavèn eunna botta*)
Pe llou que areuvve avouè la caèya avouè le raoue queutto eunna botta !

*La mamma finalemàn s'achouatte si la premiè feulla, totta émochon-aye. I contréo, lo vétchot é l'éleveur avèitson torse la mamma.
Silanse.*

MAMMA Bon mancon seun meneutte ! Spéèn que arrevisan tcheutte !

Silanse. Entron dou tsachaou. Eun de leur seuble eunna tsansón.

TSACHAOU I (*Eun quetèn de seblé*) N'i la fèi que n'en trompou poste ! (*I vétchot*) Squezade, l'è-ti seuilla la réunion de la tsasse ?

VÉTCHOT Véyade-ti pa que l'è la réunion di Comité di Bataille ?

TSACHAOU II Mi v'ouèide robo-no la plase ? Oueu totse a no, vo
v'ouyavade devàn ieur, oueu totse a no ! Lo devendro totse a
no !

VÉTCHOT Na, na, na.

ÉLEVEUR ... é oueu que dzor l'et ?

TSACHAOU II Oueu l'è devendro.

VÉTCHOT Oh la fèi n'i pa verià lo calandri !

TSACHAOU II T'ou veure que n'en trompoù tcheu dou é sen vin-ì
de desandro !

MAMMA (*I tsachaou*) Sssht ! Te vèi pa que sen a téatro !

TSACHAOU II Téatro ? A Tsarvensoù ? Sarè 20 an que n'a pamì lo
téatro a Tsarvensoù !

MAMMA Ouè mi seutta l'è totta eunna noua Compagnì ! Le dzoueunno
de ara l'an désidoù de beté torna si lo téatro a Tsarvensoù.

Le tsachaou, lo vétchot é l'élèveur son sensa paolle.

MAMMA Lèi crèyo pa que sade ren de to sen !

TSACHAOU I Na.

MAMMA L'an reumpli lo veladzo de manifeste, de volanteun, ià pe
totta la parotse !

TSACHAOU I Pa vi ren.

MAMMA L'an finque betoù-le si le-z-annonse di mor !

TSACHAOU I (*Éton-où, ver l'atro tsachaou*) Ah t'a comprèi ara qui
l'iye si Digourdì ! Mé pensò que l'iye eun rabadàn que l'iye
mancoù.

TSACHAOU II Mi son ià de tita ! Mé n'i vi icrì ouette é demì di nite
é n'i pensoù : « mi sarè-ti pa seutta l'aoua de fé le sépolteue ! ».

TSACHAOU I Adón l'è nèisia eunna noua Compagnì... adón avèitsen-
la !

VÉTCHOT Na, na, na, mé vou belle que i mitcho.

TSACHAOU I (*Eugn aritèn lo vétchot*) Mi na fièn eunna mia de prézanse, n'a gneun !

*Le dou tsachaou s'achouatton si la trèijima feuilla.
Bèichon eunna mia le lemiye.*

MAMMA Oh comenchon !

La mamma, le tsachaou, lo vétchot é l'éleveur boueuchon di man 🍌.

Silanse. Tcheut avèitson lo spettacolo.

VÉTCHOT (*A l'éleveur*) Mi senque l'è-ti salla beurta бага lé ?

Lo vétchot moutre avouè lo dèi eunna persona douàn llou.

ÉLEVEUR Que rotobala !

VÉTCHOT Se comprèn pa se l'è eugn ommo ou eunna fenna !

ÉLEVEUR Na.

VÉTCHOT Eunna бага pai... clloure i mitcho é templi ià la cllo !

MAMMA (*Inervaye, ver le dou que son eun tren de prédjì*) Deh ! Èit-sade que v'ouite eun tren de prédjì de la feuille de mé ! Itade quèi ! Grame lenve !

*Silanse. Lo secón tsachaou comenche a tossèi for, caze s'apeutre.
Son compagnón lèi baille de patèle si l'itseun-a, mi servèison a ren.*

ÉLEVEUR (*Eun tapèn eun bombón i tsachaou*) Tchappa eun bombón di préé é quèi !

TSACHAOU II Mersì !

Lo tsachaou meudze lo bombón é se calme. Silanse.

Lo premi tsachaou sthoppe a riye bièn for. Tcheu le-z-atre riyon pa é avèitson mal lo tsachaou que molle pa de riye. Silanse.

VÉTCHOT (*Eun sarèn le joueu*) Mi ! L'è-ti pa de Feleunna si lé ?

ÉLEVEUR (*Eun sarèn le joueu*) Orco can ouè !

VÉTCHOT (*Digoutó*) San-ti pa que son tcheu de-z-itrandji ?

ÉLEVEUR L'an fran recoilla-le tcheutte !

VÉTCHOT Se san dza l'italièn l'è dza eun méacillo ! Prètègnon de vin-ì inque prédji patoué !

TSACHAOU II Sssht ! Mal polì que v'ouite pa d'atro !

Silanse. Tcheu stchoppon a riye mouèn que lo premì tsachaou, que se sen eunna mia fouda plase. Silanse.

TSACHAOU II (*A l'atro tsachaou*) Salla lé i caro...

TSACHAOU I Sssht prèdza plan.

TSACHAOU II ... l'è-ti pa la feuille de Diego ? La blonda aoutre lé !

TSACHAOU I Ouè, ouè, l'è lleu... que couése ! 😊

Silanse. Lo vétchot s'eundrime. Lemiye 💡.

MAMMA (*Eun se levèn é eun bouéchèn le man*) L'è fenì ! (*Ver l'éleveur*) Oh l'è fenì !

L'éleveur l'è eunna mia dizorientou, mi can mimo se levve é eun bouéchèn di man rèche lo vétchot.

ÉLEVEUR (*I tsachaou*) L'è fenì !

Lo vétchot se rèche. Le tsachaou se levvon é tcheut eunsemblo boueuchon di man pe fé compagni a la mamma, totta euntu-ziasta de la pièse.

Teuppe 💡.

Lemiye 💡 a drèite di palque.

Scène V – FRAN DE-Z-ATTEUR PROFESSIONEL !

NEVAOUZA Magàn, n'ayè fran eun pebleuque mal polì...

MAGÀN Ouè pebleuque ! Se te vou queri-lo pebleuque ! N'ayè catro tsatte !

PAGÀN Mi senque te nen sa té ? Sophie tourna aoutre a mounougouï avouï salla бага lé, lo portable, Facebook, Amazon. . .

Pagàn gave ià di man l'album a magàn. Magàn se levve é tourne s'achouatté si la poltronna. Pagàn s'achouatte si le chofà, todzor i mentèn di dou nevaou.

MAGÀN Èitsa, pitoù d'acouté salle counte foule de té, ito pi belle achouataye inque tranquila.

PAGÀN (*I nevaou*) Magàn l'è an mia viille é adón se rappelle pa tan comèn son alaye le bague. Aprì sitte l'iye maque lo comenchemèn ! Alèn eun devàn. . .

Pagàn vionde le padze de l'album.

NEVAOU (*Eun moutrèn eunna fotografie*) Seuilla ? Senque fiavade ?

PAGÀN Seuilla ? Sé l'iye lo premì Printemps Théâtral, i téatro Giacosa de Veulla ! Que sucse ! Que bouéchì di man ! N'ayoon fé fran eunna dzenta pièse.

NEVAOUZA Wow ! Vo douàn d'entré si lo palque comèn vo après-tavade ? Senque fiavade douàn d'entrì ?

PAGÀN (*Eunna mia surprì de seutta dimanda*) No sayon de professioniste ! Tsaqueun s'aprestave, prouave sa partiya, aprì n'ayè de coiffeur, caqueun que fiè an mia de méditachón pe. . .

MAGÀN . . . senque t'i eun tren de counti ? Todzor de counte foule. Mi soplè ! Ara vo counto mé sen que capitave dérì le ridó .

Teuppe 🍷 a drèite di palque.

Lemiye 💡 a gotse é i mentèn di palque.

Scène VI – DÉRÌ LE RIDÓ

No no trouèn dèrì le ridó di Téatro Giacosa. Deun seutta scène tcheu le-z-atteur fan semblàn que lo ridó di fon di palque sisa lo ridó rodzo di téatro, de fasón que lo pebleuque sisa dèrì le ridó eunsemblo i-z-atteur mimo.

Tcheu l'an lo tecste de la pièse eun man, caqueun l'è ajitoù, d'atre relassoù é caqueun d'atro finque tro relassoù !

Eun scène n'a Cima achouató si eunna caèya.

CIMA (*Eun se levèn, bièn ajitoù, eun troulèn comme eun pedzeun*)
Na, na me rappello pa la battiya, poui pa ! Adón l'ye seumpla : « Mé te diyo qu'areuvvo de Feleunna... caco, peucho, avèitso la leunna » ... na, na, na, si tro ajitoù !

Entre Pierre arbeillà comme eun prie, eun béyèn eun ju de frouite. Cima s'achouatte.

PIERRE (*Bièn relassoù*) Paolo ! Senque t'a ? Te me semble preste a partì eun guèra !

CIMA Na, na, na, si tro ajitoù !

PIERRE Ita tranquilo.

CIMA (*Eun tremblèn*) Na, na, na, si tro ajitoù !

PIERRE Te la sa la partia ?

CIMA Na ! N'i eunna battiya seumpla : « Mé dze si de Feleunna... »
voulà n'i oublià-la.

Entron Marco é Joël. Eunna mia piòn 🤔, se teugnon si eun avouì l'atro.

JOËL (*Eun tsemièn torse avouì Marco*) Marco ! Tourna fiye salla de douàn que te fiyè bièn.

MARCO (*Eun se medzèn le paolle*) Queunta ? Ah ouè, (*eun tsantèn*)
« eun desì meulle lèi l'a fi ! ».

JOËL Mi brao ! Mi t'i meilloroù ! Ara te boueucho lo ten. . .

Joël se baille de patèle si la tsamba pe bouéchì lo ten. Paolo é Pierre avèiston la scène dispéroù.

MARCO (*Eun tsantèn (caze) a ten avouì Joël*) « Eun desì meulle lèi l'a fi ! ».

JOËL Mi brao !

MARCO Mersì, mi ara fièn eunna бага ? Prouèn la pièse.

JOËL Ouè !

CIMA Mi senque prouèn ? ! Viade pa comèn v'ouite combinou ?

JOËL (*Eun se medzèn le paolle*) Senque n'at ? N'a quetsouza que va pa ?

CIMA Te vèi pa comèn ti combinou ?

JOËL (*Comme douàn*) Pequé té t'i combinou mioù de mé ?

CIMA Quetèn pédre. . . (*eun braillèn*) n'en lo spettacolo seutta nite !

JOËL Bon sen beun a poste ; sen aloù bèye eunna goloù é sen arevou lo pi vito poussiblo é sen arevou ara. . . é ara prouèn. . .

CIMA Mi v'ouite deun eun stat ! Iaou v'ouite aloù ? Di Moldave ?

MARCO Na, sen aloù i Café du Tèatro, que l'è pi protso !

CIMA Quetèn pédre. Na, na, na !

JOËL Te comprègno pa. Tcheu le cou t'i ajitoù. Lé de foua (*moutre lo ridó di fon*) lèi seràn catro tsatte.

CIMA Catro tsatte ? ! Mi té t'i ià de tita ! T'aré bi eunna cisterna de rodzo !

MARCO (*A Joël*) Va vère véo de dzi n'at.

JOËL (*Eun s'aprotsèn i ridó di fon*) N'aré catro dzi. . .

Joël se beutte a dziillón é avèitse dézò lo ridó .

JOËL (*Eun rièn*) Mondjeu ! Mondjeu ! L'è plen de dzi !

CIMA (*Malechà*) Mi t'i té plen !

JOËL N'i jamì vi tan de dzi pouèi ! Gnenca a la fèira de Sent-Or.

CIMA Oh mondjeu, na, na, na !

MARCO (*A Cima*) Ita tranquilo ! Acoutta, fièn an baga... vou mé vère véo de dzi n'at... llou (*moutre Joël*) l'è normal que l'a vi-nèn an matse : vèi dobro !

Marco s'aprotse i ridó di fon é, can beutte la tita i mentèn di ridó, Joël lo pouche. Marco fenèi foua di ridó, mi to de chouite tourne dedeun, iao acappe Joël eun tren de riye.

MARCO (*Malechà*) Mi t'i marón ! Mi queunte fegueue te me fi fiye ? !

PIERRE Sssht !

JOËL Mi se squerse !

Entre Francesca.

FRANCESCA Adón, mi senque l'è to si vacarno ? Vo siade panco tsandjà ? Senque v'ouite eun tren de fiye ? Dji meneutte é comenchèn ! I galoppe, vito vo tsandjì !

MARCO Ouè Francesca, eunna maille é eun per de pantalón é sen preste.

JOËL Eunna mailletta é si preste !

Marco, Pierre é Joël chorton.

FRANCESCA ... é tcheu le-z-atre iaou son ?

CIMA Mi que nen si. Oh na, na, lèi la fièn pa ! Na, na, na !

FRANCESCA Oh Cima ! Calma té... ouè... sit l'è andait !

Entre Simone eun saoutèn é avouè eun vazet de zuccherini alcolique.

SIMONE (*To contèn*) Ouélla Franci ! Agouta euncó té eun zuccherino !

Simone soumón eun zuccherino a Francesca.

CIMA (*Todzor pi ajitoù*) Ouè senque l'è oueu ? L'è fita ?

FRANCESCA Euh Simone Roveyaz ! Soplé, dji meneutte é comen-
chèn !

SIMONE (*Eun moutrèn Cima*) ... é sitte ? T'a pouiye eh ?

*Simone, comme se Cima fuche eun petchoù tseun, lèi tappe i
vol de zuccherini. Cima tsertse de le medjì i vol.*

Entre Joëlle eun galopèn, an mia inervaye.

JOËLLE Sssht ! Oh mi prédzade plan ! Se sen totte lé dérì ! (*A Fran-
cesca*) A propoù, Joël iaou l'è ? Dièn proué eun per de bague.

FRANCESCA N'i spedi-lo se tsandjì eunsemblo i-z-atre é l'a deu-me
« eunna mailletta é si preste » ... panco vi-lo !

JOËLLE Oh mondjeu !

CIMA (*Eun tremblèn todzor si la caèya*) Na, na, na, la spountèn pa
si cou !

FRANCESCA Sen stra eun retar !

JOËLLE Lo si... é aprì fa co fé la foto comme souvenir de la pre-
mière i Giacosa !

FRANCESCA Oue la ferèn se n'en lo ten !

JOËLLE Pouèn euncó pa la fiye ! Pe comèn pouriye chotre seutta
foto : sitta (*eun moutrèn Cima*) que tremble comme eun ped-
zeun, l'atro lé (*moutre Simone*) que areuvve pa a resté rito,
l'atro que molle pa de bèye !

FRANCESCA Si pa sen que te diye. Euncó mé me fa liye lo bocón
de mé...

Entre Joël.

JOËL (*Eun fièn eunna pirouette pe se moutré*) Me voualà preste pe
lo referendum !

JOËLLE Ouè mi Joël, mi comèn t'i arbeillà ?

JOËL Pequé ? Pe la pièse di *referendum*.

JOËLLE T'i arbeilla-te pe la pièse de l'an passou ! Seutta l'è la noua pièse, l'opetaillo moderno.

JOËL Isto ! La noua pièse ! L'opetaillo moderno.

JOËLLE Rècha-té va ! Soplé, galoppa te beti eun pijama ou quet-souza que semblise a eun pijama !

JOËL Mi so semble eun pijama !

Joël comenche a chotre di palque.

FRANCESCA (*Ver Joël*) Na, Joël iaou t'i eun tren d'alé ? Ara restèn tcheutte seu que de sé a dji meneutte no fa fé la fotografie.

Entre Pierre.

FRANCESCA Boneur que l'è arrevoù euncó Pierre. (*Ver Pierre*) A propoù Pierre Savioz : t'a pensoù té i souffleur ?

PIERRE Ouè le joueur. Aprì areuvvon Marco é Simon.

FRANCESCA Na le souffleur !

PIERRE Ah le souffleur. Mi Francesca ! Selón té no n'en fata di souffleur ? Mi na, n'i pa crià gneun, no n'en pa fata !

CIMA Senque ? N'en pa le souffleur, voualà l'è feniya. T'ayè eunna бага a fiye, eunna ! (*Tsache ià Pierre*) Mi va ià soplé ! (*Ver Joëlle*) Euh Giada, na euh Esterina, na Jasmine...

JOËLLE Joëlle.

CIMA Soplé va queri Pepe é Paoletta, dimanda-lèi se pouon fé le souffleur vi que leur cougnisson la pièse.

JOËLLE Ouè, ouè mi té achoutta-té é calma-té... (*Ver tcheutte*) mé vou tsertchi Pepe é Paoletta é tcheu le-z-atre pe la foto... (*Ver Simone*) é té Simone planta-la-lé de tsemin-è de rempleure le dzi de seucro que aprì san pa iaou van !

Joëlle chor é entre Richard, lo fotografe avouè eunna grousa machina di foto de la Kodak.

FOTOGRAFE Voué garsón, v'ouite preste pe la fotografie ?

JOËL Oh l'è arrevoù Richard pe la fotografie ! Veun maque.

JOËLLE (*Dèi foua scène*) Arrevèn euncó no !

Avouè Joëlle entron d'atre atteur de la pièse : Francesca Lucianaz, Giada Grivon, Jasmine Comé, Laurent Chuc, Ester Bollon, Ilaria Linty. Tcheutte se beutton eun pozechón : se plachon eun demisercllo eun baillèn le-z-ipale i pebleuque. Richard l'et i fon di palque.

FOTOGRAFE Le pi ate protso i pi base.

JOËL Senque vou diye ?

FOTOGRAFE I meun trèi diade fromadzo ! Eun, dou... trèi !

TCHEUTTE (*Eugn eurlèn*) Fromadzo !

FOTOGRAFE Na l'a pa martchè ! Fa refiye.

CIMA Mi eun pi feun pouavade pa lo acapé ?

FOTOGRAFE I meun trèi : eun, dou... trèi !

TCHEUTTE (*Eugn eurlèn*) Fromadzo !

FOTOGRAFE A poste !

Joël accompagne foua Richard. Dimèn tcheu le-z-atre se beutton eun demisercllo ver lo pebleuque é s'apreston pe lo motte final.

JOËL Adón Richard mersì de totte é a la prochène.

Richard chor é Joël rejouèn le-z-atre.

JOËL Alé Garsón, ara si reprèi-me eunna mietta ! Mondjeu ! V'ouite preste ? I meun trèi, noutre motte... eun, dou...

Dimèn entre eun scène Richard é se tappe i mentèn di demisercllo.

FOTOGRAFE (*Eun braillèn*) Fromadzo !

TCHEUTTE (*Bièn malechè*) Mi va ià ! Feulla ià !

Richard veun tchachà foua. Lo groupe tourne se beti eun demi-sercillo, tcheutte avouè eunna man pouzaye desì salla de Joël.

JOËL Eun, dou, trèi...

TCHEUTTE (*Eun braillèn*) Todzor pi Digourdì !

Tcheutte chorton a gotse, mouèn que Joël que chor ver lo fon, dèrì lo rido, pe bailli lo bienvenù i pebleuque é pe présenté la pièse l'« Opetaillo Moderno ».

Teuppe 🧐 a gotse é i mentèn di palque.

JOËL Bonsoir a tcheutte. Oueu n'en la Compagnì di Digourdì de Tsarvensoù que pe lo premì cou deun l'istouére pouye si lo palque di Giacosa. Vo queutto donque a la pièse icrita pe leur « L'opetaillo moderno » !

Lemiye 💡 a drèite.

Scène VII – PLEN DE SOU !

MAGÀN Voualà : sen l'è sen que l'è capitoù dèrì le ridó di premì Printemps !

NEVAOU (*Ver pagàn*) Ouè, v'ouyavade cheur pa de esper de téatro !

MAGÀN Na ! Digourdì pa pe ren !

PAGÀN (*Ver magàn*) Mi té te dèi todzor beti lo bèque i mentèn !
Acoutta, va aoutre a lavé le-z-éze.

MAGÀN Le-z-éze ? Mi te sa pa que le-z-éze se lavon pamì a man ?

PAGÀN Comèn na ? Comèn se fé ?

MAGÀN Te féo vèrè. (*Eun terièn foua son téléphone*) N'i djeusto dit-sardjà eunna applicachón.

Magàn gnaque eun botón si son téléphone.

MAGÀN (A vouése ata) Fuffi !

Vouése derì le ridó 🗿 : « Ouè Sophie ».

MAGÀN (Comme douàn) Lava le-z-éze !

Vouése derì le ridó 🗿 : « Va bièn ».

MAGÀN (A pagàn) Té te sen de tapadzo di platte que se lavon ?

PAGÀN Mi senti senque ? Sento té que t'i matta !

NEVAOUZA Magàn ! Ouè, la lavaplatte l'è eun martse.

MAGÀN Vou aoutre vèrè. Si pa tan chiya de seutta modernitoù.

Magàn chor.

PAGÀN Mondjemé ! Sen mal betoù. (I nevaou) Acoutade, magàn l'è eunna mia ià de tita. Can mimo, Aimé é Julie... sitte l'iye maque lo comenchemèn. Aprì n'en fé eunna matse de spet-tacle, sen fé-no eunna matse de sou é avouì sise sou n'en fé de fite, de maende, de sin-e é pi finque de dzente chortiyè !

NEVAOUZA De chortiyè ? Wow ! Iaou v'ouite aloù ?

PAGÀN Sen aloù ba a Pollein... na... Polonia ! Aprì Londra, San Francisco, Mosca, Dubai é pi finque Rio ! Mì ara vo counto de can sen aloù eun Piémón !

NEVAOU Na, na, counta-no vèi de can t'i aloù a Dubai ou a Rio.

Entre magàn.

MAGÀN Ouè Paul, counta vèi de can t'i aloù a Rio, té que t'a tan pouiye de l'aviòn.

PAGÀN (Malechè) Ara itade quèi tcheutte ! Ara vo counto de can sen aloù i Ca' Brusà ba pe Alba !

Teuppe 🍷 a drèite.

Lemiye 💡 a gotse é i mentèn di palque.

Scène VIII – CHORTIYA BIÈN DIGOURDIA

Acapèn nou caèye plachaye pe représenté eun poulmeun. Douàn lo sédil di chauffeur, l'è eun volàn. Tote le-z-achón di-z-ateur que dèyon euntérajì avouì lo poulmeun (iverteua di pourte ou di finestreun) seràn mimaye.

Lo chauffeur l'è achouatoù deun lo poulmeun to solette, eunna mia eunfastedjà.

CHAUFFEUR Sise de Tsarvensoù son todzor eun retar : pe la chortiya di For. . . eun car d'aoua, le pompi volontéo demì aoua. . . é ara sise di téatro l'an dza trèi car d'aoua bondàn ! Atégnèn euncoa. Dimèn controlèn que sise totte a poste : le lemiye lèi son, lo clacson martse é le panavèyo martson. . . se fé lo temporal sen a poste. Ara atégnèn.

Entron Jordy é Simone. S'aprotson i finestreun, prouon a prédjì i chauffeur mi se sen ren.

CHAUFFEUR Sento pa !

Lo chauffeur teurie ba lo finestreun.

JORDY Mé é Simone sen arrevoù ! Atégnèn seuilla de foua le-z-atre.

CHAUFFEUR Na, na vegnade si ! Pouyade maque si que aprì alade a bèye eun cafi é vo vèyo pamì ; si beun comèn martson le bague.

Simone ivre lo :

Simone é Jordy entron deun lo poulmeun. Jordy cllou lo portellón³. Entron eun scène Thierry é Joël. Joël l'at eun petchoù saque pe la mordiya.

CHAUFFEUR (*Eugn avèitsèn Thierry é Joël*) Sise ? Sarèn pa de vo sise ?

JORDY Ouè, son de no !

Thierry ivre lo portellón.

JOËL Bondzor, pouèn entré ?

CHAUFFEUR Vo v'ouèide pa comprèi. Vo v'achouatade devàn.

JOËL Pequé ?

CHAUFFEUR Pequé se itade mal, se vo tourne si to sen que v'ouèide bi ieur, oumouèn n'a lo finestreun !

JOËL Que stoufiàn !

Thierry cllou lo portellón.

THIERRY Que boutro !

Joël ivre la pourta di poulmeun. Thierry entre pe premì pe se plachì protso di finestreun. Eun passèn desì Thierry, Joël entre é se plache i mentèn. Thierry cllou la pourta.

CHAUFFEUR (*Eun moutrèn lo saque de Joël*) So senque l'è ?

JOËL So l'è la mordiya.

CHAUFFEUR Adón la mordiya va dèrì !

Lo chauffeur tchappe lo saque é lo tappe dèrì.

JOËL Mi pequé ?

CHAUFFEUR Pequé se no ariton fan de counte !

3. Dèi-z-ara tcheu le cou que lo portellón se ivre ou se cllou, se sen lo son di portellón.

THIERRY (*Dezò vouése a Joël*) Que malpoli si chauffeur !

JOËL Ouè t'a rèizón.

Entron eun scène trèi feuille : Marlène, Joëlle é Stephanie. Se plachon douàn lo poulmeun pe se fé eun selfie.

JOËL (*I chauffeur*) Seutte son avouì no.

CHAUFFEUR Bièn, eunna mia de feuille fa beun !

JOËL Ouè nen n'en maque trèi. Fan todzor de foto ! Ara pouèn diye sen que n'en voya, mi can entron fa fé atenchón.

Le feuille prouon a ivrì lo portellón, mi areuvvon pa. Simone se levve é lo ivre. Le trèi feuille entron é salion tcheutte.

STEPHANIE Squezade lo retar, mi n'ayé lo passadzo a livel d'Am-pallian ba...

SIMONE Ouè, fa cloure lo portellón !

Simone se levve é comme douàn clou lo portellón.

CHAUFFEUR (*Ironique ver le feuille*) Ouè é euncó finque lo semaforo di Bourni ! Can mimo, pouèn parti ? N'at euncó eun poste vouido...

SIMONE Ouè pequé fa passé prendre Marco a Feleunna.

CHAUFFEUR Ah, va bièn.

JOËL (*I chauffeur*) Feleunna l'è djeusto douàn d'arrevé a Pollein.

CHAUFFEUR Si beun iaou l'è Feleunna !

Lo chauffeur aleumme lo poulmeun, mi lo moteur vou pa nen sèi de parti.

🔧 TENTATIF AVIEMÀN MOTEUR 🔧

JOËL (*Eun rièn*) Comenchèn bièn !

 AVIEMÀN MOTEUR

Lo chauffeur reproue.

Finalemàn lo moteur s'aleumme.

Lo chauffeur beutte la rétro.

CHAUFFEUR Vo que v'ouite ba i fon, diade-mé se n'i de caro dèrì.

JORDY Ouè te diyo mé. Veun maque ! Veun, veun, veun...

Lo poulmeun totse contre lo meur é tcheutte boueuchon la tita countre lo sédil.

JORDY Praou pouèi !

CHAUFFEUR Ouè n'i praou sentì ! Tacaleun !

Lo chauffeur beutte la premiye é partèi.

JOËL Sen belle partì, alèn ba pe lo Piémón, medjì de tseur...

Silanse.

JOËL N'at an mia de silanse desì si poulmeun...

THIERRY Beteun de mezeucca !

Thierry alondze la man pe avì la radió, mi lo chauffeur lèi baille eunna dzifla.

CHAUFFEUR Na, beutto mé !

Lo chauffeur tsertse eun per de canal mi n'a maque de publisitó.

CHAUFFEUR Tchouyéèn, maque de publisitó.

JOËL Adón fièn eunna tsansón no ! Joëlle attaca-là té !

JOËLLE Va bièn. (*Eun tsantèn*) Le Digourdì...

TCHEUTTE (*Eun tsantèn*) ... le Digourdì, le Digourdì de Tsarvensoù, le Digourdì de Tsarvensoù, le Digourdì de Tsarvensoù.

JOËL Seutta l'è fran dzenta, la fièn euncó can vegnèn si.

CHAUFFEUR Va bièn. Can mimo no aprotsèn... èitade : lé n'a lo premì sate de Feleunna. Ouè l'an fé-lo fran ate...

Tcheutte (douàn la premiye feulla, aprì la secounda é a la feun la trèijima) sauton si can lo poulmeun pase desì lo dosso.

JOËL Ouè son fran ate, sourtoù ara que l'an levou-lo. Son beun dzen é comodo ; mi n'a todzor de dzi que se lamenton...

CHAUFFEUR Djèique ! Baillon maque de problème...

JOËL (*Eun contegnèn son discoù*) ... pren eunna Jeep se te ite eun Val d'Outa.

CHAUFFEUR (*Eun contegnèn son discoù*) ... ou te va a 15 a l'aoua ou te difé la machina...

JOËL Djèique.

CHAUFFEUR Nen fan eun tsaque 100 mètre !

JOËL Vrèi ! Djeusto pouèi. Ah ! Arrevèn protso de Feleunna.

Dimèn, tcheu le-z-atre s'arbeuillon pe se toppé di frette que comenche a lèi itre.

CHAUFFEUR Iaou ite Marco ?

JOËL Ba lé, 50 mètre a drèite.

THIERRY (*A Joël*) Toppa-té que fé frette.

Joël, eunsemblo a tcheu le-z-atre, teurie foua di saque de paltó, de gan, de bounet pe se toppé di frette. Dimèn lo polmeun s'arite.

CHAUFFEUR Mondjeu que frette ! Tsandze fran l'er ! Mé n'i pa prèi ren déri.

Caqueun baille i chauffeur eun bounet.

JOËL (*Eun fenissèn de s'arbeilli*) Mé si organizou-me bièn, pequé avouè lo frette que fé seu i mèis d'avri fa pa squersé !

CHAUFFEUR Ouè pensade de alé lo queri ? Seu fé frette !

JOËL Ouè, ouè vou mé ! Vo itade seuilla !

Joël bèiche ba di poulmeun. Se sen eugn :

 OUA FRÈIDE 

JOËL (*Eun braillèn*) Marco ! Marco !

Entre Marco eun mailletta.

MARCO (*A Joël*) T'a fenì de fé lo marón ?

JOËL Mi comèn te fé sensa eun paltó ? Beutta eun paltó que fé frette !

MARCO Ah, ah ! Tcheu le-z-àn la mima battiya. . . sen a avrì marón !

JOËL Ouè, pouya si que fé frette !

Marco ivre lo portellón é pouye si lo poulmeun. Joël, tot i gallope, cllou lo portellón, ivre la pourta é se tappe desì a Thierry pe entré.

THIERRY (*A Joël*) Ouè mi que couése dzalaye !

JOËL T'a senti ?

Thierry cllou la pourta. Se sen pamì lo ravadzo de l'oua dzalaye que soufflè foua di poulmeun. Le chauffeur partèi. Tcheutte se dizarbeuillon.

JOËL Comenche l'Adret. Fenì Feleunna comenche a fé tsa. Te pase lo pon é te reste dza mioù.

CHAUFFEUR (*Eun avèitsèn douàn*) Grousa seutta rionda ! L'è noua ?

JOËL Na l'è tchica que l'an fé-la.

Lo chauffeur entre deun la rionda avouì bièn de vélosité. Vionde lo volàn é tcheutte se plèyon ba a leur drèite.

THIERRY Plan, va plan !

JOËL Ara praou chor foua !

CHAUFFEUR Fièn euncó eun tor !

TCHEUTTE Na, na, na !

THIERRY Plan, va plan !

*Lo chauffeur vionde de l'atro couti lo volàn é tcheutte tournon
a itre achouatoù drette.*

JOËL (*I chauffeur*) Mi comèn se fé a prendre de rionde pouai ! Can
te entre te rallente !

CHAUFFEUR Mi n'i pa fé-la mé seutta rionda !

JOËL Mi soplé di pa de counte foule !

THIERRY Penson de itre i couscrì !

CHAUFFEUR Ouè avouì vo desì semble beun de itre i couscrì. Can
mimo ara tanque a Muntal Deura no ariterè pa gneun.

JOËL Spéèn.

Silanse.

To d'eun creppe, le Digourdì achouatoù déri lo chauffeur sauton si pe l'er comme se quetsouza sise pasoù dézò le ràoue di poulmeun. Lo chauffeur arite to de chouite lo poulmeun.

JOËL Mi senque l'è capitoù ?

CHAUFFEUR Si pa. Avèitsèn déri se n'a quetsouza.

Tcheutte se viondon pe avèitchi. Gneun vèi ren.

JOËL Mi avèitsèn euncó eun cou.

Tcheutte eunsemblo se viondon pe avèitchi. Gneun vèi quetsouza.

CHAUFFEUR Adón bèicho ba pe vère.

Lo chauffeur ivre la pourta é bèiche ba di poulmeun. Can cllou la pourta Joël ataque a prédjì. Dimèn lo chauffeur mioule sen que n'a déri lo poulmeun.

JOËL Jordy eun chauffeur pouèi te pouè accapi-lo maque té!

JORDY N'en vouli reusparmì pe pa prendre Pelanda?

JOËL Ouè mi se pou pa prendre de chauffeur comme sitte!

THIERRY (A Joël) Ah can t'ie té Prézidàn!

Lo chauffeur ivre la pourta.

CHAUFFEUR Garsón... n'ì sètchà eun tèissón.

JOËL Eun tèissón? N'at eun deun to lo Piémón é t'a tchapou-lo té?

CHAUFFEUR Eh ouè.

JOËL Ara vèi té sen que fa fiye.

CHAUFFEUR Ara l'è mioù querì le Garde Forestier pe pa èi de counte.

Can lo chauffeur cllou la pourta Joël ataque a prédjì.

JOËL Mi l'è pa poussiblo. A té, Jordy, te baillèn pamì de-z-entsardzo.

THIERRY (A Joël) Pregnèn no lo moublo?

JOËL Te di?

THIERRY Mi ouè tante sitte l'è pa bon a gueudé.

JORDY Senque?

JOËL (Ver tcheutte) Mé é Thierry n'en i eunna idou! Se prégnèn no lo poulmeun é ataquèn ba?

Tcheutte, mouèn que Joëlle, son d'acor é entuziaste. Lo chauffeur l'è euncó eun tren de prédjì i téléphone. Joël pouye si lo poste di chauffeur.

JOËLLE (Dispéraye) Joël soplé, fièn pa le Digourdi!

Joël beutte eun martse. I mimo ten areuvve lo chauffeur.

CHAUFFEUR Mi senque v'ouite eun tren de...

Partèi lo refrain de :

 RUDA TAŃCZY JAK SZALONA - CZADOMAN 

Lo poulmeun partèi ià a flama. Lo chauffeur lèi galoppe déri.

*Aprì eun per de seconde a totta vélositoù, la mezeucca se tchoué,
totta l'achón rallente.*

JOËLLE (*Lentamente, a Joël*) Attenchón, la viille !

*A drèite entre eunna viille madama. Let eun tren de traversi la
rotta. Tot a rallentateur, Joël frène, tcheutte boueuchon la tita
countre le véyo ou le sédîl. Dimèn, areuvve euncó lo chauffeur
tot a galoppe, mi boueuche la tita countre lo déri di poulmeun.*

Teuppe  a gotse é i mentèn di palque.

Lemiye  a drèite.

Scène IX – HOLLYWOOD

NEVAOU Adón te vèi que sise Digourdì son pa itò de super star.
V'ouite nèisì pe eunna cantin-a, lo voutro non l'è chortì pe
eunna souaré de fita, pe la premiye pièse n'ayè catro tsatte,
i premì Printemps fiavade maque de confujón é di chortie...
prédzen-nen pa !

PAGÀN Éitsa que grama lenva que t'a ! Fiade attenchón : pourtade
reuspé pe le Digourdì ! Rappelade-vó que le Digourdì l'an...

LE DOU NEVAOU ... pourtoù lo non de Tsarvensoù pe to lo moundo !

PAGÀN Ouè fran pai ! (*Eun viondèn la padze de l'album*) Avèitsade
vèi sen que l'è capitoù aprì. Aprì eun per de-z-à n'en fé eunna
matse de sou é la Val d'Outa l'iye viin-a tro petchouda pe no
é sen partì aoutre pe l'Amérique !

NEVAOUZA Comèn v'ouite aloù aoutre pe l'Amérique ?

PAGÀN Totte l'è comenchà mersì a eun *court-métrage* que n'en fé avouè Alessandro Stevanon. To lo moundo l'a vu si *court-métrage* é l'an euncó finque quera-no a Hollywood ; mi ara lamerio sentì la vouése de magàn... di vèi se l'è pa vrèya seutta counta ?

MAGÀN Ouè, pe eun cou me totse bailli-te rèizón. Mi can mimo n'i pa comprèi sen que l'an vi eun vo sise de Hollywood pe finque vo baillè eugn Oscar !

NEVAOUZA Eugn Oscar ? Qui de vo la gagnà l'Oscar ?

PAGÀN Se me rappello amoddo...

Teuppe 🗨️ a drèite.

Lemiye 💡 a gotse é i mentèn di palque.

Scène X – LA NITE DI-Z-OSCAR 🏆

Eun scène, arbeillà bièn élégàn, n'a lo prézentateur de la nite di-z-Oscar. L'a douàn llou eun pupitre.

CONDUCTEUR Bonsouar, mersì a tcheutte, voutro *accueil* toujours si chalereu m'émochoun-e todzor. Mi l'è pa pe mé que v'ouite inque, tellamente nombreu pe reumplire totte le caèye di si magnifique téatro. V'ouite inque, *mesdames é messieurs*, pe-qué l'è arrevoù lo momàn que tcheu no, que to lo mondo l'è eun tren d'attendre : l'asségnachón de l'Oscar pe lo meillaou atteur protagoniste. L'è itaye bièn bataillaye. Vo rappello ara le sinque finaliste, euncó se vo sade bièn que maque eun de leur gagneré, maque eun non l'è icrì deun la busta, maque eun de leur entrerè deun l'istouére. Le sinque finaliste son :

1. Leonardo DiCaprio ;
2. Julia Roberts ;

3. George Clooney ;
4. Angelina Jolie ;
5. Paolo Cima Sander.

Complèmen a tcheu leur. De caque momàn devrie arrevé la busta é finalemèn noutra quèriaouzitòu serè satisfète.

*Entre eunna feuille élégante avouè eunna busta rodze é l'Oscar.
Lo conducteur can la vèi se émochoon-e é la bèije eun per de
cou. Aprè pren la busta.*

CONDUCTEUR (A la feuille) L'è salla djeusta ? Pa comme l'atro an que l'iye eugn'atra busta ?

ASSISTANTA Spéèn !

CONDUCTEUR L'Oscar pe lo meillaou atteur protagoniste va a . . .

Lo conducteur ivre la busta é teurie foua eun papè.

CONDUCTEUR . . . Paolo Cima Sander !

Paolo Cima Sander l'è achouatoù i mentèn di pebleuque. Can sen son non se levve eun pià tot émochon-ou. Eunna lemiye s'aleumme fran iaou l'è achouatoù.

CIMA (Bièn émochon-ou) Oh mondjeu, mi na, lèi crèyo pa, mi fran mé. Attégnade que areuvvo ba.

Partèi la tsansón :

 KATCHI - OFENBACH VS. NICK WATERHOUSE 

Paolo, tellamente ajitoù, miclle eunna mia d'anglé avouè lo patoué.

CIMA Areuvvo ! Oh my God ! Mersì a everybody !

CONDUCTEUR Ouè t'attégnèn !

Paolo s'aprotse i palque.

CIMA Me l'attégnavo pa !

*A couza de l'émochón, Paolo lèi beutte bièn de ten pe arrevé .
Lo conducteur, adón, tsertse de fé passé lo ten.*

CONDUCTEUR Adón lo attégnèn. Qui se l'attégnave ? Complèmèn a Paolo, mi euncó a tcheu le-z-atre que se refàn pi eugn atro an. . .

CIMA (*Eun braillèn*) N'i sbaillà chortiya ! Areuvvo !

CONDUCTEUR Ouè t'attégnèn. Eugn éffé seutta l'è sa souaré ; l'attégnèn volontchè, n'en pa de prisa.

CIMA (*Comme douàn*) Areuvvo !

CONDUCTEUR (*A la feuille, pe fé pasé lo ten*) Aprì pensa que dzen : pe eunna persona, que tanque ieur itave deun petchoù veladzo de montagne, arrevé inque a Hollywood, arrevé i temple, i Mont Olympe, a l'éillize di cinéma mondial.

ASSISTANTA Euncrouayablo !

CONDUCTEUR Ah, voualà Paolo Cima Sander !

Paolo areuvve dézò lo palque é comenche a saliì le dzi. La mezeucca s'arite.

CIMA (*Avouì la ranfan-a*) Me voualà ! *Of course, ok, ok. I don't me l'attégnavo pa. (Eugn eumbrachèn eunna madama)* Oh madama moratsade-me vèi !

Paolo conteneuvve a saliì le dzi.

CIMA Mersì, mersì, one, two, three. . . *don't worry be happy !*

CONDUCTEUR Prèdza maque patoué Paolo !

CIMA (*Eun calabrot*) Ni vidimu ndu giardinu ! Mersì ! (*Ver lo conducteur*) Iaou son le-z-itchilì ?

Lo conducteur moutre iaou son.

CIMA (*Eun pouyèn si lo palque*) Mondjeu di paadi !

Paolo areuvve si lo palque é salie lo conducteur é la feuille que lèi baille l'Oscar.

CIMA Oh mondjeu ! Mi comèn diade seu a Hollywood « *tutto bagnato di caldo* » ?

CONDUCTEUR Blet de tsa !

CIMA Adón si fran blet de tsa ! (*Eugn avèitsèn l'Oscar*) Mi euncó finque Oscar... pensao pa a eunna бага pouai aprè itre itoù Secretéo di Consor de l'Éve de Feleunna.

La feuille chor.

CIMA Ara senque fa diye ?

CONDUCTEUR Sen que t'a voya, lo palque l'è de té.

CIMA (*Todzor émocho-n-ou*) Na, na, trop eumpourtàn si Oscar. Fa remersì la fameuille : Mami Roby é Papi Tony...

La feuille entre é dézò vouése baille eun mésadzo i conducteur, dimèn que Paolo conteneuvve avouè le remersiemèn.

CIMA ... trop eumpourtàn Oscar ; se sit an l'è l'Oscar eugn atro an seré lo Nobel !

CONDUCTEUR Ouè cheur !

CIMA (*Todzor bièn émù é ajitoù*) Adón fa remersì euncó le vezeun ! La vezin-a Miranda, Armando é Lucia que son bièn eumpourtàn ; mi sourtoù comèn pa remersì le-z-amì de mé de Feleunna é Plan-Feleunna, le-z-amì valdotèn crèisì avouè mé : Rocco, Turi, Mimmu *u pulici*, Tommaso Buscetta, Salvatore Savastano, Tommaso *u pistulero* é Johnny *a munnezza*. Mi can mimo... Oscar ! Que dzen ! Can mimo si arrevoù seuilla avouè la fameuille, le-z-amì... mi comèn pa remersì le-z-amì Digourdi ! L'an édja-me, son restou-me protso, l'an pourto-me seuilla a Hollywood, djeusto ?

CONDUCTEUR Ouè Hollywood !

CIMA Le Digourdì que son crèisì avouè mé !

CONDUCTEUR L'è to vrèi Paolo é te pou le remersì, te pou lo brailli a tcheutte ! Pequé me diyon ara de la réjì que n'en eunna sourprèiza pe té : Paolo, *mesdames é messieurs*, n'i fran l'onneur de querì inque si lo palque tcheu le Digourdì, totta la compagnì deun laquelle Paolo l'è crèisì é que la fé-lo vin-à lo bon atteur que ara l'è douàn no ! Réjì ! Mezeucca !

 KATCHI - OFENBACH VS. NICK WATERHOUSE 

Lo conducteur queurie, eun aprì l'atro, tcheu le Digourdì si lo palque. Tsaque Digourdì, arbeillà élégàn pe la nite di-z-oscar, attraverse lo parterre eun salièn lo pebleuque é pouye si lo palque pe saliè Paolo.

CONDUCTEUR N'i lo plèizì de querì si lo palque :

- Pierre Savioz ;
- Ester Bollon ;
- Giada Grivon ;
- Laurent Chuc ;
- Jasmine Comé ;
- Francesca Lucianaz ;
- Marco Ducly ;
- Ilaria Linty ;
- Marlène Jorrioz ;
- André Comé ;
- Joëlle Bollon ;
- Joël Albaney ;
- Jordy Bollon ;
- Simone Roveyaz ;
- Thierry Jorrioz.

La mezeucca s'arite.

CONDUCTEUR Voulà son tcheue inque. *Mesdames é messieurs*, a vo le Digourdì !

Teuppe 💡 a gotse é i mentèn di palque.

Lemiye 💡 a drèite.

Scène XI – AN MATSE DE DVD

NEVAOU ... é queun l'ye lo titre de si *court-métrage* que l'a fé gagnì l'Oscar a Cima ?

PAGÀN L'ye... « RECONSTITUTION – La vèille di gran dzô ».

NEVAOUZA ... é senque counte ?

PAGÀN L'ye la counta... (*Ver Sophie*) de senque counte ?

MAGÀN L'ye la counta de la *reconstitution* de noutra Quemeua : sinque Tsarvensolèn, deun lo 1946, l'an prei eun man Tsarvensoù.

NEVAOU Se pou veure ?

PAGÀN Ouè ! N'en euncó lo DVD ! (*A Sophie*) Iaou t'a catcha-lo ?

MAGÀN Lé avouì le bague de té !

PAGÀN Ouè, t'aré caya-lo ià !

NEVAOUZA Eun DVD ? Adón to lo moundo l'arè vi-lo !

PAGÀN To lo moundo ! L'atsetavon si Amazon, l'avèitsavon si l'iPhone, l'atsetavon euntchì no ; mi lo cou que n'en vendi-nen de pi l'ye l'an que n'en fé la pièse pe le dji-z-àn di Digourdì ! L'ye lo 10 marse 2018 i Tèatro Splendor !

NEVAOU Mi iaou i Splendor ?

PAGÀN Iaou ? (*Eugn avèitsèn amoddo lo pebleuque*) Lé ! Can te chor a gotse ! Me rappello que l'an bailla-no eunna matse de sou ! N'en to vendì é vo sade senque l'è capitoù ? L'è arrevoù eugn ommo que l'a bailla-no pe eun DVD 100 euro !

NEVAOUZA Mi qui l'ye si matte ?

MAGÀN L'ye lo Seunteucco deun cou : Ronny Borbey !

PAGÀN Que matte Ronny! L'è belle aloù eun penchón euncó llou ara...

MAGÀN Ouè!

NEVAOU Ah ouè. V'ouyavade fran feun vo Digourdì, v'ouite itoù todzor de Digourdì!

PAGÀN Ouè. Aimè, te sa pequé? (*Eun se levèn*) Pequé itre Digourdì vou deu itre : abile, actif é euntelledzèn! É no lo sen todzor itoù, dèi can sen nèisì! No sen todzor...

Se avion le lemiye 💡 si to lo palque. A gotse n'a tcheu le Digourdì, que, eunsemblo avouì pagàn, magàn é le dou nevaou, eurlon ver lo pebleuque :

... pi Digourdì!

Derì le ridó

Mezeucca, éffé sonore

Michel Comé

Lemiye

Alessandro Chiono

Miji

Renzo Bollon

SÈIDEPOU(VO)ÈR

Pièse icrita pe Le Digourdi

Téatro Splendor de Veulla, 9 marse 2019

Le Digourdì di 2019



Drette: *André Comé, Alessandro Garetta, Sophie Comé, Richard Cunéaz, Margot Jorrioz, Jordy Bollon, Marlène Jorrioz, Marco Ducly, Paolo Dall'Ara, Paolo Cima Sander, Christianne Albaney, Michel Comé, Jérôme Munier.*

Achouatoù: *Stephanie Albaney, Joël Albaney, Joëlle Bollon, Julie Squinabol, Thierry Jorrioz, Aimé Squinabol, Eyvia Lucianaz, Fabien Lucianaz.*

🧑 SÈIDEPOU(VO)ÈR 🧑



Lo souvenir de l'acteur

« À mon avis, SÈIDEPOU(VO)ÈR l'è la pièse la pi jénialla di Digourdì a nivó d'orijinalité métatématrale. N'en vouli, comme comédièn, no-z-aprotchè pe lo premì cou a la satire politique di Conseille réjonal. L'eunterprétachón finale si lo palque l'è itaye lévetta é bièn efficace di momàn que lo teste l'ie *autobiographique* é métatématral. Deun la partiya *autobiographique* di sujé, mé sayó effectivamente itaye élia, a l'éyadzo de 18 an, Prézidanta de eunna compagnì d'acteur bièn pi grou que mé. Eun pi, di couti métatématral, mé sayó pe dabón la premiye fenna é éto la pi dzouveunna Prézidanta di Digourdì que dèijè gagnì le-z-éléchón pe itre reconfermaye. Donque, itre la protagoniste de mé mima l'é itó doblemàn émouvàn ! L'émo-chón l'è euncó redoblaye a la feun di spettacille can to lo pebleuque l'a tsanto-me *Joyeux anniversaire*, vi que lo dzor mimo fitoo 19 an ! Ah... a propoù de métatématro : deun la pièse, mon cher Paolo Dall'Ara me régale finque eun bosqué de fleur pe mon anniverséo ! SÈIDEPOU(VO)ÈR : eun cateillón métatématral que llate Digourdì é satire politique. »

Marlène Jorrioz

Queriazouzitòu

- Lo titre¹ de la pièse l'è eun djouà de paolle que souligne dou élémèn di mal governemèn de la classe dirijante : la sèi de pouvoer (SÈI DE POUVOÈR) é la corruchón, l'itre pouer (SÈIDE POUÈR).
- Lo final de la pièse l'è itó icrì é ricrì pi de dji cou... é prooù pi de 100 cou ! L'è itaye la scène pi traillaye de totta l'istouère

1. Pe la grafie di BREL lo titre sarie "SÈIDEPOU(VO)ER". Lo dèrì acsàn l'è considéroù pa nésesséo, pa an veetabla erreur ; n'en donque désidoù de vardì la grafie orijinella di titre.

di Digourdì.

- Lo dzor di spettacolo, la Compagnì l'è itaye premiaye pe la seconda plase di Prix Magui Bétemps pe la pièse di 2018 « Todzo pi Digourdì » ! Eunna grousa soddisfachón pe le Digourdì, di momàn que sayoon jamì itó premià pe si Concour.
- Pe lo premì cou l'è pouyà si lo palque eun noutro cher collaborateur é *auteur*. No spèèn todzor que tournise si lo palque, mi llou préfée partisipé foua di théâtre, eun no baillen de-z-idoù jénialle pe réalisé de counte comique.
- L'élémen lo pi métatétral de SÈIDEPOUVOÈR l'è, senza doute, la campagne électorale que tcheu le-z-acteur l'an fé lo lon di senà devàn de la pièse. Le doe liste l'an pa moló de bailli de beillette électorale ià pe la parotse, pe convencre le dzi a vin-ì ba i théâtre pe voté lo nouo Prézidàn di Digourdì. A témouagnadzo de la pressante propagande féta pe la lista numérodou, n'a seutta *vidéo* :

👤 VOTA JORDY DI DIGOURDÌ 👤



Scénographie

- Eun per de table  a feur de caval avouè eun grou lenchoueu blan ;
- 12 caèye di Consèille réjonal  ;
- Statut di Digourdì  ;
- 1 campaneun  ;
- 1 calandrè ;
- De-z-objé pe tsaque postachón di consèillè réjonal : micro-fonne, botèille d'éve  , de foillette, de plime... ;
- 1 per de-z-esqui  ;
- De jiragnón sèque  ;
- 1 tsaretta  avouè de saouseuse  é 1 dzeleunna  ;
- 2 poltronne  ;
- 1 tabla  é eunna caèya d'ouficho  ;
- 1 pourta  ;
- 1 coutse  ;
- 1 per de menotte .

 PERSONADZO

AIMÉ	Présentateur de la pièse, eunterprétoù pe AIMÉ SQUINABOL.
JULIE	Présentatrice de la pièse, eunterprétaye pe JULIE SQUINABOL.
PRÉZIDÀN	La vrèya Marlène Jorrioz di Chef-Lieu, éfectivemàn Prézidàn di Digourdì deun lo 2019, eunterprétaye pe MARLÈNE JORRIOZ.
SECRETÉO	Ommo prési é secretéo de la Compagnì téatrala, eunterprétoù pe FABIEN LUCIANAZ.
JORDY	Lo vrèi Jordy Bollon di Chef-Lieu, dézireu de reprendre la plase de Prézidàn, eunterprétoù pe JORDY BOLLON.
MARCO	Lo vrèi Marco Ducly de Feleunna, eunterprétoù pe MARCO DUCLY.
SOPHIE	La vrèya Sophie Comé di Chef-Lieu, eunterprétaye pe SOPHIE COMÉ.
CIMA	Lo vrèi Cima Sander Paolo de Feleunna, eunterprétoù pe PAOLO CIMA SANDER.
RICHARD	Lo vrèi Richard Cunéaz de Pompioù, eunterprétoù pe RICHARD CUNÉAZ.
PAOLO DALL'ARA	Lo vrèi Paolo Dall'Ara de la Prériye, eunterprétoù pe PAOLO DALL'ARA.
JOËLLE	La vrèya Joëlle Bollon di Chef-Lieu, eunterprétaye pe JOËLLE BOLLON.
EYVIA	La vrèya Eyvia Lucianaz d'Ampaillan, eunterprétaye pe EYVIA LUCIANAZ.

SERVENTA	Eumpléyaye i servicho di Consèille réjonal  , eunterprétaye pe CHRISTIANNE ALBANEY.
JEAN LUC	Ommo de 25 an, fier de traillì i-z-eumplàn de Pila, eunterprétoù pe ANDRÉ COMÉ.
SAVENTA	Ville  de 80 an queraouza comme eun pet é bièn atatchaye a seun jiragnón sèque, eunterprétaye pe SOPHIE COMÉ.
POMPIOLÈN	Eugn ommo ansièn  de Pompioù, eunterprétoù pe RICHARD CUNÉAZ.
GARDE DI COR	Garde di cor de Bruno Aveuille, responsablo de l'iverteua de la Pourta, eunterprétoù pe ALESSANDRO GARETTA é JÉRÔME MUNIER.
NOTÉO VIONDAPAPÌ	Ommo avouì la fiacca de traillì que fé to sen que di Bruno Aveuille, eunterprétoù pe THIERRY JORRIOZ.
BRUNO AVEUILLE ²	Conducteur télévisif di renommoù programme <i>Porta a Porta</i> de RAI 1, eunterprétoù pe JOËL ALBANEY.
POURTAPIZZE	Garsón euntsardjà de pourté le <i>pizze</i>  i mitcho di dzi, eunterprétoù pe MICHEL COMÉ.
SPETTATEUR I	Eun spettateur de <i>Porta a Porta</i> , eunterprétoù pe RONNY BORBEY.
SPETTATEUR II	Eugn atro spettateur de <i>Porta a Porta</i> , eunterprétoù pe LAURENT CHUC.

2. Litérallemàn sarie Bruno Vipa, mi Bruno Aveuille  soun-e mioù.

AVANSPETTACLE

Lemiye 💡.

Aimé é Julie son i mentèn di proscenium.

AIMÉ *Mesdames é Messieurs* bonsouar ! Sit an le Digourdì l'an di-mandó a no de fiye eunna péгна eunTRODuchón.

JULIE Ouè, pequé comme sèide beun, dedeun la Compagnì n'a i eunna groussa disquechón, que l'a divijà le Digourdì eun doe fachón !

AIMÉ Adón ara totse a no fiye eugn avanspettacle pi nèutral. Pe-qué oueu l'è lo dzor di-z-éléchón, iaou fa chède lo nouo Pré-zidàn di Digourdì é fa vardé lo silanse électorat !

JULIE Ouè, le-z-électeur dèyon pa itre eunfluenchà pe le doe fachón !

Marlène, a catsón, queurie Aimé é lèi beutte eunna craotta rouze 🍷.

AIMÉ (*Eun tournèn i mentèn*) ... é ren, véyade de chède amoddo ; é se sèide fran pa qui fa voté...

Aimé avouì lo dèi moutre la craotta. Dimèn Jordy l'a querià Julie pe lèi beti eun tita eun grou floque dzano 🧡.

JULIE Ouè tsertsade de itre responsablo é votade pe la fachón (*eun moutrèn lo floque*) que vo plé de pi !

AIMÉ Mi devàn de voté fa comprendre comèn son allaye pe dabón le bague...

JULIE Adón a vo...

AIMÉ É JULIE Sèidepou(vo)èr !

ACTE I

🏠 SE IVRE LO RIDÓ 🏠

Scène I – LO CONSEILLE DI DIGOURDÌ

Vouése derì le ridó 🧑🏽 : « Eunna normalla reunión di Digourdì ».

Eun scène n’at eunna tabla a fer de caval tott’apprestaye comme deun lo Conseille réjonal (microfonne, botèille d’éve 🍷, plime, etc...). La serventa l’è eun tren de controlé que totte sise a poste.

Entron Madame le Présidàn é lo secretéo.

PRÉZIDÀN (*Totta tracachaye 😞*) Ouè si pamì chiya d’èi la Compagnì deun le man. . .

SECRETÉO Senque te lo fé diye ?

PRÉZIDÀN Marco me baille todzor contre, salla premì fenna de Cima Sander veun pamì i proue dèi que n’en pamì bailla-lèi de partie eumpourtante é salla carogne de Sophie n’i la fèi que l’ise voya de me robé la poltronna.

SECRETÉO Mmm eugn éffé te pou belle èi rèizón, te sa ? Euncó Jordy n’i la fèi que l’a an mia de sèi de pouvoer.

PRÉZIDÀN (*Malisieuze 😏*) Lèi penso poui mé a fé ité quèi salla beurta rosa. . .

SECRETÉO Bon bon !

Entre Marco. Sensa diye ren va s’achouaté. Aprì entron Jordy é Cima eun borbottèn quetsouza.

JORDY (*S’arite to d’eun creppe avouì Cima*) Adón, se te me baille fèi té deun lo 2019 te fé seutta partia iaou te fé eun grou

monologue devàn 30 meulle personne (*Cima dimèn sondze seutta scène*) té to solette !

CIMA Mi mé n'i todzor deu-lo que té t'iye an mentalitoù jénialla, té Giordi t'a an martse eun pi !

JORDY Adón te sa sen que fé...

Jordy s'achouatte é Cima s'achouatte protso de Marco.

MARCO Senque conte noutro Bollon ?

CIMA La propozou-me an baga que no pouèn pa refezé, té te fa renque fé sen que te diyo mé.

A drèite entre Sophie é Jordy la queurie avouì eun mouvemèn de la man 🤲. Sophie s'achouatte protso de llou é dimèn Jordy lèi borbotte quetsouza pe lo bouigno 🗣️.

SOPHIE Mi te lo sa que avouì salla comandanta (*eun moutrèn Marlène*) n'en pa droué de paolla 🤔 !

JORDY (*Eun terièn foua eunna busta* ✉️) Té fé comme n'i deu-te... é le bague tsandzon pouì !

SOPHIE Iprouèn adón !

Areuvvon le-z-atre atteur de la compagni. Tcheutte s'achouat-ton.

PRÉZIDÀN Dimanderio a la serventa de no porté l'odre di dzor dimèn que lo consèilli secretéyo vérifiye le prézanse eun prosédàn pe appel nominal eugn ordre alfabétique.

La serventa baille a tcheutte lo foillette de l'odre di dzor é dimèn lo secretéo fé l'appel. Tsaqueun repoùn eun levèn la man 🤲.

SECRETÉO Prosédèn avouì l'odre di dzor :

1. sujé de la pièse 2019 ;
2. bouite di lettre eun bouque ou eun feu pe lo nouo sièje ;

3. mise a bilàn de la « colachón » a Lugano (avèitse Cima) de 2000 èiro ;

*Tcheu repoundon avouè eugn « Euh ! » é avouè lo dèi lévo
reprodzon Cima 🙌 ;*

4. cotachón eun Borsa de la Compagni.

La paolla i Prézidàn !

PRÉZIDÀN (Avouè eun ton politisièn) Mersi secretéo. Bonsouar a tcheutte, chère Digourdie é cher Digourdì. Oueu, lo 23 settembro 2018, no sen seuilla pe analizé lo sucse de la pièse « Todzo pi Digourdì » que la fé-no gagni la seconda plase i Prix Magui Bétemps.

Tcheutte boueuchon di man 🙌.

Mi comme vo sade l'è belle l'aoua de pensé i demàn, é lo demàn l'è lo Printemps Téatral 2019. Dimando ara a sise d'euntre vo que l'an eunna idoù de la propozé i Consèille.

Richard levve la man 🙌 pe prendre la paolla. Joëlle lèi fé vère que dèi la prendre eun gnaquèn eun botón. Richard trebeulle an mia é aprì gnaque lo botón djeusto.

PRÉZIDÀN L'a dimandoù de èi la paolla lo consèilli Cunèya é l'è deun sé drouè.

Richard se levve³, comenche a prédjì mi se sen ren pequé l'a pa allemou lo microfonne. Tcheu lèi diyon de allemi lo microfonne. Richard se inerve é can areuvve finalemàn a allemi-lo se sen eun « isto seutte porcherie ». Tcheu le prézan lèi repondon avouè eun« shttt ».

CIMA (Ver lo pebleuque) Squezade... l'è de Jovençan !

RICHARD Bondzor a tcheutte ! Vouillo maque propozé eunna dzenta idoù : eunna pièse avouè dou vétchot devàn eun fornet 🍷, fan

3. Dèi-z-ara tcheu le consèilli que prègnon la paolla se levvon pe prédjì.

la counta de comèn son tsandjaye le séizón, avouè eun bon doblón de rodzo é...

JORDY (*Eun bloquèn Richard*) Mi pe pleizì ! Consèillì Cunéaz, achouatade-vó é contignade maque a lie la Vallée. Chère Digourdie é cher Digourdi, diyèn prao i tradéchonnelle pièse iaou n'a todzor dou pouo campagnar que se plègnon de la burocrasi ou si lo fé que n'a pamì de demì sèizón, diyèn prao i pièse iaou n'a todzor la fénna que fé de grouse corna a l'ommo. Chère Digourdie é cher Digourdi fièn de pièse pi fritse, pi lévette, pi éffervéchante, pi moussaye, pi plèizente. Chère Digourdie é cher Digourdi, si seu pe vo propozé eunna pièse su le Simpson 🧔 !

MARCO Ouè, brao Jordy ! Te sa que riye Cima to dzano que rotte é bèi de biye si lo chofà !

PAOLO DALL'ARA Chère Digourdie é cher Digourdi... Madame lo Prézidàn... l'an deu-me que oueu l'è voutro anniverséo é adón n'i porto-vo eun dzen cadó, pe vo.

Paolo régale eun mase de fleur a Marlène. Aprì reprèn son discoù.

PAOLO DALL'ARA Chère Digourdie é cher Digourdi, consèillì Bol-lon, mi de senque v'ouite eun tren de prédjì ! De fé le Simpson ? Avèitsade lo pebleuque : pappa é mamma de mé san pa senque son le Simpson ; fa prédjì di bague de no-z-atre, de la Val d'Outa, de la poleteucca... mogà pourian fé eunna pièse si noutra Prézidanta... èitsade comme l'è dzenta !

PRÉZIDÀN Bon-a idou Paolo ! Senque n'a-ti de pi téatral di noutro Consèille réjonal ? Ah voualà... pouèn fé la conta de comèn n'i gagnà le-z-éléchón pe vin-ì Prézidàn ! (*Inervaye*) L'a dimandó la paolla la consèilliye Comé é fièn prédjì euncó lleu.

SOPHIE Adón garsón mé diyo na, na a eugn'atra pièse que prèdze de no ! Sarie lo secón an si de no, aprì le dzi son stouffie 😞

é veugnon pamì no vère !

CIMA Oué vèyo dza Ettore Champrétavy que l'è seuilla (*moutre Ettore i mentèn di pebleuque*) que no fé la morale si lo fé que ara fièn renque de pièse *autobiographique*.

JOËLLE Mi Paolo, que problème n'at ? Disa sen que la voya, can n'en jamì acouto-lo ?

Caqueun baille rèizón a Joëlle.

EYVIA Squezade mi la poleteucca l'è an бага que sentèn dza a la radió, a la télévìjón. . . é mé euncó finque i mitcho avouì pappa que me conte le counte de Place Deffeyes !

Partèi eun vacarno jénéral, tcheutte se prèdzon eun desì l'atro, tanque lo Prézidàn fé restì tcheu quèi

PRÉZIDÀN (*Eun braillèn é souèn lo campaneun 📢*) Silaaanse !

Tcheutte fan silanse, mouèn que Richard é lo secretéo, que s'apesèison pa que le-z-atre son tcheu quèi.

SECRETÉO ... se n'i deu-te que té te pourte lo veun 🍷 é mé la polenta...

Tcheutte avèitson mal le dou.

PRÉZIDÀN Vo dou ? Soplé, sen eun tren de prédjì de bague sérieuze. (*I Consèille*) Vo rappello que mé si lo Prézidàn é tanque a proua contréa désido to mé !

MARCO Ita quèya tsaretta ! T'i pa i micho iaou te pou comandé !

JORDY Oué Madame lo Prézidàn, bèichade la crita, pequé sen deun eunna démocrasi é se no sen pa d'acor, vo tapèn ba de salla caèya ! Vourio rappelé que tanque ara comme Prézidàn v'ouèide fé ren ! Vourio rappelé a tcheutte qui l'è itoù lo Prézidàn, (*bièn fier*) lo seul vrèi Prézidàn que l'a fé-vo gagnì la seconda plase 🏆 di Prix Magui Bétemps !

Mèitchà Consèille boueuche for di man eun baillèn man forta a Jordy.

PRÉZIDÀN Consèilli Bollon, vo dimando de fé atenchón a comme prédzade é de pourté eunna mia de reuspé pe seutta sala.

JORDY Squezade !

PRÉZIDÀN (A Jordy) Vo pensade que sen que diyo mé l'è pa par-tadjà pe tcheutte ? Mé si chiya que, se lo betèn i votachón, mé gagno !

Parmi le consèilli n'a qui boudze la tita pe diye de ouè é qui pe diye de na.

JORDY Madama la Prézidanta va bièn. Mi se aprì la votachón v'ouèide pamì la majoranse vo v'ouèide fenì de fé lo Prézidàn !

PAOLO DALL'ARA Consèilli Bollon ! Iaou pensade de itre ? I mart-chà ? Mi avèitsade que mouro que v'ouèide, me semblade lo Ministre Toninelli !

CIMA (A Paolo Dall'ara) Mi comencha a prédjì lo patoué comme se dèi, peuccaparmidjàn ! Can mimo Jordy bailla pa fèi a sitte ; pitoù, v'ouite eun tren de me diye que se salla pantoufla 🦶🦶 l'a pa la majoranse no no la gavèn di pià ?

Partèi eun vacarno jénéral, tcheutte se prèdzon eun desì l'atro, tanque lo Prézidàn fé resti tcheu quèi.

PRÉZIDÀN (Eun baillèn é souèn lo campaneun 🚨) Silaaanse !

Tcheutte fan silanse, mouèn que Richard é lo secretéo, que s'apesèison pa que le-z-atre son tcheu quèi.

RICHARD ... n'i deu-te que lo douse lo pourto mé...

PRÉZIDÀN Euncoa vo dou ? Prao ! Dimanderio a la serventa de no pourté lo Statut é a noutro secretéo, se l'a pa d'atro a fiye, de no lie l'art. 4 - Élechón di tsardze.

*Lo secretéo se beutte le lenette 🧐, teurie foua eun grou livro
 📖 avouè desì bièn de poussa, souffle desì pe la gavé, tsertse la
 padze djeusta é teussaille.*

SECRETÉO Adón « dans le cas où, à l'occasion d'une votation importante comme : le nombre de « doblón » de vin rouge à acheter pour chaque épreuve, le choix de la destination de la sortie annuelle ou le sujet d'une pièce, si le Président n'obtien pas 50% + 1 des voix, il doit remettre sa charge ».

SOPHIE Aaah !

Jordy, Cima é Eyvia, eunsemblo, diyon « ah aaah ! ». Aprì Cima baille eun creppe eun tita a Marco que l'ìye distré é avouè eunna mia de retar euncó Marco braille « Ah ah aaah ».

JORDY Adón... (eun countèn le catro consèillì que son avouè llou) Madame lo Prézidàn, se la matématique l'è pa eunna conta foula, v'ouèide le-z-aoue contaye !

PRÉZIDÀN (Tracachaye 😬) Se lo riillemèn l'è pai fa lo reuspetté ! Mi can mimo vourio vo rappelé que se oueu lo directif tsi, noutro spettaclo i Printemps Téâtral l'è a forta reusca.

MARCO Molla de prédjì é fé-no voté !

PRÉZIDÀN Mesieu lo secretéo vo sade sen que déyade fée. Pasèn i votachón.

SECRETÉO Ouè Madame lo Prézidàn ! Adón, lévisan la man sise que son a faveur de la pièse « Le Simpson » ...

Levvon la man Cima, Jordy, Sophie é Eyvia. Marco l'a la tita pe le gnoule é adón Cima lèi baille tourna eun creppe eun tita pe lèi diye de lévé la man. Marco levve la man é lo secretéo marque si lo verbal sinque vouése pe la pièse « Le Simpson ».

SECRETÉO Lévisa la man sise que son a faveur de la pièse « Comèn n'ì gagnà le-z-éléchón » ...

Levvon la man Marlène, Joëlle, Paolo Dall'Ara, Richard é Fabien... a catsón Paolo Dall'ara soumón eun per de beillette de 50 euro 🗳️ a la serventa, que totta contenta levve euncó lleu la man.

SECRETÉO Eun, dou, trèi, catro, sinque (*eun véyèn la serventa*) é chouï! Avouï chouï préfèranse pe lo parti de majoranse la mochón l'è...

SOPHIE (*Pren to de chouite la paolla*) Na, na, na! Dèi can le servente l'an-ti drouet de voté? (*A la serventa*) Betade maque ià sise sou!

SECRETÉO (*Jèinoù 😊*) Ah ouè, ouè, djeusto... adón patta a sinque! Le Digourdì l'an pamì eun Prézidàn!

CIMA Ah, ah, ah! I mitcho!

EYVIA É ara comèn martse?

RICHARD Ouè, fièn comme va de moda : no no micllèn tchica é no terièn foua eunna noua majoranse!

JORDY Consèillì Richard Cunéaz, soplé, achouatade-vó é contegnade a lie la Vallée. No no micllèn pa; comme resite noutro Statut, que can l'io Prézidàn sayò tot a mémouée... (*sarcastique 🤨*) n'ayò pa fata de eun secretéo, eh Madame lo Prézidàn; comme resite noutro Statut, can n'en pamì eun Prézidàn la paolla passe i peuple tsarvensolèn. Secretéo controlade maque... la padze l'è la 3056.

SECRETÉO Na, na, mé lèi crèyo pa.

Pren la padze é vérifie.

SECRETÉO Ouè l'a fran rèizón! Lo nouo Prézidàn dèi itre votoù pe lo peuple tsarvensolèn! Adón fa acapé eun dzor pe le-z-éléchón. (*Eun mioulèn eun dzor si lo calandri 📅*) A désambre na pequé n'a la betchì; a janvieur na pequé mé si ià colaté; a févri sen aoutre a Lugano; ah lo voualà! Lo premì dzor dispo-

niblo pe « l'élection dzor » l'è lo 9 marse 2019 ! Cher Digourdì, bon-a campagne électoralla a tcheutte !

*La fachón de Jordy se levve totta contenta eun fièn fita 🎉.
Marlène, i contréo, chor malechaye 🙄.*

Si l'écran l'è proyettaye la vidéo de l'émichón ecstraordinére di TG de NO, iaou François Catro Lenve, djeusto foua di sièje di Digourdì, eunterviste la ex Prézidanta Marlène Jorrioz é Jordy. Marlène scappe ià de coursa ; i contréo Jordy s'arite é repón i questchón de François, sensa pédre l'occajón, avouì le compagnón de llou, de fé campagne électorale avouì de mésadzo populère.

Dimèn Marlène comande i seun fidèle Paolo Dall'Ara de acapé 800 vouése i Chef-Lieu ; lèi euntéresse pa comèn é avouì queunse sou, vou 800 vouése.

Teuppe 🗳️.

🗳️ LA CHUTE DI PRÉZIDÀN 🗳️



Lemie 💡.

Scène II – CAMPAGNE ÉLECTORALE

Lo palque seré divijà eun trèi poueun icllerà : a gotse n'a Jean Luc, a drèite eun Pompiolèn eun tren de coueillì de secôrie é i mentèn n'at eunna ville penchon-aye saventa que baille bèye i son jéragnón to sèque.

Dèi-z-ara tsaque fachón l'aré deun l'arbeillemèn quetsouza de dzano 🧡 (pe Jordy) ou rouze 🖤 (pe Marlène).

Lemiye 💡 a gotse é teuppe 🗳️ si lo reste di palque.

Jean Luc l'è eun tren de tourni a mèizón avouì eun grou per de-z-esquì 🙏. Dimèn, déri de llou, Paolo é Joëlle tsatcharon.

PAOLO DALL'ARA Acoutta Joëlle, n'i prédzà avouì Madama la Prézidanta é l'a deu-me « te fa partì avouì Joëlle, alé i Chef-Lieu é pourté-me 800 vouése ! ».

JOËLLE L'a deu 800 ? Ouè adón fa comenchì ara ! Mi senque dièn i dzi ?

PAOLO DALL'ARA No lèi contèn de conte foule, to sen que no passe pe la tita... acoutta : sitta (*eugn avèitsèn Jean Luc*) te lo cougnì ?

JOËLLE Oue l'è de Tsarvensoù é travaille eun Pila.

PAOLO DALL'ARA Ouè, parfé ! Comencha té a prédjì, que l'è eun dzen garsón é té t'i eunna dzenta feuille !

Joëlle s'aprotse a Jean Luc di couti drèite, dimèn que Paolo s'aprotse de l'atro couti.

JOËLLE Bondzor Mesieu !

Jean Luc se vionde ver Joëlle é sensa s'apersèi reusque de tchapé la tita de Paolo avouì le-z-esquì.

JEAN LUC Oh Bondzor Joëlle !

JOËLLE Tot amoddo ?

PAOLO DALL'ARA (*Eun s'aprotsèn a Jean Luc*) Salì l'ommo !

Jean Luc se vionde ver Paolo é, comme douàn, sensa s'apersèi, reusque de tchapé la tita de Joëlle avouì le-z-esquì.

PAOLO DALL'ARA Que dzen-z-esquì ! Le pouzèn ba mogà, eh ? Maque eunna meneutta.

JEAN LUC Mi ouè...

Lagnà é eun souflèn 🙏, Jean Luc pouze ba le-z-esquì.

JOËLLE Que dzen que son !

JEAN LUC (*To fier*) So son le nouo Salomon SC40 !

PAOLO DALL'ARA (*Eun fièn semblàn de savèi*) Ah créyao SC35 !

JEAN LUC (*Euncoa to fier*) ... mi son de moublo ! Van to solette !
Nivó coupa di mondo !

PAOLO DALL'ARA Imajino... traillà amoddo oueu ?

JEAN LUC (*Todzor eun sboufèn*) Trop ! Si d'eun lagnà, to lo dzor
beutta si le mèinoù é beutta ba le mèinoù ; t'areuvve a la feun
de la dzornoù que t'a renque voya de medji eun bon platte
de seuppa é d'acapé la coutse 🍷.

PAOLO DALL'ARA Acoutade : no vo portèn ià maque eunna me-
neutta !

JEAN LUC Senque me vendade ?

JOËLLE Na, na, vendèn ren. No sen djeusto seu pe vo propozé lo
nouo projé pe le-z-éléchón di nouo Prézidàn di Digourdì.

JEAN LUC Le digourdì ?

PAOLO DALL'ARA Vo sade pa qui son le Digourdì ?

Jean Luc gante la tita.

JOËLLE Le Digourdì son...

*Paolo fé resté quèya to de chouite Joëlle, pe pa que esplequisa
a Jean Luc qui son le Digourdì.*

PAOLO DALL'ARA Ah ! Ahn... sa pa qui son le digourdì...

*Paolo refléchèi 😊 doe seconde é repette « sa pa qui son le Di-
gourdì » eugn avèitsèn Joëlle pe lèi diye « di pa ren ».*

PAOLO DALL'ARA Le Digourdì l'è la Digourdì S.p.A., la sociétéou de
Milan que l'è arrevaye eun Val d'Ousta é l'a atsetoù tcheu le-
z-eumplàn !

JOËLLE ... é euncó si de Pila !

JEAN LUC Ah, é dèi can ?

PAOLO DALL'ARA Dèi can ? Dèi oueu lo mateun, vito, te sa que a Milan se rèchon lo mateun é atseuton a drèite é a gotse !

JEAN LUC Ah, sayò pa qué, pa lizì ren si lo journal.

JOËLLE Ouè é aprì l'an a queur lo bièn ètre di travailleur. Vo véo traillade ?

JEAN LUC Eh... dèi can chor lo solèi tanque a can lo solèi va ià !

JOËLLE Tan adón !

PAOLO DALL'ARA ... é véyo vo gagnade ?

JEAN LUC Féo chouì mèis a l'an, véo t'ioù que gagniso ?

PAOLO DALL'ARA Adón ara v'ouèide la poussibilitou de tsandji vou-tra viya ! Ara tsandze la Prézidanse di Digourdi é noutra Prézidanta vou beté la *Rente di Citoyen*. T'a dza senti-nèn prédji si le journal 📰 ? Avouì la *Rente di Citoyen* te gagne to l'an euncó se te travaille pa !

JEAN LUC Ah dzen so !

PAOLO DALL'ARA Acoutta ! Se t'ioù tsandji ta viya, lo 9 de marse te fa alé i téatro Splendor a voté !

JOËLLE ... é fa voté Marlène, Prézidàn Marlène.

PAOLO DALL'ARA ... é se te te lo rappelle pa, pensa...

JOËLLE É PAOLO (*Eun tsantèn*) « Te travaille pe trèi mèis, te gagne to l'an, vota Marlène Prézidàn » !

Paolo é Joëlle baillon eun beillette élettoral de Marlène a Jean Luc.

Eunna ville madama 🙄 chor di mentèn di palque (que l'ye senza lemiye) é se miclle deun lo discour de Paolo é Joëlle.

SAVENTA Senque l'è seutta counta que sitte travaille trèi mèis é

gagne to l'an é me avouè ma péгна penchón areuvvo ghenca
a feun senà .

PAOLO DALL'ARA Mondjemé madama, vegnade avouè mé que vo
conto totta la counta ! (A Jean Luc) Garsón restade-mé bièn !
Salì... é te gagne pe to l'an !

*Paolo é la madama se tramon i mentèn di palque dimèn que
Joëlle di euncó doe paolle a Jean Luc.*

Lemiye 🍷 i mentèn di palque.

JOËLLE Adón lo 9 marse Lista numéró 1 - Pe lo bièn di péi !

JEAN LUC Ah tranquila ! (Eun moutrèn lo beillette élettoral) Mé la
croueu la beutto seu desì !

JOËLLE Adón mersì é au revoir !

Joëlle rejouèn Paolo é la ville i mentèn di Palque.

Teuppe 🍷 a drèite di palque.

PAOLO DALL'ARA (Ironique) Mondjemé Joëlle avèitsa que dzen ji-
ragnón que l'a seutta madama !

JOËLLE (Avouè eunna mia de doute 😬) Ouè que dzen... fran dzen...
dzen jiragnón !

PAOLO DALL'ARA ... é te sa pa, te sa pa véyo pren de penchón
seutta poua fenna avouè sise dzen jiragnón ; madama, diade-
lèi !

SAVENTA Eunna mizée !

PAOLO DALL'ARA ... é adón madama vouillade tsandji voutra viya ?
Sitte l'è lo momàn, v'ouèide dza senti prédji de Quota 100 ?
Son 100 meulle euro to l'an ! Lo premì de janvì si lo contcho !

SAVENTA Na ! Mondjemé !

JOËLLE Eh ouè madama...

PAOLO DALL'ARA Jamì vi eunna бага pouèi, vrèi madama ? Mi lo
9 de marse fa alì voté...

JOËLLE ... é fa voté Marlène, Prézidàn Marlène.

PAOLO DALL'ARA ... é se vo rappelade pa...

JOËLLE É PAOLO (*Eun tsantèn*) Pe èi de dzen jiragnón é aoumenté
la penchón, votade noutra fachón !

*Paolo é Joëlle baillon eun beillette élettoral de Marlène a la
ville madama.*

SAVENTA Ouè, ouè va bièn, ouè cheur !

PAOLO DALL'ARA Oh madama ! Mi véo v'ouite dzenta ? Poui-dze
vo baillì eun poteun ?

SAVENTA (*Emochon-aye 😊*) Ouè euncó dou !

Se baillon dou poteun dimèn que Joëlle levve le joueu si pe l'er.

SAVENTA (*A Joëlle*) Ouè euncó a té, t'i tan dzenta.

JOËLLE (*Eun salièn avouè eun poteun la madama*) Ouè, ouè mersi
é au revoir ; (*todzor bièn ironique*) fran de dzen jiragnón !

Joëlle é Paolo chorton de scène ver la drèite di palque to teuppe.

SAVENTA (*Ver lo pebleucco*) Digourdì... la fèi que sise Digourdì son
pi digourdì de sen que diyon de itre...

Teuppe 🗨 i mentèn di palque é lemiye 💡 a drèite.

*N'at eun vétchot que l'è eun tren de coueillì de secôrie. Déri de
llou areuvvon Cima é Marco avouè eunna tsaretta plèin-a de
bague.*

CIMA Adón Marco ieur nite n'i deu-te : fa alé ià eun campagne
élettoral é te fa me prègne de saouseuse 🍷, de boudeun, de
moutsetta, de beuro coloù... é ara, adón, te me euspleuque
senque no nèn fièn de eunna dzeleunna 🐔 ?

MARCO (*Eun terièn foua la dzeleunna de la tsaretta*) Seutta dzenta dzeleunna no serveré pi prao !

CIMA Mi a senque ? Mi te me vèi entré i Limonet avouè eunna dzeleunna ?

MARCO La fièn pi foua devàn de arrevé i Limonet ; tracàcha-te pa !

CIMA Marco, sen eun campagne électorale !

MARCO N'i deu-te de ité tranquilo ! Lèi penso mé.

CIMA Va bièn, attaquèn que sen dza eun retar.

Cima é Marco s'aprotson i vétchot.

MARCO Salì mesieu !

POMPIOLÈN Salù !

MARCO Ouemma que dzente secôrie !

POMPIOLÈN Oh salì, salì !

CIMA Comèn l'è, tot amoddo ?

POMPIOLÈN Ouè, ouè, tanque sen pa a fé téra va todzor bièn !

CIMA Adón tot amoddo !

POMPIOLÈN Mi ouè coueillèn catro secôrie.

MARCO Èita Paolo que dzente secôrie que l'a lo mesieu. . .

POMPIOLÈN Ah ouè sit an son mondiale ! Ouè bon. . . fa euncó le lavé, se-z-adebé. . . mi aprì seutte eun salada avouè dou-z-ouè
 son mondiale !

MARCO Ah avouè dou-z-ouè ? N'i sen que fé pe vo !

Marco teurie foua doze-z-ouè é le baille a Cima.

POMPIOLÈN (*Pren eunna secôrie é la moutre a Paolo*) Èitade seu que qui blan ! Gneunca la fenna can l'iye dzoueun-a l'ayè eun qui pouèi !

CIMA ... é adón sade an бага ? Avouè le-z-ou de Feleunna (*lèi fé vère le-z-ou*)... voutre secôrie...

POMPIOLÈN Ah mi son pe mé ? Ouè mi que jantilo que v'ouite mesieu !

MARCO (*Eun prègnèn la dzeleunna*) Mi ouè mesieu fièn pai : prègnade euncó la dzeleunna.

POMPIOLÈN Mi tro jantilo !

CIMA Mi ouè, fièn an бага : betèn to dedeun voutra saquetta di secôrie.

Lo Pompiolèn ivre la saquetta é lèi beutte dedeun la dzeleunna é le-z-ou.

POMPIOLÈN Oh que dzen, pouèi euncó la fenna l'è contenta, contenta !

CIMA Ah voualà ! (*Eun terièn foua eun beillette élettoral*) Rappelade-vó maque, mesieu, lo 9 de marse, Lista numéroté 2, Digourdì... .

POMPIOLÈN Eh ? Senque l'è seutta porcaria ?

CIMA (*I pebleuque*) Oh lamondjeu, sitte comprèn ren ! (*I vétchot*) Dèijade alì beté an croueu lo 9 de marse si la lista numéroté 2.

POMPIOLÈN Ah ouè lista numéroté dou... pe le-z-ou !

CIMA (*I pebleuque*) L'a pa comprèi ren ! (*I vétchot*) Dèijade beté an croué si la...

POMPIOLÈN (*Eunfastedjà* 🙄) Ouè, ouè n'i comprèi ! Lista numéroté 2 !

Paolo teurie foua eugn atro beillette élettoral.

CIMA Ouè é prègnade euncó sitte pe la fenna, prègnade tcheu dou.

POMPIOLÈN (*Eun prègnèn lo secón beillette élettoral*) Ouè tcheu dou, pouèi dou pi dou... catro !

CIMA (*I pebleuque*) Mondjemé l'a pa comprèi ren sitte. (*I vétchot*) Dèijade beté an croueu si la...

POMPIOLÈN ... amoddo, amoddo, itade mai tranquilo : voto pe vo, tracachàde-vo pa !

MARCO Adón parfé ! No ara alèn... *au revoir* mesieu !

CIMA Tanque mesieu !

Marco é Cima se nen van ver la gotse di palque.

Teuppe 🍷 a drèite é lemiye 💡 a gotse.

Marco é Cima acappon Jean Luc.

CIMA (A Jean Luc) Salì ! Comèn l'è ?

JEAN LUC Ah salì ! Ouè mi que trafeutso oueu ià pe Tsarvensoù.

CIMA Mondjemé que dzen esquì !

JEAN LUC Ouè, ouè son an bomba !

CIMA ... é adón comèn l'è, tot amoddo ?

JEAN LUC Mi ouè amoddo ! Te vèi pa comèn si to contèn ? Son djeusto ià doe dzi que l'an deu-me que me payon pe to l'an ; mé traillo maque chouì mèis a l'an, féo la sèizón si eun Pila.

CIMA (Douteu 🤔) Doe dzi ? Mi comèn l'ion arbeillà ? Comèn l'ion ?

JEAN LUC Mi to terià a fita, eun garsón l'ayè la lenva londze, molè pa de prédjì ! La feuille, pitoù, grachauza...

CIMA (A Marco) Aaah... l'è lo peuccaparmidjàn ! Lo Biélèis !

MARCO Mi espleuca vèi mioù : pequé t'i contèn ?

JEAN LUC Mi pequé, d'abor, sise Digourdì ou Digourdì S.P.A. l'an atsetoù tcheu le-z-eumplàn é ara l'an a queur lo bièn être de no travailleur : me payon to l'an !

MARCO Le Digourdì S.P.A. ? Èita, me diplé te lo diye mi le Digourdì son pa eunna S.P.A. ; le Digourdì sen no, fièn de Téatre.

CIMA L'è eunna compagnì téatralla !

MARCO ... atsetèn pa de-z-eumplàn...

CIMA ... atsetèn pa seutte bague... Marco(*eun moutrèn la tsaretta*), soplé, fé-lèi vère qui sen, sen que n'en no-z-atre.

MARCO Ouè to de chouite que lo vèyo an mia ba de moral si pouo ommo... baillèn an mia de coadzo !

Marco teurie foua de la tsaretta eunna tsèina de saouseuse 🍷
é la baille a Cima.

CIMA (*Eun gneflèn la saouseuse*) Seutta l'è la saouseuse de Feleunna !
Sen que bon flo...

JEAN LUC (*Eun gneflèn*) ... mmm que bon !

CIMA La saouseuse de Feleunna !

Cima beutte la tsèina a l'entor di cou de Jean.

CIMA èita Mi avèitsa comèn te reste bièn ; é aprì lo flou que l'at !

JEAN LUC Mi l'è pe mé ?

CIMA Mi ouè, pe vo ! V'ouite eugn ommo formidablo.

Marco teurie foua eugn'atra tsèina é la beutte a l'entor di cou de Jean Luc.

MARCO Euncó seutta !

CIMA Euncó eugn'atra pe la fenna : la dobra saouseuse de Feleunna !

JEAN LUC Mi mersì ! Te fé té so ?

CIMA Ouè féo mé betsi i mitcho, mé é Roberta... son an бага formidable ! Mi te fa rappelé an бага...

Marco baille a Paolo eun beillette élettoral.

CIMA ... lo 9 de marse te dèi alì votì le Digourdì... mi la Lista numérò 2, sise dzano, le pi onéto !

Cima baille a Jean Luc lo beillette élettoral.

JEAN LUC (*Eun lizèn*) « Eunsemblo pe le Digourdì ».

MARCO ... pa sise que atseutton le-z-eumplàn !

CIMA Mi na ! Sen de dzi pi onnéto no, do saouseuse, do...

JEAN LUC Vo diyo an бага ! Mé lamo le dzi comme vo, que prèdzon pouai téra téra, diyon le bague comme son ! Pa de counte foule, que gneun comprèn ren !

CIMA Mi na !

JEAN LUC La croueu la beutto si vo dzano !

CIMA É MARCO Oh brao ! Brao !

CIMA Adón bièn mersi... mi can mimo... la saouseuse de Feleunna l'a an martse eun pi !

JEAN LUC Ouè, èita t'isa eun bocón de pan eun pi...

CIMA Eh na, fièn pi eugn atro cou ! Ara vo salio.

MARCO Ouè (*eun sarèn la man a Jean Luc*) salì, no contegnèn nou-tro tor.

Marco pren la tsaretta é chor a gotse di palque. Cima dimèn salie euncó llou Jean Luc é chor foudè déri de Marco.

Teuppe 💡 a gotse é lemiye 💡 a drèite.

Entron Joëlle é Paolo é reston déri lo vétchot que l'è todzor eun tren de coueilli le secôrie.

PAOLO DALL'ARA Bon Joëlle ! Sen a bon poueun. Acoutta fièn euncó sitte (*avèitse lo mesieu douàn llou*) é aprì n'en belle que fenì... acoutta... comencha té que l'è eugn ommo !

Joëlle s'aprotse i mesieu, a sa drèite, é Paolo s'aprotse a gotse.

JOËLLE Bondzor mesieu !

POMPIOLÈN Oh bondzor bondzor ! Que dzen vo vére : le fenne ià pe lo pro !

PAOLO DALL'ARA Salì l'ommo !

POMPIOLÈN Ouè salì euncó a vo...

PAOLO DALL'ARA Mi que dzen serdzette que v'ouite eun tren de coueillì !

Joëlle se dispère pe sen que l'a deu Paolo.

POMPIOLÈN (*Malechà* 🤪) Senque ? Le serdzette le-z-atsetade pi a sen de Bisson, don ! Seutte son de SECÔRIE !

Joëlle pren la paolla pe arendjì la gaffe de Paolo.

JOËLLE Mi que dzente secôrie ! Aprì avouì le-z-ouè seutte son la feun di mondo !

POMPIOLÈN Mi son mondiale ! N'i belle que le-z-ouè ; l'an djeusto bailla-me-leu dou mesieu seumpateucco. Èitsade que coqueun frique ! (*Eun lèi moutrèn le-z-ouè*) L'an maque deu-me que dèyo voté eunna Compagnì téatralla, mi n'i pa tan comprèi, comprègnò pa tan salle bague...

JOËLLE (*Eugn avèitsèn Paolo*) Ah n'i comprèi...

Joëlle avèitse Paolo dispéraye é eunsemblo tournon dèrì lo mesieu pe prédjì dézò vouése. Dimèn lo vétchot conteugne a coueillì le secôrie.

PAOLO DALL'ARA Joëlle senque fièn ? Acoutta, mé lèi baillo 400 euro, si pa sen que fiye.

JOËLLE Mi na fran pouèi ! Ehi ! (*Eun moutrèn lo vétchot*) Acoutta...

POMPIOLÈN Mi l'è todzor pi sèque ! Gneunca le vatse cacon pami comme eun cou ! Maladetto ! Ouè, saré pi prao pequé n'a pami de sèizòn : lo dézer l'è a catro pa, l'an deu-me que l'è a Pon-Sen-Martèun é veun todzor pi si, todzor pi si ! Ah iaou no allerèn fenì !

Paolo l'at eunna idoù. Avouì eun jسته, eunvite Joëlle a tourni a l'attaque.

PAOLO DALL'ARA Deh l'ommo ! Adón l'è belle seque eh ?

POMPIOLÈN An tappolette sit an, de bague moustre !

PAOLO DALL'ARA Mi la sade eunna бага? Euncó no sen di Di-gourdi, mi no alèn pa ià pe bailli de-z-ou ou prédji de téatre... no... no fièn de projé !

JOËLLE ... é de grouse bague !

POMPIOLÈN An comprèi...

PAOLO DALL'ARA (*Eun betèn eunna man si l'ipala di vétshot*) Te vèi ba lé ?

Paolo avouì lo dèi moutre eun poueun louèn.

POMPIOLÈN (*Eun sarèn le joueu*) Iaou? Vèyo pa tan bièn.

PAOLO DALL'ARA Avèitsa sé, dèi le teun pià tanque ba lé i fon...

POMPIOLÈN Ah dérì salla pesse !

PAOLO DALL'ARA ... 4.452.000 mètre caró de tsan avouì eugn eum-plàn d'irrigachón a gotta pe le serdzette !

JOËLLE ... pe le secôrie !

POMPIOLÈN Que dzenta бага !

PAOLO DALL'ARA ... é adón di-mé, véo te nen vou ? Alé, spara si an tseuffra !

POMPIOLÈN Eun petchoù tsan pe mé é ma fenna.

PAOLO DALL'ARA Mi alé beutta de pi ! Lo dobro !

JOËLLE Ouè fièn trèi ou catro cou pi grou !

PAOLO DALL'ARA (*Tòdzor avouì eunna man si l'ipala di vétshot*) Te sa senque vouillon fé le-z-atre sé ?

POMPIOLÈN Na, senque ?

PAOLO DALL'ARA Inque... la TAV ! Turin-Lyon passeriye seuilla !

POMPIOLÈN (*Éton-ou* 🤖) Eulla ! Mi que malpoli !

PAOLO DALL'ARA Mi no n'en deu de na ! No seu vouillèn le serdz...

Joëlle avèitse Paolo avouè le flame dedeun le joué

PAOLO DALL'ARA ... le secôrie !

POMPIOLÈN Ouè ouè ! Penso beun !

PAOLO DALL'ARA Adón acoutta (*eun souplièn*) lo 9 de marse vota pe no-z-atre.

JOËLLE Fa voté Marlène : Prézidàn Marlène.

POMPIOLÈN ... é beun itade maque tranquilo !

PAOLO DALL'ARA Se te te lo rappelle pa... pensa a...

JOËLLE ... se pi de secôrie t'ou coueilli...

PAOLO DALL'ARA ... vota Marlène ...

JOËLLE ... di Digourdì !

Joëlle lèi fé veure lo beillette élettoral de Marlène.

POMPIOLÈN Ah ouè, ouè, n'i to comprèi. Betade maque deun la saquetta.

Joëlle beutte lo beillette élettoral deun la saquetta ; dimèn Paolo fé tsire pe tèra, dèrì lo vétchot, 500 euro.

JOËLLE Fiade atenchón mesieu !

PAOLO DALL'ARA Deh l'ommo ! V'ouèide perdì 500 euro, seu dèrì...

POMPIOLÈN Na, na, son pa de mé, la fenna me queutte pa alé ià di mitcho avouè sise sou.

PAOLO DALL'ARA Na, na, son de vo mesieu 😊 !

Paolo coueille le sou é avouè eun grou souri le beutte deun le man di vétchot 🍷.

PAOLO DALL'ARA Son de vo, son de vo, tegnade maque, pouèi vo rappelade pi amoddo !

POMPIOLÈN (*Eun pregnèn le sou*) Ah ouè, ouè, n'i comprèi !

JOËLLE Bon ara alèn ; *au revoir*, salì mesieu !

Joëlle pren Paolo pe lo bri é lo pourte ià, comme se l'ise pouiye que terise foua d'atre sou. Joëlle é Paolo chorton a drèite.

POMPIOLÈN (*Ver lo pebleuque*) Eh eh eh ! (*Eun countèn le sou*) Mé n'i pi belle comprèi ren ! Le rouze, le dzano, Marlène, Jordy, argh ! Bague pe le dzouveun-o, salle bague lé ; l'eumpourtàn l'è que oueu n'en pourtó i mitcho la pagnotta... é la fèi avouì so(*eun moutrèn le sou*) nen atseutto euncó eun mouì ! Ah l'è fran bièn aloù que sise rablasoque l'an fran comprèi ren : leur pensoon que mé fucho de Tsarvensoù, que votòo pe inque ; na, na, na... mé si eun Pompiolèn é si renque inque a la maodda !

Lo vétchot chor de scène a drèite.

Teuppe 🗡 a drèite é lemiye 💡 i mentèn.

Accapèn todzor la viille fenna eun tren de chouegni le jiragnón sèque 🪴 . Sentèn Cima prédjì solette déri de lleu.

CIMA Maladetto d'eun botcha eumpestoù, avouì totte le bague que n'en a fiye, sen ià eun campagne élettoral... senque l'a fi-me ? La créou-me la raoua de la tsaretta ! Maladetto, maladetto ! Bon, sen eun retar... féo mé to solette. (*Eun s'aprotsèn a la madama*)Bondzor madama !

SAVENTA Oh bondzor !

CIMA Comèn l'è ? Tot amoddo ?

SAVENTA Ouè, ouè.

CIMA Senque v'ouite eun tren de fiye ?

SAVENTA Si eun tren de m'aprestì pe lo concour de la Quemeua Balconi Fioriti.

CIMA Maladetto... (*eun totsèn eunna foille sètse*) seutte bague sètse, gnenca le tchivre de Fragno peucon de bague pai !

SAVENTA Prédzade pa pi mal di jiragnón de mé !

CIMA Mi pequé, lèi tagnade co finque ?

SAVENTA Ouè l'è to l'iveur que le choueugno...

Ver la drèite di palque sentèn la vouése de Marco que, eun braillèn« Paolo si arrevoù », entre eun scène avouè la tsaretta 🗑️; mi eugn arrevèn to de coursa, Marco s'apersèi pa di jiragnón é le gnaque avouè la tsaretta.

SAVENTA (Épouvantaye 😨) Euh ! Mé dzen jiragnón ! Mi senque v'ouèide fé ? Vo sade matte ! Na, na, na, se pou pa... mé... mé me sento pa bièn... si fran pa bièn...

La poua madama évaèi. Se beutte eunna man si lo queur é s'itaoule si la tsaretta de Marco sensa pamè diye ren.

CIMA Mi madama, na, avèitsade que l'a maque totcha-le... madama ?

MARCO (Eun s'aprotsèn i jiragnón) Mi queun l'è lo problème ? Senque n'at ?

CIMA Mi senque n'at ? Avèitsa sen que t'a combin-ou !

MARCO Euh pe seutte catro frappe ! To si cazeun pe catro frappe ?

CIMA Mi avèitsa (eun moutrèn la viille itaoulaye) sen que t'a combin-ou ! T'a tchoué-me la ville ! Maladetto !

MARCO É ara ?

CIMA ... é ara... eh, n'en perdì an vouése ara !

MARCO Te di ?

CIMA Ouè ! Avèitsa...

Cima baille an cré piatò a la viille madama, todzor itaoulaye si la tsaretta, rèida é paralizaye.

CIMA L'è dza diya seutta !

MARCO Comèn l'è diya ?

CIMA Ouè... atèn eun momàn...

Cima pouze dou dèi si lo cou de la viille madama pe sentre lo queur .

CIMA Maladetto l'è euncó finque frèida !

MARCO (Bièn tracachà ) Comèn frèida ? (Eun terièn foua de la secotse eun per de santini) Mi adón senque me nen fiyo ara de sise ?

CIMA Bailla a mé...

Cima pren eun beillette élettoral é tsertse de lo euncastré deun la man de la madama.

CIMA Ouè mi l'è dza diya comme eun bèrio ! (A Marco) Bailla-ménèn euncó trèi que Camandona can areuvve son todzor a trèi...

Cima pren la man gotse de la viille é la pourte desì l'atra é dimèn euncastre le santini pe le dèi de la madama.

CIMA Mi maladetto que diya que l'è !

CIMA (Eun prégnèn la tita de la madama) Voualà ! Vionda-té tchica... aprì betèn la tsamba tchica pi sexy...

Cima pren la tsamba drèite de la madama é l'encrouije avouè l'atra.

CIMA Ara alèn ià !

MARCO La tsaretta mé la queutterio inque.

CIMA Mi queutta-là sé ouè ! Avèitsa que cazeun t'a combin-ou !

MARCO Sen ià !

CIMA Ouè, ouè, ià ! (Eun avèitsèn pe lo dérì cou la viille) Ah madama ! Vardade-vó di gamolle !

Teuppe 🕒 si to lo palque.

Scène III – POURTA 🏠 A POURTA 🏠

Se avion le lemiye 💡. La tèila di rétroproyetteur l'è teriaye ba tanque pe tèra.

La campagne électorale l'è fenìa. Sen lo 8 de marse deun le studiό télévisif de la RAI, caque meneutta douàn de la directe de Pourta a Pourta. Si la drèite l'è plachaye eunna pourta blantse. Eun scène n'a lo notéo Viondapapì que roule tot ajitoù a drèite é a gotse lo lon di palque. Avouì eunna vouése autoritàre, mi todzor ajitaye, baille le-z-ordre pe comenchì la directe. Le tecni-sièn plachon doe caèye comodde i mentèn di palque é, a drèite, eunna caèya é eunna tabla avouì eun ordinateurur.

VIONDAPAPÌ Tchica pi aoutre seutte caèye !

Dimèn doe garde di corp 🕵️ entron é se plachon protso de la pourta blantse, eunna a drèite é l'atra a gotse.

VIONDAPAPÌ (I garde di corp) Adón v'ouite preste ?

Le doe garde di corp fan ouè avouì la tita, sensa diye eunna paolla.

VIONDAPAPÌ Bon... alé que alèn eun leugne de sé a pocca...

Vouése derì le ridó 🧐 : « Eun leugne de sé a catro... trèi... dou... eun... ».

Partèi lo refrèn de :

🏠 GONE WITH THE WIND | MAX STEINER
PORTA A PORTA - SIGLA 🏠

Eunna di garde di corp ivre la pourta. Lo notéo s'aprotse é avouì bièn d'entouzasme fé entré Bruno Aveuille.

VIONDAPAPI Bruno !

Lo notéo eumbrache Bruno é aprì va s'achouaté si sa pol-tronna. Dimèn Bruno se plache i mentèn di palque.

BRUNO 🐝 Bonsouar a tcheutte, mersì, mersì bièn é bienvin-ì a seutta édichón ecstraordinéra... (*ver la réji*) se pouèn tchoué la mezeucca, soplé !

Lo refrèn s'arite.

BRUNO 🐝 ... édichón ecstraordinéra de Pourta a Pourta. Oueu éléchón eumpourtante a Tsarvensoù : doe fachón, sinque é sinque pe couù que pouràn tramì l'économì de leur pèi. Saré eunna souaré bièn eumpourtanta, oueu 9 de marse 2019... é... ah ouè ! Vourio rappelé eunna бага eumpourtanta : n'en la télévouése, pouade voté de mèizón é pouade voté euncó vo di pebleuque seuilla prézèn.

Dimèn lo notéo l'è lévo-se é l'è aprotsa-se a Bruno.

BRUNO 🐝 (*I notéo*) Dimanderio i notéo Viondapapi se pou esple-quì le modalitoù pe voté di mitcho...

VIONDAPAPI L'è seumplo : l'è suffizàn téléfoun-ì i numéró 088... ah na ! 800 3453 é gnaqué lo botón 1 pe Marlène ou 2 pe Jordy.

BRUNO 🐝 Voualà vo remersio. Pouèn fé partì la télévouése !

Lo notéo tourne s'achouaté.

🏠 TCHÉQUEUN 🏠

BRUNO 🐝 (*Surpri*) Oh ! L'an soun-ouè... Viondapapi alade vère.

Lo notéo, djeusto achouatoù, se levve. Partèi lo refrèn⁴ é eunna di garde di corp ivre la pourta. Entre Marlène tot arbeillaye de

4. Refrèn a padze 470.

rouza. Lo notéo lèi bèije la man. Marlène se plache i mentèn di palque iaou Bruno la salie é la fé achouaté jantilamente si la caèya a gotse.

BRUNO 🐝 Ah, madama Dzourio bonsouar ! Adón, senque me contade ? Comèn l'è alaye la campagne électorale ?

PRÉZIDÀN L'è itaye diya, mi n'en fé eun dzen travaille. Ma fachón l'a traillà que l'iye eun plèizi ! Dèyo fran le remersì tcheutte, sourtoù mon cher Paul !

BRUNO 🐝 Ouè, ouè, mé adón vourio vo dimandì se v'ouèide caque-z-imadze de voutra campagne électorale...

PRÉZIDÀN Ouè.

Marlène teurie foua eun VHS 📼 é lo baille a Bruno. Bruno l'avèitse avouè eunna mia de doute.

BRUNO 🐝 (I notéo) Si pa se n'en euncó seutte bague... Viondapapi... prouade a vère de beti si lo VHS !

Lo notéo tsertse de fé partì lo réjistrateur, que l'è dézò la tabla.

BRUNO 🐝 (A Marlène, ironique) V'ouite bièn avàn avouè le tecnolojì !

Lo notéo se vionde ver la tèila di rétroproyetteur é gnaque eun botón de la télécomanda 📺 pe fé partì la vidéo. La télécomande martse pa.

VIONDAPAPI Torna le-z-alcaine 📺 que van pa !

BRUNO 🐝 Vo fa le blèttì, Viondapapi ! (I pebleuque) Squezade, l'è la directe...

Lo notéo lètse le pile, le plache amoddo deun la télécommande é gnaque tourna lo botón : finalemente la vidéo partèi.

Si la tèila son proyettaye sinque épizode de la campagne électorale de Marlène, que tsertse de soumondre le santini de sa fachón avouè de technique bizarre :

1. *eun tseun acappe dézò tèra lo beillette élettoral é lo pourte i son patrón ;*
2. *eun garsón acappe lo beillette élettoral dedeun eun paneun ;*
3. *eunna mamma acappe lo beillette élettoral dedeun lo pan-noleun di mèinoù ;*
4. *eun djovinotte acappe lo beillette élettoral dedeun lo distributeur di gan de Paris ;*
5. *avouì lo metal detector eun djouyao di fiolet acappe lo beillette élettoral dézó téra.*

Teuppe 🗨️.

👤 LISTA N° 1 - PE LO BIÈN DI PÉI 👤



Lemie 💡.

BRUNO 🐝 Complèmen madama Dzourio pe la vidéo...

🏠 TCHÉQUEUN 🏠

PRÉZIDÀN La fèi que l'an soun-ou !

BRUNO 🐝 Mmm na me semble pa...

🏠 TCHÉQUEUN 🏠

PRÉZIDÀN Ouè l'an soun-ou !

BRUNO 🐝 Ah ouè !

BRUNO 🐝 Viondapapi, alade vère.

Lo notéo se levve avouì la fiacca. Partèi lo refrèn.

Eunna di garde di corp ivre la pourta é entre Jordy, arbeillà avouè eunna djacca é eunna craotta dzana. Lo notéo lèi sare la man pa tan convencù. Jordy tsemin-e ver lo mentèn di palque eun salièn lo pebleuque.

BRUNO 🐝 (Eun sarèn la man a Jordy) Bonsouar ! Achouatade-vó sé...

Bruno lèi moutre la caèya eun fase a Marlène. Jordy s'achouatte.

BRUNO 🐝 Se mogà lo prochèn cou pouade pa vo eundrèimì si lo tchequeun de la pourta...

JORDY (*Bièn émocho-nò é plen d'énerji*) Squegade Bruno, mi si életrizòu d'itre seuilla ! (*Ver lo pebleuque*) Tchao mamma !

BRUNO 🐝 (Eun calmèn Jordy) Euh pe plèizì ! Comme n'i demandoù a Marlène Dzourio, vo dimando comèn l'è itaye seutta campagne elettorale.

JORDY L'è tot aloù amoddo ! La crotta de pappa l'è an mia vouida mi... ah, poui fé eun remersiemèn ? Vourio remersii la dzeleunna de tanta, que l'a fé-no de-z-ou grou pèi (*eun moutrèn avouè le man la dimenchón de l'ou*) pe noutro-z-életteur. Salì euncó a té Rosita ! Dzen travaille !

BRUNO 🐝 (C.d.) Va bièn, va bièn ! Euh... se v'ouèide prestoù euncó vo eunna vidéo...

JORDY (*Eun terièn foua eunna plimetta*) Ouè, n'i eunna plimetta 📺...

Bruno pren la plimetta de Jordy.

BRUNO 🐝 Ah eunna USB...

JORDY Na eunna plimetta...

BRUNO 🐝 (*Eun se dirijèn ver lo notéo*) ... USB !

JORDY Plimetta !

BRUNO 🐝 (A Viondapapi) N'en eunna USB?

VIONDAPAPI N'en totte !

Viondapapi pren l'USB é l'atase a l'ordinateur. Si la tèila son proyettoù sinque épizode de la campagne élettoral de Jordy, que tsertse de bailli le santini avouï de viamèn euncrouayablo :

- 1. eunna feuille s'aprotse a l'imondicha pe tapi ià eun cartón : dèi dézò le cartón chor foua Jordy pe lèi soumondre eun beillette élettoral ;*
- 2. eunna madama l'è eun tren de lavé le pateun i boueuille : eun chortèn foua de l'éve Jordy lèi soumón eun beillette élettoral ;*
- 3. eun garsón s'aprotse i for di pan ; can lo ivre troue Jordy, dza preste avouï lo beillette élettoral eun man ;*
- 4. eun djovinotte l'è eun tren de galoppé si pe eun sentchè : eun chortèn foua di tombeun, Jordy lo bloque é lèi baille lo beillette élettoral ;*
- 5. eunna feuille ivre son conjélateur é lèi troue dedeun Jordy avouï eun beillette élettoral eun man. . . la feuille déside de lo clloure tourna deun lo conjélateur.*

Teuppe 💡.

👤 LISTA N° 2 - EUNSEMBLO PE LE DIGOURDÌ 👤



Lemie 💡.

Plan planotte la tèila se teurie si é, dimèn, véyèn di fon di palque avanchi le doe fachón : a gotse salla de Marlène, tcheut arbeillà avouï eun détaille rouza, é a drèite salla de Jordy, arbeillà avouï quetsouza de dzano. Le doe fachón se plachon a l'entor de leur candidà.

BRUNO 🐝 *(A marlène é Jordy dimèn que la tèila veun teriaye si)*
 V'ouèide tcheu dou fé eunna dzenta vidéo. *(A Jordy)* Lo voutro l'è fran dzen... *(A Marlène)* mi lo voutro l'è bièn pi dzen
 ah ah ah !

PRÉZIDÀN Mersì Bruno !

BRUNO 🐝 *(Eun se viondèn ver lo fon di palque)* Voualà, entron euncó le doe fachón, *(ver lo pebleuque)* bouéchèn di man i doe fachón que son entraye ara eun trasmichón...

Applodissemèn 🙌.

BRUNO 🐝 Ouè prao pèi ! Prael pèi ! Vo remersio tcheutte, mi mé ara passerio i momàn pi eumpourtàn de la souaré : vourio dimandé a vo dou comèn vo pensade de rezoudre lo problème que n'a pamì de mèinoù, de dzouvin-o que vouillon entri deun le compagnì de téatre, a la lemiye de la crize *démographique* que viquisèn, iao le fameuille fan pamì de mèinoù... comèn pensade de rezoudre ? Mé dirio, comme l'è djeusto que fise, que lo premì a prédjì *(avèitse Jordy avouè eun fase souri)* l'è... Marlène !

PRÉZIDÀN Mersì !

Bruno baille le-z-ipale a Jordy é s'aprotse a Marlène.

PRÉZIDÀN Adón Bruno, mé pe repoundre a la dimanda férió eun pégnò pa eun dérì...

BRUNO 🐝 ... fien-nèn dou !

Dimèn que Marlène conte de counte foule, la fachón de Jordy se beutte le man pe le pèi ou gante la tita. I contréo, la fachón de Marlène, fé seumblèn de comprendre.

PRÉZIDÀN Mé me rappello que can no alloon a l'icoula no sayòn tcheu blan, mouèn que noutro amì Osama, que pe deue l'ieye pi Valdotèn de tcheu no ! Salle lé sayòn itó le-z-àn de la grousa

nèi, lo pou fiave pami de-z-ouè 🍊 , le dzeleunne tsantavon a cat'aoe de l'éprou é can alavon a djoui i fiolet n'ayè euncó le coucouye. . . me restade déri ? Sen que mé voui diye l'è que no fa le-z-èidjì euntchì leur, piatro l'a pa de sanse : ou te lèi baille le peïssón 🐟 ou te lèi aprèn a pitchi. Mi pe fenì lo discoù, pe itre cléya, voui fé an demanda a té Bruno é a vo tcheut que v'ouite seuilla : mi no Valdotèn iaou vouillèn alé ?

La fachón de Marlène boueuche di man.

BRUNO 🐝 (A Marlène, dispéou) Mondjemé ! Cheur eun discoù *vraiment* reutso de sostanse, (*ironique*) complemèn ! (A Jordy) Dirio ara de passé la paolla euncó a vo.

JORDY Ouè adón no sen bièn seumplo é concret. . .

BRUNO 🐝 Poublisitó !

La trasmechón s'arite é Bruno tsemie a drèite é a gotse pe attendre la feun de la poublisitó. Dimèn, la fachón rouza se réunèi pe bailli de coadzo a Marlène é salla dzana tsertse de tranquilizé Jordy que comprèn pa pequé Bruno l'a vouli copé to de chouite son discoù.

Aprì eun per de seconde Bruno dimande a tcheutte de tourné a leur plasse.

BRUNO 🐝 (I doe fachón) Euh squeeze, squeeze, se comenche ! Trèi, dou, eun. . . voualà no passèn la paolla a Bollon.

JORDY Ouè dijao. . . no sen bièn seumplo é concret. Adón, n'a pami de mèinoù ? Fa fé pi de botcha. Fa tsertchì de fé fé i dzi pi de mèinoù. . . comèn se fan le mèinoù ? L'è que n'a salla magniye pe se protédjì : te lo eunfeuille (*eun moutrèn avouì la man*) é te te divertèi. Adón, avouì mon éper de jinécoloji Paolo Cima Sander, n'en itedjà la soluchón : fa fé eunna péгна, mi fran cré borna, desì eun per de gan de Paris 🇫🇷, sensa lo diye a gneun, pouèi can lo eunfeuille baille campa i botcha !

BRUNO 🐝 (*Euncó pi dispéroù de douàn*) Mondjemé !

JORDY Seumplo mi concret !

BRUNO 🐝 Ouè, ouè l'è eun dzen squerse mi pa pi eun di pi...

🏠 TCHÉQUEUN 🏠

BRUNO 🐝 Qui l'è ?

VIONDAPAPÌ Mi n'en trèi fachón ?

BRUNO 🐝 Attégnaon pa gneun...

Partèi lo refrain. Eunna garde di corp ivre la pourta é entre eun pourtapizze.

POURTAPIZZE Bonsouar a tcheutte ! N'i portu-vo le nou pizze 🍕
maxi que v'èi comandoù !

VIONDAPAPÌ Na pa pe no.

POURTAPIZZE Mi lo numéró 23 de Rue Festaz sade prao vo !

BRUNO 🐝 (*I pebleuque*) Argh squezade, squezade l'a directe ! (*I garde di corp*) Fiade chotre, fiade-ló chotre sitte, soplé !

Le doe garde di corp eumbrancon lo pourtapizze é lo tsachon foua.

BRUNO 🐝 (*I pebleuque*) Squezade, son de bague que capiton can te fé eunna trasmichón eun directe... can mimo, mé n'ario voya de dimandé a vo se v'ouèide caque dimande a no fiye, pe noutro dou candidà. N'a caqueun que vou prédjì ?

Eun spettateur levve la man.

BRUNO 🐝 (*I spettateur*) Oué diade maque.

SPETTATEUR I Vouillao savèi iaou l'è lo ben di Splendor...

BRUNO 🐝 I fon di corridoù a drèite ! Euh se n'a de dimande eunna mia pi eumpourtante...

Eugn atro spettateur levve la man.

SPETTATEUR II Bonsouar a tcheutte ! N'ario an baga a dimandé i doe liste : véyo l'è coutaye la campagne elettorale ? Pa pe d'atro, mi maque pe savèi, pequé sise son de sou de tcheu no !

BRUNO 🐝 Ah ! Pourie fé lo seunteucco sitte !⁵ (*I dou candidà*) Adón seutta l'è eunna dzenta dimanda, l'è pa comodo repoundre.

Bruno pe desidé qui dèi prédjì pe premì gnouye a fé la conta ; lo notéo se levve, lèi pren lo bri é lo pounte ver Marlène.

BRUNO 🐝 (A Marlène) Totse a vo !

PRÉZIDÀN Mersì ! Mé si sitte poueun ferio repoundre a mon esper de économi Paul.

PAOLO DALL'ARA (*Eunna mia ajitoù*) Mersì Madama la Prézidanta, mersì Bruno, mersì i pebleuque pe la dzenta dimanda. Adón, n'en pa totchà le secotse di Tsarvensolèn. N'ayòn pa de sou mi n'en i la chance d'acapì eugn ommo, sayo, que la bailla-no pi de 800 meulle euro. N'en to spendi-le pe fé la rente di si-touayèn é aumenté le penchón di Tsarvensolèn ; ara nen n'en pamì mi sen preste pe gagnì le-z-éléchón !

BRUNO 🐝 Euh se poui vo féo eunna péгна dimanda : qui l'è lo financhateur ?

Paolo s'aprotse ver Bruno.

PAOLO DALL'ARA (*Eun prédzèn todzèn i bouigno de Bruno*) Si mé lo financhateur... mi se vo baillo (*eun terièn foua de sou* 🤝) 400 euro vo diade ren a gneun ?

Bruno pren le sou é se le beutte eun secotse, eun tsertsèn de pa se fé vère.

5. Lo dzor de la pièse l'iyé itó fran lo Seunteucco de Tsarvensoù, Borbey Ronny, a pouzé la dimanda.

BRUNO 🐝 Va bièn, donque... Marlène vo fiyo eugn applodisse-
mèn maque mé pequé vo lo metade.

*Bruno s'aprotse ver Jordy pe lèi baillè la paolla. Can Jordy l'è
preste pe ivrì botse, Bruno se vionde ver lo pebleuque.*

BRUNO 🐝 Contegnèn noutra trasmechón...

JORDY Bruno! (*Eun levèn la man, eunna mia surprì*) Pouì repoundre
euncó mé?

BRUNO 🐝 Oh ouè, oubliavo... ouè, ouè diade maque euncó vo
la voutra.

JORDY Adón no sen bièn seumplo é concret : n'en pa spendi ren!
N'en prèi noutra Ape é sen aloù i mentèn di veladzo pe prédjì
avouì lo peuple, avouì le dzi! N'en an mia ézajéroù avouì la
fita finalla... euh Marco!

*Marco teurie fouda eun lon scontreun [SE POU DEU?] é lo
baille a Jordy.*

JORDY I Limonet n'en spendi 500 euro de Proseccchi, 450 euro de
Spritz... 1 euro de Martini Blanc? (*Douteu* 🤔) Qui l'a bi de
Martini Blanc? Voualà... mi pe lo reste n'en pa terià fouda eun
sou!

BRUNO 🐝 V'ouèi fé viondé l'économì di voutre pèi dièn!

JORDY Ouè!

BRUNO 🐝 Ah bièn, penso que sisa eunna dzenta baga so que
v'ouèide fé. (*Eun tsemièn ver lo pebleuque*) Mi mé ara me di-
londzerio pa troppe, mogà caqueun di pebleuque... mi caze
caze fiyo mé eun discoù.

*Lo notéo, eun véyèn Bruno todzor pi protso di palque, galoppe
ver lli é l'arite.*

VIONDAPAPÌ Bruno iaou te va? L'è dza saouto-nen ba eun sit an!
Attenchón! Pitoù... fa cloure la télévouése.

BRUNO 🐝 Ah ouè ! Adón : dji...

VIONDAPAPÌ Nou...

BRUNO 🐝 Ouette...

VIONDAPAPÌ Satte...

BRUNO 🐝 Chouè...

VIONDAPAPÌ Sinque...

BRUNO 🐝 Catro...

VIONDAPAPÌ Trèi...

BRUNO 🐝 Dou...

VIONDAPAPÌ Eun...

Lo notéo tourne a sa plase.

BRUNO 🐝 GONG ! Voualà, la télévouése l'è fenìa é ara ferio voté vo di pebleuque, pequé l'è bièn eumpourtàn. Eun attendèn Viondapapì fiade le voutre contcho : avèitsade qui gagne avouè la télévouése é no ara vièn comèn va avouè lo pebleuque.

Lemiye 💡 si to lo pebleuque.

BRUNO 🐝 (Ver lo pebleuque) Adón comencherio avouè le vouése de Bollon Jordy : viyo levvon la man pe Bollon Jordy ?

Totta la fachón dzana levve la man é eunvite lo pebleuque a voté. Bruno counte rapidamente é a basa vouése le dzi di pebleuque que voton pe Jordy.

BRUNO 🐝 Mmm va bièn... Viondapapì, marcade 4 !

JORDY Comèn catro vouése ?

VIONDAPAPÌ (Avouè eun grou binocolo 🔭) T'a counto euncó Gildo é Provino si i sondzon a l'anglle a drèite ?

BRUNO 🐝 Na... Provino vote pe Marlène, marcade 4 !

BRUNO 🐝 ... é ara le vouése pe Marlène !

Totta la fachón rouza levve la man é eunvite lo pebleuque a voté. Bruno avouè de jسته platéal se beutte a counté an matse de vouése. Aprè tchica s'arite.

BRUNO 🐝 (I notéo) Adón lo Splendor l'a 471 plasse, gavade 4 é betade salle vouése pe Marlène Dzourio !

BRUNO 🐝 (A Marlène) Ah, ah, le bague son eun tren de alé bièn eh ?

BRUNO 🐝 Va bièn, ara fièn fé le contcho a Viondapapi é... n'en euncó lo caro pe an péгна dimanda.

Lo pourtapizze i mentèn di pebleuque pren la paolla.

POURTAPIZZE Bruno ! Bruno ! Seuilla ! Ara veugno si lo palque pouèi me sentade mioù.

Lo pourtapizze pouye si lo palque.

POURTAPIZZE Mé si pi aloù vère : lo 25 l'è lo Gourmet, lo 24 l'è lo Fashion Café é lo 23 l'è lo Tèatro Splendor de Veulla... é ara me payade seutte pizze !

BRUNO 🐝 (Ver le garde di corp) Pe plèizi...

Le garde di corp prègnon de pèise lo pourtapizze é lo pourton foua di palque, eun chortèn a goste.

POURTAPIZZE (Malechà 😞) Me le dèyade paì seutte pizze !

BRUNO 🐝 (Eunfastedjà 😞) Mi l'è pa poussiblo ! Squezade, squezade a tcheutte ! Me l'atèгнаo fran pa... euh Viondapapi sen preste pe le rezultà ?

VIONDAPAPI Ouè !

Lo notéo pourte eunna busta a Bruno é aprè tourne a sa plase. Bruno ivre la busta ✉ pe avèitchi qui la gagnà le-z-éléchón.

BRUNO 🐝 ...Lentamente Adón... lo nouo Prézidàn di Digourdi de Tsarvensoù, que resteré eun tsardze pe sinque an, saré Jor-riz Marlene ou Jordy Bollon ? Saré... Jor... Jordy Bollon !

Pe eun per de seconde partèi lo refrèn de :

🔊 WE ARE THE CHAMPIONS - QUEEN 🔊

La fachón dzana saoute si pe l'er totta entuziaste. I contréo, salla rouza se dispère. Stchoppon si pe l'er euncó de coriandoli 🇫🇷. Le dzano s'eumbrachon, tsanton é saouton. Dimèn Bruno, eunna mia triste, se teurie si de moral eun se betèn a fé fita avouè le dzano.

JORDY Mersi, mersi ! Paolo, Sophie, Eyvia alade i mentèn di pebleuque é remersiade tcheutte ! Marco ! Marco ! Alèn bèye eun crep ! (I pebleuque) Mersi : avouè Jordy !

🇬🇧 TSI LA TÈILA 🇬🇧

Bruno é Viondapapi avanchon ver lo proscenium dimèn que la tèila se cllou.

BRUNO 🐝 Notéo Viondapapi, fa diye que me l'atégnao.

VIONDAPAPI Mé na !

BRUNO 🐝 Mé créyao deun si dzouvin-o. Metave ou na ?

VIONDAPAPI Ouè mioù llou que salla lé !

BRUNO 🐝 Mi ouè djaque ! Marlene aprì l'è dzouvin-a é l'a lo ten de crèitre.

VIONDAPAPI Mi aprì prèdze troppe, ite pa quèya !

BRUNO 🐝 Can mimo si contèn pequé a la feun l'an gagnà le dzouvin-o é le dzouvin-o que l'an voya de fé quetsouza l'è beun dzen ou na ?

VIONDAPAPÌ Aprì si de Renzo n'en vi-lo crèitre ! (*Eun moutrèn l'at-chaou d'eun botcha.*) L'iye péugno pouai.

BRUNO 🐝 No diyon de clloure !

VIONDAPAPÌ Te cllou té o cllouzo mé ?

BRUNO 🐝 Cllouzèn eunsemblo : adón(*i pebleuque*) vo remersio tcheutte, no véyèn tcheut lo prochèn desando a 21 aoue seuilla si RAI...

VIONDAPAPÌ ... 1 !

BRUNO 🐝 ... é pa si RAI...

VIONDAPAPÌ ... 2 !

BRUNO 🐝 ... avouì eunna édichón de Pourta a Pourta noualla !
Mersì é *au revoir* !

VIONDAPAPÌ Salì a tcheutte !

Bruno é Viondapapì chorton de scène a gotse.

Scène IV – MI DEZÒ LE LENCHOUËU...

🚪 SE IVRE LO RIDÓ 🚪

Itaoulaye desì eunna coutse 🚪 avouì de lenchoueu rodzo, n'a Marlène avouì eunna londze sigalla eun botse é eun foulard blan ator di cou.

PRÉZIDÀN (*Avouì eun ton satisfé 😎*) L'è itaye eunna dzornoù londze é l'an gagnà sise di Simpson. Jordy l'è lo nouo Prézidàn. Tcheu le cou que n'a de-z-éléchón n'a qui gagne é qui per. Mi can mimo ma fachón l'a fé eun dzen traille. L'è-ti pa pai, péгна carottin-a 🥕 de mé ?

Vouése derì le ridó 🧠 : « Mi ouè ». (L'è eunna vouése de eugn ommo, mi se comprèn pa amoddo de qui).

PRÉZIDÀN Ah ouè, dèyo fran remersì mon Paul ! Llou ouè que me lame : lèi fou eun petchoù souri é fé totte sen que n'i voya. Euncó Joëlle, le dou eunsemblo l'an pourto-me an matse de vouése. L'è-ti pa pai pégnò pedzeun 🙌 de mé ?

Vouése deri le ridó 🙌 : « Ouè madama ».

PRÉZIDÀN Euncó pe le Digourdì, comme pe la poleteucca, can n'a de crize tsizon le majoranse é fa alé a noue-z-éléchón... é finque si cou l'è itoù lo peuple que l'a desidoù ! No pouèn pa lèi fé ren... mi can mimo seuilla i mitcho si todzor mé que pourto le pantalón, l'è-ti pa pai ma péгна verdzassa 🙌 ?

Vouése deri le ridó 🙌 : « Ah ouè madama ». Marlène se levve, tchoué pe tèra la londze sigalla é s'aprotse i pebleuque.

PRÉZIDÀN Vo fa savèi que la réji l'è itaye de mé : avouì Joëlle, Richard, Fabien é (eun avèitsèn a gotse di palque) mon tan sayo Paul, n'en betoù si eun plan formidable... é i pouer di Digourdì lèi si todzor mé ! L'è-ti vrèi ma dzenta itèila ★ ?

Jordy, eun galopèn, entre eun scène avouì dou vèyo de Champagne 🍷 pe le man. Le pantalón son euncó avortoillà a l'entor de eunna tsamba. Lè caze peillotte ; l'a maque eun per de ganesón bordeaux é eunna craotta dzana 🍷 llataye a la tita. Can areuvve douàn a Marlène se beutte a dzouiillón é, to sourièn 😊, lèi soumón eun vèyo.

JORDY Madame la Prézidante !

PRÉZIDÀN (Eun prégnèn lo vèyo) Mersi !

Avouì supériorité, Marlène caye ià lo vèyo que Jordy l'a eun man.

PRÉZIDÀN Alade a la coutse !

JORDY (An mia épouvantó é életterizouè) Ouè madama la Prézidanta !

Jordy se gave ià le pantalón euncó avortoillà i pià é eun fricotèn se itaoule si la coutse. Dimèn Marlène, ver lo pebleuque, bèi a qui blan lo vèyo é lo tappe pe tèra.

PRÉZIDÀN La SÈI DE POUVOER !

JORDY Ouè madama la Présidanta... vo rappelade senque v'ouèi prometti-me ?

PRÉZIDÀN Qui l'a deutte de prédjì ?

Jordy bèiche la crita é avouè le bouigno ba se teurie todzor pi eun dérì, dimèn que Marlène s'aprotse.

PRÉZIDÀN Te fa ité quèi 🤔 ! T'a comprèi ? (Eun pouchèn Jordy countre la tita de la coutse) Seuilla désido to mé !

Jordy l'è gnacoù contre la tita de la coutse é Marlène, todzor pi protso, lèi pren la man é la llatte a la coutse avouè eunna menotta 🍆.

JORDY (Eun fricotèn tot ecsitoù 😄) Oh mondjeu di paadi ! Madama...

Marlène pase dérì la coutse, se plache si l'atro couti de la coutse, pren l'atra man de Jordy é la llatte comme l'a fé douàn.

PRÉZIDÀN V'ouite tcheu cobbla ! Vo féo eun pégnò souri é fiade to sen que n'i voya ! V'ouite tcheu foundi pe mé.

JORDY Madama la Présidanta vèyo que lamade le djouà POUER !

Marlène, eun silanse, fé tourna lo tor de la coutse dimèn que Jordy, llatoù, tsertse de se baoudjì.

PRÉZIDÀN (Eun tsemièn ver lo pebleuque) Lo dzen di POUER l'è que désido mé can comenchon le danse !

Marlène baille le-z-ipale i pebleuque é se plache i pià de la coutse, douàn Jordy que l'è életterizòu. Partèi la tsansón :

🎧 WALKIN' & STRIPPIN' | SONNY LESTER ORCHESTRA 🎧

Marlène comenche a se dizarbeilli : douàn lo foulard blan, aprì lo maillontcheun rouza... Jordy avouì totte sé forse tsertse de eumbranquì Marlène, mi, comme eun tseun llatoù que vèi arrevé lo piqué, l'è obledjà a attendre lo volèi de Madama la Prézidanta, que s'aprotse to todzèn. Marlène ara l'a maque eun cré coteillón que la toppe. Le ridó dimèn se clouzon é la Prézidanta baille le-z-ipale i pebleuque : l'è contchentraye si Jordy. Can la tèila l'è caze clouta, Marlène, finalmente, se gave ià lo coteillón.

JORDY Ahouuu! 😊😊😊

🇸🇪 TSI LA TÈILA 🇸🇪

Derì le ridó

Vidéo

Joël Viérin

Tecnisièn vidéo é son

Stephanie Albaney

Margot Jorrioz

Lemiye

Roger Comé

Joueur

Marcello Giometto

Camion

Louis Bollon

Annexe

Version numérique

Ce dépôt



regroupe l'ensemble du code utilisé pour créer *Dji Cou Digourdì*, ainsi que sa version PDF. À partir de cette version numérique, il est possible d'accéder directement aux fichiers originaux employés par les Digourdì pour reproduire les effets sonores et les morceaux musicaux intégrés aux pièces. Un simple clic sur les titres correspondants suffit pour les consulter.

De plus, cette version numérique permettra d'assurer la mise à jour continue des liens et des QR codes associés aux contenus multimédias, même en cas de modification ou de déplacement de ceux-ci.

Un peu de chiffres !

Cette section représente fidèlement la déformation professionnelle de l'auteur, lequel n'a pas résisté à la tentation d'extraire quelques statistiques descriptives de *Dji Cou Digourdì*. Pour en faciliter la lecture, quelques précisions sont nécessaires :

- Est considéré comme mot tout nom commun ou adjectif (les noms propres sont exclus) ;
- Les avant-spectacles et les vidéos ne sont pas pris en compte dans le calcul des répliques⁶ ni dans celui des paroles ou des mots ;
- Le nombre d'acteurs mentionnés ne comprend que ceux ayant prononcé au moins une réplique.

Tableau 1 – Les chiffres de *Dji cou Digourdì*.

Paroles	42588
Paroles non répétés	4407
Répliques	3586
Acteurs	38
Vidéos	12
Effets sonores	12
Musiques	32

6. L'ensemble des paroles prononcées par un personnage sans qu'il soit interrompu par un autre (IT - *Battuta teatrale*).

Tableau 2 – Les 10 mots les plus prononcés.

Mesieu	107
Dzor	93
Djeusto	76
Bague	76
Dzen	75
Pappa	69
Éve	67
Dzenta	64
Ten	61
Man	59

Tableau 3 – Ce tableau présente tous les acteurs de *Dji cou Digourdi*, accompagnés par leurs nombre de participation aux pièces, répliques, paroles et leurs trois mots les plus fréquemment prononcés. L'absence de trois mots s'explique par l'impossibilité d'identifier les trois plus fréquents.

Acteurs	Top 3 mots	Pièces	Répliques	Paroles
Albaney Joël	Djeusto	10	518	5725
Albaney Stephanie	Mamma	5	109	1169
Bollon Ester	Dzor	4	64	656
Bollon Jordy	Prézidàn, Mamma	7	212	2475
Bollon Joëlle	Mesieu, Dzen	8	243	2533
Borbey Denise	Vèyo, Pappa	1	63	933
Borbey Ronny		1	1	9
Brunod Christian		1	43	335
Chuc Laurent	Pappa, Mesieu, John	7	170	2621
Cima Sander Paolo	Bague, Dzor	10	441	4893
Comé André	Déri, Aoua	7	150	1777
Comé Jasmine	Blan	2	25	290
Comé Michel	Pizze	1	5	76
Comé Sophie	Mesieu, Busta	6	108	1419
Cunéaz Richard	Mitcho, Fenna	2	68	1008
Dalbard Aline		1	16	120
Dall'Ara Paolo		2	88	1669
Ducly Marco	Mesieu, Djeusto, Bou	10	251	2277
Giannino Tania		1	16	414
Grivon Giada	Vatse	2	15	154
Jorrioz Marlène	Petchoudacllenda, Dji	4	104	1458
Jorrioz Thierry	Plan	2	35	230
Linty Ilaria	Documàn, Vétérinéro	5	55	781
Lucianaz Eyvia		1	2	37
Lucianaz Fabien	Dzor, Présidàn	1	12	200
Lucianaz Francesca	Éve, Pascal, Aoue	8	155	2329
Marguerettaz Valérie	Vèyo	1	33	354
Roveyaz Simone	Dzor	8	79	943
Savioz Pierre	Mesieu, Dzor	8	356	4372
Squinabol Aimé		1	11	153
Squinabol Federico		1	14	148
Squinabol Ilenia	Mitcho, Mamma	1	3	63
Squinabol Julie		1	12	106
Squinabol Michel	Atro	1	13	115
Ventrice Michel		1	3	20
Vermillon Stefano		1	19	126
Viérin Elisa	Vèyo	1	35	193
Yeuillaz Alain	Martini, Danche	1	39	407

Tableau 4 – Les trois acteurs comptant le plus de répliques.

Acteur	Répliques
Joël Albaney	518
Paolo Cima Sander	441
Pierre Savioz	356

Tableau 5 – Les trois acteurs comptant le plus de mots prononcés.

Acteurs	Paroles
Joël Albaney	5725
Paolo Cima Sander	4893
Pierre Savioz	4372

Tableau 6 – Les trois acteurs les plus présents.

Acteur	Pièces
Albaney Joël	10
Ducly Marco	10
Cima Sander Paolo	10

Tableau 7

L'OPETAILE MODERNO		
Durée (min)		36
Nombre d'acteurs		10
Nombre de vidéos		0
Nombre de musiques		3
Nombre d'effets sonores		0
Nombre de paroles		2758
Nombre de répliques		302
Acteur avec le plus de paroles	Albaney Joël (666)	
Acteur avec le plus de répliques	Albaney Joël (67)	
Mots les plus prononcés	Mesieu, Medeseun, Dzor	

Tableau 8

FORUM VALDOTÈN		
Durée (min)		42
Nombre d'acteurs		10
Nombre de vidéos		3
Nombre de musiques		1
Nombre d'effets sonores		0
Nombre de paroles		3981
Nombre de répliques		219
Acteur avec le plus de paroles	Chuc Laurent (716)	
Acteur avec plus de répliques	Lucianaz Francesca (41)	
Mots les plus prononcés	Mesieu, Dzeudzo, Dzor	

Tableau 9

LA VATSE DE L'UNIVERSITOÙ		
Durée (min)		50
Nombre d'acteurs		12
Nombre de vidéos		1
Nombre de musiques		4
Nombre d'effets sonores		1
Nombre de paroles		4423
Nombre de répliques		334
Acteur avec le plus de paroles	Savioz Pierre (1271)	
Acteur avec le plus de répliques	Savioz Pierre (97)	
Mots les plus prononcés	Pappa, Vatsé, Vétérinéro	

Tableau 10

EUN DROLO DE DISTRIBUTEUR		
Durée (min)		44
Nombre d'acteurs		16
Nombre de vidéos		0
Nombre de musiques		1
Nombre d'effets sonores		1
Nombre de paroles		3718
Nombre de répliques		280
Acteur avec le plus de paroles	Albaney Joël (742)	
Acteur avec le plus de répliques	Albaney Joël (63)	
Mots les plus prononcés	Éve, Litre, Mesieu	

Tableau 11

MATTE... SEN TCHEUTTE MATTE	
Durée (min)	54
Nombre d'acteurs	13
Nombre de vidéos	3
Nombre de musiques	5
Nombre d'effets sonores	2
Nombre de paroles	4746
Nombre de répliques	405
Acteur avec le plus de paroles	Bollon Jordy (898)
Acteur avec le plus de répliques	Cima Sander Paolo (71)
Mots les plus prononcés	Bague, Dzen, Ommo

Tableau 12

TANTA BETSII	
Durée (min)	34
Nombre d'acteurs	10
Nombre de vidéos	0
Nombre de musiques	1
Nombre d'effets sonores	2
Nombre de paroles	3179
Nombre de répliques	290
Acteur avec le plus de paroles	Savioz Pierre (1214)
Acteur avec le plus de répliques	Savioz Pierre (100)
Mots les plus prononcés	Tanta, Dzor, Mamma

Tableau 13

DISCO FLAMA		
Durée (min)		74
Nombre d'acteurs		22
Nombre de vidéos		0
Nombre de musiques		9
Nombre d'effets sonores		0
Nombre de paroles		5369
Nombre de répliques		514
Acteur avec le plus de paroles	Borbey Denise (933)	
Acteur avec le plus de répliques	Borbey Denise (63)	
Mots les plus prononcés	Vèyo, Doe, Pappa	

Tableau 14

N'EN PA LO TEN		
Durée (min)		68
Nombre d'acteurs		11
Nombre de vidéos		2
Nombre de musiques		3
Nombre d'effets sonores		1
Nombre de paroles		4049
Nombre de répliques		424
Acteur avec le plus de paroles	Albaney Joël (942)	
Acteur avec le plus de répliques	Cima Sander Paolo (86)	
Mots les plus prononcés	Ten, Petchoudaclenda, Baga	

Tableau 15

TODZO PI DIGOURDÌ	
Durée (min)	59
Nombre d'acteurs	16
Nombre de vidéos	0
Nombre de musiques	2
Nombre d'effets sonores	4
Nombre de paroles	4865
Nombre de répliques	423
Acteur avec le plus de paroles	Dall'Ara Paolo (884)
Acteur avec le plus de répliques	Albaney Joël (79)
Mots les plus prononcés	Téatro, Pièse, Compagnì

Tableau 16

SÈIDEPOU(VO)ÈR	
Durée (min)	61
Nombre d'acteurs	15
Nombre de vidéos	3
Nombre de musiques	3
Nombre d'effets sonores	1
Nombre de paroles	5500
Nombre de répliques	395
Acteur avec le plus de paroles	Albaney Joël (878)
Acteur avec le plus de répliques	Albaney Joël (67)
Mots les plus prononcés	Dzen, Prézidàn, Madama

Tableau 17 – Résumé des pièces.

La plus longue (min)	DISCO FLAMA (74)
La plus courte (min)	TANTA BETSII (34)
Top répliques/min	TANTA BETSII (8.5)
Top paroles/min	FORUM VALDOTÈN (94.8)